


সত্যজিৎ রায়

তারিণী খুড়োর কীর্তিকলাপ



সত্যজিৎ রায়

তারিণীখুড়োর কীর্তিকলাপ

মহারাজা তারিণীখুড়ো

‘আজ আপনার কপালে ভ্রুকুটি কেন খুড়ো?’ জিগ্যেস করল ন্যাপলা। এটা অবিশ্যি আমিও লক্ষ্য করেছিলাম। খুড়ো তত্ত্বপোষের উপর বাবু হয়ে বসে ডান হাতটা পায়ের পাতায় রেখে অল্প অল্প দুলছেন, তাঁর কপালে ভাঁজ।

খুড়ো বললেন, ‘এই বাদলার সন্ধ্যায় গরম চা যতক্ষণ না পেটে পড়চে ততক্ষণ ভ্রুকুটি থাকতে বাধ্য।’

খুড়ো আসার সঙ্গে সঙ্গেই চা অর্ডার দেওয়া হয়েছে, বেশি দেরিও হয়নি, তাও আমি আরেকবার চাকরের নাম ধরে হাঁক দিলাম।

‘আপনার গল্প ফাঁদা হয়ে গেছে?’ ন্যাপলা জিগ্যেস করল। সত্যি, ওর সাহসের অন্ত নেই।

‘গল্প আমি ফাঁদি না’, দাঁত খিঁচিয়ে বললেন খুড়ো। ‘আমার অভিজ্ঞতার স্টক অটেল। সে ফুরোতে-ফুরোতে তোদের গোঁফ-দাড়ি গজিয়ে যাবে।’

চা এল। খুড়ো একটা সশব্দ চুমুক দিয়ে বললেন, ‘এক দিন কা সুলতানের গল্প তোরা হয়ত শুনেছিস। সেটা ঘটেছিল হুমায়ূনের যুগে। সেরকম আমাকে পাঁচ দিনের মহারাজা হতে হয়েছিল একটা নেটিভ স্টেটে, সে গল্প তোদের বলেছি কি?’

আমরা সকলে একসঙ্গে না বলে উঠলাম।

‘আপনাকে সিংহাসনে বসতে হয়েছিল?’ ন্যাপলা জিগ্যেস করল।

‘আজ্ঞে না’, বললেন খুড়ো। ‘নাইনটীন সিকসটি ফোরের ঘটনা। তখন রাজারা আর সিংহাসনে বসে না; ভারত অনেকদিন হল স্বাধীন হয়ে গেছে। তবে রাজা গুলাব সিং-এর তখনো খুব খাতির। রাজ্যের সব লোকেরা তাঁকে মহারাজ বলে সম্বোধন করে। যাকগে—গল্পটা বলি শোন।’

খুড়ো কাপে আরেকটা চুমুক দিয়ে তাঁর গল্প শুরু করলেন:

আমি তখন ব্যাঙ্গালোরে। মাদ্রাজে দুবছর একটা হোটেলের ম্যানেজারি করে আবার ভবঘুরে। সেই সময় একদিন খবরের কাগজে একটা বিজ্ঞাপন চোখে পড়ল। অদ্ভুত বিজ্ঞাপন; ঠিক তেমনটি আর

কখনো চোখে পড়েছে বলে মনে পড়ে না। বিজ্ঞাপনের মাথায় একজন লোকের ছবি। তার নিচে বড় হরফে লেখা ‘১০,০০০ টাকা পুরস্কার!’ তারপর ছোট হরফে লিখেছে যে ছবির চেহারার সঙ্গে আদল আছে এমন লোক যদি কেউ থাকে, সে যেন নিম্নলিখিত ঠিকানায় অ্যাপ্লাই করে তার নিজের ছবি সমেত। যাদের চেহারা মিলবে তাদের ইন্টারভিউতে ডাকা হবে। ঠিকানা হল ভার্গব রাও, দেওয়ান, মন্দোর স্টেট, মাইসোর। মন্দোর নামে যে একটা নেটিভ স্টেট আছে সেটা টক করে মনে পড়ে গেল। কিন্তু বিজ্ঞাপনে যাঁর ছবি রয়েছে তিনি যে কে সেটা বুঝতে পারলুম না। নাইবা বুঝি; এটুকু বুঝি যে এই চেহারার সঙ্গে আমার নিজের চেহারার বিলক্ষণ মিল। আমি যদি আমার গোঁফটাকে একটু সরু করে ছাঁটি তাহলে দুই চেহারায় তফাত করা মুশকিল হবে।

গোঁফ ছেঁটে ভিক্টোরিয়া ফোটো স্টোর্সে গিয়ে একটা পাসপোর্ট সাইজের ছবি তুলিয়ে অ্যাপ্লাই করে দিলুম। দশ হাজার টাকার লোভ সামলানো কি সহজ কথা?

সাতদিনের মধ্যে উত্তর এসেছিল। ইন্টারভিউ-এর জন্য ডাক পড়েছে। যাতায়াতের খরচ বিজ্ঞাপন দাতারাই দেবেন, বোর্ড অ্যান্ড লজিংও তাঁদের দায়িত্ব, আমি যেন অবিলম্বে মন্দোর রওনা দিই। এও বলা ছিল, চিঠিতে যে, আমি যেন সঙ্গে দিন দশেকের মতো জামাকাপড় নিয়ে নিই।

পরের দিনই একটা টেলিগ্রাম ছেড়ে দিয়ে রওনা দিয়ে দিলুম। হুবলি ছাড়িয়ে দুটো স্টেশন পরেই মন্দোর, আমার জন্য স্টেশনে লোক থাকার কথা। অনেকখানি রাস্তা, ভাবতে ভাবতে গেলুম এ বিজ্ঞাপনের কী মানে হতে পারে। যে ভদ্রলোকের ছবিটা দেওয়া হয়েছিল বিজ্ঞাপনে তিনি যে সম্ভ্রান্ত বংশের লোক তাতে সন্দেহ নেই, কিন্তু তাঁর জোড়া কেন দরকার হবে তা আমার মাথায় ঢুকল না।

মন্দোর স্টেশনে সুটকেস নিয়ে নেমে এদিক ওদিক দেখছি, এমন সময় এক বছর ষাটেকের ভদ্রলোক আমার দিকে এগিয়ে এলেন।

‘ইউ আর মিস্টার ব্যানার্জি?’ আমার দিকে ডান হাত বাড়িয়ে জিজ্ঞেস করলেন ভদ্রলোক। তিনি যে রীতিমতো অবাক হয়েছেন সেটা আর বলে দিতে হয় না।

আমি বললুম, ‘হ্যাঁ, আমিই মিস্টার ব্যানার্জি।’

‘আমার নাম ভার্গব রাও’, বললেন ভদ্রলোক। ‘আমি মন্দোরের দেওয়ান। আমাদের বিশেষ সৌভাগ্য যে আপনার মতো একজন ক্যানডিডেট পেয়েছি।’

‘কিসের ক্যানডিডেট?’

‘আগে গাড়িতে উঠুন । পথে যেতে যেতে সব কথা হবে । আমাদের এখন রাজবাড়ি যেতে হবে, এখান থেকে সাত কিলোমিটার । পথে আপনার সব প্রশ্নের জবাব দিতে পারব বলে বিশ্বাস করি ।’

একটা পুরোনো মডেলের সুপ্রশস্ত আর্মস্ট্রং সিডনি গাড়িতে গিয়ে উঠলুম । দেওয়ান সাহেব পিছনে আমার পাশেই বসলেন । জানালা দিয়ে দেখছি দূরে পাহাড়ের লাইন—ভারি মনোরম দৃশ্য ।

গাড়ি রওনা হবার পর দেওয়ান রহস্য উদ্ঘাটন করতে শুরু করলেন ।

‘মিস্টার ব্যানার্জি, আমাদের এখানে হঠাৎ একটা দুর্ঘটনা ঘটায় একটা জটিল পরিস্থিতি দেখা দিয়েছে । আমাদের মহারাজা গুলাব সিং-এর হঠাৎ মস্তিষ্কের বিকার দেখা দিয়েছে । হাসপাতালে চিকিৎসা চলেছে, মাইসোর থেকে বড় ডাক্তার এসেছেন, কিন্তু খুব শিগ্গির আরোগ্যের কোনো সম্ভাবনা আছে বলে মনে হয় না । অথচ আর তিন দিনের মধ্যে মহারাজার কাছে এক অতি সম্মানিত গেস্ট আসছেন আমেরিকা থেকে—ক্রোড়পতি মিস্টার অস্কার হোরেনস্টাইন । উনি প্রাচীন শিল্পদ্রব্য সংগ্রহ করেন এবং তার পিছনে লাখ লাখ ডলার খরচ করেছেন । আমাদের রাজারও সংগ্রহে অনেক পুরোন জিনিস আছে । তাঁর ইচ্ছা ছিল হোরেনস্টাইনকে কিছু জিনিস বিক্রি করা । তার একটা কারণ অবশ্য এই যে, আমাদের তহবিলে অর্থাভাব দেখা দিয়েছে বেশ কিছুদিন থেকেই । আমাদের কম্পাউন্ডে ছোটবড় মাঝারি প্রায় গোটা ছ’য়েক প্রাসাদ রয়েছে, রাজা তাদের মধ্যে একটিকে হোটেলে পরিণত করার সিদ্ধান্ত নিয়েছেন । মন্দোরে দেখবার জিনিসের অভাব নেই । লেক আছে, পাহাড় আছে, জঙ্গলে বাঘ হাতি হরিণ আছে ; তাছাড়া এখানকার আবহাওয়া স্বাস্থ্যকর । ঠিক মতো বিজ্ঞাপন দিলে হোটেলের ব্যবসা মার খাবে বলে মনে হয় না । কিন্তু তার আগে কিছু নগদ টাকা পাবার সম্ভাবনা ছিল এই হোরেনস্টাইনের কাছে । সেই জন্য তাঁকে আর আমরা আসতে বারণ করিনি, বা রাজার অসুখের কথা বলিনি । বুঝতেই পারছেন—’

বুঝতে আমি পেরেইছিলাম । বললাম, ‘তার মানে খবরের কাগজের ছবিটা ছিল রাজার ছবি, আর আমাকে কিছুদিনের জন্য রাজার ভূমিকায় অবতীর্ণ হতে হবে ।’

‘শুধু যে কদিন হোরেনস্টাইন থাকবেন সেই কদিন ।’

‘হোরেনস্টাইনের সঙ্গে রাজার আলাপ হয় কোথায় ?’

‘আমেরিকায়, মিনিয়াপোলিস শহরে । সেখানে রাজা বেড়াতে গিয়েছিলেন মার্চ মাসে । রাজার একমাত্র ছেলে মহীপাল সেখানে ডাক্তারি করে । মিনিয়াপোলিসে থাকতে একটা পার্টিতে রাজার সঙ্গে হোরেনস্টাইনের আলাপ হয় । সেখানেই রাজা তাকে আমন্ত্রণ জানান ।’

হোরেনস্টাইনের শিকারের শখও আছে, কাজেই একদিন শিকারের বন্দোবস্তও করতে হবে। আপনি গুলি চালাতে পারেন ?’

আমি বললাম, ‘বিলক্ষণ, যদিও শিকার করিনি প্রায় দশ বারো বছর।’

‘এ শিকার হাতির পিঠ থেকে, কাজেই অপেক্ষাকৃত নিরাপদ।’

‘আপনি যে রাজার সংগ্রহের কথা বলছিলেন, এগুলো কী ধরনের জিনিস ?’

‘বেশির ভাগই অস্ত্রশস্ত্র। ছোরা, ঢাল, তলোয়ার, পিস্তল—এসব প্রচুর আছে এবং দেখলেই বুঝতে পারবেন সেগুলো কত মূল্যবান। এ ছাড়া প্রসাধনের জিনিসপত্র, আতরদান, আলবোলা, ছবি, ফুলদানি এসবও আছে। আমার মনে হয় না আপনাকে বেশি পীড়াপীড়ি করতে হবে। সাহেবের কথা যা শুনলাম, তাতে তিনি নিজেই কিনতে আগ্রহী হবেন। ইনি আসবেন বলে রাজা একটা দামের তালিকাও করে রেখেছিলেন, সেটাও আপনাকে দিয়ে দেব।’

দেওয়ানের সঙ্গে কথা বলে সমস্ত ব্যাপারটা বুঝতে পারলাম। আমাকে সাজতে হবে পাঁচ দিন কা সুলতান। তারপর আবার যেই কে সেই। অবিশ্যি পারিশ্রমিকের কথাটা ভুললে চলবে না। তখনকার দিনে দশ হাজার টাকার ভ্যালু এখনকার চেয়ে পাঁচগুণ বেশি।

রাজবাড়ির বিশাল ফটক দিয়ে যখন গাড়ি ঢুকছে, তখন বুকের ভিতরে বেশ একটা দুরু দুরু অনুভব করছিলুম, কিন্তু সত্যি বলতে কি নাভাস একটুও হইনি। গাড়িতে দেওয়ান বার তিনেক আমার দিকে চেয়ে চেয়ে দেখে বললেন, ‘আমি স্বপ্নেও ভাবিনি যে, আমাদের বিজ্ঞাপনের উত্তরে আমরা রাজার এমন একজন জোড়া পেয়ে যাব। আমি ধরেই নিয়েছিলাম আমাদের অতিথিকে জানিয়ে দিতে হবে তিনি যেন না আসেন। এখন দেখছি সাপও মরল, লাঠিও ভাঙল না।’

সাহেব আসবেন বুধবার, আজ রবিবার। এই তিন দিন আমার কাজ হচ্ছে রাজার ডায়রি পড়া। আর টেপ রেকর্ডারে রাজার কণ্ঠস্বর শোনা। গোটা তিনেক ইংরিজি বক্তৃতার টেপ করা আছে। দেওয়ান সেগুলো আমার জিন্মায় দিয়ে দিলেন আর সেই সঙ্গে চামড়ায় বাঁধানো গত দশ বছরের ডায়রি। ডায়রিগুলো উলটে পালটে দেখলুম। ইংরিজিতে লেখা, এবং বেশ চোস্ত ইংরিজি। নানান খুঁটিনাটির খবর রয়েছে তাতে। রাজা যখন ঘুম থেকে ওঠেন, কী ব্যায়াম করেন, কী খেতে ভালোবাসেন, কী পরতে ভালোবাসেন, সংগীতে রাজার রুচি নেই—এই সবই ডায়রি থেকে জানা যায়।

রাজার স্ত্রী মারা যান বছর তিনেক আগে। তাতে তিনি সাময়িক ভাবে

কী রকম ভেঙে পড়েছিলেন—মৃত্যুর পর পনেরো দিন ডায়রির পাতা ফাঁকা—সে সবও খবর আমার খুব কাজে দিল ।

তিন দিনের শেষে আমি দেওয়ানকে বললাম আমি একদম তৈরি । এছাড়া আরেকটা কথা আমি দুদিন থেকে বলব বলব করছিলাম, সেটা আজ বলে দিলাম ।

‘দেওয়ানজি, ব্যবস্থা সবই ভালো, কিন্তু আমার দ্বারা ওই রাজশয্যায় শোওয়া চলবে না । অত নরম বিছানায় শোয়া আমার অভ্যেস নেই । ওতে ঘুমের ব্যাঘাত হয় ।’

‘তাহলে আপনি থাকবেন কোথায় ?’ জিগ্যেস করলেন দেওয়ানজি ।

আমি বললাম, ‘কেন আপনার এখানে তো অনেক ছোট ছোট প্রাসাদ রয়েছে—লালকোঠি, পিলাকোঠি, সফেদকোঠি—এর একটাতে থাকা যায় না ?’

‘তা অবিশ্যি যায়’, দেওয়ান চিন্তিত ভাবে বললেন, ‘এক দিক দিয়ে লালকোঠিতে থাকার খুব সুবিধে । একটা চমৎকার শোবার ঘর আছে, যেখানে মহারাজার বাপ মাঝে মাঝে থাকতেন । শত্রুঘ্ন সিং এক বাড়িতে বেশিদিন থাকা পছন্দ করতেন না । তাঁর জন্য নানারকম ছোট, ছোট বাসস্থান বানানো হয়েছিল ।’

‘বেশ ত, সেই লালকোঠিতেই থাকব ।’

‘থাকবেন ?’

‘কেন, অসুবিধাটি কী ?’

‘একটা ব্যাপার আছে ।’

‘কী ব্যাপার ?’

‘বছর পঞ্চাশেক বয়সে শত্রুঘ্ন সিং-এর মাথা খারাপ হয়ে যায় ; উনি নিজের মাথায় রিভলভার মেরে আত্মহত্যা করেন এবং সেটা করেন ওই লালকোঠির শোবার ঘরেই ।’

‘আপনার ধারণা তাঁর প্রেতাত্মা বাস করেন ওই ঘরে ?’

‘সে ত জানি না । তাঁর মৃত্যুর পর ও ঘরে আর কেউ থাকেনি ।’

‘তাহলে ওই ঘরে আমি থাকব । এই অভিজ্ঞতার সুযোগ ছাড়া যায় না । আমি অনেক ভূত দেখেছি তাই আমার ভূতের ভয় নেই । আর বিছানাটা যেন অত নরম না হয় ।’

দেওয়ান রাজি হয়ে গেলেন । অবিশ্যি অবাকও কম হননি । একজন বাঙালির যে এত সাহস থাকতে পারে সেটা বোধহয় উনি ভাবতে পারেননি ।

সেদিনই বিকেলে সাহেব এসে পড়লেন । বয়স আন্দাজ পঞ্চাশ, আমার চেয়েও ইঞ্চি তিনেক লম্বা, মুখের সব মাংস যেন খুতনিতে গিয়ে

জমা হয়েছে, নীল চোখে সোনালি চশমা, মাথায় কাঁচা পাকা মেশানো চুল মাঝখানে সিঁথি করে ব্যাকব্রাশ করা ।

সাহেব আসা মাত্র অবিশ্যি আমি তাঁর সঙ্গে দেখা করিনি । দেওয়ানজি বললেন, ‘লোকটা আগে সফেদকোঠিতে নিজের ঘরে গিয়ে উঠুক, তারপর কিছুটা সময় দিয়ে ওঁকে আপনার কাছে নিয়ে আসব । নইলে প্রেস্টিজ থাকে না । তবে হ্যাঁ, একটা কথা বলে রাখি—সাহেব মনে হল একটু তিরিক্ষি মেজাজের লোক । স্টেশন থেকে আসার পথে গাড়ির টায়ার পাংচার হয় ; তাতে বেশ ক্ষেপে আছে ।’

আমি মনে মনে ঠিকই করে রেখেছিলুম যে, সাহেব মেজাজ দেখালেও আমি দেখাব না । আমার সঙ্গে দেখা হতে রাগ আর রসিকতা মিলিয়ে সাহেব বললেন, ‘ওয়েল, মহারাজ—হোয়াট কাউন্ড অফ এ ওয়েলকাম ইজ দিস ? মাঝ-রাস্তায় আমাকে পনেরো মিনিট রোদের মধ্যে দাঁড়িয়ে থাকতে হল !’

আমি যথাসাধ্য অ্যাপলাইজ করলুম, বললুম যে আর কোনো গলতি হবে না সে গ্যারান্টি দিচ্ছি । সাহেব চেয়ারে বসলেন, তাঁর জন্য শরবত এল, সেটা খেয়ে যেন মাথাটা ঠাণ্ডা হল । আমি বললাম, ‘তুমি এখানে কী কী করতে চাও সেটা আমাকে বল । অবিশ্যি আমার মোটামুটি জানাই আছে, আর সে অনুযায়ী ব্যবস্থাও করেছি, কিন্তু আমি তোমার মুখ থেকে শুনতে চাই ।’

সাহেব বললেন, ‘আমার শিকারের শখ আছে, আমি বাঘ মারতে চাই—সে ব্যবস্থা করেছ ?’

আমি মাথা নেড়ে জানালাম করেছি ।

‘আর আমি তোমার সংগ্রহ থেকে কিছু জিনিস কিনতে চাই আমার সংগ্রহের জন্য । বিশেষ করে সামনের বছর আমাদের বিয়ের রজত জয়ন্তী । আমার স্ত্রীর জন্য একটা ভালো উপহার আমি নিয়ে যেতে চাই । আশা করি তেমন জিনিস আছে তোমার সংগ্রহে ।’

‘সেটা তুমি দেখলেই বুঝতে পারবে । ভালো জিনিসের অভাব নেই আমার দেড়শ বছরের সংগ্রহে ।’

দুপুরে খাবার পর সাহেবকে সংগ্রহশালায় নিয়ে যাওয়া হল । আমিও অবশ্য প্রথম দেখলুম জিনিসগুলো । দেখে চোখ জুড়িয়ে গেল । এমন মহামূল্য জিনিস হাতছাড়া হয়ে যাবে ভাবতে আমার খারাপ লাগছিল । হোরেনস্টাইন দেখলাম সমঝদার লোক । সে চটপট কেনবার মতো জিনিস আলাদা করে রাখতে লাগল । সবসুদ্ধ প্রায় দশ লাখ টাকার জিনিস এইভাবে বাছল । কিন্তু তাও তার কপাল থেকে ভুকুটি যায় না । ব্যাপার কী ? শেষটায় সে বলল, ‘সবই হল, কিন্তু ক্যাথলীনের উপযুক্ত

কিছু পেলাম না এখনো । কোনো ভালো ডায়মন্ড ব্রোচ জাতীয় জিনিস তোমার নেই ? আমার স্ত্রীর পাথরের উপর ভীষণ ফ্যান্সি । একখানা ভালো পাথরও যদি পেতাম তার জন্যে !

আমি মাথা নেড়ে আক্ষেপ জানালাম । ‘ভেরি সরি, মিঃ হোরেনস্টাইন । পাথর থাকলে আমি তোমাকে নিশ্চয়ই দিতাম ।’


দিনের বেলাটা সাহেবকে রাজার বড় গাড়ি লাগভাতে ঘুরিয়ে শহরের নানান দৃশ্য দেখানো হল । সন্ধ্যায় দুজনে বসে কিছুক্ষণ দাবা খেললাম । বুঝতেই পারছিলাম সাহেব তাঁর গিনির জন্য লাগসই উপহার পেলেন না বলে তাঁর মনটা ভারি হয়ে রয়েছে, এবং তাই তাঁর চালে ভুল হচ্ছে । কিন্তু মেজাজের কথা মাথায় রেখে আমি আরো বেশি ভুল চাল দিয়ে তাঁকে জিততে দিলুম ।

রাত্রি ন’টায় ষোড়শোপচারে ডিনার খেয়ে কফি আর ব্রান্ডিতে কিছুটা সময় দিয়ে সাহেব শুতে চলে গেলেন সফেদকোঠিতে । রাজা নিজে মদ্যপান করেন না, আমিও করি না—এখানে মিলেছে ভালো । আমি শুধু কফি আর একটা ভালো হাভানা চুরুট খেয়ে উঠে পড়লাম । দেওয়ান নিজে এলেন আমাকে লালকোঠিতে পৌঁছে দিতে । আমি জিগ্যেস করলাম, ‘রাজা আজ আছেন কেমন ?’ দেওয়ান মাথা নেড়ে আক্ষেপসূচক শব্দ করে বললেন, ‘সেইরকমই । ভুল বকছেন, হাসপাতালের নার্সদের খুব জ্বালাচ্ছেন । ডাক্তাররাও হিমসিম খেয়ে যাচ্ছেন ।’

লালকোঠিতে গিয়ে দেখি এখানে খাট বিছানা তোষক বালিশ সবই অনেক ভদ্রস্থ, অর্থাৎ আমার উপযোগী । দেওয়ানজি যাবার সময় বলে গেলেন, ‘আপনার সাহসের তুলনা নেই । এই ঘরে রাজা শত্রুঘ্ন সিং মারা যাবার পর এই প্রথম মানুষ বাস করছে ।’ আমি বললাম, ‘কোনো চিন্তা করবেন না । আমি সব অবস্থাতেই নিজেকে সামাল দিতে পারি ।’

খাটের পাশে একটা ল্যাম্প রয়েছে ; সেটা জ্বালিয়ে কিছুক্ষণ মন্দোরের ইতিহাস সম্বন্ধে একটা বই পড়ে সাড়ে এগারোটা নাগাৎ বাতি নিবিয়ে দিলাম । পশ্চিমে একটা বড় জানালা রয়েছে, সেটা দিয়ে এক সঙ্গে চাঁদের আলো আর ঝিরঝিরে বাতাস আসছে, চোখে ঘুম আসতে বেশি সময় লাগল না ।

ঘুমটা ভাঙল যখন তখন চাঁদ নেমে গিয়ে ঘরের ভিতরটা আবছা আলোয় ভরে গেছে । চোখ চেয়েই বুঝলাম যে ঘরে আমি একা নই । দরজা যদিও বন্ধই আছে তবু জানালার পাশে একজন লোক সোজা আমার দিকে চেয়ে দাঁড়িয়ে আছে । আমারই মতন লম্বা আর আমারই ধাঁচের চেহারা, কেবল গোঁফটা আমার চেয়ে একটু বেশি পুরু । চাঁদের আলোয় খুব স্পষ্ট বোঝা না গেলেও লোকটা যে গাড় রঙের বিলিতি



পোশাক পরে রয়েছে সেটা বুঝতে পারলাম ।

আমি কনুইয়ে ভর দিয়ে একটু উঠে বসলাম । বুকের ভিতরে একটা মৃদু কাঁপুনি অনুভব করছিলাম, কিন্তু সেটাকে আমি ভয় বলতে রাজি নই । বেশ বুঝতে পারছি যে যিনি প্রবেশ করেছেন তিনি জ্যোন্ত মানুষ নন ; তিনি প্রেতাঙ্গা । এবং ইনি যে বর্তমান মহারাজার বাপ শত্রুঘ্ন সিং-এর প্রেতাঙ্গা তাতেও কোনো সন্দেহ নেই । ইনিই এই ঘরে নিজের মাথায় রিভলভার মেরে আত্মহত্যা করেছিলেন ।

‘অ্যাঁ হ্যাভ কাম টু টেল ইউ সামথিং’ গম্ভীর গলায় বললেন প্রেতাঙ্গা । বাকি কথাও ইংরিজিতে হল, আমি সেটা বাংলায় বলছি ।

আমি জিগ্যেস করলাম, ‘কী বলতে এসেছেন আপনি ?’

‘আজ থেকে ত্রিশ বছর আগে আমি একটা মহামূল্য পাথর কিনেছিলাম ভিয়েনাতে একটা নিলামে । সেটা একটা পান্না । তার নাম ছিল ডোরিয়ান এমারেন্ড । এমন পান্না সচরাচর দেখা যায় না ।’

‘সে পান্না কী হল ?’

‘এখনো আছে । আমার ছেলের আলমারির দেরাজে একটা মখমলের বাক্সে । যদি পার ত সেটা বিক্রি করে দাও । খরিদদার যখন পেয়েছ তখন এ সুযোগ ছেড়ো না ।’

‘কেন বলছেন এ কথা ?’

‘ও পাথর শয়তান পাথর । যখন কিনি তখন আমি এটা জানতাম না । ওর প্রথম মালিক ছিল লুক্সেমবুর্গের কাউন্ট ডোরিয়ান । সে তার কেল্লার ছাত থেকে লাফিয়ে পড়ে আত্মহত্যা করে । তার দেহের একটা হাড়ও আস্ত ছিল না । তারপর এই পান্না উনিশ জনের হাতে ঘোরে । উনিশ জনই আত্মঘাতী হয় । আমি এটা জেনেও পান্নাটি হাতছাড়া করিনি, কারণ এমন আশ্চর্য সুন্দর পাথরের সঙ্গে যে এত ট্র্যাজিডি জড়িয়ে থাকতে পারে সেটা আমি বিশ্বাস করিনি । কিন্তু আমার মৃত্যুর জন্য ওই পাথরই দায়ী । আজ যে আমার ছেলের মাথা খারাপ হয়েছে তার জন্যেও ওই পাথর দায়ী । আমার নাতির এখনও কিছু হয়নি, কিন্তু ভবিষ্যতে...’

প্রেতাঙ্গা কথা থামালেন । আমি বললাম, ‘আপনি নিশ্চিত থাকুন । আমার দৃঢ় বিশ্বাস আমি ওই পান্নাকে বিদায় করতে পারব ।’

‘তবে আমি আসি ।’

চাঁদের আলোয় প্রেতাঙ্গা ক্রমে অদৃশ্য হয়ে গেল ।

আমি বাকি রাত আর ঘুমোতে পারলাম না ।

পরদিন সকালে দেওয়ানকে বললাম রাত্রে ঘটনা । দেওয়ান ত শুনে

থ। বললেন, ‘কিন্তু আমি এমন পাথরের কথা জানি না।’ আমি বললাম, ‘যাই হোক, আলমারির দেরাজটা একবার খুলে দেখতে হয়।’

আলমারির দেরাজ খুলে লাল মখমলের বাক্সে পান্নাটা পেতে কোনোই অসুবিধা হল না। পাথর দেখে আমার চক্ষু স্থির। এমন পান্না আমি জীবনে দেখিনি।

এবার সাহেবকে ডেকে বললাম, ‘সাহেব তুমি পাথর চাইছিলে, একটা আশ্চর্য পাথর আমার ব্যক্তিগত সংগ্রহে আছে বটে, কিন্তু সেটা আমার বাবার কেনা, তাই হাতছাড়া করতে দ্বিধা হচ্ছিল। পরে ভেবে দেখলাম, তুমি সম্মানিত অতিথি, এবং দূর থেকে এসেছ, তোমাকে বিমুখ করার কোনো মানে হয় না। দেখ ত এই পান্নাটা তোমার পছন্দ হয় কিনা।’

পান্না দেখে সাহেবের চোখ ছানাবড়া হয়ে গেল। দুবার অস্ফুট স্বরে বললেন, ‘ইট্‌স এ বিউটি...ইট্‌স এ বিউটি!’ তারপর বললেন, ‘আমি আর কিছু নেব না।’

পান্না সাহেবের হাতে চলে গেল, আর আমাদের হাতে এল একটা চেক।

আশ্চর্য এই যে বিকেলে হাসপাতাল থেকে খবর এল যে রাজা অনেকটা সুস্থ বোধ করছেন।

সাহেবের তরফ থেকে শিকার তেমন জমল না, কারণ জঙ্গল হাঁকোয়াদের কেনেস্তারা পেটানোর চোটে বাঘ জঙ্গল থেকে বেরিয়ে সাহেবের হাতির কাছে এসে পড়া সত্ত্বেও সাহেবের নিশানা অব্যর্থ হল না। শেষটায় আমার গুলিতেই বাঘ মোলো।

পরের দিন সাহেব দিল্লি চলে গেলেন।

দুদিন পরে কাগজে দেখলাম দিল্লির এয়ারপোর্ট থেকে একটি প্যান অ্যামেরিকান বিমান টেক-অফ করার প্রায় সঙ্গে সঙ্গে তার এঞ্জিনে একটা শব্দ তুকে পড়ে। প্লেন বিকল হয়ে গোঁৎ খেয়ে মাটিতে পড়ে। যদিও কেউ মারা যায়নি, যাত্রীদের মধ্যে জনা পঁচিশেককে নার্ভাস শকের জন্য হাসপাতাল যেতে হয়েছিল। তাদের মধ্যে ছিলেন মার্কিন ধনকুবের অস্কার এম. হোরেনস্টাইন।

তারিণীখুড়ো ও ঐন্দ্রজালিক

‘কই, আর সব কই?’ বললেন তারিণীখুড়ো। ‘সব্বাইকে খবর দে, নইলে গল্প জমবে কি করে?’

আমি বললাম, ‘খবর পাঠানো হয়ে গেছে খুড়ো। এই এসে পড়ল বলে।’

‘তাহলে এই ফাঁকে চা-টা বলে দে।’

বললাম, ‘তাও বলা হয়ে গেছে—দুধ চিনি ছাড়া চা।’

‘ভেরি গুড।’

মিনিট তিনেকের মধ্যেই ন্যাপলারা এসে পড়ল। বলল ম্যাজিক দেখতে গিয়েছিল। অর্গব দি গ্রেট। খুব ভালো লেগেছে।’

খুড়ো বলল, ‘ম্যাজিকের কথাই যদি বলিস, তাহলে তোদের বলেই ফেলি—আমি কিছুকাল ম্যাজিশিয়ানের ম্যানেজার ছিলাম। অবিশ্যি তোরা তখনো জন্মাস নি।’

‘কী নাম ম্যাজিশিয়ানের?’ ন্যাপলা জিগ্যেস করল।

‘আসল নাম জানি না, তবে স্টেজের নাম ছিল চমকলাল। বাঙালি না, পশ্চিমের লোক। বছর পঁচিশেক আগের কথা। খুব নাম করেছিল। ম্যানেজারের জন্য বিজ্ঞাপন দেয়। আমি একবার ভদ্রলোকের ম্যাজিক দেখে নিয়ে তারপর অ্যাপ্লাই করি। যেমন তেমন খেলোয়াড় না হলে তার ম্যানেজারি করতে যাব কেন? তবে এ দেখলাম খাঁটি মাল। যাকে বলে ‘স্টেজ ইলিউশন’ তা ত আছেই, আবার তার সঙ্গে আছে ‘থট রীডিং’। সে এক অবাক করা ব্যাপার। সবচেয়ে শেষে আসত এই খেলা। জাদুকরের চোখ বেঁধে দেওয়া হত। তারপর স্টেজের দিকে ফিরে বসে এক-একজন দর্শকের সীটের নাম্বার বলে তার সম্বন্ধে বুড়ি বুড়ি তথ্য বলে যেতেন চমকলাল। সে লোক কী চাকরি করে, তার কোনো ব্যারাম আছে কিনা, সে কী খেতে ভালোবাসে, সম্প্রতি কী থিয়েটার বা বায়স্কোপ দেখেছে—একেবারে এক ধার থেকে সব। এমন আশ্চর্য খেলা আমি কখনো দেখিনি।

‘এই খেলা দেখে ইম্প্রেস্‌ড হয়ে আমি ভদ্রলোককে অ্যাপ্লিকেশন পাঠাই। তারপর ডাক পড়ল, গিয়ে কথা বললুম, সঙ্গে সঙ্গে চাকরি হয়ে

গেল । আমার নিজেরও একটু শখ ছিল দু-একটা—সেটা শুনে ভদ্রলোক বোধহয় আরো খুশি হলেন ।

‘ভদ্রলোকের বয়স পঞ্চাশের বেশি না, বেশ বনেদি চেহারা, ফ্রেঞ্চকাট দাড়ি আর গোঁফ, টিকালো নাক, আর চোখ দুটো যাকে বলে দেদীপ্যমান । ওরকম জ্বলজ্বলে চোখ আমি খুব কম মানুষের দেখেছি ।’

চা এল, তাই তারিণীখুড়োর কথা কিছুক্ষণের জন্য থামল । আমরা উদ্গ্রীব হয়ে বসে আছি, আর মনে মনে ভাবছি কত রকম কাজই না করেছেন ভদ্রলোক জীবনে । এইটেই হল তারিণীখুড়োর বিশেষত্ব । এক জায়গায় বেশিদিন টিকে থাকতে পারেন নি । এখন অবিশ্যি আর কাজ-টাজ করেন না । বেনেটোলা লেনে একটা ফ্ল্যাট নিয়ে রয়েছেন, আর সেইখান থেকে হেঁটে আসেন এই বালিগঞ্জে আমাদের গল্প শোনাতে । বলেন বুড়োদের কম্পানি নাকি ওঁর ভালো লাগে না । খুড়ো অবিশ্যি বিয়ে করেন নি, তাই সংসারের চিন্তা যাকে বলে সেটা ওঁর নেই ।

চায়ে পর পর দুটো চুমুক দিয়ে একটা এক্সপোর্ট কোয়ালিটি বিড়ি ধরিয়ে খুড়ো আবার বলতে শুরু করলেন ।

‘চমকলালের সঙ্গে গোড়া থেকেই আমার একটা ভালো সম্পর্ক গড়ে উঠেছিল । তেমন মুড়ে থাকলে আমাকে দু-একটা ছোটখাটো ম্যাজিকও শিখিয়ে দিতেন । ওঁর টুরের প্রোগ্রাম আমিই করতাম—আর সে বিরাট টুর । ভারতবর্ষের কোনো প্রদেশ বাদ নেই । আর সব জায়গাতেই সাক্সেস । চমকলাল বলতে ছেলে বুড়ো সবাই অজ্ঞান ।

একদিন বস্ আমাকে ডেকে বললেন, ‘তুমি তারাপুর স্টেটের নাম শুনেছ ?’ নামটা চেনা চেনা লাগলেও বললাম শুনিনি । চমকলাল বললেন, ‘ফৈজাবাদ থেকে ৫৬ মাইল দক্ষিণে ! ভালো মোটরের রাস্তা আছে ।’

আমি বললাম, ‘হঠাৎ তারাপুর কেন ?’

‘তারাপুর একটা নেটিভ স্টেট,’ বললেন চমকলাল, ‘সেখানকার রাজার খুব ম্যাজিকের শখ এটা আমি জানি । তাই একবার আমার জাদু দেখানর ইচ্ছে করছে । দেখ যদি পার অ্যারেঞ্জ করতে । রাজার ম্যানেজারকে একটা চিঠি ছেড়ে দাও, তারপর দেখ কী হয় ।’

আমি তাই দিলুম । সাতদিনের মধ্যেই জবাব চলে এল । রাজা চমকলালের নাম শুনেছেন, এবং তার ম্যাজিক দেখতে খুবই আগ্রহী ।

আমরা ত লটবহর নিয়ে একটা বিশেষ দিনে ফৈজাবাদ পৌঁছে গেলুম । এগারটা ট্রাক, তার জন্য একটা লরির ব্যবস্থা করার কথা আগে থেকে জানিয়ে দিয়েছিলুম । ফৈজাবাদেই রাজার ম্যানেজার মাধো সিং হাজির ছিলেন, আমাদের খুব আপ্যায়ন করে একটা বড় স্টুডিওবেকার

গাড়িতে তুলে দিলেন ।

রাজবাড়ি পৌঁছে প্রথমে যে যার নিজের ঘরে একটু বিশ্রাম করলুম, তারপর ডাক পড়লে রাজার সঙ্গে গিয়ে দেখা করলুম । বছর পঁয়তাল্লিশ বয়স, বেশ ধারালো চেহারা, বললেন ছেলেবেলা থেকে ম্যাজিকের শখ । প্রাসাদের বাইরে আলাদা স্টেজ আছে । তাতে গান বাজনা থিয়েটার ম্যাজিক, সবই হয়, সেখানেই চমকলাল তাঁর খেলা দেখাবেন ।


প্রথম দুদিন গাড়িতে ঘুরে তারাপুরের দৃশ্য, পুরোনো কেল্লা, জঙ্গলের মধ্যে তারাসুন্দরীর মন্দিরের ভগ্নাবশেষ ইত্যাদি দেখেই কেটে গেল । তৃতীয় দিন সন্ধ্যাবেলা শো । স্টেজটা একবার ভালো করে দেখে নিলুম—সব ঠিক আছে । আটশো লোক ধরে থিয়েটারে ; হাউস যে ফুল হবে তাতে কোনো সন্দেহ নেই ।

ম্যাজিক দারুণ হল । এখানের লোকে যে এ জিনিস কখনো দেখেনি সেটা তাদের হাবেভাবেই বুঝতে পারছিলুম । ম্যাজিকে এংকোর দেয় শুনেছিস কখনো ? তারাপুরে তাও হয়েছিল । একই ম্যাজিক দুবার করে দেখাতে হল ।

সব শেষে এল থট রীডিং-এর খেলা । জনা চার-পাঁচ লোকের বিষয় আশ্চর্য সব তথ্য বলে দিয়ে চমকলাল হঠাৎ বললেন, ‘আমি এবার হিজ হাইনেস-এর সম্বন্ধে কিছু বলতে চাই । আশা করি তাঁর কোনো আপত্তি হবে না ।’

রাজা একটু যেন উসখুস করে তারপর বললেন, ‘গো অ্যাহেড ।’

চমকলাল অবশ্য প্রথমেই অ্যাপলজাইড করে নিলেন রাজাকে বাছাই করার জন্য । তারপর চলল রাজা সম্বন্ধে তথ্য পরিবেশন । বারো বছর বয়সে রাজার টাইফয়েড হয়েছিল, বাঁচার কোনো আশা ছিল না, শেষে এক ফকিরের ঝাড়ফুঁকে ভালো হয়ে ওঠেন । রাজা ব্যাপারটা স্বীকার করলেন । তারপর চমকলাল বললেন যে রাজার একটা আশ্চর্য গুণ হল যে তিনি দু হাতেই লিখতে পারেন । এটাও রাজা স্বীকার করলেন । তারপর জানা গেল রাজা একবার একটা বাঘ মারতে গিয়ে সেই বাঘের দ্বারা আক্রান্ত হয়ে পিঠে আঁচড় খান । তারপর শিকারের দলের এক সাহেব, নাম ডানকান কুক, বাঘটাকে গুলি করে মারেন । রাজা এই ঘটনাও অস্বীকার করলেন না । তারপর চমকলাল বললেন, ‘আপনার সম্পত্তির মধ্যে যেটিকে আপনি সবচেয়ে মূল্যবান বলে মনে করেন, সেটা যদি একবার সকলকে দেখান তাহলে আজকের সন্ধ্যার আমোদটা পরিপূর্ণ হয় । এতে আপনি রাজি হবেন কি ? আশা করি আপনি বুঝতে পারছেন আমি কোন জিনিসটার কথা বলছি । আমি চোখের সামনে দেখতে পাচ্ছি সেটাকে, আমার চোখ বলসে যাচ্ছে, আমি চাই এই সভায় উপস্থিত



সকলকে সেটা আপনি একবার দেখান ।’

রাজা দেখলাম খুব স্পোর্টিং । কী সম্পত্তির কথা বলছেন চমকলাল সেটা আমিও জানি না, কিন্তু বুঝতেই পারছি মহামূল্য কোনো জিনিস ।

রাজা বললেন, ‘যে সম্পত্তিটার কথা জাদুকর বলছেন সেটা আমি কখনো কাউকে দেখাই না, কিন্তু আজকের দিনটি একটি বিশেষ দিন । আজ আমার জন্মতিথি, তাই জাদুকরের অনুরোধ আমি রাখছি ।’

রাজা তাঁর জায়গা ছেড়ে উঠে বেরিয়ে গিয়ে আবার দশ মিনিটের মধ্যেই ফিরে এলেন । চমকলালের থট রীডিং-এর খেলা শেষ হয়ে গেছে, তাই তিনি চোখের বাঁধন খুলে ফেলেছেন । রাজা তাঁর হাতে একটা জিনিস দিয়ে বললেন, ‘এটা আমি জাদুকরকেই অনুরোধ করছি সভার সকলকে দেখাতে ।’

চমকলাল যে জিনিসটা তুলে ধরলেন, এবং যেটা স্টেজ লাইটের আলোতে ঝলমল করছিল সেটা একরকম মহামূল্য পাথর । রঙ সবুজ, কাজেই মরকত বলেই মনে হয়, কিন্তু এত বড় মরকত আমি কল্পনাও করতে পারিনি ।

এদিকে সভায় হাততালির চোটে কান পাতা যায় না । রাজা

চমকলালের হাত থেকে মণিটা নিয়ে আবার চলে গেলেন সেটাকে রাখতে । তারপর ফিরে এসে চমকলালের হাতে এক থলি মুদ্রা ইনাম দিয়ে শো-য়ের কাজটা সারলেন । পরে দেখেছিলাম মুদ্রাগুলি সোনার ।

কেন সেটা বলতে পারব না, আমার মনের মধ্যে একটা খটকা লাগছিল । সেটা অবিশ্যি চমকলাল বুঝতে পারলেন, খট রীডিং-এর জোরে । ট্রেনে যখন ফিরছি, তখন আমাকে বললেন, ‘কী ব্যানার্জি, এত কী ভাবছ ?’

আমি আর কী বলি ? বললাম যে ‘তারাপুরের সমস্ত ব্যাপারটা আমার মনে একটা খটকার সৃষ্টি করছে । প্রথমত, এত জায়গা থাকতে তারাপুর কেন ?’

চমকলাল বললেন, ‘তার কারণ জানতে চাও ?’

বললাম, ‘খুবই কৌতূহল হচ্ছে ।’

‘তাহলে তোমাকে একটা গল্প বলতে হয় ।’

‘তা বলুন না ।’

‘তোমার ধৈর্যচ্যুতি হবে না ত ?’

‘মোটাই না ।’

‘তবে শোন । ওই যে পাথরটা দেখলে সেটা কোথায় পাও-যায় জান ?’

‘কোথায় ?’

‘তারাসুন্দরীর মন্দিরে বিগ্রহের গলা থেকে খুলে নেওয়া ।’

‘তাই বুঝি ?’

‘তারাপুরের রাজা মহেন্দ্র সিং তখন বেঁচে । তাঁর দুই ছেলে ছিল । বড় হল সূর্য আর ছোট চন্দ্র । তারা দুজনেই ছিল ওস্তাদ শিকারী । দুই ভাই একদিন শিকার করতে যায় তারাপুরের জঙ্গলে । গভীর বন, তাতে দিনের আলো প্রায় প্রবেশ করে না বললেই চলে । সেই বনে শিকার খুঁজতে খুঁজতে বড় ভাই সূর্য সিং তারাসুন্দরীর মন্দিরটা দেখতে পান, এবং ওঁর ভাইকে দেখান । দুজনে একসঙ্গে মন্দিরে প্রবেশ করেন । সূর্য সিং ছিল সভ্যভব্য, কিন্তু চন্দ্র সিং অত্যন্ত লোভী প্রকৃতির । সে বিগ্রহের গলায় মরকত মণিটা দেখেই সেটাকে হাত করে নেয় । এ ব্যাপারে সূর্য আপত্তি করেছিল, কিন্তু চন্দ্র তাতে কান দেয়নি ।

‘তারপর কিছুকাল কেটে যায় । রাজা মহেন্দ্র সিং এই মরকত মণির বিষয় কিছুই জানেন না ; এদিকে চিরকালের লোভী চন্দ্র সিং এখন গদীতে বসার লোভ করছে । কিন্তু নিয়ম মতো সিংহাসন পাবার কথা বড় ছেলে সূর্য সিং-এর ।

‘চন্দ্র সিং তখন চূড়ান্ত উপায় অবলম্বন করলেন । বড় ভাইয়ের

সরবতে বিষ মিশিয়ে তাঁকে হত্যা করার চেষ্টা করলেন । সূর্য সিং-এর হৃৎপিণ্ডের ক্রিয়া বন্ধ হল । পাছে ডাক্তার কিছু সন্দেহ ক'রে সূর্য সিং-এর লাশ পরীক্ষা করেন তাই চন্দ্র সিং চটপট তাঁর সৎকারের ব্যবস্থা করে লাশ শ্মশানে পাঠিয়ে দিলেন ।

‘সেটা ছিল শ্রাবণ মাস । বজ্রপাতের সঙ্গে সঙ্গে তুমুল বৃষ্টি আরম্ভ হল শ্মশানে । যারা শবযাত্রায় গিয়েছিল তারা সকলেই শব ফেলে দিয়ে পালাল—যেমন হয়েছিল ভাওয়াল রাজকুমারের বেলায় ।

‘এদিকে বৃষ্টিতে ভিজেই হোক, আর যে কোনো কারণেই হোক, চিতায় শোয়ানো সূর্য সিং-এর দেহে আবার প্রাণ ফিরে এল । আসলে সে মরেনি ; ডাক্তারের ভুলে তাকে মৃত বলে ধরে নেওয়া হয়েছিল । অবিশ্যি এমনও হতে পারে যে চন্দ্র সিং আগেই ডাক্তারকে মোটা ঘুষ দিয়ে রেখেছিলেন, কারণ সূর্য সিং-এর স্বাস্থ্য ছিল অত্যন্ত ভালো ।

‘যাই হোক, সূর্য সিং এখন চিতা থেকে উঠে পড়ে উদ্ভ্রান্তের মতো এদিক সেদিক ঘুরতে লাগলেন । কী হয়েছে সেটাও তিনি ঠিক করে বুঝতে পারলেন না ।

‘শ্মশানের কাছেই এক কুটির, সে কুটিরে থাকত এক তান্ত্রিক । তিনি ছিলেন পিশাচসিদ্ধ ; তন্ত্রের অনেক কায়দাকানুন তাঁর জানা ছিল । তিনি সূর্য সিংকে দেখে চিনতেও পারলেন, এবং অনুকম্পাবশত তাঁর কুটিরে আশ্রয় দিলেন । তারপর তিনিই মন্ত্রবলে সব ঘটনা বুঝতে পেরে সূর্যকে বুঝিয়ে দিলেন । বললেন, ‘তুই নতুন জীবন পেয়েছিস, আমার কাছে এখন কিছুদিন থাক, এখনও তোর শরীর সম্পূর্ণ সুস্থ নয়—তারপর এই নতুন জীবনের সদ্যবহার কর । আমি দিব্য চোখে দেখতে পাচ্ছি তোর কপালে যশলাভ আছে । তোকে কী করতে হবে সেটা আমি বাৎলে দেব । রাজা হওয়া তোর কপালে নেই ; সেটা তোর ছোট ভাইই হবে ।’

‘সূর্য সিং রইল তান্ত্রিকের কাছে দেড় বছর । সেই সময় সে একটা জিনিস শিক্ষা করল ; সেটা হল ইন্দ্রজাল । তান্ত্রিক তাঁর সমস্ত ঐন্দ্রজালিক বিদ্যা সূর্যকে দিয়ে দিলেন । তারপর সূর্য একদিন সাধুকে ছেড়ে নিজের পথ দেখল । সে পথে সে অনেক দূর এগোল, এবং নতুন পাওয়া জীবনের সে সম্পূর্ণ সদ্যবহার করল ।’

চমকলাল থামলেন । আমি ত ব্যাপারটা বুঝেই ফেলেছি । বললাম, ‘সূর্য সিং আর চমকলাল ত একই লোক, তাই নয় কি ?’

চমকলাল মৃদু হেসে বললেন, ‘তুমি ঠিকই ধরেছ ।’

আমি বললাম, ‘কিন্তু আমি একটা জিনিস বুঝতে পারছি না ; আপনার উপর যে লোক এত অত্যাচার করল, আপনাকে হত্যার চেষ্টা পর্যন্ত করল—তাঁকে আপনি শুধু ম্যাজিক দেখিয়ে ছেড়ে দিলেন ? আপনার

মধ্যে কি প্রতিহিংসার ভাব ছিল না মোটেই ?

‘তা থাকবে না কেন—আমি ত মানুষ ।’

‘তাহলে ?’

‘তাহলে আর কী ? তাহলে এই !’

এই বলে চমকলাল তাঁর পকেট থেকে একটা জিনিস বার করে আমার সামনে ধরলেন । তাঁর তর্জনী আর বৃদ্ধাঙ্গুষ্ঠের মধ্যে থেকে চোখ ধাঁধানো রশ্মি আমাকে প্রায় অন্ধ করে দিল ।

‘এই হল তারাসুন্দরীর অলঙ্কারের মরকত । রাজার কাছে এখন যেটা রয়েছে সেটা ভুয়ো, জাল । সেটা আমি তৈরি করিয়ে রাখি তারাপুর যাবার আগে । সামান্য হাত সাফাইয়ের ব্যাপার আর কি !’

নরিস সাহেবের বাংলা

তারিণীখুড়োকে ঘিরে আমরা পাঁচ বন্ধু বসেছি, বাদলা দিন, সন্কে হব-হব, খুড়োর চা খাওয়া হয়ে গেছে। এবার বিড়ি ধরিয়ে হয়ত গল্প শুরু করবেন। খুড়ো এলে সন্কেতেই আসেন, আর এলেই একটি করে গল্প লাভ হয় আমাদের। সবই খুড়োর জীবনেরই ঘটনা, কিন্তু সে ঘটনা গল্পের চেয়েও মজাদার। একজন লোকের এতরকম অভিজ্ঞতা হতে পারে সেটা আমার ধারণা ছিল না।

খুড়ো বললেন, ‘আমি যে সব সময় চাকরির ধান্দায় দেশ বিদেশে ঘুরছি তা কিন্তু নয়; মাঝে মাঝে রোজগারের উপর বিতৃষ্ণা এসে যায়, তখন ঘুরি কেবল ভ্রমণের নেশায়। নতুন জায়গা দেখার শখ আমার ছেলেবেলা থেকে। সেই ভাবেই একবার গিয়ে পড়েছিলাম ছোট নাগপুর। ও অঞ্চলটা তখনো দেখা হয়নি। আর ওখানেই ঘটে এক আশ্চর্য ঘটনা। সেই গল্পই আজ তোদের বলব।’

খুড়ো বিড়িতে একটা লম্বা টান দিয়ে তার গল্প শুরু করলেন।

আমি তখন হাজারিবাগে। একটা হোটেলে আছি, নাম ডি লাক্স হোটেল, কিন্তু ব্যবস্থা চলনসইয়ের বেশি নয়। তাতে কিছু এসে যায় না, কারণ ব্যক্তিগত স্বাচ্ছন্দ্যটাকে আমি কখনো খুব উঁচুতে স্থান দিই না। নানান অবস্থার সঙ্গে নিজেকে মানিয়ে নেওয়াটাই আমার অভ্যাস। হাজারিবাগে কাউকে চিনি না, সেটা আরো ভালো লাগছে, কারণ মাঝে মাঝে একটা অবস্থা আসে যখন প্যাঁচাল পাড়তে একদম ভালো লাগে না। চুপচাপ একা একা বিছানায় শুয়ে কল্পনার স্রোতে নিজেকে ভাসিয়ে দিতে ইচ্ছে করে। তবে এটাও ঠিক যে ভারতবর্ষে এমন জায়গা নেই যেখানে বাঙালি নেই। বিশেষ করে হাজারিবাগে ত বিস্তর বাঙালি। তাদের মধ্যে এক-আধজনের সঙ্গে যে আলাপ হয়ে যাবে তাতে আর আশ্চর্য কী?

যাঁর সঙ্গে প্রথমে আলাপ হল তাঁর নাম অর্ধেন্দু বসু। ইনি ইতিহাসের লোক, পাবনার একটা জমিদার বংশ—হালদার বংশ—নিয়ে পড়াশুনা করছেন, ইচ্ছে আছে বই লেখার। এই বংশে নাকি অনেক বাঘা বাঘা

চরিত্রের পরিচয় মেলে । এঁদেরই এক আদিপুরুষ, নাম রামগতি হালদার, রামমোহনের নাকি খুব কাছের লোক ছিলেন । তাছাড়া এঁর পরেও বেশ কিছু সমাজ সংস্কারক নির্ভীক চরিত্রের পরিচয় নাকি এবংশে মেলে । আমি ভদ্রলোককে জিগ্যেস করলাম, ‘এই পরিবার সম্বন্ধে লিখতে আপনার হাজারিবাগ আসতে হল কেন ?’ ভদ্রলোক বললেন, ‘উনবিংশ শতাব্দীর মাঝামাঝি এই পরিবারের একজন নাকি হাজারিবাগে একটা বাড়ি করেন । সে ছুটি কাটানোর জন্য না অন্য কোনো কারণে সেটা এখনও বুঝতে পারিনি । এই বিশেষ ব্যক্তির নাম ছিল মহেশ হালদার । এই মহেশ হালদার অবধি আমি হালদার বংশের ইতিহাস পাচ্ছি, যদিও এঁর সম্বন্ধেও অনেক কিছু জানতে বাকি আছে । এঁর পরে সব যেন কেমন ব্ল্যাক ।’ আমি জিগ্যেস করলাম, ‘এঁর হাজারিবাগের বাড়িটা আপনি দেখেছেন ?’ অর্ধেন্দুবাবু বললেন, ‘দেখেছি, কিন্তু সেখানেও এক রহস্য । এই বাড়িটাকে এখানকার সকলেই উল্লেখ করে নরিস সাহেবের বাংলা বলে ! অথচ মহেশ হালদার যে বিয়ে করেছিলেন সে খবর আমি পেয়েছি, কিন্তু মহেশ হালদারের পরে বংশটার যে কি হল সে খবর পাইনি । সম্ভবত মহেশবাবু নরিস সাহেবকে বাংলাটা বিক্রি করে দেন কোনো কারণে ।’

‘কলকাতায় তাঁদের আর কোনো বংশধর নেই ?’ আমি জিগ্যেস করলাম ।

অর্ধেন্দুবাবু বললেন, ‘মহেশ হালদার ছিলেন তাঁর বাবা যোগেশ হালদারের একমাত্র সন্তান । তাই তাঁর যদি আর ছেলেপিলে না থাকে তাহলে হয়ত হালদার বংশ মহেশেই শেষ হয়ে গেছে । প্রশাখা আর কোথাও আছে কিনা জানা নেই । আমি শুধু শাখাতেই ইন্টারেস্টেড ।’

‘এই বংশ সম্বন্ধে খবর দিতে পারে এমন কোনো লোকের সন্ধান পাননি হাজারিবাগে ?’

‘এখানে এক ভদ্রলোক আছেন, আজন্ম এখানেই বাস, তাঁর বয়স নব্বুই, নাম কালিকিঙ্কর বাঁড়ুজ্যে । একবার ভাবছিলাম তাঁর কাছে গিয়ে জিগ্যেস করব ।’

‘তা চলুন না আজই বিকেলে যাওয়া যাক ।’

কালিকিঙ্করবাবুকে সকলেই চেনে, তাই তাঁর বাড়ি বার করতে অসুবিধা হল না । গিয়ে শুনি ভদ্রলোক বৈকালিক ভ্রমণে বেরিয়েছেন । বুঝে দেখে কিরকম স্বাস্থ্য ! নব্বুই বছরেও বিকেলে হাঁটা চাই ।

আমরা একটু অপেক্ষা করতেই ভদ্রলোক এসে পড়লেন । আমরা নিজেদের পরিচয় দিলাম । ভদ্রলোক বললেন, ‘আমার কাছে ত বড় একটা কেউ আসে না । আপনাদের কোনো প্রয়োজন আছে বুঝি ?’



‘আপনি ঠিকই ধরেছেন,’ বললেন অর্ধেন্দুবাবু। ‘আমি পূর্ববঙ্গের এক জমিদার বংশ নিয়ে রিসার্চ করছি। হালদার বংশ। তাঁদের একজন ঊনবিংশ শতাব্দীর মাঝামাঝি হাজারিবাগে একটা একতলা বাংলো বাড়ি করেছিলেন। সেই বাড়িকে এখানকার লোকেরা নরিস সাহেবের বাংলো বলে।’

‘ও—তাই বলুন। ওসব হালদার-ফালদার জানি না; তাঁরা এখানে এসে থাকতে পারেন। আমার যখন সাত কি আট বছর বয়স তখন আমি নরিস সাহেবকে দেখেছি ঘোড়ায় চড়ে বেড়াতে যেতে। আমায় দেখে মাথা হেঁট করে গুড আফটারনুন বলতেন। তবে তাঁর শেষটা জানেন ত?’

আমরা দুজনেই মাথা নেড়ে বললাম জানি না।

‘ভদ্রলোক আত্মহত্যা করেন,’ বললেন কালিকিঙ্করবাবু। ‘কারণ জানা যায়নি। লোকে বলে বাড়িটা নাকি হানাবাড়ি। সাহেবের ভূত দেখা যায়

এখনো । আমি অবশ্য দেখিনি । খুব জ্বরদস্ত সাহেব ছিলেন নরিস সাহেব ।’

‘তাঁর বাড়িটা কোথায় গেলে দেখা যায় বলতে পারেন ?’

‘বাড়ি ত এই কাছেই ।’

কালিকিষ্করবাবু আমাদের রাস্তা বাতলে দিলেন । আমরা দুজনে তাঁকে ধন্যবাদ জানিয়ে উঠে পড়লাম ।

রাস্তায় বেরিয়ে এসে অর্ধেন্দুবাবুকে বললাম, ‘আপনি এতদিন সে বাড়ি দেখেননি ?’

ভদ্রলোক বললেন, ‘দেখেছি বৈ কি, কিন্তু লোকে ঠিক বলছে কিনা একবার যাচাই করে নিলাম । ইনি যা বলবেন সে ত আর ভুল বলবেন না ।’

‘আমারও যে বাড়িটা দেখার জন্য কৌতূহল হচ্ছে ।’

‘আসুন না, দেখিয়ে দিচ্ছি ।’

মাথায় টালি বসানো ঢালু ছাতাওয়ালা বাড়ি, বাংলোই বলা চলে, যেমন হাজারিবাগে আরো দেখা যায় । টালির অধিকাংশই অবশ্য খসে গিয়ে ছাত ফাঁক হয়ে গেছে । চারিদিকে পাঁচিল দিয়ে ঘেরা চার-পাঁচ বিঘে জমির উপর জীর্ণ অবস্থায় দাঁড়িয়ে আছে বাংলোটা । কেউ থাকে না সেখানে, শেষ কবে ছিল তাও কেউ বলতে পারে না ।

আমি অর্ধেন্দুবাবুকে বললাম, ‘আপনার হালদার বংশের কথা জানি না মশাই, কিন্তু এই নরিস সাহেবকে নিয়ে আমার বিলম্বন কৌতূহল হচ্ছে । আর সত্যি বলতে কি, এই সাহেবের প্রেতাত্মার সঙ্গে যদি যোগস্থাপন করা যায়, তাহলে ত ইনি মহেশ হালদার সম্বন্ধে কিছু তথ্য দিতে পারেন । তাই নয় কি ?’

‘তা অবিশ্যি ঠিক ।’

কথাটা খুব জোরের সঙ্গে বললেন না অর্ধেন্দুবাবু । বুঝলাম তিনি সাহেবের প্রেতাত্মার সঙ্গে যোগস্থাপনের ব্যাপারে খুব একটা উৎসাহ বোধ করছেন না । আমি না হয় ভূতকে তোয়াক্কা করি না, কিন্তু সবাই ত সেরকম নয় ।

দুটো দিন পেরিয়ে গেল ।

তিনদিনের দিন আমি অর্ধেন্দুবাবুকে বললাম, ‘এইভাবে হাত পা গুটিয়ে বসে থেকে আপনার কী লাভ আছে ? আসুন একটা কিছু করা যাক । না হয় বাংলোটায় একটা রাত কাটিয়ে আসা যাক ।’

অর্ধেন্দুবাবু একটু চুপ থেকে বললেন, ‘এখানে বাঙালিদের একটা আড্ডা আছে শশী ডাক্তারের বাড়ি । আমি কাল সেখানে গিয়েছিলাম । তারা বলল নরিস সাহেবের বাংলোকে হানাবাড়ি বলা হলেও এখনো পর্যন্ত

কেউ কোনো ভূতের সাক্ষাত পায়নি। তবে ওই আড্ডাতেই উৎপলবাবু ঘলে এক নিরীহ গোছের ভদ্রলোক ছিলেন, তিনি নাকি খুব ভালো মিডিয়ম। অর্থাৎ তাঁর মধ্যে দিয়ে ভূতের আবির্ভাব ঘটেছে নাকি অনেকবার। ভদ্রলোক একটা বিশেষ অবস্থায় এলে তাঁর গলা থেকে নাকি ভূতের গলায় কথা বেরোয়, আর তখন নাকি ভূতের সঙ্গে কথাবার্তা বলা চলে। অন্ধকার ঘরে তেপায়া টেবিলের উপর হাত রেখে নাকি ব্যাপারটা করতে হয়। কিঞ্চিৎ সময়সাপেক্ষ।’

আমি বললাম, ‘দেখুন কিরকম যোগাযোগ। এই মিডিয়ম পাওয়া কিন্তু সহজ ব্যাপার নয়। আপনি এই উৎপলবাবুকে বলুন আমরা কালই রাত্রে বসছি। তেপায়া টেবিল জোগাড় করতে পারবেন?’

‘আমার হোটেলের ঘরেই একটা আছে।’

‘তাহলে ত কথাই নেই। আসুন লেগে পড়া যাক।’

অর্ধেন্দুবাবু শশী ডাক্তারের আড্ডায় নিয়ে গিয়ে আমার সঙ্গে উৎপলবাবুর আলাপ করিয়ে দিলেন। সকলের সামনে আর ভূতের প্রসঙ্গটা তুললাম না, কারণ প্ল্যানচেটে আমাদের তিনজনের বেশি কেউ থাকে এটা আমি চাইছিলাম না। আড্ডার পরে বাইরে বেরিয়ে এসে উৎপলবাবুকে প্রস্তাবটা দেওয়া হল। ভদ্রলোক এক কথায় রাজি। বললেন নরিস সাহেবের বাংলায় প্ল্যানচেট করার ঔঁর অনেকদিনের শখ, কিন্তু এতদিন কাউকে সঙ্গী পাননি বলে হয়ে ওঠেনি। ‘তাহলে পরশু বুধবার বসা যাক,’ বললেন উৎপলবাবু। ‘পরশু অমাবস্যা, সেই কারণে কাজটা সহজে হবার সম্ভাবনা।’ কী কী জিনিস লাগবে জিগ্যেস করাতে ভদ্রলোক বললেন তিনটে চেয়ার, একটা তেপায়া টেবিল, আর একটা মোমবাতি। মোমবাতিটা লাগবে কাজ শেষ হয়ে যাবার পর।

আমি আর অর্ধেন্দুবাবু দিন থাকতে দুটো সাইকেল রিকসায় করে চেয়ার টেবিল পাঠিয়ে দিয়েছিলাম বাংলাতে। সেই ফাঁকে বাড়িটা একটু ঘুরে দেখে নিলাম। বহুকাল কেউ থাকে না, তাই ঘরগুলোর অবস্থা অত্যন্ত শোচনীয়। আমরা স্থানীয় লোক লাগিয়ে একটা ঘর বেছে নিয়ে সেটাকে ঝাড়পোঁছ করিয়ে একটু ভদ্রস্থ করে নিলাম। এটাই বোধহয় ছিল বৈঠকখানা। বাড়িটা পাহারা দেবার জন্যও একটি লোককে জোগাড় করা হয়েছিল, সে প্রথমে সাহেবের ভূত সাহেবের ভূত করে একটু আপত্তি তুলেছিল, তারপর হাতে একটা দশ টাকার নোট গুঁজে দিতেই চুপ মেরে গেল।

রাত দশটার একটু আগেই আমরা তিনজন বাড়িটার সামনে জমায়েত হলাম। কথা হল ভূত এলে প্রশ্ন করবেন অর্ধেন্দুবাবু, আর উত্তর ত উৎপলবাবুর মুখ দিয়ে সাহেবের ভাষাতেই বেরোবে— অবিশ্যি সব যদি

ঠিকমতো হয়। অর্ধেন্দুবাবু ইংরেজিটা মোটামুটি ভালোই বলেন। সে দিক দিয়ে সুবিধে আছে। উৎপলবাবুকে দেখলাম সঙ্গে করে একটা কৌটো এনেছেন। জিগ্যেস করতে বললেন, ‘ওতে কর্পূর আছে। প্ল্যানচেটের ব্যাপারে খুব সাহায্য করে।’

মোমবাতির আলোয় সব তোড়জোড় হল। তিন জনে তেপায়া টেবিলের তিন দিকে বসে টেবিলের উপর হাত উপুড় করে রাখলাম। তারপর বাতি নিবিয়ে চোখ বন্ধ করে সাহেবের চিন্তায় মগ্ন হলাম।

গাছপালায় ঘেরা বাংলো, বাইরে বাতাস দিচ্ছে তার ফলে মাঝে মাঝে পাতার শোঁ শোঁ শব্দ পাচ্ছি। কিছুক্ষণ পরে বোধহয় বাতাস থেমে যাওয়ায় আর কোনো শব্দ পাওয়া গেল না। অমাবস্যার রাত, তার উপরে আকাশে মেঘ; রাস্তায় আলোও নেই যে জানালা দিয়ে ঢুকবে। তাই ঘরের ভিতর দুর্ভেদ্য অন্ধকার।

কতক্ষণ এইভাবে ছিলাম জানি না। হঠাৎ অনুভব করলাম টেবিলটা মৃদু মৃদু নড়ছে। সেটা একটু বেড়ে যাওয়ায় খটখট শব্দ শুরু হল। আমি জানি এ ধরনের প্ল্যানচেটে সেটা ভূত নামার লক্ষণ।

আমরা টেবিলের উপর থেকে হাত সরাবি না, কিন্তু বেশ বুঝতে পারছি হাত আর অনড় নেই, টেবিলের সঙ্গে সঙ্গে উঠছে নামছে।

‘আ—১-১-১—’

শব্দটা উৎপলবাবুর গলা থেকে বেরোল। আগে থেকেই অর্ধেন্দুবাবুকে বলা ছিল। উনি কাঁপা গলায় প্রশ্ন করলেন,—

‘ইজ এনিওয়ান হিয়ার?’

উৎপলবাবুর মুখ থেকে সম্পূর্ণ সাহেবী গলায় উত্তর এল—

‘ইয়েস।’

‘হু ইজ ইট?’

‘মাই নেম ইজ নরিস।’

বাকি কথাও ইংরেজিতেই হল, এবং নরিস সাহেবের ইংরেজি যাকে বলে বেশ চোস্ত ইংরেজি। আমি কথোপকথনটা মোটামুটি বাংলাতেই বলছি।

অর্ধেন্দুবাবু বললেন, ‘এই বাংলো কি তোমার বাসস্থান ছিল?’

‘ইয়েস।’

‘তুমি কি করতে হাজারিবাগে?’

‘আমার অফিসের খনি ছিল।’

‘শহরে আরো সাহেব ছিল?’

‘ইয়েস। অফিসের খনির মালিকদের একটা ক্লাব ছিল, ডিস্টোরিয়া ক্লাব। আমি সে ক্লাবের সদস্য ছিলাম।’

‘এই বাড়িতে তোমার আগে হালদার বলে একজন ছিলেন ?’

‘হ্যাঁ, ছিলেন !’

‘তিনি কি এই বাড়ি তোমাকে দিয়ে যান ?’

‘হ্যাঁ ।’

‘তারপর তিনি কোথায় যান ?’

‘কলকাতায় । সেখানেই মৃত্যু হয় ।’

‘তুমি কি আত্মহত্যা করেছিলে ?’

উত্তর আসতে একটু সময় লাগল ।

‘হ্যাঁ ।’

‘কী ভাবে ?’

‘রিভলভার দিয়ে মাথায় গুলি মেরে ।’

‘কেন ?’

‘আমার আর বাঁচার ইচ্ছে ছিল না ।’

‘বুঝেছি ! কিন্তু এমন মনের ভাব হল কেন ?’

‘আজ এই পর্যন্তই থাক । বড় ক্লান্ত লাগছে ।’

বুঝতে পারলাম উৎপলবাবুরই আসলে ক্লান্ত লাগছে । আমি লাইটার দিয়ে মোমবাতিটা জ্বালিয়ে দিলাম । উৎপলবাবুর মাথা হেঁট হয়ে বুকের উপর নুইয়ে পড়েছে । কাঁধ ধরে ঝাঁকুনি দিতে তাঁর জ্ঞান আবার ফিরে এল । মাথাটা ঝাড়া দিয়ে হঠাৎ নিজের গলায় প্রশ্ন করলেন—

‘কেমন হল ?’

‘খুব ভালো,’ বললেন অর্ধেন্দুবাবু । ‘বোঝাই যাচ্ছে মহেশ হালদার এখানকার পাট উঠিয়ে দিয়ে বাংলাটা নরিসকে বিক্রি করে কলকাতা চলে যান । আর সেখানেই তাঁর মৃত্যু হয় । অর্থাৎ যতদূর মনে হয় হালদার বংশের ওখানেই শেষ । ...অনেক ধন্যবাদ, উৎপলবাবু ।’

আমার কিন্তু মনে একটা খটকা লেগেছে যেটা আমাকে ভাবিয়ে তুলল । নরিস সাহেবের মৃত্যুর কারণটা ঠিক পরিষ্কার হল না । আমার এখন হালদারের চেয়ে নরিসের উপরই ঝোঁকটা বেশি । অবিশ্যি উৎপলবাবুকে যা যা প্রশ্ন করা হয়েছে তার উত্তর তিনি ঠিক ভাবেই দিয়েছেন ।

আমি রাস্তিরে অনেকক্ষণ ধরে এই ব্যাপারটা নিয়ে ভাবলাম, তারপর সকালে উঠে অর্ধেন্দুবাবুর হোটেল গিয়ে সোজাসুজি বললাম যে আমি আরেকবার প্ল্যানচেস্ট করতে চাই, এবং এবার প্রশ্নগুলি আমি করব । অর্ধেন্দুবাবু বললেন, ‘আমার আপত্তি নেই, তবে আপনি হালদার বংশ সম্বন্ধে আর কী নতুন তথ্য জানার আশা করছেন তা জানি না ।’

আমি বললাম, ‘সত্যি বলতে কি, আমি নরিস সম্বন্ধে আরো কিছু



জানতে চাই । লোকটিকে বেশ ইন্টারেস্টিং বলে মনে হল ।’

উৎপলবাবু আমাদের প্রস্তাবে রাজি হয়ে গেলেন ।

আমরা আবার দশটার সময় সাহেবের বাংলোতে জমায়েত হলাম ।
আমি উৎপলবাবুকে ঠাট্টা করে বললাম, ‘আজ ত অুমাবস্যা নয় ।
প্ল্যানচেট ঠিকমতো হবে ত ?’

উৎপলবাবু বললেন, ‘মনে ত হয় । এ ভদ্রলোকের আত্মা বেশ
সহজেই ধরা দেয় ।’

অর্ধেন্দুবাবু বললেন, ‘আমি সবই বরদাস্ত করতে পারি, কিন্তু আপনার
গলা দিয়ে যখন অন্য লোকের স্বর বেরোয় তখন মেরুদণ্ডটা কেমন যেন
শির শির করে ।’

আমরা সোয়া দশটার মধ্যে তৈরি হয়ে নিলাম । পনের মিনিটের
মধ্যেই টেবিল নড়া আর উৎপলবাবুর গলা থেকে ‘আ’ শব্দ শুনে বুঝলাম
যে প্রেতাত্মা হাজির ।

এবার আমি প্রশ্ন করলাম—‘ইজ এনিবডি হিয়ার ?’

নরিসের কণ্ঠস্বরে উত্তর এল—

‘ইয়েস ।’

‘আর ইউ মিস্টার নরিস ?’

‘ইয়েস ।’

‘মিস্টার নরিস, তোমাকে দুবার বিরক্ত করার জন্য ক্ষমা চাইছি ; কিন্তু কাল একটা প্রশ্নের ঠিক জবাব মেলেনি, তাই আবার তোমাকে ডাকলাম ।’

‘কী প্রশ্ন ?’

‘তোমার জীবনের উপর এতটা বিতৃষ্ণা এল কেন যে আত্মহত্যা করলে ?’

একটুক্ষণ কোনো কথা নেই । তারপর ইংরাজিতে উত্তর এল—

‘আমাকে প্রচণ্ডভাবে অপমান করা হয়েছিল ।’

‘কে করেছিল অপমান ?’

‘মেজর টমসন ।’

‘ঘটনাটা কোথায় হয় ?’

‘আমাদের ক্লাবে ।’

‘কিন্তু অপমানের কারণটা কী ?’

‘তাহলে অনেক কথা বলতে হয় ।’

‘বলুন । আমরা শুনতেই এসেছি ।’

‘আমি এক বেয়ারাকে একদিন হিন্দিতে একটা কথা বলেছিলাম । সেটা মেজর টমসন শুনে ফেলেছিলেন ।’

‘তাতে কী হল ?’

‘তাতে তিনি বুঝে ফেলেছিলেন আমি সাহেব নই ।’

‘আপনি সাহেব নন ?’

‘না । তবে আমার চেহারা সাহেবের সঙ্গে কোনো পার্থক্য ছিল না । আমার চুল ছিল কটা, চোখ নীল, আর গায়ের রঙ সাহেবের মতো ফরসা । আমি মিশনারি স্কুলে পাদ্রীদের কাছে ইংরেজি শিখেছিলাম । সেই ইংরেজি শুনে আমার চেহারা দেখে কারুর বোঝার সাধ্য ছিল না যে আমি সাহেব নই । আমাদের ক্লাবে ভারতীয়দের প্রবেশ নিষিদ্ধ ছিল, কিন্তু আমি নরিস নাম নিয়ে ক্লাবে ঢুকতে পেরেছিলাম । এই ক্লাবে আমি সাড়ে তিন বছর মেম্বর ছিলাম । তারপর টমসনের কাছে ধরা পড়ে গেলাম । সে সকলের সামনে আমাকে নেটিভ বলে ক্লাব থেকে লাথি মেরে বার করে দেয় ।’

‘আসলে তুমি কী ছিলে ?’

‘আমি ছিলাম বাঙালি । আমার নাম ছিল নরেশ । নরেশ থেকে নরিস ।’

আমি হঠাৎ যেন চোখের সামনে একটা আলো দেখতে পেলাম । বললাম,

‘তুমি কি মহেশ হালদারের কোনো আত্মীয় ছিলে ?’

‘আমি ছিলাম মহেশ হালদারের একমাত্র ছেলে । বাবা তাঁর অভ্রের খনির ভার আমার উপর দিয়ে কলকাতায় চলে যান । সেইখানেই তাঁর মৃত্যু হয় । আমি বিয়ে করিনি । আমি হালদার বংশের শেষ প্রতিনিধি ।’

বাকি কথাটা নরেশ বাংলাতেই বললেন ।

‘আজ তাহলে আমি আসি, কারণ এ ধরনের কথোপকথন আমার পক্ষে বড় ক্লাস্তিকর ।’

‘আপনাকে অশেষ ধন্যবাদ ।’

‘আমারও অনেক হাল্কা লাগছে । অ্যাডিন পরে বাংলা বলে আরাম পাচ্ছি, আর সাহেব সেজে কী যে ভুল করেছিলাম সেটা নতুন করে বুঝতে পেরেছি ।’

মোমবাতি জ্বালিয়ে দিলাম ।

এখন আর আমার মনে কোনো খটকা রইলো না, আর অর্ধেন্দুবাবুর হালদার বংশের ইতিহাসের শেষ পর্ব শেষ হল ।

তবে এটাও বুঝতে পারলাম যে উৎপলবাবুকে না পেলে মিঃ নরিসের রহস্য রহস্যই থেকে যেত ।

গণংকার তারিণীখুড়ো

তারিণীখুড়োর এক ভাইপো এক চা কোম্পানিতে ভালো কাজ করে, সে খুড়োকে এক টিন স্পেশাল কোয়ালিটির চা দিয়েছে। খুড়ো টিনটা আমার হাতে চালান দিয়ে বললেন, ‘এটা খোলাবার ব্যবস্থা কর ; আজ তোদের চা না খেয়ে এইটে খাবো।’

বৈশাখ মাসের এক রবিবারের সন্ধ্যা। দুপুরের দিকে কালবৈশাখী হয়ে গেছে, এখন সব শান্ত। আমাদের ঘরে খুড়োর শ্রোতারা সব জমায়েত হয়েছে, তার মধ্যে অবিশ্যি ন্যাপলাও আছে। ন্যাপলা বলল, ‘ভূতের গল্প অনেক হয়েছে খুড়ো ; আজ একটা অন্য কিছু হোক। আপনি একবার বলেছিলেন আপনি কিছুদিন গণংকারী করেছিলেন তখন একটা আশ্চর্য ঘটনা হয়। সে গল্প কিন্তু আজ অবধি শোনা হয়নি।’

‘ও, সে গল্প বলিনি বুঝি?’

আমরা সবাই একসঙ্গে না বললাম।

খুড়ো বললেন, ‘আগে ওই নতুন চা-টায় একটা চুমুক দিয়ে নিই। কাপে ঠোট ঠেকাতে না পারলে গল্প খোলে না।’

পাঁচ মিনিটের মধ্যেই চা এসে গেল, ভুরভুরে সুগন্ধ, খুড়ো ওই গরম চাতেই একটা চুমুক দিয়ে বললেন, ‘বাঃ, খাসা চা।’ তারপর একটা এক্সপোর্ট কোয়ালিটি বিড়ি ধরিয়ে নিয়ে গল্প আরম্ভ করলেন।

ঘটনাটা ঘটে নাগপুরে। আমি বোম্বাই গেস্লাম যদি ফিল্মে কিছু কাজ পাওয়া যায়। তার মানে মনে করিস না যে আমার ফিল্মে অভিনয় করার ইচ্ছে ছিল। তা নয় মোটেই। আমি প্রোডাকশন ম্যানেজারের কাজটা ভালো জানতাম ; টালিগঞ্জে দুটো ছবিতে ওই কাজ করেছি, তাই সেই দিকেই চেষ্টা করছিলাম। একটা ছবিতে কাজ জুটেও গেল।

আমি থাকি ভিলে পার্লেতে একটা দোতলা বাড়ির একতলায় একটা ছোট ফ্ল্যাটে। পুরো দোতলাটা নিয়ে থাকেন বম্বের এক বিখ্যাত জ্যোতিষী মুকুন্দ পটবর্ধন। দিশি মতে হাত দেখিয়ে হিসেবে তার খুব নাম ডাক। আমার প্রতিবেশী, তাই আমার সঙ্গে আলাপ হয়ে গেল। কেন জানিনা, ভদ্রলোকের আমাকে খুব ভালো লেগে গেল। বললেন,

‘তোমাকে আমি পামিস্ট্রি শিখিয়ে দেব ।’

যে কথা সেই কাজ । কাজের পর রাত্তিরে ভদ্রলোকের ঘরে বসে হস্তরেখা গণনা শিখতে আরম্ভ করলাম । অদ্ভুত সাবজেক্ট । নেশা ধরে গেল । দু মাসের মধ্যে দেখি আমিও বেশ হাত দেখতে পারছি । স্টুডিওর কয়েকজনের হাত দেখে অতীত ভবিষ্যৎ বলে দিলাম, এক প্রোডিউসারের ছবি হিট হবে সেটা বলে দিলাম, আর ফলেও গেল ।

শেষটায় একটা সময় এল যখন মনে হল আমি নিজেই এ কাজ করে রোজগার করতে পারি । এক কাজে বেশি দিন টিকতে পারি না সেটা ত তাদের বলেইছি, তাই ফিল্মের লাইন ছেড়ে পামিস্ট্রি ধরলাম । কিন্তু বস্বেতে নয় । বস্বেতে এ কাজে পটবর্ধন একচ্ছত্র অধিপতি । আমাকে অন্য জায়গা দেখতে হবে । চলে গেলুম নাগপুর । পাচপাণ্ডুলি অঞ্চলে রাস্তার ওপর একটা ঘর নিয়ে দরজার পাশে নোটিশ লটকে দিলুম— ‘এখানে সুলভে হস্তরেখা দেখে ভবিষ্যৎ গণনা করা হয় । বেঙ্গলের বিখ্যাত গণৎকার’ ইত্যাদি ।

দেখতে দেখতে পসার জমে উঠল । এরকম র‍্যাপিড সাক্সেস হবে তা আশা করিনি । এক বছরের মধ্যে একটা বড় ফ্ল্যাটে উঠে যেতে হল, একটা বি. এ. পাশ ছোকরা সেক্রেটারি রাখতে হল । সারা ভারতবর্ষ থেকে হাতের ছাপ আসে, সেই ছাপ দেখে আমি ইংরাজিতে গণনা করি, সেক্রেটারি সেগুলো টাইপ করে যথাস্থানে পাঠিয়ে দেয় । বেশির ভাগ মক্কেলই হচ্ছে ব্যবসাদার, আর তাদের মধ্যে বেশির ভাগই মারোয়াড়ি । মাসে রোজগার তখন আমার প্রায় তিন হাজার টাকা, আর আমার বয়স তখন বত্রিশ তা হলে কদিন আগের কথা বুঝতেই পারছি ।

এর মধ্যে একদিন এক ভদ্রলোক এলেন, ফর্সা একহারা চেহারা, চোখে চশমা, পরণে বিলিতি পোষাক । বয়স আন্দাজ বছর ত্রিশেক । তিনি তাঁর হাতটা দেখিয়ে বললেন, ‘আমি শুধু একটা জিনিস জানতে চাই । আমি একটা নতুন চাকরিতে জয়েন করছি । সে কাজটা ঠিক হচ্ছে না ভুল হচ্ছে ?’

আমি হাতের রেখা দেখে বললাম, ‘যা করতে যাচ্ছ করো । তোমার নতুন চাকরিতে উন্নতি হবে ।’

‘ভেরি গুড’, বললেন ভদ্রলোক । ‘এবার আমি তোমাকে একটা জিনিস দেখাতে চাই ।’

আমি আগেই লক্ষ্য করেছিলাম যে ভদ্রলোকের কাঁধে একটা নকসাদার কাপড়ের ব্যাগ ঝুলছে । ভদ্রলোক তার মধ্যে থেকে একটা বেশ বড় খাম বার করে তার ডিতর থেকে এক শিট কাগজ টেনে বার করলেন । কাগজটা পুরোনো তা দেখলেই বোঝা যায় । সেই কাগজে রয়েছে কালো

কালিতে একটা রেখা সমেত হাতের ছাপ । ভদ্রলোক সেটা আমার দিকে এগিয়ে দিলেন । কাগজের উপর দিকে ডান কোনায় একটা তারিখ লেখা রয়েছে সেটা পনেরো বছর আগের ।

আমি জিজ্ঞেস করলাম, ‘এটা কার হাতের ছাপ ?’

‘আমার বাবার’, বললেন ভদ্রলোক । একটা পুরনো বাস্ম ঘাঁটতে ঘাঁটতে বেরিয়ে পড়ল । মনে হয় এটা উনি নিয়েছিলেন বন্দের গণৎকার পটবর্ধনকে পাঠানোর জন্য । কিন্তু ঘটনাচক্রে সেটা আর হয়ে ওঠেনি ।’

‘আমাকে কি এখন এই হস্তরেখা দেখে গণনা করতে হবে ?’

‘হ্যাঁ । বিশেষ কয়েকটা তথ্য ।’

‘আপনার বাবার বয়স তখন কত ছিল ?’

‘পঞ্চাশ ।’

আমি হাতের রেখা বিচার করে একটা অদ্ভুত তথ্য আবিষ্কার করলাম । ভদ্রলোকের মৃত্যু হয়েছে ওই পঞ্চাশ বছর বয়সেই । সেটা আমি বললাম আমার মক্কেলকে ।

‘স্বাভাবিক মৃত্যু কি ?’ জিজ্ঞেস করলেন মক্কেল ।

আমি আবার ভালো করে দেখলাম ছাপটা ! তারপর বললাম, ‘রেখা স্পষ্ট বলছে অপঘাত মৃত্যু, স্বাভাবিক নয় ।’

‘এ বিষয় আপনি নিশ্চিত ?’

‘অ্যাবসোলিউটলি’, আমি জোর দিয়ে বললাম ।

‘তাহলে আপনাকে ঘটনাটা একটু খুলে বলি’, বললেন ভদ্রলোক । ‘আমার বাবার নাম ছিল প্রকাশচন্দ্র মাথুর । আমি বাবার একমাত্র সন্তান । আমার মা আমাকে জন্ম দিতে মারা যান ; আমি মানুষ হই এক বিধবা পিসির কাছে । আমার নাম সুরেশ মাথুর । বাবা ব্যবসাদার ছিলেন । বাবার একজন অংশীদার ছিল, নাম গজানন আপ্টে । আজ থেকে পনেরো বছর আগে— তখন আমার বয়স সতের— বাবা একটা বিশেষ কারণে খুব কষ্ট পান । বাবাকে এত বিচলিত হতে আমি কখনও দেখিনি । আমি কারণ জিজ্ঞেস করতে বাবা বলেন, ‘যাকে আপনার জন বলে মনে করা যায়, সে যদি বিশ্বাসঘাতকতা করে তা হলে যত কষ্ট পেতে হয় তেমন আর কিছুতে হয় না ।’ আমার স্বভাবতই বাবার বিজনেস পার্টনারের কথা মনে হয় ; কিন্তু বাবা এই নিয়ে আর কিছু বলতে চান না । এর কিছুদিন পরেই একদিন বিকেলে আপিসে বাবাকে চেয়ারে বসা অবস্থায় তাঁর টেবিলের উপর ছমড়ি খেয়ে পড়ে থাকতে দেখা যায় । তখনই ডাক্তার ডাকা হয় । ততক্ষণে বাবা মারা গেছেন । ডাক্তার বলেন হার্ট অ্যাটাক । আমার ইচ্ছা ছিল পুলিশ ডাকার, কারণ আমার সন্দেহ হয়েছিল বাবাকে হত্যা করা হয়েছে । বাবা তাঁর

অংশীদারের কীর্তি ধরে ফেলেছেন, তাই তাঁকে मेरे তাঁর মুখ বন্ধ করা হয়েছে। কিন্তু আমার তখন মাত্র সতেরো বছর বয়স— আমার কথা কে শুনবে? আজ আপনার গণনায় জানতে পারছি যে আমার ধারণাই ঠিক ছিল, বাবাকে খুনই করা হয়েছিল।’

আমি বললাম, ‘যাই হোক, যা হবার হয়ে গেছে। এতদিন আগের খুনের ব্যাপারে আজকে ত আর তুমি কিছু করতে পারবে না।’

সুরেশ মাথুর ধন্যবাদ দিয়ে আমার পারিশ্রমিক চুকিয়ে দিয়ে চলে গেল।

এই ঘটনার প্রায় ছমাস পরে একদিন হঠাৎ আমার কাছে এক মক্কেল এসে হাজির, বছর ষাট-ষাটটি বয়স, ঘি খাওয়া চেহারা, বললেন তিনি একজন ব্যবসাদার, একটা নতুন ব্যবসায়ে টাকা ঢালতে যাচ্ছেন, তার ফলাফল কী হবে সেটা জানতে চান। সামনে তাঁর কোনও আর্থিক বিপর্যয় আছে কি?

আমি জিজ্ঞেস করতে বললেন তাঁর নাম গজানন আপ্টে। আমি ত শুনে অবাক।

যাই হোক, মক্কেল যখন, তখন তাঁকে অ্যাটেন্ড করতেই হবে। আমি তাঁকে আমার ফরাসে বসালাম। তারপর আমার একটা প্রশ্ন ছিল সেটা করলাম।

‘আপনার বয়স কত?’

ভদ্রলোক বললেন, ‘ছেষটি।’

আমি হাতের রেখার দিকে মন দিলাম। দেখি যে নতুন ব্যবসা ফাঁদার কোনও প্রশ্ন আসছে না। এই বছরই ভদ্রলোকের মৃত্যু এবং সেটা অপঘাত মৃত্যু। সে কথা তো আর তাঁকে বলতে পারি না; বললাম, ‘তোমার নতুন ব্যবসায়ে টাকা ঢেলে কোনও সুফল হবে না; তুমি যা করছ তাই করো।’

‘তুমি ঠিক বলছ?’ ভদ্রলোক আবার প্রশ্ন করলেন। ‘আমি কিন্তু অনেক ভেবে চিন্তে এই পস্থা স্থির করেছি।’

আমি ভদ্রলোককে আবার বারণ করলাম। তাঁর হাতের তেলো আমার সামনে খোলা, আমি তখনও মনে মনে গণনা করে চলেছি। হঠাৎ একটা ব্যাপার দেখে আমি স্তম্ভিত হয়ে গেলাম।

ভদ্রলোকের হাতে স্পষ্ট দেখা যাচ্ছে তিনি পনেরো বছর আগে একটা খুন করেছেন। সাংঘাতিক ফাঁড়া, কিন্তু সে ফাঁড়া তিনি কাটিয়ে উঠেছেন সে কথাও হাতে রয়েছে।

আমি অবশ্যি এ বিষয় আর কিছু বললাম না। ভদ্রলোক আমাকে টাকা দিয়ে আমার কাছ থেকে বিদায় নিয়ে চলে গেলেন। আমি আবার



বলে দিলাম যে নতুন ব্যবসায় টাকা ঢেলে কোনও ভালো ফল হবে না।

এর সাতদিন পরে সুরেশ মাথুর আবার এসে হাজির। আমি বললাম, 'কী ব্যাপার?'

মাথুরকে বিশেষভাবে উত্তেজিত বলে মনে হচ্ছিল। সে বলল যে এর মধ্যে নাকি গজানন আপ্টের আপিসে গিয়েছিল। আপ্ট ছিলেন না কিন্তু তাঁর সেক্রেটারি ছিল। সেটা জেনে শুনেই নাকি মাথুর গিয়েছিল। সেক্রেটারি নাকি বিশ বছর ধরে ওই আপিসে চাকরি করছে। তার সঙ্গে কথা বলার দরকার ছিল মাথুরের। মাথুর তাকে তার বাপের মৃত্যুর কথা জিজ্ঞেস করে। সেক্রেটারি বলে তার ঘটনাটা পরিষ্কার মনে আছে। সে প্রকাশ মাথুরের বিশেষ অনুরক্ত ছিল। সে বলে বিকেলে কফি খাবার পরই নাকি প্রকাশ মাথুর মারা যান। সেক্রেটারি সন্দেহ করেছিল যে কফিতে বিষ মেশানো হয়েছে, কিন্তু ডাক্তারের মুখের উপর সে কোনও কথা বলতে পারেনি।

'তা হলে এখন তোমার কী মতলব?' আমি সুরেশ মাথুরকে জিজ্ঞেস করলাম।

সুরেশ চাপা স্বরে বলল, 'আমি বাবার মৃত্যুর প্রতিশোধ নেব।'

'সে কী? কী করে?'

'যে করে হোক।'

আমি যে ইতিমধ্যে গজানন আপ্টের হাত দেখেছি আর জেনেছি যে তাঁর আয়ু ফুরিয়ে এসেছে, সে বিষয় আর কিছু বললাম না। সুরেশ মাথুর প্রতিশোধের সংকল্প নিয়ে আমার আপিস থেকে বেরিয়ে গেল।

এর তিন দিন পরে খবরটা খবরের কাগজে বেরোল। গজানন আপ্ট খুন হয়েছেন। তিনি ইটওয়ারি রোডে থাকতেন, রোজ সন্ধ্যায় আপিসের পর জুমা তালাও-এর পাশে হাঁটতে যেতেন। সেই হাঁটা অবস্থায় পিছন থেকে কেউ এসে তাঁকে কোনও ভারী অস্ত্র দিয়ে মাথায় মেরে খুন করেছে। পুলিশ আততায়ীর অনুসন্ধান করছে।

কিন্তু আমি তো সুরেশ মাথুরের হাত দেখেছি। আমি জানি তার এখন একটা ফাঁড়া আছে, কিন্তু এ ফাঁড়া সে কাটিয়ে উঠবে।

শেষ পর্যন্ত হলও তাই। পুলিশ খুনিকে ধরতে পারল না, এবং গজানন আপ্টের খুন 'আনসল্ভড ক্রাইম্‌স্'-এর পর্যায়ে ফেলে দেওয়া হল।

সুরেশ মাথুর যে শুধু পারই পেল তা নয়। আমি জানি যে বিরাশি বছরের আগে তার মৃত্যু নেই, এবং সে মৃত্যু স্বাভাবিক মৃত্যু।

অন্তত তার হাতের রেখা তাই বলে।

গল্প বলিয়ে তারিণীখুড়ো

‘তোরা ত আমাকে গল্পবলিয়ে বলেই জানিস,’ বললেন তারিণীখুড়ো, ‘কিন্তু এই গল্প বলে যে আমি এককালে রোজগার করেছি সেটা কি জানিস?’

‘না বললে জানব কী করে?’ বলল ন্যাপলা।

‘সে আজ থেকে বাইশ বছর আগের কথা,’ বললেন তারিণীখুড়ো। ‘বস্বেতে আছি, ফ্রি প্রেস জার্নাল কাগজে এডিটরের কাজ করছি, এমন সময় একটা বিজ্ঞাপন দেখলাম—আমেদাবাদের এক ধনী ব্যবসায়ী একজন গল্পবলিয়ার সন্ধান করছে। ভারি মজার বিজ্ঞাপন। হেডলাইন হচ্ছে “ওয়ানটেড এ স্টোরি টেলার।” তারপর লেখা আছে যে আমেদাবাদের একজন কাপড়ের ব্যবসায়ী বলবন্ত পারেখ একটি ব্যক্তির সন্ধান করছেন যে তাঁকে প্রয়োজন মতো একটি করে মৌলিক গল্প শোনাবে। সে’ লোক বাঙালি হলে ভালো হয়, কারণ বাঙালিরা খুব ভালো গল্প লেখে। বুঝে দেখ—“মৌলিক” গল্প। অন্যের লেখা ছাপা গল্প হলে চলবে না। সেরকম গল্প ত পৃথিবীতে হাজার হাজার আছে। কিন্তু এ লোক চাইছে এমন গল্প যা আগে কোথাও প্রকাশিত হয়নি। এখন ব্যাপারটা হচ্ছে কি, আমার পক্ষে গল্প তৈরি করা খুব কঠিন নয়। আমার জীবনের এতরকম অভিজ্ঞতা হয়েছে, তাতেই একটু-আধটু রং চড়িয়ে রদবদল করে বলে নিলেই সেটা গল্প হয়ে যায়। তাই কপাল ঠুকে অ্যাপ্লাই করে দিলুম। এটাও জানিয়ে দিলুম যে আমি গুজরাটি জানি না, তাই গল্প বললে হয় ইংরিজিতে না হয় হিন্দিতে বলতে হবে। হিন্দিটা আমার বেশ ভালো রকমই রপ্ত ছিল আর ইংরিজি-ত কলেজে আমার সাবজেক্টই ছিল। সাতদিনে উত্তর এসে গেল। পারেখ সাহেব জানালেন ওঁর ইনসমনিয়া আছে, রাত সাড়ে তিনটে চারটের আগে ঘুমোন না, সেই সময়টা গল্প শুনতে চান। রোজ নয়, যেদিন মন চাইবে। মাইনে মাসে হাজার টাকা।’

‘আমি আমার বস্ত্রের খবরের কাগজের চাকরি ছেড়ে দিলুম। দেড় বছর করেছি এক কাজ, আর এমনিতেও ভালো লাগছিল না।’

বুড়ো থেমে দুধ চিনি ছাড়া চায়ে একটা চুমুক দিয়ে আবার শুরু



করলেন ।

আমেদাবাদ গিয়ে জানলুম পারেখ সাহেবের কাপড়ের মিল আছে, বিরাট ধনী লোক । বাড়িটাও পেছায়, অন্তত বারো-চোদ্দখানা ঘর । তার একটাতেই আমাকে থাকতে দিলেন । বললেন, ‘তোমার ডিউটির ত কোনও ধরা বাঁধা সময় নেই । মাঝরাতিরে তোমায় ডাকব—অন্য জায়গায় থাকলে চলবে কি করে । তুমি আমার বাড়িতেই থাক ।’ ভদ্রলোকের বয়স পঁয়তাল্লিশের বেশি না । অর্থাৎ আমারই বয়সী । দুই ভাইপো আছে, হীরালাল আর চুনীলাল—তারা কাকার ব্যবসায় লেগে গেছে । এর মধ্যে হীরালালের বিয়ে হয়ে গেছে, সে বউ আর দুটি ছেলে মেয়ে নিয়ে ওই একই বাড়িতে থাকে ।

খাওয়ার ব্যাপারে আমার কোনও ঝামেলা নেই । পারেখ সাহেব জিগ্যেস করলেন আমি কোনও স্পেশাল রান্না খাব কি না, আমি বলে দিলুম যে আমি গুজরাটি রান্নায় অভ্যস্ত ।

মোট কথা মাসখানেকের মধ্যেই বেশ গ্যাঁট হয়ে বসলাম । গল্প দেখলাম মাসে দশ দিনের বেশি বলতে হচ্ছে না । বাকি সময়টা খাতায় গল্পের প্লট নোট করে রাখতাম । ইচ্ছে করলে আমি নিজেই একজন গল্পলিখিয়ে হয়ে যেতে পারতাম, কিন্তু তাতে মাসে হাজার টাকা আয় হত না । ভূতের গল্প, শিকারের গল্প, ক্রাইমের গল্প—সাধারণত এইগুলোই ভদ্রলোক বেশি ভালোবাসতেন শুনতে । তোরা ত জানিসই ভূতের



অভিজ্ঞতা আমার অনেক হয়েছে। তেমনি রাজারাজড়াদের সঙ্গে শিকারও করেছি কম না। ক্রাইমের গল্পটা মাথা থেকে বার করে বলতুম, সেটা বেশ ভালোই উতরিয়ে যেত। মোটামুটি ভদ্রলোক আমার কাজে খুশিই ছিলেন।

মাস ছয়েক হয়ে গেছে এমন সময় একদিন সকালে এক ভদ্রলোক পারেখ সাহেবের সঙ্গে দেখা করতে এলেন। পারেখ সাহেব সেদিন একটু বেরিয়েছিলেন। আমি ভদ্রলোককে বৈঠকখানায় বসিয়ে জিগোস করলুম তাঁর কী দরকার। উনি বললেন ওঁর নাম মহাদেব দ্বিতীয়া, উনি একটা বিশেষ জনপ্রিয় গুজরাটি মাসিক পত্রিকা ললিতার সম্পাদক। ললিতার নাম আমি শুনেছিলাম। ওটার নাকি প্রায় এক লাখ সার্কুলেশন। আমি বললাম, ‘মিঃ পারেখের ফিরতে আঘঘণ্টাখানেক হবে, আপনি যদি বলেন, আপনার কী দরকার ছিল আমি সেটা ওঁকে জানিয়ে দিতে পারি।’

দ্বিতীয়া বললেন, ‘আমি ওঁর কাছ থেকে গল্প চাইতে এসেছি। ‘সাহিত্য’ পত্রিকায় উনি নিয়মিত লিখছেন কয়েক মাস থেকে। আমার গল্পগুলো খুব ভালো লেগেছে, তাই ভাবছিলাম আমাদের কাগজে যদি লেখা দেন। আমাদের পাঠক সংখ্যা সাহিত্যের প্রায় দেড়।’

‘উনি গল্প লিখছেন?’ আমি একটু অবাক হয়েই জিগোস করলাম।

‘আপনি জানেন না?’ ভদ্রলোকও অবাক।



‘না । একেবারেই জানি না ।’

‘ভেরি গুড স্টোরিজ । আর ওঁর গল্পের খুব ডিমান্ড হয়েছে । সাহিত্যের গ্রাহক সংখ্যা বেড়ে গেছে । আপনি গুজরাটি পড়তে পারেন ?’

‘একটু একটু । হিন্দির সঙ্গে সামান্য মিল আছে ত ।’

‘এই দেখুন ওঁর একটা গল্প ।’

দুতিয়া একটা থলি থেকে একটা পত্রিকা বার করে একটা পাতা খুলে দেখাল । লেখকের নামটা পড়তে আমার কোনও অসুবিধা হল না ।

‘এ গল্প তুমি পড়েছ ?’

‘সার্টেনলি । খুব ভালো গল্প ।’

‘গল্পের মোটামুটি ব্যাপারটা খুব সংক্ষেপে আমাকে বলতে পার ?’

দুতিয়া বললেন, এবং আমি বুঝলাম যে সেটা আমারই বলা একটা



গল্প । ভদ্রলোকের কাহিনীকার হবার শখ হয়েছে, কিন্তু নিজের মাথায় প্লট আসে না, তাই অন্যের কাছ থেকে শোনা মৌলিক গল্প নিজের বলে চালাচ্ছেন । গল্পবলিয়ে বাঙালি হবার প্রয়োজনও এখন বুঝলাম । আমি গুজরাটি হলে ত এ ব্যাপারটা অনেক আগেই জেনে ফেলতাম । এভাবে ঘটনাচক্রে দুতিয়ার কাছ থেকে জানার কোনও প্রয়োজন হত না ।

আমি বললাম, ‘আপনি কি বসবেন ? না আরেকদিন আসবেন ? অবিশ্যি আমিও ওঁকে ব্যাপারটা বলে দিতে পারি ।’

‘আমি নিজেই আসব । কাল সকালে এলে দেখা হবে কি ?’

‘এগারোটা নাগাদ এলে নিশ্চয়ই হবে । মিঃ পারেখ একটু দেরিতে ওঠেন ।’

মিঃ দুতিয়া চলে গেলেন ।

আমি আবার মন দিয়ে ব্যাপারটা উপলব্ধি করার চেষ্টা করলাম।
ব্যাপার খুবই সোজা। লোকটা শ্রেফ আমাকে না জানিয়ে আমার নাম
ভাঙিয়ে নিজে নাম করছে।

নাঃ—এর একটা বিহিত না করলেই নয়। এ জিনিস বরদাস্ত করা
যায় না। অথচ লোকটাকে দেখে একবারও বুঝতে পারিনি যে সে এত
অসৎ হতে পারে।

পরদিন দোতলায় আমার ঘরের জানালা থেকে দেখলাম এগারোটার
সময় একটা পুরোন ফোর্ড গাড়ি এসে পারেখের বাড়ির সামনে থামল
আর তার থেকে দুতিয়া নামলেন। এবার থেকে ললিতা পত্রিকায় চোখ
রাখতে হবে। পারেখের কোনও গল্প বেরোয় কিনা সেটা দেখতে হবে।
কিন্তু এর প্রতিকার হয় কী করে? এ জিনিস ত চলতে দেওয়া যায় না।

রাত্তিরে ডাক পড়ল। গেলুম। পারেখ বললে গল্প শুনবে। আমার
ভাবাই ছিল। আমি বলে গেলুম। গল্পের শেষে আমায় তারিফও
করলে। বললে, ‘দিস ইজ ওয়ান অফ ইওর বেস্ট।’

এক মাস পরের কথা। এর মধ্যে আরও আট-দশটা গল্প বলা হয়ে
গেছে। একদিন সকালে পারেখ বেরিয়েছে, আমি আমার ঘরে বসে
আছি। এমন সময় পারেখের ভাইপো হীরালাল এসে বলল আমার
টেলিফোন আছে।

আমি নীচে আপিসে গেলুম। ফোন তুলে হ্যালো বলে দেখলুম
ললিতার সম্পাদক দুতিয়া কথা বলছেন। বললেন, ‘মিঃ পারেখ নেই
শুনছি।’

‘না, উনি একটু বেরিয়েছেন।’

‘বিশেষ জরুরি দরকার ছিল। তা আপনি কি একবার আমার আপিসে
আসতে পারবেন? ঠিকানাটা টেলিফোন ডিরেক্টরিতেই পাবেন।’

আমি বললাম, ‘এখান থেকে কতদূর আপনার আপিস?’

‘ট্যাক্সিতে এলে দশ মিনিটে পৌঁছে যাবেন।’

‘বেশ, আমি আসছি।’

ললিতার আপিস দেখলেই বোঝা যায় তাদের অবস্থা খুব সচ্ছল।
বেশ বড় ঘরে একটা বড় টেবিলের পিছনে দুতিয়া তিনটে টেলিফোন
সামনে নিয়ে বসে আছেন। আমাকে দেখেই উত্তেজিত হয়ে বললেন,
‘কেলেকারি ব্যাপার!’

‘কী হল?’

‘মিঃ প্যারেখ আমাদের একটা গল্প পাঠিয়েছিলেন—চমৎকার গল্প ।
আমরা সেটা ছাপিয়েছিলাম । তারপর থেকে অন্তত দেড়শো চিঠি
পেয়েছি—পাঠকরা বলছে গল্পটা চুরি—এর মূল লেখক হচ্ছেন তোমাদের
বাংলাদেশের শরৎচন্দ্র চ্যাটার্জি ।’



ডুমনিগড়ের মানুষখেকো

‘আমি তখন ছিলাম ডুমনিগড় নেটিভ স্টেটের ম্যানেজার’, বললেন তারিণীখুড়ো।

‘ডুমনিগড় ম্যাপে আছে?’ জিগ্যেস করল ন্যাপলা। ন্যাপলার মুখে কিছু আটকায় না।

‘তোর কি ধারণা ম্যাপে যা আছে তার বাইরে আর কিছু নেই?’ চোখ-কান কুঁচকে বিস্ময় আর বিরক্তি দুটোই একসঙ্গে প্রকাশ করে বললেন তারিণীখুড়ো। ‘ম্যাপ তৈরি করে কারা? মানুষে ত! ভগবানের সৃষ্টিতে ডিফেক্ট থাকে জানিস? জোড়া মানুষ সায়ামীজ টুইন্সের কথা শুনিসনি? হাতে ছটা করে আঙুল, বাছুরের দুটো মাথা—এসব শুনিসনি?—ম্যাপে নেই ডুমনিগড়। এই নিয়ে ফিলিপ্সের অ্যাটলাস কোম্পানিকে কড়া চিঠি দিয়েছিলাম সেই সময়। তারা লিখলে, ভেরি সরি, আগামী সংস্করণে শুধরে দেবে। দেয়নি যে, সেটা শ্রেফ গাফিলতি। ডুমনিগড় হচ্ছে মধ্যপ্রদেশের বাঘেলখণ্ডে। মাইহার অবধি ট্রেন, তারপর একশো বত্রিশ কিলোমিটার পূবে গাড়িতে। হল?’

ন্যাপলা চুপ মেরে গেল। আমরাও বাঁচলাম, কারণ তারিণীখুড়োর গল্প শোনার আগ্রহ আমাদের সকলের সমান, ন্যাপলারও। খুড়ো আসলে আমাদের কেউ হন না, তবে খুব ছেলেবেলা থেকেই দেখে আসছি ইনি মাঝে-মধ্যে আসেন আমাদের বাড়িতে। আমার জন্মের আগে বাবারা যখন ঢাকায় ছিলেন, তখন তারিণীখুড়ো ছিলেন আমাদের পড়শি। তাই খুড়ো। বাবারও খুড়ো, আমাদেরও খুড়ো। খুড়ো ছাড়া আর ঝুঁকে কেউ কিছু বলে ব’লে জানি না। বাবার কাছেই শুনেছি, যে, ভদ্রলোক নাকি চাকরির খান্দায় সারা ভারতবর্ষ ঘুরেছেন, আর অভিজ্ঞতাও হয়েছে বিচিত্ররকম। কাজেই গল্পের স্টক অটেল। খুড়ো বলেন যে শুধু আর্টের খাতিরে যেটুকু কল্পনার আশ্রয় নিতে হয় সেটুকু ছাড়া নাকি সবই সত্যি।

গল্পের প্রথম লাইন বলে থেমে গেছেন খুড়ো, কারণ তাঁর ফরমাশ-মতো দুধ-চিনি ছাড়া চা এসে গেছে। এ-জিনিসটি একটু বেশি রসিয়ে-রসিয়ে খাচ্ছেন দেখে ন্যাপলা অধৈর্য হয়ে বলল, ‘ডুমনিগড়ে হলটা কী?’

‘বলছি, বলছি,’ বললেন তারিণীখুড়ো। এই র’টি খাওয়ার অভ্যাস আমার ডুমনিগড় থেকেই। রাজা ভূদেব, সিং-এর হয়েছিল ডায়াবিটিস। এককালে সাত রঙের সাত রকম মিঠাই বরাদ্দ ছিল রোজ দুবেলা। তাছাড়া নিয়মিত মদ্যপান করতেন। আমার ডাক পড়ত সন্ধ্যাবেলা যেদিনই খুলতেন শঁপাঞ-এর বোতল।

‘শঁপাঞ?’—নামটা আমাদের সকলের কাছেই নতুন।

‘অশিক্ষিতরা যেটাকে বলে শ্যামপেন’, বললেন খুড়ো। ‘যাই হোক, রাজা একদিনে সব পরিত্যাগ করেন। আমার চোখের সামনে ষোলো স্টোন থেকে সাড়ে ন’ স্টোনে নেমে গেল ওজন। আর সেই সময়ই খুনটা হয়।’

‘খুন?’

আমাদের পাঁচজন শ্রোতার পাঁচ রকম গলায় একসঙ্গে উচ্চারিত হল প্রশ্নটা।

‘হ্যাঁ, খুন। রাজার তিন ছেলে—শ্রীপত, ভূপত আর অনুপ। ছোটটা রায়পুরে রাজকুমার কলেজে পড়ে, বড় দুটো পড়াশুনা শেষ ক’রে ডুমনিগড়েই থাকে। বড় শ্রীপতই হল খুন। শ্রীপতের ইয়ার ছিল নারায়ণ শ্রীমল। ধনী ব্যবসাদার ডুমনিগড়ের রাইস-কিং পুরুষোত্তম শ্রীমলের একমাত্র ছেলে। জুয়ার আড্ডা বসত নারায়ণের বাড়িতে। এক সন্ধ্যায় তুমুল বচসা হয় শ্রীপত আর নারায়ণে। প্রায় হাতাহাতি। শ্রীপত জিতছিল প্রায় বিশ হাজার টাকা। সেই সময় নারায়ণের হাতে তার জোচ্চুরি ধরা পড়ে যায়। নারায়ণ শাসায় তাকে খতম করবে বলে।

‘যাই হোক, খেলা শেষ করে বাড়ি ফিরছিল শ্রীপত। তখন রাত এগারোটা। হেঁটেই ফিরত। রাজবাড়ি থেকে শ্রীমলদের বাড়ি হাফ-এ-মাইল। পথে পড়ে রাম সরোবর। ভারী সুদৃশ্য লেক, ঠিক মধ্যখানে একটি শ্বেতপাথরের মিনি-প্রাসাদ, নৌকো করে যাওয়া যায় সেখানে। সেই লেকের ধারে কে জানি রিভলভার দিয়ে গুলি করে শ্রীপতকে। পয়েন্ট-ব্ল্যাক রেঞ্জ থেকে মেরেছে, এক গুলিতেই সাবাড়। পুলিশ নারায়ণকে সন্দেহ করে। সে যে শ্রীপতকে মারবে বলে শাসিয়েছে, সে-কথা জেরাতে আড্ডার সকলেই স্বীকার করে, কিন্তু শেষ পর্যন্ত উপযুক্ত প্রমাণের অভাবে নারায়ণ বেকসুর খালাস পেয়ে যায়। আমি অবশ্য খুনের সময় কাছেই ছিলাম।’

‘বলেন কী!’ আবার পাঁচটা গলা একসঙ্গে।

‘জোনাকি স্টাডি করছিলাম’, বললেন তারিণীখুড়ো। ‘সামনে দেওয়ালি—রাজাকে কথা দিয়েছিলাম পিদ্দিমের বদলে একটা নতুন ধরনের বাতির বন্দোবস্ত করব। ইলেকট্রিক নয়। কাঁচের টিউবের অর্ডার দিয়ে

দিয়েছিলাম । রাজবাড়ির যত ব্যালকনি আর যত বারান্দা সব কটার আলসে আর রেলিঙের উপর টিউব বসানো থাকবে, আর তার মধ্যে ছাড়া থাকবে জোনাকি । অবিশ্যি নিশ্বাস-প্রশ্বাসের জন্য ফুটো থাকবে টিউবে । নির্ঘাত চমকপ্রদ ব্যাপার হত, তবে বড়কুমারের মৃত্যুর জন্য সেবার আর কোনো ঘটনা হয়নি দেওয়ালিতে ।’

‘আপনি খুনিকে দেখেছিলেন ?’ জিগ্যেস করল ন্যাপলা ।

‘না, দেখিনি । গুলি করেই সে পালায় । তবে খুনের খবরটা আমিই দিই । আমি যদি অন্যমনস্ক না থাকতাম তাহলে হয়ত খুনিকে হাতে-নাতে ধরে ফেলতে পারতাম, কিন্তু সেটা হবার ছিল না । ফলে একটা জলজ্যান্ত অপরাধী চিরকালের মতো রেহাই পেয়ে গেল ।’


তারিণীখুড়ো বিড়ি ধরাতে থেমেছেন, আমরা মুখ চাওয়া-চাওয়ি করছি, গল্প শেষ কিনা তাও বুঝতে পারছি না, এমন সময় খুড়ো আবার শুরু করলেন ।

‘এদিকে বড় ছেলের মৃত্যুতে রাজা আঘাত পেয়েছেন খুবই, আর তাতে অসুখও গেছে বেড়ে । এমন সময় একটা অন্য গণ্ডগোল দেখা দিল ।

‘খুনের মাসখানেক আগে দুই আমেরিকান এসেছিল রাজার অতিথি হয়ে । আসল উদ্দেশ্য শিকার । ডুমনিগড়ের পূর্বদিকে পাহাড়ের শ্রেণী, আর তার পাদদেশে গভীর জঙ্গল । যাকে বলে হান্টারস প্যারাডাইজ । বহু বিদেশী শিকারি ডুমনিগড়ে এসে শিকার করে গেছে, রাজা তাদের জন্য ঢালাও বন্দোবস্ত করে দিয়েছেন । বীটাররা বন পিটিয়ে কাঁসি ক্যানেষ্টার পিটিয়ে বাঘ এনে ফেলে দিয়েছে শিকারিদের সামনে, আর তারা হাতির পিঠ থেকে শার্দূলসংহার করে খুশি মনে দেশে ফিরে গেছে ।

‘এইবার ওই দুই আমেরিকানের একটি, নাম স্যাস্পার, চল্লিশ হাত দূর থেকে পর-পর দুটি গুলি মেরেও বাঘকে জখমের বেশি কিছু করতে পারল না । একটা গুলি লাগল ল্যাজে, একটা পিছনের পায়ের গোড়ালিতে । সেই বাঘ এখন হয়ে গেছে নরখাদক । এটা খুবই স্বাভাবিক ঘটনা, তোরা জানিস বোধহয় । পুলান্সি, হাড্ডা আর থুয়ারা—পাহাড়ের নীচে এই তিনটি গ্রাম থেকে সতেরোজন মেয়ে-পুরুষকে ধরে নিয়ে গেছে সেই বাঘ । গাঁয়ের লোকে রাজার কাছে এসে হত্যা দিয়েছে, ওই বাঘের শেষ না দেখা পর্যন্ত তাদের সোয়াস্তি নেই । বাঘের ভয়ে তারা বাড়ি থেকে বেরোতে পারে না, সেই সুযোগে তাদের খেতের ফসল খেয়ে নিচ্ছে হরিণ আর শুয়োরের দল ।

‘রাজা ডেকে পাঠালেন আমাকে । বললেন “ট্যারি”—রাজা আমাকে ট্যারি বলেই ডাকতেন—“ট্যারি, এখন তুমিই ভরসা । এই ম্যানইটারের একটা বিহিত না করলেই নয় । তোমার কী লোকজন লাগবে বলো, আমি দিয়ে দিচ্ছি । তুমি দু-একদিনের মধ্যেই বেরিয়ে পড়ো ।”



‘এখানে বলা দরকার যে, মেজোকুমার ভূপত সিং-ও শিকারে সিদ্ধহস্ত । তেইশ বছর বয়স, কিন্তু এর মধ্যেই বড় বাঘ ছোট বাঘ মিলে সংখ্যা দাঁড়িয়েছে তিয়াত্তর । তবে এটা জানি যে, রাজা মেজোকুমারের খুব একটা ভক্ত নন, কারণ সে অতি উচ্ছৃঙ্খল প্রকৃতির ছেলে । তাছাড়া মদ জিনিসটাকে একটু বেশিরকম পছন্দ করে । আমি মেজোকুমারের হয়ে একবার সুপারিশ করেও কোনো ফল হল না ।

‘কাজেই আমাকেই রাজি হতে হল । আমার তখন জোয়ান বয়স, সবে ত্রিশ পেরিয়েছে । চোখে মাইনাস পাওয়ারের পুরু চশমা সত্বেও অব্যর্থ টিপ । কর্নেল হোয়াইটহেড নিজে হাতে ধরে বন্দুক চালানো শিখিয়েছেন আজমীরে থাকতে ।

‘যেখানে উৎপাতটা হচ্ছে, সেখানে পৌঁছতে হলে একটা ছোট নদী পেরোতে হয় । সে নদীর নাম লুঙ্গি কেন জিগ্যেস করিসনি ন্যাপলা, কারণ উত্তর আমি জানি না । এই লুঙ্গিরই পাশে এক অশ্বখ গাছের তলায় মাস চারেক হল এক বাবাজি এসে আস্তানা গেড়েছেন, এ-খবর আমরা পেয়েছি । রাজার আবার হোলি ম্যানে খুব বিশ্বাস ; বলে দিলেন যাবার সময় আমি যেন একবার দেখা করে যাই । রাজা শুনেছেন বাবাজির কাছে নাকি অনেকরকম ওষুধ আছে ; যদি ডায়াবিটিসের কোনো ওষুধ বলতে পারেন আমি যেন সেটা জেনে নিই ।

‘জানুয়ারি মাস, প্রচণ্ড শীত পড়েছে সেবার, তারই মধ্যে দুটি বেয়ারা সমেত বেরোবার সব তোড়জোড় করে ফেললাম । রাজার কাছে বিদায় নিতে গিয়ে দেখি মেজোকুমার বসে রয়েছেন তাঁর ঘরে । বুঝলাম একটা কথা-কাটাকাটির মাঝখানে গিয়ে পড়েছি । রাজা তখনও হাঁপাচ্ছেন, এবং আমার সামনেই মেজোকুমারকে কড়া কথা শুনিয়ে তাঁকে ঘর থেকে বিদায় করে দিলেন । বেরোবার মুখে কুমার আমার প্রতি যে দৃষ্টি হানলেন, সেটা মোটেই প্রসন্ন নয় । বুঝলাম তাঁকে বাদ দিয়ে আমাকে বাঘ মারতে পাঠানো হচ্ছে সেটা আদৌ ঠিক মনঃপূত নয় । তবে সিদ্ধান্তটা তো আমার নয়, সেটার জন্য দায়ী স্বয়ং রাজা ভূদেব সিং । কাজেই আমার উপর চোখ রাঙানোর কারণটা বোধগম্য হল না ।

‘লুঙ্গি নদী ডুমনিগড় থেকে ৩২ মাইল, অর্থাৎ আজকের হিসেবে পঞ্চাশ কিলোমিটার । তখন দ্বিতীয় মহাযুদ্ধ চলেছে, তবে ডুমনিগড়ে জীপ আসেনি । রাজার একটা পুরনো ফোর্ড ছিল, সেটা খুব মজবুত । তাতে করেই পৌঁছে গেলাম এক ঘন্টার ভেতর । শিকারের জন্য যাবতীয় যা কিছু দরকার, সবই সঙ্গে এসেছে । নদী পেরিয়ে আরো যেতে হবে সতেরো মাইল, তার জন্য ফরেস্ট ডিপার্টমেন্টের গাড়ি থাকবে ওপারে । রেঞ্জার নিজেও থাকবেন, আমরা গিয়ে উঠব ফরেস্ট রেস্ট হাউসে ।

‘অবিশ্যি ওপারে যাবার আগে একটা কর্তব্য সারতে হল । উদাস বাবার আশ্রমে একবার টু দিতে হল । গেরুয়াধারী বাবাজি শিষ্য-শিষ্যা-পরিবেষ্টিত হয়ে

পর্ণকুটিরের সামনে বাঘছালের উপর বসেছেন, সামনে ধুনি জ্বলছে। চেহারাটি বেশ ভক্তি-উদ্রেককারী, দাড়ি-গোঁফ-জটা সত্ত্বেও অনেক সাধুর চেয়ে বেশি পরিষ্কার-পরিচ্ছন্ন, জংলিভাব একেবারেই নেই।

‘সাধু আমাকে দেখেই স্মিতহাস্য করে “আইয়ে” বলে তাঁর সামনে একটা জায়গা দেখিয়ে দিলেন। আমি গিয়ে বসলাম। সাধু চেয়ে রইলেন আমার দিকে। ঠোঁটের কোণে সেই স্মিত হাসির রেশ। মনে মনে ভাবছি এত দেখার কী আছে, এমন সময় বাবাজি হঠাৎ বলে উঠলেন, “বাঙালি?” এবং যেভাবে যে-উচ্চারণে বললেন তাতে বুঝলাম ইনি নিজেও বাঙালি। এতে অবাক হলাম বই কী, কারণ যেদিন থেকে বাবাজি আস্তানা গেড়েছেন সেদিন থেকে শুনছি এনার কথা, কিন্তু কেউ বলেনি ইনি বঙ্গসন্তান।

“কী চাস তুই?”

‘এখানে বলে রাখি, বাবাজিদের এই হোলসেল তুইতোকোরির ব্যাপারটা আমি মোটে বরদাস্ত করতে পারি না। তাই এনার প্রশ্ন শুনে ধাঁ করে মাথায় রক্ত উঠে গেল। বললাম, “রাজার অনুরোধে তোর সঙ্গে দেখা করতে এলাম।”

‘বাবা কিন্তু আমার মুখে তুই শুনে মোটেই বিরক্ত বা বিচলিত হলেন না। বরং এবার যে-কথাটা বললেন, তাতে আমি হকচকিয়ে গেলাম তো বটেই, সেই সঙ্গে বেশ খানিকটা নম্রও হয়ে গেলাম।

“রাজার জন্য ওষুধ আমি দিয়ে দিচ্ছি। বলিস চিন্তা করার কিছু নেই। অসুখ সেরে যাবে, তবে পুত্রশোক থেকে রেহাই নেই। বড়টা গেছে, পরেরটাও যাবে। ছোটটি ভাল ছেলে, সেই বাপের মুখ রাখবে। তবে রাজত্ব নেই কপালে, কারণ রাজা আর থাকবে না দেশে। দেশ স্বাধীন হয়ে যাবে।”

‘আমি কী বলব ভেবে পাচ্ছি না, এমন সময় বাবাজি বললেন, “তোর জন্যেও ওষুধ আছে।”

‘আমার ওষুধ? সে আবার কী? জিগ্যেস করলাম, “কিসের ওষুধ?”

“তুই বাঘের পেটে যেতে চাস?”

“সেটা আর কে চায় বলুন।”

“তাহলে আরো কাছে আয়।”

‘আমি আরেকটু এগিয়ে গেলাম সাধুবাবার দিকে। বাবাজি তাঁর ঝোলা থেকে একটা কৌটো বার করে তার থেকে খানিকটা সবুজ মলম নিয়ে আমার কপালে ঘষে দিলেন। হিঙ আর কস্তুরী মেশানো একটা গন্ধ এল নাকে।—“বাস্, আর ভয় নেই তোর।”

‘রাজার জন্য ওষুধ নিয়ে বিদায় নিলাম। মনে-মনে বললাম, বাবাজির ক্ষমতা অসীম, কারণ আমার কাছ থেকে “তুই” থেকে “আপনি” সম্বোধন আদায় করে নিতে লেগেছে ঠিক দু মিনিট।

‘রেস্ট হাউসে পৌঁছে গেলাম আধ ঘন্টার মধ্যেই। গিয়ে দেখি সব ব্যবস্থা হয়ে আছে। আমি আসছি সে-খবর আগেই পৌঁছে গেছে, তিন গাঁয়ের তিন মোড়ল এসেছে আমার সঙ্গে দেখা করতে। বললাম আমার যতদূর সাধ্য আমি করব।

‘শীতকালের দিন ছোট, তাই সাড়ে চারটের মধ্যে বনমোরগের রোস্ট খেয়ে বেরোবার জন্য তৈরি হয়ে গেলাম। স্থানীয় শিকারি শুকদেও তেওয়ারি আমাকে সাহায্য করছে; সে মাচা বাঁধার জন্য গাছ বেছে রেখেছে সমতল জমি যেখানে শেষ হয়ে পাহাড় শুরু হয়েছে সেইরকম একটা জায়গায়। কাছাকাছির মধ্যে বাঘের পায়ের টাটকা ছাপ পাওয়া গেছে। একটি মোষও কেনা হয়েছে টোপ হিসেবে, সব মিলিয়ে ব্যবস্থা ভালই। আমি একাই থাকব পাহারায়, সকালে শিকারি ও কুলির দল এসে আমায় মীট করবে। তার মধ্যে যদি কাজ সারা হয়ে যায় তো ভালই, নইলে কাল সন্ধে থেকে আবার বসতে হবে। এ-ভাবে কতদিন চলবে জানা নেই।

‘রেস্ট হাউস ছাড়বার মুখে আরেকটা গাড়ির আওয়াজ পেলাম। এ-আওয়াজ আমার চেনা। এ হল মেজোকুমারের পন্টিয়াক টুরার। ব্যাপার কী?

‘মেজোকুমার গাড়ি থেকে নেমেই কারণটা জানিয়ে দিলেন। বললেন বাবাকে বলে রাজি করিয়েছেন, তিনিও আমার সঙ্গে নরখাদকের সন্ধানে যাবেন। এমন একটা গুরু দায়িত্ব শুধু একজনের উপর দেওয়ার কোনো মানে হয় না।—“দাদার মৃত্যুতে বাবার বুদ্ধিশুদ্ধি সব লোপ পেয়েছে।”

‘কথাটা শুনে আমার মোটেই ভাল লাগল না। রাজা সত্যিই অনুমতি দিয়েছেন কি না জানার কোনো উপায় নেই। আমার ধারণা তিনি বারণই করেছেন, কিন্তু ঈর্ষাবশত ইনি নিজেই চলে এসেছেন।

‘কী আর করি। মনিবের সন্তান, তার সঙ্গে তো আর ঝগড়া চলে না। তখনই তেওয়ারিকে বলে একটা দ্বিতীয় মাচার বন্দোবস্ত করা হল। তবু ভাল যে, মেজোকুমার তাঁর নিজের জন্য শিকারের সব সরঞ্জাম সঙ্গেই এনেছিলেন।

‘দুজনে গিয়ে উঠলাম মাচাতে। আমারটা শিমুল গাছ, ওনারটা বাদাম। আমাদের রেখে দল ফিরে গেল। আমরা রাত্রি জাগরণের জন্য তৈরি হলাম। নীচে থেকে যাতে বাঘ বুঝতে না পারে তার জন্য দুটো মাচার নীচেই লতাপাতা দিয়ে ক্যামুফ্লেজ করা হয়েছে। ব্যবস্থা পাকাপোক্ত।

‘কুমার দেখি মাচায় উঠে ব্যাঙের বোতল খুলেছেন। আমি ইশারায় তাঁকে বারণ করার চেষ্টা করলাম, তিনি আমার দিকে চেয়েও চাইলেন না।

‘অন্ধকারটা যেন একটু আগে হল মনে করে আকাশের দিকে চেয়ে গাছের পাতার ফাঁক দিয়ে দেখি, কালো মেঘে দিগন্ত ছেয়ে গেছে।

‘ছ’টা নাগাত বিদ্যুৎ ও বজ্রপাতের সঙ্গে মুষলধারে বৃষ্টি নামল। বাঘ বৃষ্টির

তোয়াক্কা করে না, শিকারিরও করা উচিত নয়, কিন্তু শীতকালের বৃষ্টি বলেই বোধহয় অনুভব করলাম ওভারকোট ভেদ করে বরফের মতো ঠাণ্ডা জল আমায় কাঁপুনি ধরিয়ে দিচ্ছে। এমনিতে আমার অসুখ-বিসুখ হয় না বললেই চলে, কিন্তু সর্দি জিনিসটাকে আমি বড় ভয় পাই। এটা চিরকালের ব্যাপার। যখন একটা হাঁচি হল, তখন প্রমাদ গুনলাম। মাচায় বসা শিকারির পক্ষে হাঁচি-কাসি যে কী সর্বনেশে ব্যাপার, তা বোধহয় তাদের বুঝিয়ে বলতে হবে না। তাছাড়া হঠাৎ মনে পড়ে গেল ছেলেবেলায় এক জ্যোতিষী বলেছিল আমার অপঘাতে মৃত্যু হতে পারে। একে বাজ পড়ছে, তায় গাছের উপর বসা। পরিস্থিতিটা মোটেই ভাল লাগল না।

‘এবার কুমারকে ইশারা করে জানালাম আমি মাচা থেকে নেমে পড়ছি। আজ আর ম্যানইটারের সঙ্গে মোকাবিলা হবে না, কারণ এই হাঁচি শুনে তিনি আর এ-তল্লাটে আসবেন না।

‘নীচে মোষটা জলে ছটফট করছে, আর গলায় বাঁধা ঘন্টা অনবরত টিংটিং করছে। মাচা থেকে নামতে-নামতে মনে হল মেজোকুমারের ভাগ্য ভাল; নরখাদক সংহারের ক্রেডিটটা হয়তো তিনি একাই পাবেন। আমার এখন আশ্রয় নেওয়া ছাড়া গতি নেই; এই বৃষ্টিতে আর ভিজলে নিউমোনিয়া অবধারিত।

‘জঙ্গলের দুর্ভেদ্য অন্ধকারে বিদ্যুতের ঝলকানি মাঝে-মাঝে পথ দেখিয়ে দিচ্ছে। আমি টর্চের সাহায্য না নিয়েই এগিয়ে চললাম যদিকে পাহাড় সেই দিকে। হাতে বন্দুকটা নিয়েছি, কারণ সেটার যে প্রয়োজন হবে না, এমন কোনো গ্যারান্টি নেই।

‘পাহাড়ের গায়েও গাছপালা ঝোপঝাড়ের অভাব নেই, তারই মধ্যে দিয়ে হ্যাঁচড়-প্যাঁচড় করে উঠে গিয়ে হঠাৎ সামনে একটা ঘোর অন্ধকার কী যেন এসে পড়ল। বিদ্যুতের আলোতেও যখন সে-অন্ধকার দূর হল না, তখন বুঝলাম সেটা একটা গুহার মুখ। গিয়ে ঢুকলাম ভিতরে। মাথার উপর বারিবর্ষণ দূর হল। বাঁচা গেল। শেলটার পেয়ে গেছি। পকেট থেকে টর্চ বার করে সামনে ফেলে বুঝলাম, গুহার অপর দিকের দেয়াল টর্চের আলোর নাগালের বাইরে। কমপক্ষে পাঁচশো লোক এ-গুহায় আশ্রয় নিতে পারে।

‘আলোতেই দেখলাম সামনেই একটা মাঝারি আকারের পাথরের চাঁই। সেটাতে পিঠ দিয়ে বসলাম গুহার মেঝেতে। বাইরে সমানে বৃষ্টি হয়ে চলেছে। বিদ্যুতের আলোতে বুঝতে পারছি পাহাড়ের গা দিয়ে জলের ধারা নেমে এসে গুহার মুখের সামনে একটা ছোটখাটো জলপ্রপাতের সৃষ্টি করেছে। পকেটে সিগারেট দেশলাই ছিল। সেটা এই অবস্থায় ব্যবহারযোগ্য হবে কি না ভাবছি, এমন সময় তড়িৎ-ঝলকানিতে একটা ব্যাপার দেখে চমকে উঠলাম।

‘একটি লোক এসে গুহার ভিতর ঢুকল।



‘লোকটির সামান্য খুঁড়িয়ে হাঁটা থেকে বুঝতে পারলাম ইনি মেজোকুমার । তাঁর সাত বছর বয়সে পায়ের পাতার উপর দিয়ে চলে যায় বাপের রোলস রয়েস গাড়ি । সাহেব ডাক্তার মেজর স্টেবিংস-এর অস্ত্রোপচারের ফলে পা সেরে যায় ঠিকই, কিন্তু ডান পায়ের তুলনায় আধ ইঞ্চি ছোট হয়ে যায় । তার ফলেই এই খোঁড়ানো ।

‘মেজোকুমারের অন্ধকার দেহ আমার দিকে এগিয়ে এসে আমার পাশেই বসল । একটা বোটকা গন্ধ কিছুক্ষণ থেকে পাচ্ছিলাম, তার সঙ্গে এবার হেনেসি ব্র্যান্ডির গন্ধ যোগ হল । তারপর অনুভব করলাম গরম নিশ্বাস পড়ছে আমার মুখের উপর । তারপর মেজোকুমারের কণ্ঠস্বর প্রবেশ করল আমার কানে ।

“শত্রুর শেষ রাখতে নেই জানো ?”

‘বলে কি লোকটা ? আমি ওর শত্রু হতে যাব কেন ?

“তোমাকে যখন আমি দেখে চিনেছি সেই রাতে, তখন তোমারও আমাকে দেখা এবং চিনে ফেলাটা আশ্চর্য নয় ।”

“কোন রাতে ?”

“সেটা কি বলে দিতে হবে ? ইমলিগাছের নীচে দাঁড়িয়ে ছিলে তুমি । দাদা ফিরছিল শ্রীমলের বাড়ি থেকে ।”

‘আমার গরম লাগতে শুরু করেছে । ওভারকোটটা খুলে ফেলতে পারলে ভাল হয় । এই মেজোকুমারই তাহলে হত্যাকারী, নারায়ণ শ্রীমল নয় । দাদাকে হটিয়ে নিজে গদিতে বসার লোভ । যেমন আরো অনেক রাজপরিবারেই হয়ে থাকে । কিন্তু আমায় সে চিনল কী করে সে-রাতে ?

‘উত্তর এল মেজোকুমারের মুখ থেকেই ।

“ত্রয়োদশীর চাঁদ উঠেছিল তখন । তোমার চশমার কাঁচ চক্চক্ করছিল সেই আলোয় । এত পুরু কাঁচ ও তল্লাটে আর কারুর নেই ।”

‘আমি চুপ করে আছি । আমার চোখের পাওয়ার মাইনাস নয় । এই চশমাই আমাকে বিট্টে করল ।

‘একটা খুঁট করে শব্দ পেলাম । মেজোকুমারের টোটা-ভরা রাইফেল উঁচিয়ে উঠেছে । ওর ও আমার মধ্যে ব্যবধান দুহাতের । ওই বাঘ-মারা বারো বোরের আগ্নেয়াস্ত্র এই দূরত্ব থেকে আমার উপর প্রয়োগ করলে আমার দেহ শতটুকরো হয়ে ছড়িয়ে পড়বে গুহার চারিদিকে ।

‘কিন্তু ওটা কী ?

‘এক জোড়া জ্বলন্ত মারবেল এগিয়ে আসছে আমার দিকে মেজোকুমারের পিছন থেকে । আর তার সঙ্গে সেই বোটকা গন্ধ ।

“সে ইয়োর প্রেয়ারস, মিস্টার ব্যানার্জি ।”

‘বিদ্যুতের আলোতে বন্দুকের ইস্পাতের নল ঝিলিক দিয়ে উঠল ।

‘আর পরমুহূর্তেই একটা ভারী ধাতব শব্দে বুঝতে পারলাম বন্দুক গুহার মেঝেতে আছড়ে পড়েছে।

‘একটা গোঙানির শব্দ ক্রমে দূরে সরে গেল। আর সেই সঙ্গে জ্বলন্ত মার্বেল দুটোও।

‘আমি কাঠ হয়ে বসে রইলাম।

‘ক্রমে বজ্রবিদ্যুতের তেজ কমে এল, বৃষ্টির শব্দ থেমে এল।

‘বোধহয় নাভাস স্ট্রেনের দরুন, কিশ্বা হয়ত জ্বর ছিল শরীরে, এই ঘটনার কিছুক্ষণ পরেই ঘুমিয়ে পড়ি। যখন ঘুম ভাঙল তখন ভোর হয়ে গেছে। গুহাটা যে কত বড় সেটা এখন বুঝতে পারলাম। আমি যদিকে বসা, তার বিপরীত দিকে দেয়ালের সামনে পড়ে আছে মেজোকুমারের আধখাওয়া মৃতদেহ। কিন্তু নরখাদকের কোনো চিহ্ন নেই।

‘গুহার বাইরে একটা পাথর-খণ্ডের আড়ালে ঘাপটি মেরে বসে রইলাম হাতে বন্দুক নিয়ে। একটা খুঁতখুঁত ভাব ছিল মনে, কারণ এটা জানি যে, বাঘ সুযোগ পেয়েও আমাকে খায়নি—সেটা বাবাজির মলমের জন্যেই হোক বা অন্য যে-কোনো কারণেই হোক। শুধু তাই নয়, আমাকে নিশ্চিত মৃত্যুর হাত থেকে সে রক্ষা করেছে। তবে গ্রামের লোকেরা যে লাঞ্চিত, সে-কথা তো মিথ্যে নয়; তাই মন থেকে মমতা দূর করে দাঁতে দাঁত চেপে বসে রইলাম।

‘আটটা পর্যন্ত বসে থেকেও যখন বাঘের দেখা পেলাম না, তখন অগত্যা ফিরতি পথ ধরলাম। মাচার কী অবস্থা দেখতে হবে গিয়ে। সেখানে চায়ের ফ্লাস্ক, জলের বোতল, বালিশ কশ্বল ইত্যাদি অনেক কিছুই রয়েছে।

‘জায়গাটা খুঁজে পেতে অসুবিধা হল না। কিন্তু যা দেখলাম তাতে চক্ষু ছানাবড়া।

‘মাচা সমেত শিমুল গাছ বজ্রপাতে ঝলসে গেছে, আর তার পাশেই পড়ে আছে মৃত মোষ, আর তার কাঁধে দাঁত-বসানো মৃত নরখাদক। সে এক বিচিত্র ছবি। মানুষের হাতের বন্দুকের চেয়ে হাজার গুণে বেশি শক্তিশালী আগ্নেয়াস্ত্রের শিকার হয়েছে এরা, সেটা আর বলে দিতে হয় না।

‘ফেরার পথে বাবাজিকে ধন্যবাদ দিতে গিয়েছিলাম, কিন্তু তাঁর সঙ্গে দেখা হল না। তাঁর পর্ণকুটির ভাসিয়ে নিয়ে গেছে লুঙ্গি নদী গতরাত্রের বৃষ্টিতে। তিনি নিজে নাকি একটি সেগুন গাছে চড়ে রক্ষা পেয়েছিলেন, কিন্তু আপাতত সর্দিজ্বরে কাবু হয়ে এক শিষ্যের বাড়িতে আশ্রয় নিয়েছেন।’



কনওয়ে কাস্লেৰ প্ৰেতাত্মা

তাৰিণীখুড়ো তাঁৰ এক্সপোৰ্ট কোয়ালিটি বিড়িতে দুটো টান দিয়ে বললেন, ‘ভূতৰ গল্প অনেকে বলতে পারে, তবে পাসোৰ্নাল এক্সপিরিয়েন্স থেকে বলা গল্পের জাতই আলাদা। সেটা আর কজন পারে বল।’

‘আপনি পারেন?’ প্ৰশ্ন কৰল ন্যাপলা।

‘হুঁঃ’, বলে খুড়ো অন্য দিকে চাইলেন।

তাৰিণীখুড়োৰ এক্সপিরিয়েন্সেৰ স্টক যে অফুৰন্ত সেটা আমাৰা জানি। এই সেদিন অবধি সারা দেশময় টোটে কৰে বেড়িয়েছেন। ভাৰতবৰ্ষেৰ তেত্ৰিশটা শহৰে ছাঞ্চান্ন বকম কাজ কৰেছেন উপাৰ্জনেৰ জন্য। তবে এক বছৰেৰ বেশি কোনো কাজে টিকে থাকেননি—সে ব্যবসাই হোক আৰ চাকৰিই হোক। এখন চৌষটি বছৰ বয়সে চৰকিবাজি থামিয়ে কলকাতায় এসে রয়েছে বেনেটোলা লেনে একটা ফ্ল্যাট নিয়ে। এখানে বলে রাখি, তাৰিণীখুড়ো সকলেৰই খুড়ো। বাবাও খুড়ো বলেন, আমিও বলি। ন্যাপলা একবাৰ ঔঁকে দাদু বলেছিল, তাতে খুড়ো মহা ক্ষেপে বললেন, ‘এখনো বাস না পেলে অক্লেশে হেঁটে আসি বেনেটোলা টু বালিগঞ্জ—দাদু আবার কি? খুড়ো বলবি।’

আমি আৰ পাড়ার পাঁচটি ছেলে মিলে আমাদেৰ দল। আমাদেৰ বাড়িতেই আসেন তাৰিণীখুড়ো; এলেই খবৰ চলে যায়, আৰ পাঁচজন তুৰন্ত চলে আসে খুড়োৰ গল্পেৰ লোভে। একটা গল্পে পুরো একটা সন্ধে কেটে যায়। খুড়ো বলেন আৰ্টেৰ খাতিৰে খানিকটা বং চড়ানো ছাড়া গল্পগুলো ষোল আনা সত্যি।

‘আমি তখন থাকি পুনায়,’ বললেন তাৰিণীখুড়ো।

‘পুনে’ বলল ন্যাপলা।

একটা গল্পেৰ গন্ধ পাচ্ছি, ন্যাপলা যাতে বাৰবাৰ ইনটাৰাপ্ট না কৰে তাই তাৰ কোমৰে একটা চিমটি কেটে দিলাম।

‘ওই হল’, বললেন তাৰিণীখুড়ো, ‘পুনে-পুনা, মুছাই-বোছাই,

তিরুচিরপল্লী-ত্রিচিনপলি—যে-কোনো একটা বললেই হল। আর আমি যখনকার কথা বলছি তখন সবে স্বাধীনতা এসেছে ; পুনর পুনে হতে অনেক দেরি। পল্টু একটা চা বলো।’

আমি লক্ষ্মণকে ডেকে চা অর্ডার দিলাম—দুধ-চিনি ছাড়া চা—আর খুড়ো তাঁর গল্প শুরু করলেন।

আমি রয়েছি আমার এক বন্ধু রাধানাথ চাটুজ্যের বাড়ি। সে ফার্ডুসন কলেজে ইতিহাসের অধ্যাপক। কোডার্মায় মাইকা মাইনসের কাজে ইস্তফা দিয়ে শিবাজীর দেশে এসেছি একটা হোটেলের ম্যানেজারি নিয়ে। আমার বয়স তখন চৌত্রিশ।

পৌছাবার দুদিনের মধ্যেই রাধানাথ নিয়ে গেল উকীল ঘনশ্যাম আপ্টের বাড়ি। সেখানে সন্ধ্যায় আড্ডা বসে, পাঁচ মেশালি আড্ডা, যাকে বলে মিক্সড ক্রাউড। আমরা তিনজন ছাড়া আসে মহারাষ্ট্র ব্যাঙ্কের এজেন্ট মিঃ যোশী, ম্যাকডারমট কোম্পানীর উচ্চপদস্থ কর্মচারী মিঃ হরিহরণ, পুলিশ ইন্স্পেকটর মিঃ আগাশে আর তরুণ সাংবাদিক আনওয়ার কুরেশি।

কুরেশির বয়স আমাদের মধ্যে সব চেয়ে কম, ত্রিশ পৌছায়নি। তুখোড় ছেলে, হ্যাণ্ডসাম চেহারা, চোখে জ্বলজ্বলে দৃষ্টি। সে আসে হরিহরণের সঙ্গে দাবা খেলতে। তাঁরা ঘুটি এঘর ওঘর করেন, আর আমরা বাকি পাঁচজনে মারি আড্ডা। সবচেয়ে বেশি কথা বলেন বাড়ির কর্তা আপটে সাহেব নিজে। আমার বিশ্বাস তাঁর কথা বলার প্রয়োজনেই এই আড্ডার সৃষ্টি। কিছু লোক আছে যারা সান্সপান্স ছাড়া বাঁচতে পারে না। এই সান্সপান্স যদি তোষামুদে হয় তাহলে ত কথাই নেই। অবিশ্যি আড্ডার সকলে আপ্টেকে তোষামোদ করে বললে ভুল হবে, তবে ঔর মতামতের প্রতিবাদ কেউ করে না।

আগাশের মতো খোশ মেজাজের দারোগা আমি আর দুটি দেখিনি। অবিশ্যি যখন প্রথম আলাপ তখন তিনি একটা ব্যাপারে কিঞ্চিৎ দুশ্চিন্তাগ্রস্ত। সম্প্রতি কিছু টাটকা জালনোট পাওয়া গেছে পুনাতে। জালিয়াত কারা এবং তাদের আস্তানাটা কোথায় তাই নিয়ে পুলিশ দপ্তরে বেশ চাঞ্চল্য পড়ে গেছে। আগাশেকে তাই মাঝে মাঝে অন্যমনস্ক হয়ে পড়তে দেখা যায়।

দলের মধ্যে স্বল্পভাষী হলেন মিঃ যোশী ; তবে শ্রোতা হিসেবে তিনি চমৎকার। সব কথাই উদ্গ্রীব হয়ে শোনেন। হাসির কথায় ঘর কাঁপিয়ে অটুহাস্য করেন, দুঃখের কথায় তাঁর জিভ দিয়ে চুক্ চুক্ শব্দ শুনে আপ্টের পোষা ড্যালমেশিয়ন বারান্দা থেকে ল্যাজ নাড়তে নাড়তে যোশীর কাছে চলে এসেছে, এ ঘটনা বহুবার ঘটেছে।

আমার স্টকে হাজার গল্প, বাংলার বাইরে বছরের পর বছর কাটিয়ে ইংরিজিটাও বেশ রপ্ত, তাই আমার একটা বেশ ভালো পোজিশন হয়ে গেল

আপ্টের আড্ডায় ।

কী প্রসঙ্গে মনে নেই, একদিন কথা উঠল অশরীরী আত্মার । দেখা গেল আপ্টে ছাড়া আর সকলেই ভূতে বিশ্বাস করে । আমি আপ্টেকে বোঝালুম যে পুরাণ, শেক্সপিয়র, ডিকেন্স, রবীন্দ্রনাথ, দেশবিদেশের উপকথা, সবতেই ভূতের উল্লেখ আছে, কাজেই ভূতে বিশ্বাস না করার কোনো কারণ থাকতে পারে না । আপ্টে তবু মাথা নাড়ে । সে বিজ্ঞানে বিশ্বাসী, যুক্তিবাদী মন তার, খালি বলে ভূত জিনিসটা ভূয়ো ।

হঠাৎ কেন জানি 'রোখ চেপে গেল, ধাঁ করে হাজার টাকা বাজি ধরে ফেললুম । বললুম দুমাসের মধ্যে ভূত দেখিয়ে দেব তোমায় । আপ্টে হেসে উড়িয়ে দিলে । বললে—'সাবধান । হাজার টাকা খোয়া যেতে চলেছে তোমার এটা তোমায় বলে দিলাম ।'

অবিশ্যি আমার দিক থেকে ব্যাপারটা অতিমাত্রায় রিস্কি হয়ে গিয়েছিল তাতে সন্দেহ নেই । রাধানাথের কাছে ভৎসনাও শুনতে হয়েছিল ; কিন্তু বাজির ব্যাপারে দাবার মতোই চাল ফেরত নেওয়া যায় না । কাজেই ব্যাক-আউট করার কোনো প্রশ্নই ওঠে না ।

এরই দিন সাতেক বাদে আমাদের আড্ডায় এলেন প্রোফেসর অটো হেলমার । জার্মানির স্টুটগার্ট শহরের বাসিন্দা । ভদ্রলোক পক্ষিবিদ, ভারতবর্ষে এসেছেন ভারতীয় পাখির ডাক রেকর্ড করতে । টেপ রেকর্ডার জিনিসটা তখন সবে আবিষ্কার হয়েছে, সাহেবের কাছেই প্রথম দেখলুম সেই আশ্চর্য যন্ত্র । আমাদের নানারকম পাখির ডাক শুনিয়ে সাহেব বললেন পুনায় এক জায়গায় তিনি নাকি হতোম প্যাঁচার ডাক শুনেছেন । সেইটে রেকর্ড করতে পারলেই নাকি তাঁর মনোবাঞ্ছা পূর্ণ হয় । প্যাঁচার ডাকের ভালো রেকর্ডিং তিনি এখনো পাননি ।

'কোথায় শুনলে ডাক ?' প্রশ্ন করলেন আপ্টে ।

তাতে হেলমার সাহেব একটা বাড়ির বর্ণনা দিলেন—দুর্গ প্যাটার্নের প্রাচীন পরিত্যক্ত সাহেব বাড়ি । সেন্ট মেরি গির্জার পূর্ব পাশে । তারই কম্পাউণ্ডে নাকি দু'রাত আগে প্যাঁচাটা ডাকছিল । সাহেব ছিলেন গাড়িতে । সঙ্গে টেপরেকর্ডার । চলন্ত অবস্থাতেই ডাকটা শুনে গাড়ি থামিয়ে নেমে কম্পাউণ্ডের পাঁচিলের ধারে এক ঘন্টা দাঁড়িয়ে থেকেও কোনো ফল হয়নি । প্যাঁচা আর ডাকেনি ।

বাড়ির বর্ণনা এবং অবস্থান শুনে আমাদের অনেকেই বললেন যে সেটা কনওয়ে কাস্‌ল । এখানে বলা দরকার যে বৃটিশ আমলে পুনা ছিল সাহেবদের একটা বড় ঘাঁটি । মিলিটারি ত বটেই, সিভিলিয়ানও অনেক থাকতেন পুনা শহরে । তাঁরা অনেকেই রিটায়ার করার পর পুনাতে বাড়ি করে সারাজীবন সেখানেই কাটিয়ে দিতেন । ব্রিগেডিয়ার কনওয়ে ছিলেন এই রকম একজন সাহেব । তাঁরই তৈরি বাড়ি এই কনওয়ে কাস্‌ল । কুরেশি বাড়িটা সম্বন্ধে কিছু

তথ্য জানে, সেই বললে। বাড়িটা তৈরি হয় কুইন ভিক্টোরিয়া যে বছর ভারত-সাম্রাজ্যী হন সেই বছর। অর্থাৎ ১৮৭৬ খৃষ্টাব্দে। কনওয়ে এই বাড়িতে প্রবেশ করার ছ'মাসের মধ্যে নাকি তাঁর স্ত্রী ও দুটি ছেলে মারা যায়। ছেলেরা অবিশ্যি বাড়িতে মরেনি; তারা দুজনেই ছিল আর্মিতে, মরেছিল দ্বিতীয় আফগান যুদ্ধে। স্ত্রী মারা যায় যক্ষ্মারোগে। আর তার তিনমাসের মধ্যে কনওয়ে নিজেও মরে। কীভাবে মরে জানা যায়নি। তবে অনেকের ধারণা সে আত্মহত্যা করে।

মোট কথা সেই থেকে এই বাড়ি অভিশপ্ত বাড়ি বলে পরিচিত। কেউ আর সে বাড়িতে থাকেনি। সকলের পক্ষে সম্ভবও হত না, কারণ এত পেলায় বাড়ি মেনটেন করা মুখের কথা নয়। আসবাবপত্র যা ছিল সবই নাকি কনওয়ের এক আত্মীয় বিলেত থেকে এসে নিলামে বিক্রী করে দেয়।

রাধানাথ সব শুনে-টুনে বলল, 'কনওয়ে কাস্লে সম্বন্ধে একটা ঘটনা শুনেছি সেটা স্বদেশী আন্দোলনের সঙ্গে যুক্ত।'

'কোন স্বদেশী আন্দোলন?' প্রশ্ন করলেন আপ্টে।

'বালগঙ্গাধর তিলকের সময়কার', বললে রাধানাথ। 'উনবিংশ শতাব্দীর একেবারে শেষের দিকে। মেজর লেথব্রিজ বলে এক সাহেবকে হত্যা করার চেষ্টা করেছিল এক সন্ত্রাসবাদী দল। তারা নাকি ওই কাস্লে তাদের গুপ্ত ডেরা করেছিল। পরে আত্মসমর্পণ করে। তবে তাদের লীডার আচরেকরকে নাকি ধরা যায়নি। সে বেপাতা হয়ে যায়।'

'কনওয়ে কাস্লে খোঁজ করা হয়েছিল কি?' আপ্টে প্রশ্ন করলেন।

আগাশে হো হো করে হেসে উঠলেন।

'মিঃ আপ্টে—পুলিশও মানুষ। তাদেরও ভূতের ভয় আছে। ওই অভিশপ্ত বাড়ি রেড করতে গেলে রীতিমতো হিম্মৎ লাগে।'

এদিকে আমার কৌতূহল চাগিয়ে উঠেছে। ছেলেবেলা থেকেই ডানপিটেমোর শখ। সেটা চৌত্রিশ বছরেও পুরোপুরি বজায় আছে। পর পর অতগুলো মৃত্যু যেখানে ঘটেছে, সেই বাড়ির ভেতরে দু-একটা প্রেতাত্মা বসবাস করবে না কি? বাজি জেতার পক্ষে এ যে একটা বড় সুযোগ!

এর কিছুদিন পরেই হেলমার সাহেব আবার এলেন আড্ডায় তাঁর টেলিফুংকেন টেপ রেকর্ডার নিয়ে। ভদ্রলোকের বাঁ কঁজিতে ব্যাণ্ডেজ। বললেন কাঁটা ঝোপে হাত কেটে গেছে। মুখের ভাব দেখে বোঝা যাচ্ছে না সুখবর না দুঃসংবাদ। তাঁকে বসতে দিয়ে সকলেই তাঁর দিকে জিজ্ঞাসু দৃষ্টি দিলুম। ছতোমের ডাক শোনা যাবে কি?

হেলমার কপালের ঘাম মুছে বললেন, 'ডাক তুলতে পেরেছি, তবে পারফেক্ট হল না। রাত বারোটোর পর প্যাঁচাটা ডাকল, সঙ্গে সঙ্গে মেশিন চালু করলাম। তখন শহরের অন্য শব্দ প্রায় নেই বললেই চলে। নিয়মমতো নিখুঁৎ রেকর্ডিং



হবার কথা, কিন্তু দেখ কী হয়েছে।’

শুনলাম প্যাঁচার ডাক। ছেলেবেলা আমাদের বাদুড়বাগানের বাড়ির পাঁচিলের ওপারে পুকুরের ধারে শ্যাওড়া গাছে একটা ছতোম প্যাঁচা থাকত, তাই তার ডাক চেনা ছিল। ইনিও যে ছতোম তাতে কোনো ভুল নেই। কিন্তু ডাকের সঙ্গে সঙ্গে আরেকটা শব্দ তাকে সত্যিই বড্ড ডিস্টার্ব করছে। সাহেবের এত মেহনৎ ষোল আনা সার্থক হল না জেনে তাঁর প্রতি মমতা হল।

‘বাট হোয়াট ইজ দ্যাট আদার সাউণ্ড?’ প্রশ্ন করল কুরেশি। সে দাবা ছেড়ে এগিয়ে এসেছে।

‘সেটাই ত বুঝতে পারছি না,’ বললেন হেলমার। ‘মেশিনেই গুগুগোল বলে মনে হচ্ছে। এর আগে ত এ রকম হয়নি কখনো।’

শুনলে মনে হয় একটা যান্ত্রিক শব্দ। ঘটাং ঘটাং ঘটাং ঘটাং এই রকম। খুবই ক্ষীণ, কিন্তু জার্মান পক্ষিবিদ-এর মন যে তাতে ঝুঁং ঝুঁং করবে তাতে আশ্চর্যের কিছু নেই।

‘প্লে দ্যাট এগেন প্লীজ!’ হঠাৎ বলে উঠলেন ইন্স্পেক্টর আগাশে। তাঁর শরীরটা টান, আর চোখে এক অদ্ভুত তীক্ষ্ণ দৃষ্টি—শিকারের গন্ধ পেলে যেমন হয় হিংস্র জানোয়ারের।

হেলমার টেপটা ব্যাক করে আবার চালালেন। আগাশে কোমর থেকে শরীরটা ভাঁজ করে কানটা নিয়ে গেছেন একেবারে স্পীকারের সামনে।

ততক্ষণে অবিশ্যি আমিও বুঝে গেছি আগাশে কী ভাবছেন।

শব্দটা শুনে প্রিন্টিং মেশিনের কথা মনে হয়। ছোট, পায়ে-চালানোর কল। যাকে বলে ট্রেডল মেশিন।

এইরকম যন্ত্রই সাধারণত ব্যবহার হয়ে থাকে নোট জাল করার কাজে।

শব্দটা কাস্লেসের ভিতর থেকেই আসছে না অন্য কোথাও থেকে আসছে সেটা অবিশ্যি বোঝার কোনো উপায় ছিল না। কিন্তু তাও আগাশে স্থির করলেন যে কনওয়ে কাস্লে পুলিশের রেড হবে। আগাশের হুমকিতে নাকি কিছু কনস্টেবল রাজি হয়েছে অভিশপ্ত দুর্গে প্রবেশ করতে। এমনি খোশমেজাজ হলে কী হবে, অফিসার হিসেবে নাকি ভদ্রলোক অত্যন্ত কড়া।

আমি কিঞ্চিৎ নিরাশ বোধ করছি। জালিয়াতরা যেখানে আস্তানা গেড়েছে সেখানে ভূত থাকার কোনো সম্ভাবনা আছে কি? মনে ত হয় না।

পরদিনই রাত্তিরে রেড, আড্ডার সকলে ফলাফলের জন্য উদ্গ্রীব, এমন সময় ইন্স্পেক্টর সাহেব এসে হাজির।

‘সেকি, তোমাদের ত আজই রেড হবার কথা!’

আমাদের হয়ে আপ্টেই বিস্ময় প্রকাশ করলেন।

আগাশে একটা বোকা হাসি হেসে মাথা নেড়ে সোফায় বসে পড়লেন।

‘ভাবতে পার ? আজ বিকেল সাড়ে পাঁচটায় সে গ্যাং ধরা পড়েছে ।’

‘কোথায় ?’ আমরা সমস্বরে জিগ্যেস করে উঠলাম ।

‘নাসিক’, বললেন আগাশে ।

‘তাহলে ওই শব্দটা... ?’

‘টেপেরেকডারেই কোনো গুণগোল হবে । ওটা বাইরের কোনো শব্দ না । কাল মাঝ রাত্তিরে আমি কাস্লে’র আশেপাশে ঘোরাঘুরি করে কোনো শব্দ পাইনি ।’

আর কিছু বলার নেই । সমস্ত ব্যাপারটার মধ্যে একটা বেলুন চুপসোনো ভাব, অথচ তার কোনো কারণ নেই । জালিয়াতের দল ধরা পড়েছে এতো ভালো কথা ; শুধু পুনর কনওয়ে কাস্লে ধরা না পড়ে পড়েছে অন্য শহরের অন্য জায়গায় । কিন্তু তাও বলতে হবে যা ঘটেছে তার মধ্যে যেন নাটকের অভাব ।

অবিশ্যি পরমুহূর্তেই মনে হল—জালিয়াত যখন নেই, তখন ভূত থাকতে বাধা কী ? কনওয়ে কাস্লে একবার হানা দিলে দোষ কী ?

চা-টা শেষ করে আমিই কথাটা পেড়ে বসলাম, ‘কে কে যেতে রাজি আছ বল ।’

যোশী গোড়াতেই বললে তার ধুলোয় অ্যালার্জি, তাই ওই পোড়ো বাড়িতে যাওয়া সম্ভব নয় । হরিহরণ বললেন, ‘আমি যাবো, কিন্তু আপ্টে সাহেবেরও যাওয়া চাই । ভূত যদি থাকে ত সেটা ঙুর চাক্ষুষ দেখা উচিত । আমাদের কথা উনি মানতে নাও পারেন ।’

আপ্টে বললেন, ‘ঠিক আছে, আমি যাব । এবং আমি সঙ্গে ক্যাশ হাজার টাকা নিয়ে যাব । আমার কণ্ডিশন হল যে মিঃ ব্যানার্জিও যেন সঙ্গে টাকা রাখেন । বাজির টাকা ফেলে রাখা নিয়মবিরুদ্ধ ।’

আমি বললুম, ‘তথাস্তু । তাহলে কালই হোক এক্সপিডিশন ।’

এইখানে কুরেশি বললে তাকে নাকি দুদিনের জন্য কোলাপুর যেতে হবে একটা রিপোর্টিং-এর ব্যাপারে ; ফিরে এসে সে যেতে প্রস্তুত আছে । আমরাও তাতে রাজি হয়ে গেলুম ।

আগাশে এতক্ষণ চুপ করে আমাদের কথা শুনছিলেন ; এবার তিনি মুখ খুললেন ।

‘জেন্টলমেন, তোমাদের একটা প্রশ্ন করতে চাই । কাস্লে’র সদর দরজা যদি তালা দিয়ে বন্ধ থাকে, তাহলে সেটা খোলার যন্ত্র, বা জানালা ভেঙে খোলার সরঞ্জাম—এসব তোমাদের আছে কি ? কাজটি কিন্তু সহজ নয় ।’

এ প্রশ্নের জবাব অবিশ্যি হ্যাঁ হতে পারে না । আমাদের যেটা আছে সেটা হল উৎসাহ আর উদ্যম । যন্ত্রপাতি থাকবে কোথেকে ?

আমরা এ-ওর মুখ চাওয়াচাওয়ি করছি দেখে আগাশে একটু হেসে বললেন,

‘কাজেই বুঝতেই পারছ, আমি ছাড়া তোমাদের গতি নেই।’

ভালোই হল। শুধু জানালা দরজা ভেঙে খোলার সরঞ্জাম নয়, একটি আগ্নেয়াস্ত্রও থাকবে সঙ্গে এটাও কম ভরসা নয়।

জুন মাস, দিনে বেজায় গরম, রাত্তিরের দিকটা তবু একটু ঝিরঝির হাওয়া দেয়। বন্দোবস্ত অনুযায়ী খাওয়া-দাওয়া সেরে ঠিক সাড়ে এগারোটার সময় আমরা ছ’জন সেন্ট মেরি গির্জার সামনে জমায়েত হলাম। পাড়াটা নির্জন, গাড়ি চলাচল নেই বললেই চলে। আমরা দল বেঁধে এগোলাম কনওয়ে কাস্লে’র দিকে।

ফটক থেকে কাস্লে’র দরজা অবধি লম্বা রাস্তা। এককালে বাহার ছিল রাস্তাটার সেটা আঁচ করা যায়, এখন পথ বলতে প্রায় কিছুই নেই, টর্চের আলোয় কোনোরকমে আগাছা বাঁচিয়ে পা ফেলতে হয়। বাড়িটা আমাদের সামনে অনেকখানি জায়গা জুড়ে এক বিশাল প্রেতপুরীর মতো দাঁড়িয়ে আছে, কেউ যে কস্মিনকালেও সেখানে ছিল সেটা এখন আর বিশ্বাস হয় না। দলে আছি বলে রক্ষে, নাহলে যতই ডানপিটে হই না কেন, আশি বছরের মধ্যে মানুষের পা পড়েনি এমন একটা থম্‌থমে অন্ধকার অটালিকার সামনে দাঁড়িয়ে বুকের মধ্যে যে একটা ট্রেডল মেশিন চলতে শুরু করেছে, সেটা ত অস্বীকার করা যায় না।

আগাশে সদর দরজায় ঠেলা দিতেই সেটা একটা জান্তব আর্তনাদ করে ধীরে ধীরে খুলে গেল, আর সেই সঙ্গে হুঁদুর বাদুড় পায়রা চামটিকে গিরগিটি ছুঁচো মেশানো একটা গন্ধর ধাক্কায় আমরা সকলেই বেশ কয়েক হাত পিছিয়ে গেলুম।

তারপর দুরু দুরু বক্ষে সবাই মিলে ঢুকলুম ভেতরে। এটা ল্যান্ডিং, বাঁ দিকে চওড়া কাঠের সিঁড়ি উঠে গেছে দোতলায়। আগে একতলা সেরে তারপর দোতলায় যাব এটাই আমার ইচ্ছে ছিল, দেখলাম সকলেই তাতে সায় দিলে। আমরা সার বেঁধে গিয়ে ঢুকলুম একটা বিশাল ঘরে। সম্ভবত ডাইনিং রুম ছিল এটা। সারা ঘরে একাটিও আসবাব নেই ঠিকই, কিন্তু দেয়ালে ধূলিমলিন ওয়ল পেপারের উপর বড় বড় ছবির ফ্রেমের দাগ রয়েছে, খান তিনেক দেয়ালবাতির মর্চে ধরা ব্রাকেট রয়েছে, আর সীলিং থেকে ঝুলে আছে ঝাড়-লণ্ঠন আর টানাপাথার ছক। এটার কড়িকাঠেই বাদুড় ঝোলার কথা, তবে তারা বোধহয় রাত্তিরে খাদ্যের সন্ধানে বেরিয়েছে। এত বড় বাড়ির এতগুলো জানালার মধ্যে কয়েকটা কি আর খোলা নেই? বাদুড় না থাকলেও, ছোটখাটো চতুষ্পদ প্রাণী যে কিছু রয়েছে সেটা মেঝের এদিক ওদিক থেকে সড়াং সড়াং শব্দেই বুঝতে পারছি।

এতক্ষণ সবাই একটা জমাট দল বেঁধে চলাফেরা করছিলুম, বড় ঘর পেয়ে সেটা কিছুটা আঙ্গা হল। কুরেশি দেখলুম একাই একটা টর্চ নিয়ে হল ঘরের



পাশের একটা দরজা দিয়ে বেরিয়ে গেল। আপটেও খানিকটা এগিয়ে গেছে আমাদের ছেঁড়ে, তারও নিজস্ব একটি টর্চ আছে। ভূত এখনো চোখে পড়েনি ঠিকই, কিন্তু এর চেয়ে ভালো ভৌতিক পরিবেশ আর কি হতে পারে আমি জানি না।

হলঘরের একটা দরজা দিয়ে ডাইনে ঘুরে একটা প্যাসেজ পড়ল। সেটার ডাইনে বাঁয়ে দুদিকেই ঘরের সারি। আগাশে তার পাঁচ-সেলের টর্চ জ্বলে এগিয়ে চলল প্যাসেজ ধরে। আমরা তার পিছনে। ঘর পড়লে দরজা দিয়ে আলো ফেলে একবার চোখ বুলিয়ে নিচ্ছি।

এইভাবে পাঁচখানা ঘর দেখার পর একটা ঘটনা ঘটল যেটা ভাবতে এখনো গায়ের লোম খাড়া হয়ে ওঠে।

একটা গোঙানির শব্দের সঙ্গে সঙ্গে প্যাসেজের শেষ প্রান্তে বাঁয়ের একটা দরজা থেকে পিছন ফিরে টলতে টলতে বেরিয়ে এল কুরেশি। তার মুখ দেখতে না পেলেও, আতঙ্কের ছাপ রয়েছে সর্বাস্থে সেটা বুঝতে পারছি। ঘাড় কুঁজো, হাত দুটো পিছনে এবং কনুইএর কাছে ভাঙা, হাতের আঙুলগুলো ফাঁক।

আগাশের সঙ্গে আমরাও দৌড়ে গেলাম কুরেশির দিকে। আপটেও এখন আমাদেরই সঙ্গে রয়েছে।

‘কী হল ? কী ব্যাপার ?’ আগাশে ব্যস্তভাবে প্রশ্ন করলে।

কুরেশি কাঁপা হাত দিয়ে খোলা দরজার দিকে দেখিয়ে দিলে।

ঘরের ভিতর আলকাতরা অন্ধকার। আগাশে তার টর্চটা ফেলতে প্রথমে বিপরীত দিকের দেয়াল ছাড়া আর কিছুই দেখা গেল না। তারপর টর্চটা একটু তুলতেই যা দেখলুম তাতে শরীরের রক্ত হিম হয়ে গেল।

সীলিং থেকে ঝুলছে দড়ি, আর সেই দড়ি ফাঁস দিয়ে বাঁধা একটি আস্তো নরকঙ্কালের গলায়।

ধন্য ইন্সপেক্টর আগাশে। এই চরম আতঙ্কের মুহূর্তেও সে দিব্যি ঠাণ্ডা গলায় বললে, ‘ইনিই সেই স্বদেশী গ্যাঙের লীডার আচরেকর বলে মনে হচ্ছে। এই কারণেই বেপাত্তা হয়ে গেছিলেন ভদ্রলোক।’

‘বাট এ স্কেলিটন ইজ নট এ গোস্ট।’

ঠিকই বলেছেন মিঃ আপটে। এবং তিনিও যেমন দিব্যি স্বাভাবিক ভাবে বললেন কথাটা, তাতে তাঁর নার্ভের তারিফ না করে পারা যায় না।

‘সরি’ বললেন কুরেশি, ‘হঠাৎ সামনে কঙ্কালটা দেখে একটু বেসামাল হয়ে পড়েছিলাম।’

‘কিন্তু ওটা কী ?’

প্রশ্নটা করলেন আগাশে। তাঁর টর্চের আলো এখন সীলিং থেকে নিচের দিকে নেমেছে।

ঘরের কোণে ধুলো আর মাকড়সার জালে মুড়ি দেওয়া কিসের জানি একটা স্তূপ ।

আলোটা ভালো করে ধরতে বুঝতে পারলুম জিনিসটা কী, আর পেরে একেবারে তাজ্জব বনে গেলুম ।

এ যে দেখছি একটা ট্রেডল মেশিন ! এখানে ছাপার যন্ত্র কী করছে ?

আগাশে ব্যাপারটার একটু খুব সহজ এক্সপ্ল্যানেশন দিয়ে দিলেন । বললেন, ‘এটা যদি সম্ভ্রাসবাদীদের ঘাঁটি হয়ে থাকে তাহলে ছাপার কল থাকা অস্বাভাবিক নয় । এক নম্বর—তাদের মুখপত্র লুকিয়ে ছাপবার জন্যে কলের দরকার হত ; দুই—সম্ভ্রাসবাদীরা টাকার প্রয়োজনে নোট জাল করেছে এও অনেক শোনা গেছে ।’

রাধানাথ এ কথায় সায় দিল ।

মাথার উপর বুলন্ত কঙ্কাল আর তার নিচে নির্জীব যন্ত্রটা অদ্ভুত ভাবে যেন এক অতীত যুগের সাক্ষ্য দিচ্ছে ।

‘আরো অনুসন্ধানের প্রয়োজন আছে কি ?’ প্রশ্ন করলেন মিঃ আপ্টে ।

আমরা সকলেই বললাম যে যখন এসেছি তখন সারা বাড়িটা না দেখে ফিরব না । আমিই অবিশ্যি কথাটায় সবচেয়ে বেশি জোর দিলাম । কঙ্কাল হল মৃতব্যক্তির দেহের পরিণাম । তার আত্মা কী অবস্থায় আছে তা কে বলতে পারে ?

প্যাসেজ দিয়ে যখন উল্টোমুখে অর্ধেক পথ এসেছি তখন শুনতে পেলাম সেন্ট মেরি চার্চের ঘড়িতে ঢং ঢং করে বারোটা বাজল । ঘন্টার রেশ মিলিয়ে যাবার সঙ্গে সঙ্গে আরেকটা শব্দ শুরু হল যেটা আমাদের হাঁটা বন্ধ করে দিল ।

যে ঘর থেকে এলাম, সে ঘর থেকেই আসছে শব্দটা ।

ট্রেডল মেশিন চলতে শুরু করেছে, আর তার শব্দে সারা কনওয়ে কাস্‌ল গম্‌ গম্‌ করছে । সেই সঙ্গে মাথার উপর ডানার ঝটপটানি শুরু হয়েছে, কারণ ঘুলঘুলির বাসিন্দা পায়রাগুলোর ঘুম ভেঙে গেছে প্রেসের শব্দে ।

আমরা ছ’জনে রুদ্ধশ্বাসে শব্দটা শুনছি । দ্বিতীয়বার ওই ঘরের দিকে যাবার কোনো মানে নেই, কারণ জানি সে ঘরে যন্ত্র চালানোর মতো কোনো লোক নেই । হয়ত ওই আচরেকরই এককালে যন্ত্রটা চালিয়েছে । তারপর এক সময়ে বৃটিশ পুলিশের হাতে লাঞ্ছনা এড়াবার জন্য গলায় দড়ি দিয়ে মরেছে । আর সেই থেকে প্রতিদিন মাঝরাতিরে তার প্রেতাত্মা ওই ট্রেডল মেশিন চালিয়ে এসেছে । তার মানে হেলমারের রেকর্ডারে যে শব্দটা উঠেছিল সেটা এটারই শব্দ ।

কনওয়ে কাস্‌লের বাইরে বেরোবার পর বেশ কিছুক্ষণ কারুর মুখে কথা নেই । হরিহরণ অসুস্থ বোধ করছে, সে গিয়ে তার গাড়িতে উঠে পড়ল । কথা ছিল আপ্টে তার গাড়িতে আমাদের বাড়ি পৌঁছে দেবে । তার ডজ সিডানে

ওঠার আগে সে আমার হাতে একটা খাম ধরিয়ে দিয়ে বলল, ‘টেন হানড্রেড-রুপী নোটস—গুনে নাও।’

আমার তখন রীতিমতো অসোয়াস্তি লাগছে। তবে এ তো আর এলেবেলে খেলা নয়—এ বেট ইজ এ বেট।

খাম থেকে নোটের গোছটা বার করে রাস্তার আলোতে একবার দেখে নিলুম। দশখানাই আছে।

তিনদিন পরে এক শনিবারের সন্ধ্যায় নেপিয়ার হোটেলে ডিনার হল। আমিই খাওয়ালুম। তখনকার সস্তাগুণার দিনে সাত জনের বিল হল একশো নব্বই টাকা। আজ হলে বড় হোটেলে সাত জনের ফাইভ-কোর্স ডিনার হাজার টাকায় হত কিনা সন্দেহ।’

গল্প শুনে ন্যাপলা বলল, ‘তাহলে খুব দাঁও মারলেন বলুন।’

খুড়ো উত্তর দিতে একটু সময় নিলেন, কারণ সদ্য আনা তৃতীয় কাপ চা-য়ে গলা ভেজানো আছে, তারপর বিড়ি ধরানো আছে।

‘তা বটে,’ অবশেষে বললেন খুড়ো, ‘তবে ঘটনার শেষ এখানেই নয়।’

‘আরো আছে?’ আমরা সকলেই প্রশ্ন করলাম। এর পরে আর কী থাকতে পারে সেটা ভেবে পাচ্ছিলাম না।

তারিণীখুড়ো বলে চললেন—

ঘটনার কদিন পরে এক সকালে আমাদের বাড়িতে এসে হাজির হলো আমাদের আড্ডার সাংবাদিক আনওয়ার কুরেশি। বললে, ‘আমার গাড়ি আছে, তোমাদের একটা জায়গায় নিয়ে যেতে চাই। বিশ মিনিট স্পেয়ার করতে পারবে?’

কৌতূহল হল। রাধানাথ আর আমি গিয়ে উঠলুম তার গাড়িতে। কুরেশি নিজেই ড্রাইভ করে। কিছুদূর যেতেই বুঝলাম গাড়ি চলেছে আবার সেই কনওয়ে কাস্লের দিকে। কেন যাচ্ছে সে কথা বললে না হোকরা, খালি বললে এ কদিনে সে নাকি আরো তথ্য আবিষ্কার করেছে কনওয়ে সাহেব সম্বন্ধে।

একটি খবর নাকি বিলিতি কাগজে ছাপেনি, দিশি কাগজে পেয়েছে সেটা কুরেশি। ব্রিগেডিয়ার কনওয়ে তাঁর এক পাংখাবরদারকে বুট দিয়ে লাথিয়ে মেরে ফেলেছিলেন। তাতে রাধানাথ বললে সেটা নাকি সে-যুগের একটা স্বাভাবিক ঘটনা। গরমকালে মাঝরাত্তিরে পাংখাবরদার পাখা টানতে টানতে ঘুমিয়ে পড়ত। মশার কামড়ে ঘুম ভেঙে যেত সাহেবের। আর তখন রাগে দিক্‌বিদিক্‌জ্ঞান হারিয়ে এমন প্রহার করত ভৃত্যকে যে সে বেচারী অনেক সময় মরেই যেত।

মিনিট পাঁচেকের মধ্যেই গাড়ি গিয়ে থামল কনওয়ে কাস্লে'র গেটের সামনে ।

কুরেশির পিছন পিছন আমরা গিয়ে ঢুকলাম কাস্লে'র ভেতর । দিনের বেলাও রীতিমতো অন্ধকার, ঢুকলে গা হুম্‌হুম্‌ করে ।

‘আমরা কি আবার সেই ঘরেই যাচ্ছি ?’

রাধানাথের এ প্রশ্নের কোনো জবাব দিলে না কুরেশি । তবে তার লক্ষ্য যে ওই একই ঘরের দিকে তাতে কোনো সন্দেহ নেই । কী দেখব কে জানে । শিরার মধ্যে একটা চাঞ্চল্য অনুভব করছিলুম । কুরেশি ছোঁকরা নির্বিকার ।

আর তা হবে নাই বা কেন । সে ঘর যে খালি ! দড়ি কঙ্কাল, ছাপার যন্ত্র, সব হাওয়া !

আমাদের হতভম্ব ভাব দেখে কুরেশি হো হো করে হেসে উঠলে । তারপর এক অদ্ভুত প্রশ্ন করলে ।

‘আপুটের বাড়িতে চা ছাড়া কিছু খেয়েছ কখনো ?’

প্রশ্নটা অপ্রত্যাশিত হলেও বললুম, ‘কই, না ত !’

‘ওই ত !’ বললে কুরেশি । ‘লোকটা হাড় কঞ্জুশ । তাছাড়া ওর আত্মস্তুরি ভাবটাও মাঝে মাঝে ইরিটেট করে আমাকে । তুমি বাজিটা ফেলে মোটেই বুদ্ধিমানের কাজ করনি । তোমার নির্ঘাৎ হাজার টাকা খসত । তাই ভাবলাম কনওয়ে কাস্লে যদি ভূতের ব্যবস্থা করতে পারি তাহলে তোমারও লাভ, উনিও জব্দ । তাই দুদিন সময় চেয়ে নিয়েছিলাম । কঙ্কালটা আমার বন্ধু আর্টিস্ট কুলকার্নির বাড়ি থেকে আনা । ট্রেডল মেশিনটা শিবাজী জব প্রেসের । প্রোপ্রাইটার মধুকর চৌনটির ছেলে আমার সঙ্গে ইন্সকুলে পড়ত । ওটার জন্যে কিছু দক্ষিণা লাগবে ; আর ওদেরই আপিসের এক ছোঁকরা অন্ধকারে ঘাপটি মেরে ছিল ; সে-ই কলটা চালায় । বেচারী অনেক মশার কামড় খেয়েছে । তাকে কিছু বকশিস দিয়েছি—’

আমি আর কথা বলতে দিলুম না কুরেশিকে । এক হিসেবে পুরো টাকাটাই ওর প্রাপ্য, কিন্তু পাঁচশোর বেশি কিছুতেই নিতে রাজি হল না ।

প্যাসেজ থেকে বেরিয়ে যখন ল্যাণ্ডিং-এ এসেছি, তখন কুরেশি বললে, ‘একবার দোতলায় যাবে নাকি ? দেখবার জিনিস আছে কিন্তু । এলেই যখন...’

কাঠের সিঁড়ি দিয়ে যুদ্ধের দামামার মতো শব্দ তুলে তিনজনে ওপরে হাজির হলুম । ল্যাণ্ডিং পেরিয়ে বৈঠকখানা । একটা শন্ শন্ মচ্ মচ্ শব্দ পাচ্ছিলুম, কিন্তু সেটা যে কী সেটা বুঝতে পারছিলুম না ।

বৈঠকখানায় ঢুকে প্রচণ্ড চমক ।

এ ঘর যে একেবারে আসবাবে ঠাসা । ভিক্টোরিয় যুগের সোফা, টেবিল, আয়না, মার্বেলের মূর্তি, দেয়ালের বাতি, কাপেট, ঝাড়লগ্নন—কোনোটাই বাদ

নেই। মনে হয় ঠিক যেমন ছিল তেমনিই আছে, তবে সব কিছুই উপর আশি বছরের ধুলো জমে সেগুলোর আসল চেহারা বেমালুম ঢেকে দিয়েছে।

কিন্তু মোক্ষম চমকটা ঘরের মেঝে বা দেয়ালে নয়, সেটা হল সীলিং-এ।

সীলিং-এ দুলছে একটি বিশাল শতছিন্ন টানা পাখা, যার হাওয়া এই জুন মাসের ঘাম ছুটোনো গরমে আমাদের প্রাণ জুড়িয়ে দিচ্ছে।

কিন্তু এই পাখা টানছে কে? আর টানছে কী ভাবে? কারণ পাখার কোনো দড়ি নেই।

অর্থাৎ সেটাকে টানার কোনো উপায় নেই।

‘ভূতের উৎপাত বলে এ ঘরে কেউ প্রবেশ করেনি,’ বললে কুরেশি। ‘তাই জিনিসগুলোও নিলাম হয়নি। আমি ঘরটা আবিষ্কার করি ভূতের সব ব্যবস্থা করার পর। তারপর ভেবে মনে হল কঙ্কাল আর ট্রেডল মেশিনে ব্যাপারটা আরো জমবে।’

অবাক বিস্ময়ে বেশ কিছুক্ষণ চেয়ে রইলুম অশরীরী পাংখাবরদারের অদৃশ্য হাতে টানা পাখার দিকে। ভূত বলেই তার ক্লাস্তি নেই ঘুম নেই, সাহেবের লাথিতে মৃত্যু নেই।

আমরা যখন সিঁড়ি দিয়ে নামছি তখনও বেশ কিছুক্ষণ ধরে শুনতে পেলুম ওই টানাপাখার শব্দ।

কঙ্কাল আর ছাপার কলের ব্যাপারটা কুরেশির কারসাজি জেনে মনে একটা খচখচে গিল্টি ভাব জেগে উঠেছিল; এখন বুঝতে পারলুম দিব্যি নিশ্চিন্তু লাগছে।



শেঠ গঙ্গারামের ধনদৌলত

‘আমার এখন যে চেহারা দেখছিস,’ বললেন তারিণীখুড়ো, ‘তা থেকে আমার ইয়াং বয়সের চেহারা তোরা কল্পনাই করতে পারবি না।’

‘কিরকম চেহারা ছিল আপনার, খুড়ো?’ জিগ্যেস করল ন্যাপলা, ‘ধর্মেন্দরের মতো?’

‘য্যা য্যাঃ!’ বললেন খুড়ো, ‘ওরকম নাসপাতিমার্ক চেহারা নয়। টক্টকে রং, ব্যায়াম করা পাকানো শরীর, জামা খুললে প্রত্যেকটি মাস্‌ল আঙুল দিয়ে দেখানো যায়—অ্যানাটমির চার্টের দরকার হয় না।—আর ফিল্ম স্টারের কথা কী বলছিস? কত অফার পেয়েছে জানিস খুড়ো হিরো হবার জন্যে?’

‘ইস্—আর আপনি নিলেন না?’ বলল ন্যাপলা। ‘অবিশ্যি তখন ত বোধহয় সাইলেন্ট ছবি, তাই না?’

‘কে বললে সাইলেন্ট? আমি বলছি স্বাধীনতার কয়েক বছর আগের কথা। সাইলেন্ট ছবি ত ফুরিয়ে গেছে ত্রিশ সনের কিছু পরেই।’

‘আপনি রিফিউজ করলেন?’

‘আলবৎ! একবার একটা ছবিতে করতে হয়েছিল, তবে সেটা অন্য গল্প, আরেকদিন বলব। আসলে ফিল্মের হিরো হবার শখ আমার ছিল না। আমি চেয়েছিলাম আমার গোটা জীবনটাই হবে একটা সিনেমার গপ্পো। একটা খাঁটি নির্ভেজাল অ্যাডভেঞ্চার। অথবা বলতে পারিস একটা সিরিজ অফ অ্যাডভেঞ্চার্স। রং মেখে ক্যামেরার সামনে দাঁড়াব, ডিরেক্টরমশাই ডুগডুগি বাজাবেন, আর আমি নাচব—এ-শর্মা সে-শর্মা নয়।’

‘আজ কোন অ্যাডভেঞ্চারের বিষয় বলবেন, মিস্টার শর্মা?’ জিগ্যেস করল ন্যাপলা। খুড়োকে এ ধরনের কথা বলার সাহস একমাত্র ন্যাপলারই আছে, তবে সেটা খুড়ো বিশেষ মাইন্ড করেন বলে মনে হয় না। বাইরে একটা খিটখিটে ভাব দেখালেও আসলে ওঁর মনটা নরম এটা জানতাম। বেনেটোলা থেকে বালিগঞ্জ

আসেন যে শুধু আমাদের গল্প শোনার জন্যই এটা ত মিথ্যে নয় ।

দুধ-চিনি ছাড়া চায়ে পর পর দুটো চুমুক দিয়ে খুড়ো বললেন, ‘নাইনটিন ফটি-ফোরে আজমীর । তখন আমার বয়স আটাশ ।’

আমরা পাঁচজন—আমি, ভুলু, চটপটি, সুনন্দ আর ন্যাপলা—গল্পের জন্য রেডি হয়ে বসলাম । চা শেষ করে একটা একসপোর্ট কোয়ালিটি বিড়ি ধরিয়ে খুড়ো আরম্ভ করলেন ।

আগ্রায় একটা ব্যাক্সের চাকরিতে ইস্তফা দিয়ে কোথায় যাওয়া যায় তাই ভাবছি, এমন সময় হঠাৎ মনে পড়ে গেল ধরনীকাকার কথা । আমার বাবার মাস্তুতো ভাই । তিনি জয়পুরে হোমিওপ্যাথি করে বেশ পসার জমিয়ে বসেছেন । রাজস্থানটা দেখা হয়নি, অথচ ছেলেবেলা থেকেই ও-দেশটার উপর একটা আকর্ষণ রয়েছে । মনে হয় ভারতবর্ষে ওটাই হল সত্যিকারের রোম্যান্স ও অ্যাডভেঞ্চারের ঘাঁটি । চলে গেলুম কাকার কাছে ।

আমি বেকার জেনে কাকার ভুরু কুঁচকে গেল । বললেন, ‘তোর মতো একজন জোয়ান ছেলে ফ্যা ফ্যা করে ঘুরে বেড়াচ্ছে এটা আমি বরদাস্ত করতে পারি না । আজমীর যাবি ?’ বললুম, ‘কী আছে সেখানে ?’ কাকা বললেন, ‘শেঠ গঙ্গারাম আমার পেশেন্ট । পেটের আলসারে ভুগত, আমার ওষুধে চাঙ্গা হয়ে উঠেছেন । তার একজন ইংরিজি জানা সেক্রেটারি দরকার । তোরা ত ইংরিজিতে অনার্স ছিল । যদি চাস ত তোকে রেকমেন্ড করে দিতে পারি ।’

কখন কী কাজে দরকার পড়ে, তাই টাইপিংটা আগেই শেখা ছিল । কাজেই সেক্রেটারির চাকরির পক্ষে আমি অনুপযুক্ত নই । তবু লোকটার সম্বন্ধে একটু ডিটেল জানা দরকার বলে প্রশ্ন করলুম, ‘কী করেন গঙ্গারাম ?’ গঙ্গারাম বললেই উনিশটিবার ম্যাট্রিকে সে ঘায়েল হয়ে থামল শেষে—মনে পড়ে যায় ।

কাকা বললেন, ‘গঙ্গারাম মস্ত ধনী । হীরে জহরতের কারবার । বিদেশে কেরেসপন্ডেন্স চালাতে হয় । যে সেক্রেটারি ছিল সে নাকি বিয়ে করার নাম করে সেই যে গেছে আর আসেনি ।’

‘বস্ হিসেবে গঙ্গারাম কি— ?’

‘কোনো গোলমাল নেই । তবে ওর একটা ছেলে আছে বছর বারো বয়স, সে নাকি একটি মূর্তিমান বিচ্ছু । সে যদি কিছু করে থাকে ।’

আমি বললাম, ‘কুছ পরোয়া নেহী । যে ছেলের এখনো গৌফ গজাবার বয়স হয়নি তাকে আবার ভয় কিসের ? ও আমি সামলে নেব ।’

‘তাহলে আর কী, লেগে পড় । আমি গঙ্গারামকে লিখে দিচ্ছি । আমার রিকোয়েস্ট ও ঠেলতে পারবে না ।’

কাকার এক চিঠিতেই গঙ্গারাম রাজি । লিখলেন ‘সেন্ড ইওর নেফিউ

ইমিডিয়েটলি’ । একবার অম্বর প্যালেসটায় টুঁ মেরে জয়পুর থেকে চলে গেলাম মুসলমানদের পবিত্র তীর্থস্থান আজমীরে । আকবর একটা প্রাসাদ বানিয়েছিলেন এই শহরে । আজমীর থেকে সাত মাইল পশ্চিমে হিন্দুদের তীর্থস্থান পুষ্কর । সব মিলিয়ে যাকে বলে ঐতিহ্যে মহীয়ান ।

প্রথম রাতটায় থাকলাম সার্কিট হাউসে । কাকাই ব্যবস্থা করে দিয়েছিলেন । আনাসাগর নামে বিরাট লেকের ধারে এমন সার্কিট হাউস ভারতবর্ষে আর দুটি আছে কিনা সন্দেহ । বারান্দায় বেতের চেয়ারে বসে যে দৃশ্য দেখলুম তা জীবনে ভুলব না । হাজার হাঁস চরে বেড়াচ্ছে লেকে, পশ্চিমে তারাগড় পাহাড়, তার পিছনে টেকনিকালার ছবির মতো সানসেট হচ্ছে ।

শেঠ গঙ্গারামের গদি এবং বাসস্থান শহরের মথিখানে হলেও, বাড়ির ভেতরে একবার ঢুকে পড়লে সেটা আর বোঝার জো থাকে না । সাতাশ বিঘে জমির ওপর বাড়ি । আর সেটাকে ঘিরে দুর্গের মতো পাঁচিল । আড়াই শো বছরের সোনাদানার ব্যবসা । ঘরে কত যে মহামূল্য রত্ন আর গয়নাগাটি আছে তার হিসেব নেই । সেই জন্যেই এই পাঁচিলের ব্যবস্থা—যদিও তাতেও যে ষোল আনা সেফটি হয় না সেটা পরে বুঝেছিলাম, তবে সে কথা যথাস্থানে প্রকাশ্য ।

গঙ্গারামের সঙ্গে সকালে গদিতে দেখা করলুম । ভদ্রলোকের বয়স ষাট-পঁয়ষাট, ঘী খাওয়া নধর পরিপুষ্ট চেহারা, একবার বসে পড়লে উঠতে গেলে পাশের লোককে হাত ধরে হেল্প করতে হয় । আমায় দেখে প্রথম প্রশ্ন হল ‘আর ইউ এ বেঙ্গলী ?’

এ প্রশ্নের অবশিষ্ট একটা কারণ আছে । সেটা এখানে বলি ।

আগ্রায় থাকতে একদিন ব্যাঙ্কে এক খদ্দের আসে । ভদ্রলোকের চেহারা এমনতেই ভালো, তার উপর এক জোড়া তাগড়াই গোঁফ তাতে এমন এক পার্সোনিয়ালিটি এনে দিয়েছে যে দেখেই ডিসাইড করলুম ও জিনিস আমারও চাই ।

আড়াই মাস লেগেছিল গোঁফের ওই শেপ নিতে । মাঝখানটা ভরাট আর পুরু, আর দুটো পাশ যেন দুটো হাতির ঝুঁড় সেলাম ঠুকছে । কলকাতার বাঙালীদের মধ্যে থেকে গোঁফ জিনিসটা তখন প্রায় উঠে গেছে, কিন্তু পশ্চিমে অনেকেই ওটার খুব তোয়াজ করে । আর রাজস্থানে ত কথাই নেই ।

শেঠজীকে বললুম যে আমি বঙ্গসন্তানই বটে—গোঁফটা নেহাৎ শখের ব্যাপার ।

ইংরিজিটা ত মোটামুটি বলতেই পারতুম, দু-বছর আগ্রায় থেকে হিন্দিটাও সড়গড় হয়ে গেস্ল । তার উপর আদব কায়দাগুলো রপ্ত, স্বাস্থ্য ভালো, সব মিলিয়ে গঙ্গারাম খুশিই হলেন । বললেন, ‘আমার বাড়িতেই তুমি থাকবে । সকালে বিকেলে আমার কাজ করবে, দুপুরটা আমি ঘুমোই, আর সন্ধ্যাটা তুমি

আমার ছেলের টিউশনি করবে। ছেলে চালাক, তবে পড়াশুনোয় মন নেই, ভারী দুরন্ত, সঙ্গদোষে নষ্ট না হয় সেটা তোমাকে দেখতে হবে। উপযুক্ত পারিশ্রমিক আমি তোমাকে দেব। তবে একটা কথা—আমরা নিরামিষ খাই। মাছ, মাংস খেতে চাইলে তোমাকে বাইরে গিয়ে খেতে হবে। অবিশ্যি শাক-সবজি ফলমূল দুধ-মিষ্টিতে যদি তোমার অরুচি না হয় তাহলে বাইরে যাবার কোনো দরকার হবে বলে মনে করি না।’

নিরামিষ শুনে গোড়ায় মনটা দমে গেল, কিন্তু শেঠজীর বাড়ির নিরামিষ রান্না এমনই সুস্বাদু, আর বাড়ির গরুর খাঁটি দুধের মালাই-বালাইয়ের এমনই কোয়ালিটি যে মাছ-মাংসের অভাব মিটিয়ে দিয়েছিল।

গঙ্গারামের সবশুদ্ধ সাত ছেলে। তার মধ্যে দুটি অল্প বয়সেই মারা গেছে, দুটি আর্মিতে, দুটি বাপের ব্যবসায় যোগ দিয়েছে আর ছোটটি হলেন শ্রীমান মহাবীর বিচ্ছু। আমার সঙ্গে কথা বলে গঙ্গারাম ছেলেকে ডেকে পাঠালেন। সে এলে পর ‘ইনি তোমার নতুন মাস্টার’ বলে আমার পরিচয় দিয়ে বললেন, ‘যাও, ঐকে ঐর ঘর দেখিয়ে দিয়ে এস।’

এমন অস্থির চোখের দৃষ্টি আমি কোনো ছেলের মধ্যে দেখিনি, আর সেই সঙ্গে এমন তীক্ষ্ণ ঝিলিক। সে যে বিচ্ছু তাতে সন্দেহ নেই, কিন্তু সেই সঙ্গে তার বুদ্ধিও যে বেশ ধারালো সেটা বোঝা যায়।

গদি থেকে বাড়ির ভিতর ঢুকে একটা প্রকাণ্ড উঠোন পেরিয়ে একটা প্যাসেজের মধ্যে দিয়ে আরেকটা উঠোনে পৌঁছলাম। তারই পাশে বারান্দার ধারে একটা ঘরে নিয়ে গিয়ে আমাকে হাজির করল মহাবীর। বোঝাই যাচ্ছে এটা শিস-মহল জাতীয় একটা কিছু ছিল, কারণ ঘরের সারা দেয়াল আয়নার টুকরো দিয়ে মোড়া।

আমাকে পৌঁছে দিয়েই মহাবীর যে কেন চম্পট দিল সেটা মিনিট খানেকের মধ্যেই বুঝতে পারলুম।

ঘরের মেঝেতে দুটি এবং খাটের উপর একটি জ্যাস্ত বিছে অবস্থান করছে। মেঝের দুটি তেঁতুলে, আর খাটের ওপরেরটি একেবারে খোদ কাঁকড়া বিছে। শেষেরটি আপাতত খাটের মধ্যস্থান থেকে বালিশ লক্ষ করে এগুচ্ছে। আমি জানি মেঝের দুটি চেহারাতেই যা ভয়ের উদ্রেক করে,‘কামড়ে বিষ নেই। তবে বিছানার উপরে যেটি, তার ল্যাজের ডগায় বাঁকানো ছলাটির ছোবল একেবারে মারাত্মক।

‘বিচ্ছু’ বিশেষণের তাৎপর্য যে এই ভাবে প্রথম দিনই বোঝা যাবে সেটা ভাবিনি।

আমি ঘর থেকে বেরিয়ে ‘মহাবীর’ বলে একটা হাঁক দিলুম। তাতে উত্তর না পেলেও, ডাকের ফলে উন্টোদিকের বারান্দায় স্বয়ং শ্রীমানের আবির্ভাব হল।

হেলতে দুলতে সে এসে দাঁড়াল একটা থামের পাশে । আমি তাকে ডাকলুম ।

‘ইধার আও ।’

বিচ্ছু এগিয়ে উঠোনের মাঝবরাবর এসে আবার থামলেন ।

‘হাত দিয়ে বিচ্ছু তুলতে পার ?’ জিগ্যেস করলুম আমি ।

শ্রীমান নিরুত্তর ।

‘এস । দেখে যাও কি করে তোলে ।’

এবার শ্রীমানের কৌতূহল হল । এখানে বলে রাখি আমি নিজেও কোনদিন হাত দিয়ে কাঁকড়াবিছে তুলিনি । তবে সেটা যে সম্ভব তা জানি, কারণ ছেলেবেলায় গণশা বলে আমাদের একটা চাকর ছিল তাকে এ জিনিস করতে দেখেছি । খপ করে ঠিক হুলের তলাটা ধরে তুলে ফেললে হুল ফোটাবার আর মওকা পায় না বিছে ।

মহাবীর আমার ঘরের দরজার মুখটাতে এসে দাঁড়াল ।

আমি দম টেনে এক বুক সাহস নিয়ে দুগ্লা বলে এক ছোবলে খাটের উপর থেকে বিছেটাকে ল্যাজ ধরে তুললুম । তারপর সেটা দু আঙুলে ঝুলিয়ে মহাবীরের মুখের খুব কাছে নিয়ে গিয়ে বললুম, ‘বিছেগুলোকে বাইরে ফেলে আসার জন্য একটা পাত্র নিয়ে এস । আর দেখছই ত—আমার যখন ভয় নেই, তখন আমাকে ভয় দেখিয়ে কোনো মজা নেই ।’

মহাবীর এক মিনিটের মধ্যেই একটা কাঁচের বৈয়াম নিয়ে এল । তার ভেতরের দেয়ালে লাড্ডুর গুঁড়ো লেগে রয়েছে । তারই মধ্যে প্রথমে কাঁকড়া বিছেটাকে, তারপর তেঁতুলে বিছে দুটো ফেলে বললুম, ‘এগুলোকে বাড়ির পাঁচিলের বাইরে ফেলে এস ।’

মহাবীর গেল, তারপর কিছুক্ষণের মধ্যেই এসে রিপোর্ট করে গেল যে সে আমার আঙ্গা পালন করেছে ।

তারপর থেকে মনে হত যে প্রাইভেট টিউটরের প্রতি তার যে স্বাভাবিক বিরাগ সেটা মহাবীর কিছুটা কাটিয়ে উঠেছে । কতটা কাটিয়েছে সেটা জানা মুশকিল, কারণ এমনিতে সে অত্যন্ত চাপা । পেটে বোমা মারলেও মনের আসল ভাব সে প্রকাশ করবে না । কিন্তু ছেলেটি অত্যন্ত চৌকস, কাজেই লেখাপড়ায় যাতে তার মন বসে সে চেষ্টা আমাকে করতেই হবে, তাতে সফল হই বা না হই । দুটুমি বন্ধ করার চেষ্টা আমি করিনি, কারণ জানি সেটা মাঠে মারা যাবে । ত্যাঁদড়ামোর দৌড় যে কতখানি সেটা এক দিনের ঘটনা বললেই বুঝতে পারবে ।

গঙ্গারামের বাড়িতে চারটে ঘোড়া, ছটা উট । একদিন সকালে মনিবের চিঠি টাইপ করছি গদিতে বসে, এমন সময় হঠাৎ সমস্তরে অনেকগুলো উটের আর্তনাদ শুনে আঁৎকে উঠলুম । উটের ডাকের মতো এমন বীভৎস ঘড়ঘড়ে ডাক আর কোনো জানোয়ারের নেই ।

কৌতূহল হওয়াতে বাইরে বেরিয়ে দেখি—জোড়া জোড়া উট বোধহয় পরস্পরের দিকে পিঠ করে বসেছিল, কোন এক ফাঁকে গিয়ে শ্রীমান এর-ওর ল্যাজ গাঁটছড়ার মতো করে বেঁধে দিয়ে এসেছে। বসা উট দাঁড়িয়ে উঠতে ল্যাজে টান পড়ার ফলেই এই বিকট চীৎকার।

গঙ্গারাম এ ব্যাপারে ভয়ংকর আপসেট হয়ে পড়াতে তাকে বুঝিয়ে বললুম যে এ ধরনের দুষ্টুমির বয়সটা মানুষের খুব দীর্ঘস্থায়ী হয় না ; তোমার ছেলের যথেষ্ট বুদ্ধি আছে ; সে পড়াশুনোয় ভালো হবে এ গ্যারান্টি আমি দিচ্ছি, তুমি চিন্তা কোর না।

এত বলার পর বাপ স্বস্তির নিশ্বাস ফেললেন।

মহাবীরকে পড়ানোর টাইম ছিল সন্ধ্যা সাতটা থেকে নটা। একতলার পিছন দিকে আমার ঘরের উল্টোদিকে একটা ঘরে বসে পড়াশুনা হত। আমি গিয়ে বসলেই বেয়ারা এক গেলাস সরবত দিয়ে যেত। সেটা যে কিসের সরবত তা কোন দিন ঠাহর করতে পারিনি, তবে বলতে পারি এমন সুস্বাদু সুগন্ধী সরবত আর কোনদিন খাইনি। সরবত শেষ হতে না হতেই ছাত্র এসে পড়তেন।

একদিন দেখি ছেলে আর আসে না। আমি ঘড়ি দেখছি থেকে থেকে ; বিশ মিনিট হয়ে গেল, পঁচিশ মিনিট, এক ঘণ্টা, তবু সে আসে না। দেরির কী কারণ হতে পারে বুঝতে পারছি না, এমন সময় হঠাৎ শ্রীমান এসে হাজির।

‘কী ব্যাপার বল ত?’ জিজ্ঞেস করলাম তাকে। ‘এত দেরি কেন?’

‘তোমায় একটা জিনিস দেখাব তাই,’ বললেন শ্রীমান। ‘বাবার নেশা পুরোপুরি না হলে ট্যাঁক থেকে চাবি বার করতে পারছিলাম না।’

সর্বনাশ ! বাবার ট্যাঁক থেকে চাবি ? শেঠজী যে গাঁজা জাতীয় একটা কিছু সেবন করেন সন্ধ্যাবেলা সেটা জানতাম।

‘কিসের চাবি?’ জিগ্যেস করলাম আমি।

‘সিন্দুকের,’ বললেন শ্রীমান বিচ্ছু।

তারপর পকেট থেকে একটা জিনিস বার করে ঠক করে টেবিলের উপর রাখল। ল্যাম্পের আলোয় সেটার চোখ ধাঁধানো ঝলসানি আমায় থমকে দিল।

জিনিসটা একটা সোনার লকেট। সাইজে ক্যারামের স্ট্রাইকারের মতো। মাঝখানে একটা আধুলি-প্রমাণ সবুজ মণি, নির্ঘাৎ মরকত বা পান্না,—তাকে ঘিরে আছে হীরের বলয়, আর তাকে আবার ঘিরে আছে সোনার সূক্ষ্ম কারুকার্যের মধ্যে বসানো চুনি আর পান্না।

‘জাহাঙ্গীর বাদশার জিনিস ছিল এটা’ চাপা গলায় বলল মহাবীর। ‘বিশ লাখ টাকা দাম। বাবা কাউকে দেখান না, কাউকে বিক্রী করবেন না।’

‘আর তুমি এটা সিন্দুক থেকে বার করে নিয়ে এলে?’

‘বাঃ, এটা তোমাকে দেখাব না ? তোমার দেখা হলে আবার রেখে দিয়ে আসব ।’

আমি অবাক হয়ে একবার লকেটের দিকে, একবার মহাবীরের দিকে দেখছি, এমন সময় হঠাৎ একটা প্রশ্ন করে বসলেন শ্রীমান ।

‘টোটা সিং-এর নাম শুনেছ ?’

‘কে টোটা সিং ?’

‘আসল নাম কেউ জানে না । ডাকু টোটা সিং । পুলিশ ধরে জেলে পুরেছিল, ও জানলার গরাদ হাত দিয়ে বৈকিয়ে পালিয়ে যায় ।’

এবার মনে পড়ল । কোনো একটা কাগজে পড়েছিলাম বটে । রাজপুত ডাকাত, রাজপুত্রেরই মতো চেহারা । ফরসা রং, কিন্তু ডাকাতি করে মিশকালো ভীলদের সঙ্গে । ভারী রহস্যময় চরিত্র । পুলিশ জেরা করেও কিছু জানতে পারেনি । দুর্ধর্ষ সাহসী, আর বন্দুকের অব্যর্থ নিশানা । গায়েও নাকি প্রচণ্ড শক্তি ।

‘হঠাৎ টোটা সিং-এর কথা জিগ্যেস করছ কেন ?’

‘আমাদের বাড়িতে ডাকাত এলে মজা হবে ।’

আমি ত থ ! বললাম, ‘এসব কী বলছ তুমি ?’

‘গোলাগুলি চলবে, আর মজা হবে না ?’

‘এসব কথা বোল না মহাবীর । যদি লোক খুন হয় সেটা কি খুব ভালো হবে ?’

মহাবীর আর কিছু বলল না । তার উৎসাহের সঙ্গে আমার উৎসাহ মেলাতে পারলাম না বলে বোধহয় সে কিছুটা হতাশ হল । তাকে লকেটটা দিয়ে বললাম, ‘যাও, এটা রেখে এস বাবার সিন্দুকে ।’

মহাবীর বাধ্য ছেলের মতো লকেটটা নিয়ে বেরিয়ে গিয়ে আবার পাঁচ মিনিটের মধ্যে ফিরে এল । সেদিন আর তেমন জমিয়ে পড়াশুনা হল না ।

রাতিরে শুয়ে শুয়ে লকেটটার কথা আর সেই সঙ্গে কী বিপুল ধনদৌলতের মধ্যে রয়েছে আমি সেই কথাটা ভাবছিলাম । আমার ঘরের উপরেই শেঠ গঙ্গারামের ঘর । শেঠজীর ইনসমনিয়া, রাত আড়াইটা তিনটার আগে ঘুম আসে না । নেশার ফলে সন্ধ্যা সাতটা নাগাৎ একটা তন্দ্রার ভাব আসে । তারপর দশটা থেকে একেবারে সজাগ । এই ব্যারাম হোমিওপ্যাথিতে সারেনি । তাই শেঠজী আলোপ্যাথির ঘুমের বড়ি খান । কিন্তু যতক্ষণ না ঘুমের আমেজ আসে ততক্ষণ ঘরে পায়চারি করেন । তাঁর পদধ্বনি আজ শুনতে পাচ্ছি আমার মাথার উপরে ।

ক্রমে সেই পায়ের শব্দও থেমে গেল, কিন্তু আমার চোখে ঘুম নেই । ঢংঢং করে গদির ঘরের জাপানী দেয়াল ঘড়িতে দুটো বাজল, আর তারই কিছুক্ষণ পরেই মাথায় আকাশ ভেঙে পড়ল ।



একে টেলিপ্যাথি বলব না কী বলব জানি না ; আজই সন্ধ্যায় ডাকাতের কথা হল, আর আজই ডাকাত পড়ল শেঠ গঙ্গারামের বাড়ি !

প্রথমে সন্দেহ হল কুকুরের ঘেউ ঘেউ শুনে । তারপর ঘোড়ার চিহিহি আর উটের পরিত্রাহি আর্তনাদ । তারপর হৈ হল্লা আর পর পর তিনটে বন্দুকের আওয়াজ পেয়ে আমি খাটের উপর সটান উঠে বসলাম । ঘর থেকে বারান্দায় বেরোব কিনা ভাবছি, এমন সময় বেশ কিছু লোকের এক সঙ্গে দ্রুত পায়ের শব্দে সমস্ত বাড়িটা গমগম করে উঠল । দরজা দিয়ে মুখ বাড়িয়ে ওদিকের বারান্দায় প্যাসেজের ভিতর দিয়ে বাইরের উঠানের যে অংশটা দেখা যায়, তাতে আলোকরশ্মির ছটফটানি দেখে বুঝলাম কে বা কারা যেন টর্চ ফেলছে ।

মাথায় রোখ চেপে গেল । শেঠজীই আমাকে একটা রিভলভার দিয়েছিলেন । সেটা নিয়ে প্যাসেজের দিকে এগিয়ে গেলুম । বাড়িতে ডাকাত যদি পড়েই থাকে ত এভাবে কেঁচো হয়ে ঘরে বসে থাকলে বাঙালীর মুখে যে কালী পড়বে !

কিন্তু প্যাসেজ দিয়ে বেরোনমাত্র একটা বন্দুকের গর্জনের সঙ্গে সঙ্গে বুঝলাম আমার কানের পাশ দিয়ে একটা গুলি বেরিয়ে গিয়ে পিছনের একটা কাঁচের জানালাকে চৌচির করে দিল । আমি বেগতিক দেখে মাটিতে ছমড়ি খেয়ে পড়লুম । গোলাগুলি চললে এটাই যে প্রশস্ত পস্থা এটা আমার জানা ছিল । তাও উপড় অবস্থাতেই হাত বাড়িয়ে রিভলভারের ঘোড়া টিপে একজন বন্দুকধারীর দিকে একটা গুলি চালিয়ে দিলুম । লোকটা আর্তনাদ করে কোমরে হাত চাপা দিয়ে অন্ধকারে অদৃশ্য হয়ে গেল । আজ অমাবস্যা, কিন্তু উঠানের উপরে ছাত নেই বলে তারার আলোতে তবু কিছুটা দেখা যাচ্ছিল ।

এই ভাবে কুরুক্ষেত্র চলল মিনিট কুড়ি । শেঠজীর বাড়ি পাহারা দেবার জন্য সশস্ত্র দারোয়ান ছিল গোটা আষ্টেক । কাজেই যুদ্ধ যে শুধু এক তরফাই ঘটেছে তা নয় ।

ক্রমে হল্লা, আর্তনাদ, গুলির শব্দ, পায়ের শব্দ ইত্যাদি সব কিছু থামার পর আমি আবার উঠে দাঁড়ালুম । তখন এদিকে ওদিকে বাতি জ্বলতে শুরু করেছে । ওপর থেকে মেয়েদের গলায় ঘোর বিলাপ ধ্বনি শোনা যাচ্ছে । যতদূর মনে হয়, রেড সাক্সেসফুল ।

মিনিট খানেকের মধ্যেই মহাবীর দৌড়ে নেমে এল দোতলা থেকে । সে আমার ঘরেই যাচ্ছিল, মাঝপথে আমাকে দেখে থেমে গিয়ে পাকা খবর দিয়ে দিল ।

টোটা সিং ডাকাতের দল বিস্তর ধনরত্ন লুট করে নিয়ে চলে গেছে, ইনকুডিং শেঠজীর সিন্দুক খুলে জাহাঙ্গীরের লকেট । শেঠজী নিজে নাকি বিপদ বুঝে গিন্নী ও মহাবীরকে নিয়ে ছাতে গিয়ে গা ঢাকা দিয়েছিলেন । তাঁর দুই ছেলে প্রতাপ ও মহাবীর বন্দুক নিয়ে ডাকাতদের বিরুদ্ধে রুখে দাঁড়িয়েছিল—দুজনেই জখম । এ

ছাড়া দুটি প্রহরী মরেছে, আরেকটির পায়ে গুলি লেগেছে।

কিন্তু এখানেই গুল্লের শেষ নয়।

পুলিশে ডায়রি ইত্যাদি যা করবার সে ত হলই। এখানে বলে রাখি যে শেষ পর্যন্ত ইনস্পেক্টর যশোবন্ত সিং এবং তাঁর দলের লোকেরা জাহাঙ্গীরের লকেট সমেত চোরাই মালের অধিকাংশই উদ্ধার করেছিলেন, ডাকাতদলের সাতজন ধরা পড়েছিল, তবে টোটা সিং উধাও। কিন্তু এ সবার আগে আমাকে জড়িয়ে যে ঘটনাটা ঘটল তার জন্য আমি মোটেই প্রস্তুত ছিলাম না।

ডাকাতির দুদিন পরের সন্ধ্যাবেলা।

ছাত্র পড়ানোর ঘরে গেছি যথারীতি সাতটার সময়, সরবতও খাওয়া হয়ে গেছে, এমন সময় অনুভব করলাম মাথাটা কেমন যেন ঝিমঝিম করছে। ছাত্র তখনও আসেনি, এদিকে ক্রমেই বুঝতে পারছি যে চোখের সামনের জিনিসগুলো দেখতে যেন রীতিমতো কষ্ট করে দৃষ্টি ফোকাস করতে হচ্ছে।

কী যে হল কিছুই বুঝতে পারছি না, শুধু এটুকু বুঝছি যে এ অবস্থায় পড়ানো অসম্ভব।

এমন সময় শ্রীমান মহাবীর সিং-এর প্রবেশ। তার হাতে একটা হলদে কাগজ—হ্যান্ডবিলের মতো।

অবাক হয়ে দেখলাম তাতে আমারই ছবি।

‘টোটা সিং’, বলল মহাবীর, তার চোখ জ্বল জ্বল করছে।

টোটা সিং? কী বলছে ছেলেটা পাগলের মতো। স্পষ্ট দেখছি যে আমার ছবি—সেই গোঁফ, সেই বুলপি, সেই নাক, সেই চোখ!

‘টোটা সিং,’ আবার বলল মহাবীর। ‘ঠিক তোমার মতো দেখতে। রাস্তার দেয়ালে দেয়ালে ছবি আটকে দিয়েছে আজই দুপুরে। ধরে দিতে পারলে দু হাজার টাকা পুরস্কার।’

আমি সেই অবস্থাতেই কাগজটা ওর হাত থেকে নিয়ে চোখের একেবারে সামনে এনে নিচের লেখাটা পড়ার চেষ্টা করলুম। বড় করে লেখা টোটা সিং-এর নামটা পড়তে কোনো অসুবিধা হল না। আর সেই সঙ্গে ছবির মাথার উপরে লেখা ‘রিওয়ার্ড রুপীজ ২০০০।’

‘পুলিশ তোমায় ধরতে আসবে,’ বলল মহাবীর সিং। ‘কিষণলাল বলল ও পুলিশে বলে দেবে তুমি এখানে থাক। ও দেখেছে দেয়ালের ছবি।’

কিষণলাল শেঠজীর দোকানের একজন কর্মচারী। লোকটা খুব সুবিধের নয় সেটা আমারও কয়েকবার মনে হয়েছে।

‘তোমার জেল হবে,’ বলে চলেছে মহাবীর সিং। আমার জেল হলে সে যেন রেহাই পায় এমনই তার ভাব। এই অদ্ভুত প্রায়-বেইশ অবস্থাতেও বুঝতে পারলাম যে এ ছেলেকে আমি বশ করতে পারিনি। সে আমার প্রতি যেমন

বিরূপ ছিল তেমনিই রয়ে গেছে।

আমি আর চোখ খুলে রাখতে পারছিলাম না। জিভও জড়িয়ে আসছিল। তার মধ্যেই বুঝতে পারছি যে একটা বিশ্রী অবস্থায় পড়ে গেছি। চেহারা যখন এতই মিল তখন গঙ্গারামও আমাকে উদ্ধার করতে পারবেন কিনা সন্দেহ। শেষটায় হাতে হাতকড়া!

ঘর থেকে বেরিয়ে টলতে টলতে উঠোন পেরিয়ে কোনো মতে আমার শিস-মহলে বিছানায় শুয়ে পড়লাম, আর শোয়ামাত্র অঘোরে ঘুম!

পরদিন ঘুম ভাঙল পুরুষ মানুষের গলার শব্দে। ভুরী গলায় কে যেন ইংরিজি-হিন্দি মিশিয়ে কথা বলছেন আমার ঘরের কাছেই।

‘আমাদের ডেফিনিট ইনফরমেশন আছে এ বাড়িতে সে লোককে দেখা গেছে। আমরা সার্চ করে দেখতে চাই। ছাব্বিশটা ঘর এই হাভেলিতে। লুকোবার জায়গার কি অভাব আছে?’

আমি প্রমাদ গুনলাম। কথার সঙ্গে সঙ্গে পায়ের শব্দ এগিয়ে আসছে আমারই ঘরের দিকে।

এবার গঙ্গারামের কাতর কণ্ঠস্বর শোনা গেল।

‘এ বাড়িতে টোটা সিং লুকিয়ে থাকবে আমার অজান্তে? এটা কী করে সম্ভব হয় ইন্স্পেক্টর সাহেব?’

দরজার বাইরে লোক। আমি বিছানায় কনুইয়ে ভর করে আধশোয়া। আমার গলা শুকিয়ে গেছে, বুকের ভিতর ধড়ফড়ানি। এখনও মাথা ভার; কাল যে কী হল এখনও বুঝতে পারছি না!

চৌকাঠ পেরিয়ে এক পা ঢুকে এলেন উর্দি পরা দারোগা। আমার দিকে এক ঝলক দৃষ্টি দিয়ে ‘সরি’ বলে বেরিয়ে গেলেন। পায়ের শব্দ এবং কণ্ঠস্বর বারান্দার ডান দিক দিয়ে মিলিয়ে এল।

আমার মাথা ভোঁ ভোঁ করছে। তাহলে কি কালকের ছবিটাও মহাবীরের আরেকটা বিচ্ছুরি? শুধু আমার মনে একটা প্যানিক সৃষ্টি করার জন্য?

আমি বিছানা ছেড়ে উঠলাম।

দেয়ালের দিকে চোখ গেল।

দেয়ালের সর্বাস্থে আয়নার টুকরো। তাতে আমার মুখের ছায়া পড়েছে। একটা নয়, অগুন্তি।

কিন্তু এ মুখ যে বদলে গেছে!

আপনা থেকেই আমার হাতটা মুখের উপর চলে এল।

কোথায় আমার টোটা-মার্ক তাগড়াই গৌফ? আমি যে ক্লীন-শেডন!

আর আমার মাথার চুলের এ কী দশা? এ যে প্রায় কদম ছাঁট!

দোর গোড়ায় এখন দাঁড়িয়ে মহাবীর সিং—তার চোখে মুখে শয়তানী হাসি ।

‘কাল সব্বতে কী ছিল ?’ সে জিগোস করল ।

‘কী ছিল ?’

‘বাবার চারটে ঘুমের বড়ি । তুমি ঘুমোলে পর দাদার খুর দিয়ে আমি তোমার গৌফ কামিয়ে দিই, আর কাঁচ দিয়ে চুল ছেঁটে দিই । নাহলে তোমায় ধরে নিয়ে যেত । এখন ওরা বৃদ্ধ বনে যাবে ।’

আমি অবাক হয়ে চেয়ে রইলাম মহাবীরের দিকে । এমন ফন্দির কি তারিফ না করে পারা যায় ? আর সে যে সত্য আমার বন্ধু, তার এর চেয়ে বড় প্রমাণ কি আর আছে ?

‘সাবাস, মহাবীর,’ আমি এগিয়ে গিয়ে বন্ধুর পিঠ চাপড়ে বললাম, ‘জিতে রহো ।’



লখনৌর ডুয়েল

‘ডুয়েল মানে জ্ঞানিস ?’ জিগ্যাস করলেন তারিণীখুড়ো ।

‘বাঃ, ডুয়েল জানব না ?’ বলল ন্যাপলা । ‘ডুয়েল রোল, মানে দ্বৈত ভূমিকা । সন্তোষ দত্ত গুপী গাইনে ডুয়েল রোল করেছিলেন—হাম্মার রাজা, শুক্কার রাজা ।’

‘সে ডুয়েলের কথা বলছি না,’ হেসে বললেন তারিণীখুড়ো । ‘ডি-ইউ-এ-এল নয়, ডি-ইউ-ই-এল ডুয়েল । অর্থাৎ দৃক্তনের মধ্যে লড়াই ।’

‘হ্যাঁ হ্যাঁ, জানি জানি !’ আমরা সকলে একসঙ্গে বলে উঠলাম ।

‘এই ডুয়েল নিয়ে এককালে কিছু পড়াশুনা করেছিলুম নিজের শখে,’ বললেন তারিণীখুড়ো । ‘ষোড়শ শতাব্দীর শেষ ভাগে ইটালি থেকে ডুয়েলিং-এর রেয়াজ ক্রমে সারা ইউরোপে ছড়িয়ে পড়ে । তখন তরোয়াল জিনিসটা ছিল ভদ্রলোকদের পোশাকের একটা অঙ্গ, আর অসি-চালনা বা ফেনসিং শেখাটা পড়ত সাধারণ শিক্ষার মধ্যে । একজন হয়ত আরেকজনকে অপমান করল, অমনি অপমানিত ব্যক্তি ইজ্জত বাঁচাবার খাতিরে অন্যজনকে ডুয়েলে চ্যালেঞ্জ করল ; এই চ্যালেঞ্জ অগ্রাহ্য করাটা রেয়াজের মধ্যে পড়ত না, ফলে সোর্ড ফাইট শুরু হয়ে যেতো । মান যে বাঁচবেই এমন কোনো কথা নেই, কারণ যিনি চ্যালেঞ্জ করেছেন তিনি অসি চালনায় তেমন নিপুণ নাও হতে পারেন । কিন্তু তাও চ্যালেঞ্জ করা চাই, কারণ অপমান হজম করাটা সেকালে অত্যন্ত হেয় বলে গণ্য হত ।’

‘বন্দুক-পিস্তলের যুগে অবিশ্যি পিস্তলই হয়ে গেল ডুয়েলিং-এর অস্ত্র । সেটা অষ্টাদশ শতাব্দীর ঘটনা । এই ডুয়েলিং-এ তখন এত লোক মরত আর জখম হত, যে এটাকে বেআইনী করার চেষ্টা ইতিহাসে অনেকবার হয়েছে । কিন্তু এক রাজা আইন করে বন্ধ করলেন ত পরের রাজা টিলে দেওয়াতে আবার চালু হয়ে গেল ডুয়েলিং । আর কতরকম তার আইনকানুন !—দুজনকেই ছবছ একরকম

অস্ত্র ব্যবহার করতে হবে, দুজনেরই একটি করে “সেকেণ্ড” বা অ্যাম্পায়ার থাকবে যাতে কারচুপির রাস্তা বন্ধ হয় ; দুজনকেই দাঁড়াতে হবে এমন জায়গায় যাতে পরস্পরের মধ্যে আন্দাজ বিশ গজের ব্যবধান থাকে, আর চ্যালেঞ্জারের সেকেণ্ড “ফায়ার” বলা মাত্র দুজনের একসঙ্গে গুলি চালাতে হবে । তোরা জানিস কিনা জানি না, এই ভারতবর্ষেই—না, ভারতবর্ষ কেন—এই কলকাতাতেই, আজ থেকে দুশো বছর আগে এক বিখ্যাত ডুয়েল লড়াই হয়েছিল ?’

ন্যাপলাও দেখলাম জানে না ; সেও আমাদের সঙ্গে মাথা নাড়ল ।

‘যে দুজন লড়েছিলেন,’ বললেন তারিণীখুড়ো, ‘তাঁদের একজন ত জগদ্বিখ্যাত । তিনি হলেন ভারতের বড়লাট ওয়ারেন হেস্টিংস । প্রতিপক্ষের নাম ফিলিপ ফ্রানসিস । ইনি ছিলেন বড়লাটের কাউনসিলের সদস্য । হেস্টিংস কোনো কারণে ফ্রানসিসকে একটি অপমানসূচক চিঠি লেখেন । ফ্রানসিস তখন তাকে ডুয়েলে চ্যালেঞ্জ করে । আলিপুরে এখন যেখানে ন্যাশনাল লাইব্রেরি, তারই কাছে একটা খোলা জায়গায় এই ডুয়েল হয় । ফ্রানসিস চ্যালেঞ্জ করেছেন, ফলে তারই এক বন্ধুকে জোড়া-পিস্তল জোগাড় করতে হল, এবং তিনিই “ফায়ার” বলে চেষ্টা করেন । পিস্তলও চলেছিল একই সঙ্গে, কিন্তু মাটিতে জখম হয়ে পড়ল মাত্র একজনই—ফিলিপ ফ্রানসিস । তবে সুখের বিষয় সে-জখম মারাত্মক হয়নি ।’

‘ইতিহাস ত হল,’ বলল ন্যাপলা, ‘এবার গল্প হোক । ডুয়েলিং যখন আপনার মাথায় ঘুরছে, তখন মনে হচ্ছে ডুয়েল নিয়ে নির্ঘাৎ আপনার কোনো এক্সপিরিয়েন্স আছে ।’

খুড়ো বলল, ‘তোরা যা ভাবছিস সেরকম অভিজ্ঞতা না থাকলেও, যা আছে শুনলে তাক্ লেগে যাবে ।’

দুধ-চিনি ছাড়া চায়ে চুমুক দিয়ে, পকেট থেকে এক্সপোর্ট কোয়ালিটি বিড়ির প্যাকেট আর দেশলাইটা বার করে পাশে তক্তপোষের ওপর রেখে তারিণীখুড়ো তাঁর গল্প শুরু করলেন—

আমি থাকি তখন লখনৌতে । রেগুলার চাকরি বলে কিছু নেই, এবং তার বিশেষ প্রয়োজনও নেই, কারণ তার বছর দেড়েক আগে রেঞ্জার্সের লটারিতে লাখ দেড়েক টাকা পেয়ে, তার সুদেই দিব্যি চলে যাচ্ছে । আমি বলছি ফিফ্টি ওয়ানের কথা । তখনও আর এমন ম্যাগির বাজার ছিল না, আমি একা মানুষ, মাসে পাঁচ-সাতশো টাকা হলে দিব্যি আরামে চলে যেত । লাটুশ রোডে একটা ছোট্ট বাংলো বাড়ি নিয়ে থাকি, ‘পায়োনীর’ কাগজে মাঝে মাঝে ইংরিজিতে চুটকি গোছের লেখা লিখি, আর হজরতগঞ্জের একটা নিলামের দোকানে যাতায়াত করি । নবাবদের আমলের কিছু কিছু জিনিস তখনও পাওয়া যেত । সুবিধের দামে পেলে ধনী আমেরিকান টুরিস্টদের কাছে বেচে বেশ টুপাইস লাভ করা যেত । অবিশ্যি আমার নিজেরও যে শখ ছিল না তা নয় । আমার

বৈঠকখানা ছোট হলেও তার অনেক জিনিসই ছিল এই নিলামের দোকানে কেনা ।

এক রবিবার সকালে দোকানে গিয়ে দেখি জিনিসপত্রের মধ্যে রয়েছে একটা খয়েরি রঙের মেহগানি কাঠের বাস্ক, এক হাত লম্বা, এক বিঘত চওড়া, ইঞ্চি তিনেক পুরু । ভেতরে কী থাকতে পারে আন্দাজ করতে পারলাম না, তাই জিনিসটা সম্বন্ধে কৌতূহল গেল বেড়ে । নিলামে অনেক জিনিসই উঠেছে, কিন্তু আমার মনটা পড়ে রয়েছে ওই বাস্কের দিকে ।

অবশেষে প্রায় এক ঘণ্টা অপেক্ষা করার পর দেখলুম নিলামদার বাস্কটাকে হাতে তুলে নিয়েছেন । আমি টান হয়ে বসলুম । যথারীতি গুণকীর্তন শুরু হল ।—‘এবারে একটি অতি লোভনীয় জিনিস আপনাদের কাছে উপস্থিত করছি । এর জুড়ি পাওয়া ভার । দেখুন, এই যে ঢাকনা খুলছি আমি । দুশো বছরের পুরোন জিনিস, অথচ এখনো এর জেল্লা অম্লান রয়েছে । জগদ্বিখ্যাত আগ্নেয়াস্ত্র প্রস্তুতকারক জোসেফ ম্যানটনের ছাপমারা এক জোড়া ডুয়েলিং পিস্তল ! এই জোড়ার আর জুড়ি নেই !...’

আমার ত দূর থেকে দেখেই হয়ে গেছে । ও জিনিসটা আমার চাই । আমার কল্পনা তখনই খেলতে শুরু করে দিয়েছে । চোখের সামনে দেখতে পাচ্ছি দুই প্রতিদ্বন্দ্বী পরস্পরের বিশ হাত দূরে মুখোমুখি দাঁড়িয়ে ‘ফায়ার !’ শোনামাত্র গুলি চালাচ্ছে, আর তার পরেই রক্তাক্ত ব্যাপার !

এই সব চিন্তা মাথায় ঘুরছে, নিলামও হয়ে চলেছে, চারবাগের এক গুজরাটি ভদ্রলোক সাড়ে সাত শো বলার পর আমি ধী করে হাজার বলাতে দেখলাম ডাকাডাকি বন্ধ হয়ে গেল, ফলে বাস্ক সমেত পিস্তল দুটি আমারই হয়ে গেল ।

জিনিসটা দোকানে দেখে যতটা ভালো লেগেছিল, বাড়িতে এসে হাতে নিয়ে তার চেয়ে যেন শতগুণে বেশি ভালো লাগল । পিস্তলের মতো পিস্তল বটে । যেমন তার বাঁট, তেমনি তার নল । পুরো পিস্তল প্রায় সতের ইঞ্চি লম্বা । তার গায়ে পরিষ্কার খোদাই করা রয়েছে মেকারের নাম—জোসেফ ম্যান্টন । বন্দুক সম্বন্ধে কিছু পড়াশুনা আগেই করা ছিল ; অষ্টাদশ শতাব্দীর শেষ ভাগে ইংলন্ডে বন্দুক বানিয়ে হিসেবে যাদের সবচেয়ে বেশি নামডাক ছিল, তার মধ্যে জোসেফ ম্যান্টন হলেন একজন ।

লখনৌ গিয়েছি সবে মাস তিনেক হল । ওখানে বাঙালীর সংখ্যা বিশেষ কম নয়, কিন্তু তখনো পর্যন্ত তাদের কারুর সঙ্গে তেমন পরিচয় হয়নি । সন্ধ্যাবেলাটা মোটামুটি বাড়িতেই থাকি ; আমি ছাড়া থাকে একজন রান্নার লোক আর একটি চাকর । পিস্তল দুটো কেনা অবধি মাথায় ডুয়েলিং সংক্রান্ত একটা প্লট ঘুরছে, তাই খাতা-কলম নিয়ে আরাম কদারায় বসেছি, এমন সময় দরজায় কে যেন কড়া নাড়ল । কোনো বিদেশী খদ্দের নাকি ? পুরোন জিনিসের সাপ্লায়ার হিসেবে

আমার কিছুটা পরিচিতি এর মধ্যেই হয়ে গেছে।

গিয়ে দরজা খুললুম। একজন সাহেবই বটে। বছর পঁয়তাল্লিশ বয়স, বোঝাই যায় এদেশে অনেকদিনের বাসিন্দা, এমন কি জন্মও হয়ত এখানেই। অর্থাৎ আংলো ইন্ডিয়ান।

‘গুড ইভনিং।’

আমিও প্রত্যভিবাদন জানালুম। সাহেব বলল, ‘একটু দরকার ছিল। ভেতরে বসতে পারি কি?’

‘নিশ্চয়ই।’

সাহেবের উচ্চারণে কিন্তু দোআঁশলা ভাব নেই একদম।

ভদ্রলোককে বৈঠকখানায় এনে বসালাম। এইবার আলোয় চেহারাটা আরো স্পষ্ট বোঝা গেল। সুপুরুষই বলা চলে। চুল কটা। একজোড়া বেশ তাগড়াই গোঁফ তাও কটা, চোখের মণি নীল, পরনে ছেয়ে রঙের সুট। আমি বললুম, ‘সাহেব, আমি ত মদ খাই না, তবে যদি বলো ত এক পেয়ালা চা বা কফি করে দিতে পারি।’ সাহেব বললে যে তার কিছুই দরকার নেই, সে এইমাত্র বাড়ি থেকে ডিনার খেয়ে আসছে। তারপর তার আসার কারণটা বললে।

‘তোমায় আজ সকালে দেখলাম হজরতগঞ্জের অকশন হাউসে।’

‘তুমিও ছিলে বুঝি সেখানে?’

‘হ্যাঁ—কিন্তু তুমি এত তন্ময় ছিলে তাই বোধহয় খেয়াল করনি।’

‘আসলে একটা জিনিসের ওপর খুব লোভ ছিল—’

‘সেটা ত তোমারই হয়ে গেল শেষ পর্যন্ত। ডুয়েলিং পিস্তল—জোসেফ ম্যান্টনের তৈরি! ইউ আর ভেরি লাকি!’

আমি একটা কথা না জিগ্যোস করে পারলাম না।

‘ওটা কি তোমার কোনো চেনা লোকের সম্পত্তি ছিল?’

‘হ্যাঁ, তবে সে বহুদিন হল মারা গেছে। তারপর কোথায় চলে গিয়েছিল জিনিসটা জানতাম না। ওটা কি আমি একবার হাতে নিয়ে দেখতে পারি? কারণ ওটার সঙ্গে একটা কাহিনী জড়িত রয়েছে, তাই...’

আমি সাহেবের হাতে পিস্তলের বাস্কাটা দিলুম। সাহেব সেটা খুলে পিস্তলটা বার করে উদ্ভাসিত চোখে সেটা ল্যাম্পের কাছে নিয়ে গিয়ে নেড়ে চেড়ে দেখে বললে, ‘এই পিস্তল দিয়ে এক ডুয়েল লড়াইয়েছিল এই লখনৌ শহরে সেটা বোধহয় তুমি জান না?’

‘লখনৌতে ডুয়েল!’

‘হ্যাঁ। আজ থেকে দেড়শো বছর আগের ঘটনা। একেবারে ঊনবিংশ শতাব্দীর শেষে। সত্যি বলতে কি, আর তিন দিন পরেই ঠিক দেড়শো বছর পূর্ণ হবে। ষোলই অক্টোবর।’



‘তাই বুঝি ?’

‘হ্যাঁ ।’

‘খুব আশ্চর্য ত ! কিন্তু ডুয়েলটা কাদের মধ্যে হয়েছিল—’ ?

সাহেব পিস্তলটা ফেরত দিয়ে আবার সোফায় বসে বললে, ‘সমস্ত ঘটনাটা আমার এমন পুঙ্খানুপুঙ্খ ভাবে শোনা যে আমি যেন চোখের সামনে দেখতে পাই ।...ডাঃ জেরিমায়া হাডসনের মেয়ে অ্যানাবেলা হাডসন তখন ছিল লখনৌ-এর নামকরা সুন্দরী । ডাকসাইটে তরুণী ; ঘোড়া চালায়, বন্দুক চালায় —দুটোই পুরুষের মতো । এদিকে আবার ভালো নাচতে পারে, গাইতে পারে । সেই সময় লখনৌতে এক তরুণ ইংরেজ আর্টিস্ট এসে রয়েছেন, নাম জন ইলিংওয়ার্থ । তার আসল মতলব নবাবের ছবি ঐকে ভালো ইনাম পাওয়া, কিন্তু অ্যানাবেলার সৌন্দর্যের কথা শুনে আগে তার একটা পোর্ট্রেট করার প্রস্তাব নিয়ে তার বাড়িতে গিয়ে হাজির হল । ছবিও হল বটে, কিন্তু তার আগেই ইলিংওয়ার্থ অ্যানাবেলাকে গভীর ভাবে ভালোবেসে ফেলেছে ।

‘এদিকে তারই কিছুদিন আগে একটা পার্টিতে অ্যানাবেলার সঙ্গে আলাপ হয়েছে চার্লস ব্রুসের । লখনৌ ক্যান্টনমেন্টে তখন বেঙ্গল রেজিমেন্টের একটা বড় অংশ ছিল, তারই ক্যাপ্টেন ছিলেন চার্লস ব্রুস । ব্রুসও প্রথম দর্শনেই অ্যানাবেলার প্রেমে পড়ে গেলেন ।

‘পার্টির দুদিন বাদে আর থাকতে না পেরে অ্যানাবেলার বাড়ি গিয়ে হাজির হলেন ক্যাপ্টেন ব্রুস । গিয়ে দেখেন একটি অচেনা তরুণ অ্যানাবেলার ছবি আঁকছে । ইলিংওয়ার্থ তেমন জোয়ান পুরুষ না হলেও চেহারাটা তার মন্দ ছিল না । তার হাবভাবে সেও যে অ্যানাবেলার প্রতি অনুরক্ত এটা বুঝতে ব্রুসের দেরি লাগল না । শিল্পী জাতটাকে ব্রুস এমনিতেই অবজ্ঞা করে, বর্তমান ক্ষেত্রে সে অ্যানাবেলার সামনেই ইলিংওয়ার্থকে একটা অপমানসূচক কথা বলে বসল ।

‘ইলিংওয়ার্থের মধ্যে যা গুণ ছিল তা সবই শিল্পীসুলভ গুণ, আর তার প্রবৃত্তিগুলি ছিল কোমল । কিন্তু আজ অ্যানাবেলার সামনে এই অপমান সে হজম করতে পারল না । সে ব্রুসকে ডুয়েলে চ্যালেঞ্জ করে বসল । ব্রুসও খুশি মনে সে চ্যালেঞ্জ গ্রহণ করল । ডুয়েলের দিনক্ষণও ঠিক হয়ে গেল—ষোলই অক্টোবর, ভোর ছটা ।

‘তুমি জান বোধহয় যে যারা ডুয়েল লড়বে তাদের একজন করে সেকেন্ডের দরকার হয় ?’

আমি বললাম, ‘জানি । এরা আম্পায়ারের কাজ করে, অর্থাৎ লক্ষ রাখে যে ডুয়েলের নিয়মগুলো ঠিক ভাবে পালিত হচ্ছে কিনা ।’

‘হ্যাঁ । সচরাচর এই সেকেন্ডটি হয় যে ডুয়েল লড়বে তার বন্ধুস্থানীয় কেউ । লখনৌ শহরে ইলিংওয়ার্থের পরিচিতের সংখ্যা বেশি না হলেও, সরকারী দপ্তরের

এক কর্মচারীর সঙ্গে তার বেশ আলাপ হয়েছিল। ঐর নাম হিউ ড্রামন্ড। ইলিংয়ার্থ ড্রামন্ডকে অনুরোধ করল এক জোড়া ভালো পিস্তল জোগাড় করে দিতে, কারণ ডুয়েলের নিয়ম অনুযায়ী দুটো পিস্তল ঠিক একরকম হওয়া চাই। এ ছাড়া ইলিংওয়ার্থের দ্বিতীয় অনুরোধ হল ড্রামন্ড যেন তার সেকেন্ডের কাজ করে। ড্রামন্ড রাজি হল। অন্যদিকে ক্যাপ্টেন ব্রুসও তার বন্ধু ফিলিপ মক্সনকে তাঁর সেকেন্ড করলেন।

‘ডুয়েলের দিন এগিয়ে এল। এর ফলাফল যে কী হবে সে সম্বন্ধে কারুর মনে কোনো সন্দেহ নেই, কারণ পিস্তলে ক্যাপ্টেন ব্রুসের লক্ষ্য অব্যর্থ, আর ইলিংওয়ার্থ তুলি চালনায় নিপুণ হলেও পিস্তল চালনায় একেবারেই অপটু।’

এই পর্যন্ত বলে সাহেব থামলেন। আমি ব্যগ্রভাবে জিগ্যেস করলুম, ‘শেষ পর্যন্ত কী হল?’

সাহেব মৃদু হেসে বললেন, ‘প্রতি বছর ষোলই অক্টোবর ভোর ছটায় কিন্তু এই ঘটনার পুনরাবৃত্তি ঘটে।’

‘কোথায়?’

‘ঘটনাটা যেখানে ঘটেছিল সেখানে। দিলখুশার পশ্চিমে গুমতী নদীর কাছে একটা মাঠে তেঁতুল গাছের নিচে।’

‘পুনরাবৃত্তি মানে?’

‘যা বলছি তাই। ওখানে তরশু ভোর ছটায় গেলে পুরো ঘটনাই চোখের সামনে ঘটতে দেখবে।’

‘বলছ কী! এ তো ভৌতিক ব্যাপার!’

‘আমার কথা মানার কোনো বাধ্যবাধকতা নেই। তুমি নিজেই গিয়ে যাচাই করে এসো তিনদিন পরে।’

‘কিন্তু আমি কি জায়গাটা ঠিক চিনে যেতে পারব? আমি ত বেশিদিন হল এখানে আসিনি। লখনৌএর ভূগোলটা এখনো—’

‘তুমি দিলখুশা চেনো ত?’

‘তা চিনি।’

‘দিলখুশার বাইরে আমি পৌনে ছটায় তোমার জন্য অপেক্ষা করব।’

‘বেশ। তাই কথা রইল।’

সাহেব বিদায় নিয়ে চলে গেলেন। তারপরই খেয়াল হল যে ভদ্রলোকের নামটাই জানা হয়নি। অবিশ্যি উনিও আমার নাম জিগ্যেস করেননি। যাই হোক, নামটা বড় কথা নয়; যে কথাগুলো উনি বলে গেলেন সেগুলোই হল আসল। বিশ্বাস হচ্ছিল না যে এই শহরেই এককালে এরকম রোমান্টিক একটা ব্যাপার ঘটে গেছে, এবং আমারই হাতে রয়েছে এক জোড়া পিস্তল যেগুলো এই ঘটনায় একটা বিশেষ ভূমিকা গ্রহণ করেছিল। কিন্তু শেষ পর্যন্ত কার ভাগ্যে জুটল

অ্যানবেলা হাডসন ? এবং আরো একটা প্রশ্ন—এই দুজনের মধ্যে কাকে ভালোবেসেছিল অ্যানাবেলা ?

আশা করি ষোল তারিখের অভিযানেই এইসব প্রশ্নের জবাব মিলবে ।

ক্রমে এগিয়ে এল ষোলই অক্টোবর । পনরই রাত্তিরে একটা গানের জলসা থেকে বাড়ি ফিরছি । রাস্তায় দেখা সেই সাহেবের সঙ্গে । বলল, ‘তোমার বাড়িতেই যাচ্ছিলাম তোমাকে মনে করিয়ে দেবার জন্য ।’ আমি বললাম, ‘আমি যে শুধু ভুলিনি তা নয়, অত্যন্ত উদ্গ্রীব হয়ে আগামীকাল সকালের জন্য অপেক্ষা করে আছি ।’ সাহেব চলে গেল ।

ঘড়িতে অ্যালার্ম দিয়ে ভোর পাঁচটায় উঠে এক কাপ চা খেয়ে গলায় একটা মাফলার চাপিয়ে নিয়ে একটা টাঙ্গা করে বেরিয়ে পড়লাম দিলখুশার উদ্দেশে । শহরের একটু বাইরে দিলখুশা এককালে ছিল নবাব সাদাত আলির বাগান বাড়ি । চারিদিকে ঘেরা প্রকাণ্ড পার্কে হরিণ চরে বেড়াত । কখনো-সখনো জঙ্গল থেকে এক-আধটা চিতাবাঘও নাকি এসে পড়ত বাড়ির ত্রিসীমানায় । এখন সে বাড়ির শুধু খোলটাই রয়েছে । তবে তার পাশে একটা ফুলবাগিচা এখনো মেনটেন করা হয়, লোকে সেখানে বেড়াতে যায় ।

ছটা বাজতে কুড়ি মিনিটে গন্তব্যস্থলে পৌঁছে টাঙ্গাওয়ালাকে বললুম, ‘তুমি যদি আধ ঘণ্টা অপেক্ষা কর, তাহলে আমি আবার এই গাড়িতেই বাড়ি ফিরে যেতে পারি ।’ উর্দুটা ভালো জানা ছিল আগেই, তাই বোধহয় খানদানী আদমি ভেবে টাঙ্গাওয়ালা রাজি হয়ে গেল ।

গাড়ি থেকে নেমে কয়েক পা এগোতেই একটা অর্জুন গাছের পাশে দেখি সাহেব দাঁড়িয়ে আছে । বললে সেও নাকি মিনিট পাঁচেক হল এসেছে ।

‘লেট্‌স গো দেন ।’

বললুম, ‘চলো সাহেব—তুমিই ত পথ জান, তোমার পিছু নেব আমি ।’

মিনিট পাঁচেক হাঁটতেই একটা খোলা মাঠে এসে পড়লুম । দূরে বিশেষ কিছু দৃষ্টিগোচর হয় না, কারণ চারিদিক একটা আবছা কুয়াশায় ঢাকা । হয়ত ডুয়েলের দিনেও ঠিক এমনি কুয়াশা ছিল !

আগাছা আর কাঁটা ঝোপে ঘেরা একটা পোড়ো বাড়ির কাছে এসে সাহেব থামল । দেখেই বোঝা যায় সেটা প্রাচীনকালে কোনো সাহেবের বাড়ি ছিল । অবিশ্যি আমাদের কারবার এই বাড়িটাকে নিয়ে নয় । সেটাকে পেছনে ফেলে আমরা দাঁড়ালাম পূর্ব দিকে মুখ করে । কুয়াশা হলেও বেশ স্পষ্ট দেখা যাচ্ছে সামনে কিছু দূরে রয়েছে একটা তেঁতুল গাছ, আর তার ডাইনে আমাদের থেকে হাত চল্লিশেক দূরে রয়েছে একটা বেশ বড় ঝোপ । আর সব কিছুর পিছন দিয়ে বয়ে চলেছে গুমতী নদী । নদীর পিছনে কুয়াশা হলেও, আন্দাজ করা যায়

ওদিকটায় বসতি নেই। সদ মিলিয়ে অত্যন্ত নিরিবিলি পরিবেশ।

‘শুনতে পাচ্ছ ?’ সাহেব হঠাৎ জিগোস করল।

কান পাততেই শুনতে পেলুম। ঘোড়ার হারের শব্দ। গাটা যে হুমহুম করছিল না তা বলতে পারি না। তবে তার সঙ্গে একটা অভিনব অভিজ্ঞতার চরম প্রত্যাশা।

এইবার দেখলুম দুই অশ্বারোহীকে। আমাদের দাঁ দিকে বেশ দূর দিয়ে এসে তেঁতুল গাছটার নিচে দাঁড়াল।

‘এরা দুজনেই কি লড়বেন ?’ আমি ফিসফিসিয়ে জিগোস করলুম।

সাহেব বলল, ‘দুজন নয়, একজন। দুজনের মধ্যে লড়াই হলেন জন ইলিংওয়ার্থ, অর্থাৎ যিনি চ্যালেঞ্জ করেছেন। অন্যজন ইলিংওয়ার্থের সেকেন্ড ও বন্ধু, হিউ ড্রামন্ড। ওই দেখ ড্রামন্ডের হাতে সেই মেহগ্যানি বাস্কেট।

সত্যিই ত ! এবার বুঝলুম আমার বন্ধু চলচ্চল দৃঢ় হাতে শুরু করেছে। আমি যে দেড়শ বছর আগের একটি ঘটনা অর্থাৎ ১২৫০ সালে লন্ডন শহরে দাঁড়িয়ে দেখতে চলেছি, সেই চিন্তা আমার হৃৎস্পন্দন বাড়িয়ে দিয়েছে।

মিনিট খানেকের মধ্যেই দুটো ঘোড়ায় ক্যান্টেন ব্রুস ও তাঁর সেকেন্ড ফিলিপ মক্সন এসে পড়লেন। তারপর ড্রামন্ড বাস্কেট থেকে পিস্তল দুটো বার করে তাতে গুলি ভরে ব্রুস ও ইলিংওয়ার্থের হাতে দিবে তাদের যেন কি সব বুঝিয়ে দিলেন।

পিছনের আকাশ গোলাপী হতে শুরু করেছে, ওমর্তীর ভালে সেই রং প্রতিফলিত।

ব্রুস ও ইলিংওয়ার্থ এবার পরস্পরের মুখোমুখি দাঁড়ালেন। তারপর মুখ ঘুরিয়ে দুজনেই ওগে ওগে চোফ পা হেঁটে গিয়ে আবার দাঁড়িয়ে পিছন ফিরে মুখোমুখি হলেন।

এতক্ষণ পর্যন্ত কোনো শব্দ শুনতে পাইনি, কিন্তু এবার দুই প্রতিদ্বন্দ্বী পিস্তল উঁচিয়ে পরস্পরের দিকে তাক করার পর স্পষ্ট কানে এল ড্রামন্ডের আদেশ—

‘ফায়ার !’

পরমুহূর্তেই শুনলাম এক সঙ্গে দুই পিস্তলের গর্জন।

আশ্চর্য হয়ে দেখলাম যে ব্রুস ও ইলিংওয়ার্থ দুজনের দেহই একসঙ্গে মাটিতে লুটিয়ে পড়ল।

সেই সঙ্গে আরেকটি দৃশ্য আমাকে আরো অবাক করে দিল। যেই ঝোপটার কথা বলছিলাম, সেটার পিছন থেকে এক মহিলা ছুটে বেরিয়ে কুয়াশায় অদৃশ্য হয়ে গেলেন।

‘ফলাফল ত দেখলে,’ বলল সাহেব। ‘এই ডুয়েলে দুজনেরই মৃত্যু হয়েছিল।’

বললাম, ‘তা ত বুঝলাম, কিন্তু ঝোপের পিছন থেকে একজন মহিলা বেরিয়ে গেলেন, তিনি কে ?’

‘দ্যাট ওয়াজ আনাবেলা ।’

‘আনাবেলা !’

‘ইলিংওয়ার্থের গুলিতে ক্যাপ্টেন ব্রুস মরবে না এটা আনাবেলা বুঝেছিল—অথচ ওর দরকার ছিল যাতে দুজনেই মরে । তাই সে আর ঝুঁকি না নিয়ে “ফায়ার” বলার সঙ্গে সঙ্গে নিজেই পিস্তল দিয়ে ব্রুসকে মারে । ইলিংওয়ার্থের গুলি ব্রুসের গায়ে লাগেইনি ।’

‘কিন্তু আনাবেলার এই আচরণের কারণ কী ?’

‘কারণ সে ওই দুজনের একজনকেও ভালোবাসেনি । ও বুঝেছিল ইলিংওয়ার্থ মরবে, এবং ব্রুস বেঁচে থেকে ওকে বিরক্ত করবে । সেটা ও চায়নি, কারণ সে আসলে ভালোবাসত আরেকজনকে—যাকে সে পরে বিয়ে করে এবং যার সঙ্গে সে সুখে ঘর করে ।’

আমার চোখের সামনে দেখতে পাচ্ছি যে দেড়শ বছরের পুরোনো ডুয়েলের দৃশ্য দ্রুত মিলিয়ে আসছে । কুয়াশাও যেন আরো ঘন হচ্ছে । আমি আশ্চর্য মহিলা আনাবেলার কথা ভাবছি, এমন সময় একটা নারীকণ্ঠ শুনতে পেয়ে চমকে উঠলাম ।

‘হিউ ! হিউই !’

‘আনাবেলা ডাকছে,’ বললেন সাহেব ।

আমার দৃষ্টি এবার সাহেবের দিকে ঘুরতেই শরীরের মধ্যে দিয়ে একটা বিস্ময় ও আতঙ্কের শিহরণ খেলে গেল । এ কাকে দেখছি চোখের সামনে ? এর পোশাক বদলে গেল কি করে ?—এ যে সেই দেড়শ বছর আগের পোশাক !

‘তোমাকে আমার পরিচয় দেওয়া হয়নি,’ বলল সাহেব ; তার গলার স্বর যেন বহুদূর থেকে ভেসে আসছে ।—‘আমার নাম হিউ ড্রামণ্ড । ইলিংওয়ার্থের বন্ধুকেই ভালোবাসত আনাবেলা । গুড বাই...’

আমি মস্তমুণ্ডের মতো দেখলাম সাহেব ওই পোড়ো বাড়িটার দিকে অগ্নিসর হয়ে কুয়াশার মধ্যে মিলিয়ে গেল ।

টাঙ্গা করে বাড়ি ফিরে মেহগ্যানির বাস্কাটা খুলে পিস্তলদুটো আরেকবার বার করলাম । নলে হাত পড়তে গরম লাগল । এবার নলের মুখটা নাকের কাছে আনলাম । টাটকা বারুদের গন্ধ ।



ধুমলগড়ের হাণ্ডিং লজ

‘মাথায় অনেকরকম উদ্ভট শখ চাপে মানুষের’, বললেন তারিণীখুড়ো, ‘কিন্তু আমার যেমন চেপেছে, তেমন কজনের চাপে জানি না।’

আমরা পাঁচজন ঘিরে বসেছি খুড়োকে। বাইরে এক পশলা বেশ ভালো বৃষ্টি হয়ে গিয়ে এখন সেটা অবিরাম ঝিরঝিরে বৃষ্টিতে দাঁড়িয়েছে। আষাঢ় মাস, তার উপর লোড শেডিং, টিম টিম করে দুটো মোমবাতি জ্বলছে, দেয়ালে আমাদের সকলের প্রকাণ্ড প্রকাণ্ড ছায়া পড়েছে—সব মিলিয়ে তারিণীখুড়োর গল্প শোনার পক্ষে আইডিয়াল পরিবেশ। খুড়োর মতে তাঁর গল্পগুলো সবই সত্যি। এব্যাপারে গ্যারান্টি দেবার সাধ্ব্য আমার নেই, তবে গল্পগুলো যে রংদার তাতে কোনো সন্দেহ নেই, আর তারিণীখুড়োর যে গত চল্লিশ বছর ধরে সারা ভারতবর্ষ ঘুরে নানারকম অভিজ্ঞতা হয়েছে সে কথা বাবা আমাদের বলেছেন, কাজেই সেটা অবিশ্বাস করার কোনো কারণ নেই।

ন্যাপলা বলেই বসলো, ‘আজ কিন্তু ভূতের গল্পের মতো আর কোনো গল্প জমবে না।’

তারিণীখুড়ো ইঙ্কুল মাস্টারি ঢং-এ বললেন, ‘ভূত সচরাচর চার প্রকার হয়। এক, অশরীরী আত্মা, যাকে চোখে দেখা যায় না ; দুই ছায়ামূর্তি ; তিন, নিরেট ভূত—দেখলে মনে হবে জ্যাঙ্গল মানুষ, কিন্তু চোখের সামনে ভ্যানিশ করে যাবে ; আর চার, নরকঙ্কাল—যদিও সে কঙ্কাল চলে ফিরে বেড়ায় এবং কথা বলে। আমার চাররকম ভূতেরই অভিজ্ঞতা হয়েছে।’

‘আজ কোন প্রকার ভূতের গল্প বলছেন আপনি ?’ ন্যাপলা প্রশ্ন করল।

সে কথায় কান না দিয়ে, দুধ-চিনি ছাড়া গরম চায়ে একটা চুমুক দিয়ে খুড়ো তাঁর গল্প শুরু করলেন।

তোরা তো পত্রিকা-টত্রিকা পড়িস, নিশ্চয়ই লক্ষ করেছিস যে আজকাল

সাক্ষাৎকারের একটা হিড়িক পড়েছে। খেলোয়াড়ের সাক্ষাৎকার, আর্টিস্ট গাইয়ে বাজিয়ে নাচিয়ে ফিল্মস্টার—সকলেরই সাক্ষাৎকার, আর এই সব নাম-করা লোকের মনের কথা তাদের নিজের মুখে শুনে পাঠকও আহ্লাদে আটখানা। আমি যখনকার কথা বলছি—সিক্সটি ফোর—আমার বয়স তখন চল্লিশের ঘরে—তখনও এ-ব্যাপারটা তেমন চালু ছিল না। আমি তখন ডেকান হেরাল্ড কাগজের রিপোর্টার। ব্যাঙ্গালোরে থাকি, খবরের ধান্দায় চরকি ঘুরতে হয়। বিপদের তোয়াক্কা করি না বলে দাঙ্গা খুনখারাপী অগ্নিকাণ্ড—এই সব বেয়াড়া ঘটনা রিপোর্ট করতে আমাকে পাঠানো হয়।

এই সময় ডেকান হেরাল্ডেরই ফাইল ঘাঁটতে ঘাঁটতে বছর সাতেকের পুরোন একটা লেখা চোখে পড়ল। লেখক এক সাহেব—নাম রবার্ট ম্যাকার্ডি। লেখার বিষয় হল ধুমলগড়ের হান্টিং লজ। ধুমলগড় মধ্যপ্রদেশের একটা ছোট শহর, চাঁদা থেকে সত্তর কিলোমিটার পশ্চিমে। চারিদিকে জঙ্গল, আর সেই জঙ্গলেরই একটা অংশে একটা টিলার উপর রাজার হান্টিং লজ বা শিকারাবাস—দিব্যি আরামে রাত্রিবাস করা যায় এমন একটা বাড়ি, আবার তার খোলা ছাতে বসে জঙ্গুজানোয়ারও মারা যায়। ভারতবর্ষের বহু প্রদেশে বহু মৃগয়াপ্রিয় রাজাদের এইরকম হান্টিং লজ আছে; ম্যাকার্ডি সাহেব এইগুলো স্টাডি করতেই ভারতবর্ষে এসেছিলেন।

ধুমলগড়ের হান্টিং লজে গিয়ে তিনি আবিষ্কার করেন যে লজটি ‘হন্টেড’। অর্থাৎ সেখানে একটি প্রেতাঙ্গী বাস করে। ম্যাকার্ডি খবর নিয়ে জানেন যে ওই হান্টিং লজেই ধুমলগড়ের বড়কুমার আদিত্যনারায়ণের মৃত্যু হয়। ছোটকুমার প্রতাপনারায়ণ সেটা ভেরিফাই করে।

লেখটা পড়ার পর থেকেই আমার মাথায় একটা অদ্ভুত ফন্দি ঘুরতে লাগল। এটা আমার বিশ্বাস—এবং অনেকেরই বিশ্বাস যে মানুষ মরে গেলে ভূত হয় তখনই যখন মৃত্যুটা স্বাভাবিক না হয়ে হয় অপঘাত জাতীয় কিছু। খুন, আত্মহত্যা, বাজ পড়ে মরা, মোটর ক্র্যাশে মরা, জলে ডুবে মরা, হিংস্র জানোয়ারের হাতে মরা—এ সব ক্ষেত্রেই মৃত ব্যক্তির আত্মার টেনডেন্সি হয় যে তদ্রূপে মৃত্যু হয়েছে তারই আশেপাশে ঘোরাফেরা করা—যেন সে অকালে প্রাণ হারিয়ে পৃথিবীর মায়া কাটাতে পারছে না।

ডেকান হেরাল্ডের পুরোন ফাইলেই জানতে পারলাম যে দশবছর আগে ধুমলগড়ের বড় কুমার আদিত্যনারায়ণ হান্টিং লজে বন্দুক সাফ করার সময়ে অকস্মাৎ গুলি ছুটে গিয়ে মারা যান। অবিদ্যি মৃত্যুটা আত্মহত্যাও হতে পারে, কিন্তু সঠিক জানার কোনো উপায় ছিল না, অপঘাত ঠিকই, আর তাই প্রেতাঙ্গীর উপস্থিতিতে আশ্চর্য হবার কিছু নেই।

আমার মনে হল, এই প্রেতাঙ্গীর দেখা পেলে তার একটি সাক্ষাৎকার নিলে

কেমন হয় ? কী কারণে সে পৃথিবীর মায়া কাটিয়ে উঠতে পারছে না সেটা জানা যাবে কি ? কীভাবে তার মৃত্যু হয়েছিল তার সঠিক বর্ণনা পাওয়া যাবে কি ? তার অতৃপ্ত বাসনা কিছু আছে কি এবং সে বাসনা পূর্ণ হলেই কি সে পৃথিবীর মায়া ত্যাগ করে পরলোকে প্রস্থান করতে পারবে ?

আমার কাগজের সম্পাদক জগন্নাথ কৃষ্ণনকে বলে সাতদিনের ছুটি নিয়ে ধুমলগড় পাড়ি দিলাম । যারা অন্ধকার ঘরে টেবিলের চারপাশে ঘিরে বসে প্ল্যানচেট করে, তারাও প্রেতাচার সঙ্গে কথোপকথন চালায়, কিন্তু সেটা হয় একটি তৃতীয় ব্যক্তির মাধ্যমে, যাকে বলে মিডিয়াম । এখানে ভূতকে দেখা যায় না, ফলে মিডিয়াম যদি খাঁটি না হয় তাহলে বুজরুকির অনেক সুযোগ থাকে । প্ল্যানচেটে তাই আমার বিশ্বাস নেই । তবে ভূতে বিশ্বাস আছে কারণ তোরা ত জানিস, ভূতের অভিজ্ঞতা আমার নিজেরই অনেকবার হয়েছে ।

ধুমলগড়ের ছোটকুমার প্রতাপনারায়ণ এখন গদীতে বসেছে, কারণ বাপ শঙ্করনারায়ণ মারা গেছেন বছর পাঁচেক হল । বড় ছেলে আদিত্য হান্টিং লজে মারা যাওয়ায় বাপের সম্পত্তি ও সিংহাসন ছোটকুমারই পেয়েছে ।

এস্টেটের ম্যানেজারকে আগেই চিঠি লিখে আমার আসার কথা জানিয়ে দিয়েছিলাম । ধুমলগড় পৌঁছে ভদ্রলোকের সঙ্গে দেখা করে আমার অভিপ্রায় জানালাম । ম্যানেজার ঈশ্বরীপ্রসাদ বললেন যে একবার রাজার সঙ্গে কথা বলে নেওয়া দরকার । সকলকে হান্টিং লজে ঢুকতে দেওয়া হয় না ।

ঈশ্বরীপ্রসাদই রাজার সঙ্গে একটা অ্যাপয়েন্টমেন্ট করিয়ে দিল । রাজার সুসজ্জিত আপিসঘরে সকালে প্রতাপনারায়ণের সঙ্গে দেখা করলাম । বয়স চল্লিশের বেশি না, চাড়া দেওয়া গোঁফ, শরীরে চর্বি যেন একটু বেশি । পোশাক একেবারে সাহেবী ধরনের, তার সঙ্গে দুহাতের আঙুলের আংটির বহর কেমন যেন বেমানান ।

রাজাসাহেব আমাকে আসার কারণ জিগ্যেস করাতে অকপটে তাকে সব বলে দিলাম । রাজা শুনে বললেন, এ তোমার খুবই উদ্ভট শখ তাতে কোনো সন্দেহ নেই । তবে আমায় জিগ্যেস করলে আমি বলব যে আমার দাদা লজে ভূত হয়ে অবস্থান করছেন এটা আমি মোটেই বিশ্বাস করি না । ভূত জিনিসটাতেই আমি বিশ্বাস করি না । আর সে ভূত থাকলেও সে তোমার সঙ্গে কথা বলবে, তোমার প্রশ্নের জবাব দেবে, এমন আশা করাটাই বোধ হয় ঠিক না ।’

আমি তখন ম্যাকার্ডি সাহেবের কথা বললাম । প্রতাপনারায়ণ বলল, ‘ম্যাকার্ডির ধারণা ভারতবর্ষ হচ্ছে ভূত-প্রেতের ডিপো । তাকে বলে বোঝাতে পারিনি যে এ ধারণা ভুল । পোড়োবাড়ি দেখলেই সাহেব সেটাকে ভূতের বাড়ি বলে ধরে নিত । সাহেবের পুরো ব্যাপারটাই কল্পনাভিত্তিক ।’

আমি বললাম, ‘তাও একবার যাচাই করতে ক্ষতি কী ? এতদূর যখন এসেছি,

তখন, কোনোরকম অনুসন্ধান না করেই ফিরে যাব ?’

আমার গৌঁ দেখে প্রতাপনারায়ণ শেষ পর্যন্ত রাজি হলেন । রাজবাড়ি থেকে হান্টিংলজের দূরত্ব দেড় মাইল । পাতলা জঙ্গলের মধ্যে দিয়ে সাপের মতো আঁকাবাঁকা রাস্তা দিয়ে নাকি সেখানে পৌঁছাতে হয় । ঈশ্বরীপ্রসাদকে বলে রাজা আমার জন্য একটা জীপের বন্দোবস্ত করে দিলেন । সেটা আমাকে রাত দশটা নাগাৎ পৌঁছে দিয়ে আবার ভোরবেলা গিয়ে নিয়ে আসবে ।

বিকেলে ঈশ্বরীপ্রসাদের সঙ্গে বসে একটু আলাপ আলোচনা করলাম । লোকটা অনেকদিন ম্যানেজারি করছে, বয়স সত্তরের কাছাকাছি । দুই কুমারকেই সে ছেলেবেলা থেকে বড় হতে দেখেছে । বলল দুই ভাইয়ের স্বভাবচরিত্রে অনেক বেমিল থাকলেও দুজনের মধ্যে বেশ হৃদয়তা ছিল । দাদার মৃত্যুতে প্রতাপনারায়ণ খুবই বিচলিত হয়ে পড়েছিল । আত্মহত্যার কোনো কারণ ছিল না । ঈশ্বরীপ্রসাদ নিজেও খুবই আঘাত পেয়েছিল । বড়কুমার এভাবে অকস্মাৎ মরবে সেটা সে স্বপ্নেও ভাবতে পারে নি । শিকারী হিসাবে সে ছিল খুব পাকা । হাত ফসকে গুলি ছুটে গিয়ে নিজের গায় লাগবে সেটা বিশ্বাস করা খুব কঠিন ।

আমি জিগ্যেস করলাম, ‘বড়কুমারের মৃত্যুর ব্যাপারে কোনো তদন্ত হয়েছিল কি ?’

ঈশ্বরীপ্রসাদ বললেন, ‘পুলিশ ইন্সপেক্টর মহাদেব দেওয়ান তদন্ত করেছিলেন । তাঁর ধারণা—এটা অপঘাত মৃত্যু ছাড়া আর কিছুই না । কারণ আদিত্যনারায়ণের হাতে বন্দুক ছিল, এবং তার ডান হাতের তর্জনী বন্দুকের ট্রিগারের সঙ্গে লাগানো ছিল । কাজেই আত্মহত্যা বা অ্যাক্সিডেন্ট দুটোই সম্ভব । আসলে কী হয়েছিল, তা বলা মুশকিল ।’

‘বর্তমান রাজা প্রতাপনারায়ণ কি শিকার করেন ?’ আমি জিগ্যেস করলাম ।

‘না’, বললেন ঈশ্বরীপ্রসাদ । ‘ছোটকুমার চিরকালই একটু আয়েশী প্রকৃতির । খেলাধুলা বা শিকার-টিকারে তাঁর ঝোঁক নেই । সে গান-বাজনা নিয়ে থাকে । তাকে হান্টিং লজে যেতে হয় না কখনো ।’

রাত্রে লক্ষ্মীবিলাস হোটেলে চাপাটি আর মুরগীর মাংস খেয়ে, খাতা পেনসিল নিয়ে তৈরি হয়ে নিলাম । সেদিন ছিল পূর্ণিমা । আকাশে টুকরো টুকরো মেঘ দ্রুত ভেসে যাবার পথে মাঝে মাঝে চাঁদটাকে আড়াল করছে । পৌনে দশটায় জীপ এসে গেল, আমি হান্টিং লজের উদ্দেশ্যে রওনা দিলাম ।

মিনিট খানেকের মধ্যেই শহর পিছনে ফেলে জীপ জঙ্গলের পথ ধরল, আর তার দশমিনিট পরেই একটা দোতলা বাড়ির গাড়ি বারান্দার তলায় এসে জীপটা থামল । অর্থাৎ হান্টিং লজে এসে গেছি । বুঝতে পারলাম বাড়ির পিছন দিকের জমিটা ঢালু হয়ে জঙ্গলের দিকে নেমে গেছে ।

জীপের ড্রাইভার গুরমীত সিং বলল যে দরকার হলে সে সারারাত থাকতে

পারে। প্রস্তাবটা আমার ভালো লাগল না। পরিবেশ যত নিরিবিলি হয়, ভূতের আবির্ভাবের সম্ভাবনা তত বেড়ে যায়। বললুম, 'তুমি এখন যাও, কাল ভোরে ছটায় এসে আমাকে নিয়ে যেও।' জীপ চলে গেল।

আমি চারপাশটা একবার চোখ বুলিয়ে দেখে নিলুম। একটা টিলার মাথাটা চোঁছে সমতল করে তার উপর তৈরি হয়েছে হান্টিং লজটা। পাথরের তৈরি মোগলাই প্যাটার্নের বাড়ি, বয়স নাকি দেড়শ বছর।

পাঁচ ধাপ সিঁড়ি উঠে সদর দরজা দিয়ে ভিতরে ঢুকে জানালা দিয়ে আসা ফিকে চাঁদের আলোয় দেখলাম কাপেট বিছানো এক সুদৃশ্য বৈঠকখানায় এসে পড়েছি। চারিদিকে আসবাবের ছড়াছড়ি, দেয়ালে টাঙানো স্টাফ করা বাইসন হরিণ বাঘ-ভাল্লুকের মাথা। বৈঠকখানার পরে একটা চওড়া বারান্দা, তার ডানদিকে দোতলায় ওঠার সিঁড়ি। আন্দাজ করলুম সিঁড়ি দিয়ে উঠলেই খোলা ছাতে পৌঁছান যাবে। সেখান থেকে বাড়ির পিছনের জঙ্গল দেখা যায়, আর সেখানেই বড় কুমারের মৃত্যু হয়েছিল।

মূর্খের মত টর্চটা সঙ্গে আনি নি। চাঁদের আলো আছে ঠিকই, কিন্তু সে আর সব জায়গায় প্রবেশ করবে কি করে? তখন আমার চুরুট খাওয়া অভ্যেস। দেশলাই-এর আলোতে সিঁড়ি দিয়ে উঠে দোতলায় পৌঁছলুম।

যা ভেবেছিলুম তাই। একপাশে পশ্চিমদিকে খোলা ছাত, তার নিচু পাঁচিলের ধারে গিয়ে দাঁড়ালেই সামনে ঢালু জমির ওপারে গভীর জঙ্গল শুরু হয়েছে। একবার মনে হল যেন বাঘের ডাকও শুনতে পেলুম জঙ্গলের দিক থেকে।

ছাত ছাড়াও একটা বড় ঘর রয়েছে নিচের বৈঠকখানার ঠিক ওপরে। এখানে একটা ফরাস পাতা দেখে বুঝলুম যে শিকারীর যদি ঘুম পায় তাই এই ব্যবস্থা। ঘরের দেয়ালে বড় বড় অয়েল পেন্টিং, তার বেশির ভাগই মনে হল এই পরিবারের পূর্বপুরুষদের ছবি। ফরাসের পাশে একটা আরাম কেরারা ছাড়া আরো কয়েকটা ছোট ছোট সোফা রয়েছে।

আমি আরাম কেরারায় বসে একটা চুরুট ধরালুম। পকেট থেকে নোট বই বার করে চেয়ারের হাতলে রাখলুম। শর্টহ্যান্ড লেখার অভ্যাস আছে, দরকার হলে অঙ্ককারে লিখতেও কোনো অসুবিধে হবে না। আরেকটা জিনিস আমার কাছে ছিল সেটা হল এক ফ্লাস্ক ভর্তি গরম চা। নভেম্বর মাস, বেশ শীত, ফ্লাস্কের ঢাকনায় চা ঢেলে খেয়ে শরীরটাকে একটু গরম করে নিলুম।

চির-প্রচলিত ধারণা অনুযায়ী আমারও বিশ্বাস ছিল যে ভূতের আবির্ভাব যদি হয়ই, তবে সেটা মাঝরাতে, অর্থাৎ বারোটায়। বাইরে ক্রমে নিস্তব্ধ হয়ে আসছে, তার মধ্যে মাঝেমাঝে শেয়াল গোষ্ঠী কেয়া ছয়া ছয়া করে সরব হয়ে উঠছে। খবরের কাগজের আপিসে কাজ করে রাত জাগার অভ্যেস হয়ে গেছে, তবে এ পরিবেশ কেমন যেন বিম-ধরা। তার উপরে দরজা-জানালা দিয়ে আসা আবছা

চাঁদের আলো খরটাকে কেমন যেন একটা স্বপ্নরাজ্যের চোরা এনে দিয়েছে ।
তাই বোধহয় ঘাড়টা একবার একটু নুয়ে পড়েছিল, এমন সময় একটা ব্যাপারে
সজাগ হয়ে উঠলুম ।

আমার ষষ্ঠ ইন্দ্রিয় বলছে ঘরে একটি নতুন ব্যক্তির আবির্ভাব ঘটেছে ।

আমি ছাতের দরজার দিকে দৃষ্টি ঘোরালাম ।

সমস্ত দরজা জুড়ে দাঁড়িয়ে রয়েছে একটি ছায়ামূর্তি ।

মূর্তি নিঃশব্দে প্রবেশ করে ধীরপদে এগিয়ে এসে ঘরের মাঝখানে দাঁড়াল ।

মুখ বোঝার উপায় নেই, আন্দাজে বোঝা যায় পরনে শিকারীর পোশাক ।

‘তোমার কী প্রয়োজন ?’ ইংরাজীতে গভীর কণ্ঠে প্রশ্ন এল ।

‘আমি কি ধুমলগড়ের বড়কুমারের সঙ্গে কথা বলছি ?’

‘হ্যাঁ’, আবার সেই গভীর কণ্ঠস্বর ।

বললাম, ‘আমি আপনার সঙ্গেই সাক্ষাৎ করতে এসেছি ।’

‘কী প্রয়োজনে ?’

‘আমি একজন সাংবাদিক । আপনাকে দুএকটা প্রশ্ন করতে চাই ।’

‘কী প্রশ্ন ?’

‘প্রথম হল—আপনি কেমন আছেন ?’

উত্তর এল, ‘মৃত ব্যক্তির আত্মা কেমন আছে সেটা কোনো প্রশ্ন নয় ।’

‘তাহলে দ্বিতীয় প্রশ্ন করছি ।’

‘করুন ।’

‘আপনার কি কোনো অতৃপ্ত বাসনা আছে, যে কারণে আপনি এই হান্টিং লজ
থেকে মুক্তি পাচ্ছেন না ?’

‘মোটাই না । আমার আয়ু আমার জন্মের মুহূর্তেই নির্ধারিত হয়ে গিয়েছিল ।
আমি জানতাম আমার মৃত্যু হবে সাতই অগ্রহায়ণ, আমার বত্রিশ বছর বয়সে ।
আমি এই মৃত্যুর জন্য সম্পূর্ণ প্রস্তুত ছিলাম, এবং মৃত্যুর আগে আমার সব সাধ
মিটিয়ে নিয়েছিলাম । অবিশ্যি কী ভাবে যে মরব সেটা আগে থেকে জানা ছিল
না ।’

বলা বাহুল্য, আমি সব কিছুই শটহ্যান্ডে লিখে নিচ্ছি ।

এবার প্রশ্ন করলাম, ‘আপনি তাহলে আত্মহত্যা করেননি ?’

উত্তর এল, ‘না । আমার মৃত্যু হয় অকস্মাৎ আমার নিজের অসাবধানতা
হেতু । আমি বন্দুক সাফ করছিলাম, কিন্তু সে বন্দুকে যে টোটা ছিল সেটা
আমি—’

প্রত্যাহার কথা হঠাৎ থেমে গেছে, কারণ তার কথা ছাপিয়ে আরেকটা গভীর
কণ্ঠস্বর শোনা গেছে ।

‘মিথ্যা কথা !’



আমি ত থ ! এ আবার কার কণ্ঠস্বর ? কোন তৃতীয় ব্যক্তি এসে ঢুকল ঘরে ?

আমার দৃষ্টি আবার দরজার দিকে ঘুরে গেছে । হ্যাঁ, দরজার মুখে দণ্ডায়মান আরেকটি মূর্তি । যদিও আমি নিজের সাহসের বড়াই করি, কিন্তু যখন দেখলাম এই দ্বিতীয় মূর্তিটি নিরেট নয়, এর পাঁজরের হাড়ের ফাঁক দিয়ে ফাঁক দিয়ে পিছনের আকাশ দেখা যাচ্ছে, তখন গলাটা যে একটু শুকিয়ে যায়নি, তা বলব না । আসলে আগন্তুক একটি নরকঙ্কাল এবং আরো আশ্চর্য এই যে এই কঙ্কালের হাতে একটি বন্দুক ।

এবার কঙ্কাল ধীরে ধীরে এগিয়ে এল প্রথম মূর্তির দিকে । এদিকে প্রথম মূর্তি যেন সভয়ে পিছিয়ে যেতে শুরু করেছে দেয়ালের দিকে । আমি মস্তমুগ্ধের মতো দেখছি এই ছায়াছবি । ‘মিথ্যে কথা !’ আবার সজোরে বলে উঠলো কঙ্কাল । ‘আমার মৃত্যু আকস্মিক নয়, আমার অন্যমনস্কতার জন্য নয় । বন্দুক চালাতাম আমি তেরো বছর বয়স থেকে ; আমি অতটা অসাবধান হতে পারি না ।’

আমার মন বলছে এই কঙ্কালই আসলে বড়কুমারের প্রেতাত্মা । আমি জিগ্যেস করলাম । ‘তাহলে আপনার মৃত্যু হয় কী ভাবে ?’

‘আমাকে খুন করা হয়েছিল !’ গর্জিয়ে উঠল কঙ্কাল । ‘সম্পত্তির লোভে, সিংহাসনের লোভে ! এই অন্যায়ের প্রতিশোধ না নেওয়া পর্যন্ত আমি এই বন্দী অবস্থা থেকে মুক্তি পাচ্ছিলাম না । আজ সেই মুক্তির সুযোগ এসেছে । আজ আমার হত্যার প্রতিশোধ আমি নিজেই নিচ্ছি । পুলিশ সন্দেহ করেছিল আমাকে খুন করা হয়েছে । কিন্তু টাকা দিয়ে তাদের মুখ বন্ধ করা হয়েছিল, এই সব পাপের শাস্তি দিবার সুযোগ আজ এসেছে । ইষ্টনাম জপ কর প্রতাপ, তোমার অন্তিমকাল উপস্থিত !’

প্রথম ছায়া মূর্তির ঘর থেকে বাইরে পালাবার চেষ্টা বিফল করে দিল বন্দুকের গর্জন । ফরাসের উপর লুটিয়ে পড়ল প্রথম ছায়ামূর্তির নিষ্পন্দ দেহ । সঙ্গে সঙ্গে কঙ্কাল আমাকে উদ্দেশ্য করে বলে উঠল, ‘সত্য ঘটনা প্রকাশ হলে আমি শাস্তি পাব । আমার এই উপকার করার জন্য আমি আপনাকে ধন্যবাদ জানাচ্ছি ।’

এই কথাটা বলে বন্দুকধারী কঙ্কাল অদৃশ্য হয়ে গেল ।

আমি একটা দেশলাই জ্বালিয়ে ফরাসের কাছে গিয়ে ধরতেই প্রথম ছায়ামূর্তির রহস্য উদ্ঘাটিত হল । ইনি ছায়ামূর্তি নন ; ইনি রক্তমাংসের দেহসম্পন্ন সদ্যোমৃত ধুমলগড়ের রাজা প্রতাপনারায়ণ, যিনি আজ থেকে দশ বছর আগে সম্পত্তি আর গদীর লোভে নিজের দাদা আদিত্যনারায়ণকে খুন করে সেটাকে অপঘাত মৃত্যু বলে চালিয়েছিলেন ।

এই খুনের অবিশিষ্ট তদন্ত হয়েছিল, এবং স্বভাবতই তাতে আমাকেও জড়িয়ে পড়তে হয়েছিল । কারণ আমি ছাড়া আর কোন তৃতীয় ব্যক্তি ছিল না প্রতাপনারায়ণের সঙ্গে । অথচ যে অস্ত্র দিয়ে তাকে খুন করা হয়েছে তার কোনো চিহ্ন নেই ত্রিসীমানায়, তাই শেষ পর্যন্ত বেকসুর খালাস পেয়ে গেলাম ।



খেলোয়াড় তারিণীখুড়ো

ডিসেম্বরের উনত্রিশে, শীতটা পড়েছে বেশ জাঁকিয়ে। সন্ধ্যাবেলা তারিণীখুড়ো এলেন গলায় আর মাথায় মাফলার জড়িয়ে। ‘তোরা মাঠে যাচ্ছিস না খেলা দেখতে?’ তক্তপোষে বসেই প্রশ্ন করলেন খুড়ো, ‘নাকি দুধের স্বাদ ঘোলে মেটাবার তাল করছিস?’

‘তার মানে?’ জিগ্যেস করলাম আমি।

‘ওই টেলিভিশন আর কি,’ বললেন, খুড়ো। ‘লোককে ঘরকুনো করার জন্যে অমন জিনিস আর দ্বিতীয় নেই। আমাদের সময়ে খেলা দেখতে হলে টিকিট কেটে মাঠে যেতে হত, আর তার মজাটাই ছিল আলাদা। শীতকালের মিঠে রোদে সবুজ রঙের খোলা বেঞ্চেতে বসে সবুজ ঘাসে ঢাকা মাঠে সাদা পোশাক পরা লোকগুলোর কাণ্ড দেখে দিব্যি সময় কেটে যেত। তার মধ্যে দুটো একটা বাউন্ডারি, ওভার বাউন্ডারি হলে ত কথাই নেই। মনে আছে দিলওয়ার হোসেনের খেলা জার্ডিনের এম সি সি টীমের এগেনস্টে। মাথায় পট্টি—বল লেগে মাথা ফেটে গেছে—তাই নিয়ে খেলছে দিলাওয়ার। স্টাইল-ফাইলের বালাই নেই, ব্যাট ধরেছে যেন কোলা ব্যাণ্ড ওৎ পেতেছে, কিন্তু কী খেলা খেললে লোকটা! চৌষটি না পঁয়ষটি রান, কিন্তু প্রত্যেকটি রানের দাম লাখ টাকা।’

‘সে ত হল, কিন্তু খেলা যদি না জমে?’ বলল সুন্দর।

‘তাতে কী হল? চার পাশে লোক রয়েছে, তাদের সঙ্গে খোশ গল্প করো; লাঞ্চ টাইমে মুরগীর কাটলেট আর হ্যাপি বয় আইস ক্রীম। বিকেল যত বাড়ছে সূর্য তত হেলছে পশ্চিমে, আর গাছের ছায়া লম্বা হয়ে মাঠটাকে ছেয়ে ফেলছে, উত্তরে হাইকোর্ট। ব্যাটে বলে খুটখুটের ফাঁকে ফাঁকে গঙ্গা থেকে স্টীমারের ভোঁ.....আর কত বলব? সাহেবরা বলে গেছে ইডেনের মতো ক্রিকেটের মাঠ দুনিয়ায় দুটি নেই।’

‘আপনার যে ক্রিকেটে এত শখ সে ত অ্যাডিন বলেননি,’ বলল ন্যাপলা।

‘বলিস কী ! আমার হিরো ছিল রণজি । জামসাহেব অফ নওয়ানগর মহারাজা রণজিৎ সিংজী । নওয়ানগরের রাজা, ক্রিকেটেরও রাজা । সাহেবদের চোখ টেরিয়ে যেত কালা আদমির খেলা দেখে । যে সব ভারতীয় বিদেশে গিয়ে দেশের মুখ উজ্জ্বল করেছে তার মধ্যে রণজিই বোধহয় প্রথম ।...তবে, শুধু ক্রিকেট কেন ? এই ঐষটি বছরের জীবনে কোনো খেলাই বাদ দেয়নি এ শর্মা—ডাংগুলি হাড়ু থেকে শুরু করে ব্রিজ-পোকার-দাবা-বিলিয়াড পর্যন্ত । ইন্সকুল কলেজে হকি ক্রিকেট ফুটবল রেগুলার খেলতুম । ত্রিশ বছর বয়সে একবার এক সাহেব টীমের এগেনস্টে ক্রিকেট খেলতে হয়েছিল ।’

‘এম সি সি ?’ ন্যাপলা জিগোস করল ।

‘ঠিকই বলেছি’ বললেন তারিণী খুড়ো, ‘তবে এম সি সি-র বিরুদ্ধে নয়, এম সি সি-র পক্ষে । মেরিলিবোন নয়, মার্তন্ডপুর ক্রিকেট ক্লাব, আর বিপক্ষদলের সাহেবরা প্লান্টার্স ক্লাব ।’

‘কত রান করেছিলেন আপনি ?’

‘সে বললে ত পুরো গল্পটাই বলতে হয় ।’

‘তাই বলুন না’ বলল ন্যাপলা । ‘ভূতের গল্প ত অনেক হল ; আজ খেলার গল্পই হোক ।’

‘ভূত যে এ গল্পে একেবারেই নেই সেটা অবিশ্যি বললে ভুল হবে ।’

‘আরেবাস !’ চোখ গোল গোল করে বলল ন্যাপলা, ‘ভূত আর ক্রিকেট—দারুণ কন্সিনেশন !’

চিনি-দুধ ছাড়া চায়ে একটা সশব্দ চুমুক দিয়ে গলার মাফলারটা আরেকটু ভালো করে পেঁচিয়ে নিয়ে তারিণীখুড়ো আরম্ভ করলেন তাঁর গল্প ।

উত্তর প্রদেশের উত্তরে হিমালয়ের গায়ে সাড়ে তিন হাজার ফুট এলিভেশনে হল মার্তন্ডপুর শহর । নেটিভ স্টেট, রাজার বয়স বাহান্ন, নাম বীরেন্দ্রপ্রতাপ সিং । এই রাজার সেক্রেটারির চাকরি আমি পেলুম ভগবানগড়ের রাজার রেকমেন্ডেশনে । রাজাদের সম্বন্ধে যে যাই বলুক না কেন, আমি তাদের কাছ থেকে যে ব্যবহার পেয়েছি তাতে আমি অন্তত তাদের বদনাম করতে পারব না । হতে পারে যে আমার কপাল ছিল ভালো, তেমন বিচ্ছু রাজার সংস্পর্শে আমি আসিনি । সে যাই হোক, মার্তন্ডপুরের রাজা আমাকে যে ভাবে খাতির করলেন তাতে খুশি না হয়ে উপায় নেই । সেক্রেটারির যাবতীয় কাজ ছাড়াও একটা জরুরী কাজ আমার ছিল সেটা হল এই—বীরেন্দ্রপ্রতাপ তাঁর বাপ রাজেন্দ্রপ্রতাপের জীবনী লিখবেন, সেই কাজে তাঁকে সাহায্য করা । রাজেন্দ্রপ্রতাপ ছাত্র-জীবন থেকেই ডায়রি লিখতেন । সেই সব ডায়রি পড়ে তাঁর জীবনের নানান তথ্য বার করে একটা খাতায় নোট করে রাখতে হবে আমাকে ।

ঘটনাবহুল জীবন, তাই কাজটা করতে ভালই লাগছিল। এই ডায়ার থেকেই আমি জানতে পারি যে রাজেন্দ্রপ্রতাপের জীবনে ক্রিকেট একটা খুব বড় স্থান অধিকার করেছিল। রাজবাড়ির বিশাল কম্পাউন্ডে একটা ক্রিকেট মাঠ রয়েছে সেটা এসেই দেখেছিলাম। কম্পাউন্ডের অধিকাংশটাই পাশাড় চেষ্টে সমতল করে ফেলা হয়েছে। তাতে ফুলের বাগান, ফলের বাগান, তিরতির করে বয়ে যাওয়া সরু নদী, চিড়িয়াখানা, মন্দির, সবই রয়েছে। আর আছে ক্লাব বিল্ডিং সমেত ক্রিকেট গ্রাউন্ড। রাজাকে জিগোস করতে উনি বলেছিলেন সে মাঠে খেলা হয় শরৎকালে। বড় খেলা একটাই হয়, সেটা হল মার্তন্ডপুর ক্রিকেট ক্লাব ভারসাস প্লান্টার্স ক্লাব। সে খেলা দেখতে নাকি সমতলভূমি থেকেও লোক উঠে আসে। আমি যখন গেছি—নাইনটিন ফটি নাইনে—তখনও অনেক সাহেব প্লান্টার থাকে ওই অঞ্চলে। তারা সব স্থানীয় চা বাগানের মালিক। তার মধ্যে নাকি জনাচারেক ডাকসাইটে প্লেয়ার আছে যারা তরুণ বয়সে দেশে থাকতে কাউন্টি ক্রিকেট খেলেছে, তারপর ভারতবর্ষে চলে এসেছে ব্যবসা করতে। রাজার টীম নাকি রাজেন্দ্রপ্রতাপের আমলে খুবই ভালো ছিল, কিন্তু এখন আর তেমন নেই। তাই গত দশবছরে একবারও মার্তন্ডপুর জিততে পারেনি। চারদিন ধরে খেলা চলে, মার্তন্ডপুরের পক্ষে রান ওঠে না বলে প্রতিবারই নাকি ইনিংস ডিফিট হয়, তাই সাহেবদের এক ইনিংসের বেশি ব্যাটই করতে হয় না।

আমি আসার হুঁটা তিনেকের মধ্যেই রাজা একদিন আমাকে এই বাৎসরিক ম্যাচের কথা বলে বললেন, 'তোমার ত বেশ জোয়ান ছিমছাম সুপুরুষ চেহারা, খেলাধুলোর শখ আছে নাকি?'

আমি বললাম, 'আউটডোর গেমস এককালে খেলেছি; আজকাল তাস, দাবা, বিলিয়ার্ড, এই সব খেলি সুযোগ পেলে।'

তারপরেই রাজা এম সি সি আর প্লান্টার্স ক্লাবের কথাটা বললেন। 'এখানে ভালো ক্রিকেটারের খুব অভাব', বললেন রাজা। 'এককালে এমন ছিল না। আমি নিজে অবশ্য কোনোদিন ক্রিকেট খেলিনি, বাবাই খেলতেন, কিন্তু তখন আমাদের দলকে সাহেবরা রীতিমতো ভয় পেতো। এখন ব্যাপারটা উল্টে গেছে। অথচ এমনই ট্র্যাডিশনের জোর যে বাৎসরিক ম্যাচটা না খেললেই নয়। আর ত একমাস আছে; এবার তুমিও লেগে পড়।'

আমি বাধ্য হয়ে বললাম যে আমার প্র্যাকটিস নেই; কিন্তু রাজা কথাটা কানেই নিলেন না। বললেন, 'এই একমাসে প্র্যাকটিসের ঢের সুযোগ পাবে। তোমাকে গান্ অ্যান্ড মুর কোম্পানির একটা ভালো বিলিতি ব্যাট দিচ্ছি, বাবা এনেছিলেন বিলেত থেকে, তাঁর এক বন্ধুর কাছ থেকে পাওয়া। কাজের ফাঁকে ফাঁকে একটু হাত চালিয়ে নাও। তোমার কি বোলিং আসে নাকি?'

বাধ্য হয়ে বললাম যে ওদিকে আমার কোনোদিনও ঝোঁক ছিল না। ফাইড

ডাউন, সিদ্ধ ডাউন নামভূম আর ব্যাটিং-ই করতুম। তবে ইয়াং বয়সের সে ফর্ম ফিরে পাবার আশা বৃথা। সেটাও জানিয়ে দিলুম। রাজা অবিশ্যি একথাতেও কান দিলেন না। বললেন, ‘আমার সঙ্গে এস, তোমাকে ব্যাটটা দিয়ে দিই।’

প্রাসাদের দক্ষিণভাগে একটা বিশেষ ঘরে গেলুম রাজার সঙ্গে। এই ঘরটা হল যাকে বলে ট্রোফি রুম। বীরেন্দ্রপ্রতাপ ভালো শিকারি, তাঁর মারা বাঘ ভাঙ্কুক বাইসন হরিণের স্টাফ করা দেহ আর মাথা রয়েছে এই ঘরে। এছাড়া রয়েছে এক আলমারি বোঝাই কাপ আর মেডেল, তার মধ্যে বেশির ভাগই রাজেন্দ্রপ্রতাপের পাওয়া, আর বাকি পেয়েছেন বর্তমান রাজা তাঁর স্কোয়াশ খেলায় কৃতিত্বের জন্য।

এরই পাশে একটা আলমারিতে রয়েছে কিছু টেনিস র্যাকেট, স্কোয়াশ র্যাকেট, মাছ ধরার ছিপ, আর বিভিন্ন খেলার সময় পরার জন্য রকমারি ক্যাপ। কিন্তু ক্রিকেট ব্যাট ত-কোথাও দেখছি না। রাজাকে জিগ্যোস করাতে বললেন, ‘ওটা ছিল রাজার খুব সাধের সম্পত্তি, তাই যেমন-তেমন ভাবে রাখা নেই।’

এই বলে একটা আলমারির তলার দিকের দেরাজ খুলে তার থেকে টেনে বার করলেন খবরের কাগজে মোড়া ব্যাটটা। সেটা দিয়ে অনেক খেলা হলেও এখনো বেশ ব্যবহার্য অবস্থায় রয়েছে।

‘হাতে নিয়ে দেখ।’

নিলুম, আর নিতেই কেমন যেন ম্যাজিকের মতো বয়সটা দশবছর কমে গেল। মনে পড়ল যত খেলা আমি খেলেছি তার মধ্যে নিঃসন্দেহে আমার সবচেয়ে প্রিয় ছিল ক্রিকেট। বার চারেক হাঁকড়াবার ভঙ্গিতে হাত চালিয়ে ফস করে বলে দিলুম আমি রাজার দলের হয়ে সাহেবদের বিরুদ্ধে খেলতে রাজি আছি। রাজা হ্যান্ডশেকের জন্য তাঁর ডান হাতটা বাড়িয়ে দিলেন আমার দিকে।

* * * *

দিন তিনেকের মধ্যে এম সি সি টীমের সব খেলোয়াড়ের সঙ্গে আলাপ হয়ে গেল। ক্যাপটেন হচ্ছেন সুন্দরলাল গুপ্ত, দিল্লীর লোক, বয়স আমারই মতো। অন্য খেলোয়াড়দের কাউকেই দেখে বিশেষ ভরসা হয় না। এটুকু জোর দিয়ে বলতে পারি যে আমার চেহারা এবং স্বাস্থ্য এদের সকলের চাইতে ভালো।

দুদিন মাঠে নেমে ঠুকঠাক করলুম, দেখলুম দিব্যি হাত চলছে, দৃষ্টি পরিষ্কার, মাথা ঠান্ডা। সুন্দরলাল খুব খুশি হলেন।

কিন্তু তিনদিনের দিন বিধি বাদ সাধলেন। সকালে উঠে দু চারটে হাঁচি হল, আর দুপুর হতে না হতে তেড়ে জ্বর। ইন্ফ্লুয়েঞ্জা। তখন মিস্সচারের যুগ, ডাক্তার পাণ্ডে এসে প্রেসক্রিপশন লিখে দিলেন, তাও সাতদিনের আগে জ্বর ছাড়ল না। আট দিনের দিন বিছানা ছেড়ে উঠে বুঝতে পারলুম দেহের শক্তি অর্ধেক হয়ে

গেছে । আগেও ফু হয়েছে, জার্নি দুর্বল করে দেয়, কিন্তু কথা হচ্ছে—পনের দিন বাদে ম্যাচ, খেলব কি করে ? রাজা কিন্তু নির্বিকার । বললেন, ‘পনের দিন ঢের সময় ; খেলার আগে ঠিক চাঙা হয়ে উঠবে, দেখে নিও । ম্যাচের আগের দিন একটু বাট চালিয়ে নিতে পারলে আর কোনো ভাবনা নেই ।’

কী আর করি ; খেলার চিন্তা আপাততঃ স্থগিত রেখে কাজে মন দিলাম ।

এখানে রাজেন্দ্রপ্রতাপের ডায়রির কথাটা বলা দরকার । চামড়া দিয়ে বাঁধানো তেত্রিশটা ভল্যুম । ষোল বছর বয়স থেকে লেখা শুরু, আগাগোড়াই ইংরিজিতে । গোড়ার দিকে ভাষায় গন্ডগোল, ব্যাকরণে ভুল ইত্যাদি রয়েছে, কিন্তু একুশ বছর বয়সে বিলেত যাবার ছ মাসের মধ্যে ভাষা হয়ে গেছে চোস্ত । পড়ার সঙ্গে সঙ্গে নোট করে যেতে হচ্ছে বলে এই দেড়মাসে বেশি এগোতে পারিনি, কিন্তু এর মধ্যেই রাজার পর্যবেক্ষণ ক্ষমতা দেখে মুগ্ধ হয়ে গেছি । বীরেন্দ্রপ্রতাপ অবিশ্যি তেত্রিশ খন্ডের সবকটাই পড়েছেন । তাঁর মতে রাজেন্দ্রপ্রতাপের ডায়রি হল একমেবাদ্বিতীয়ম্ । ভারতবর্ষের কোনো রাজ্যের কোনো রাজাই এরকম ডায়রি লিখেছেন বলে জানা যায়নি । একটা কথা অবিশ্যি এর মধ্যেই আমি বুঝতে পেরেছি ; সেটা হল এই যে রাজেন্দ্রপ্রতাপ ছিলেন ক্রিকেটের পোকা । তিনি বিলেত পৌঁছেছিলেন ১৯০১ সালে । যেদিন পৌঁছালেন সেদিনই ডায়রিতে লিখছেন, ‘অ্যাট লাস্ট আই ক্যান ওয়চ রণ্জি প্লে !’

বিলেত থেকে ফিরে এসেই রাজেন্দ্রপ্রতাপ মার্তন্ডপুর ক্রিকেট ক্লাবের পত্তন করেন । প্লাণ্টার্স ক্লাব অবিশ্যি তার আগে থেকেই ছিল । দুই ক্লাবের মধ্যে বাৎসরিক ম্যাচের পরিকল্পনাও রাজেন্দ্রপ্রতাপের । তাঁর ষয়ত্রিশ বছর বয়স অবধি তিনি ছিলেন এম সি সি-র ক্যাপ্টেন । তাঁর আমলে সাহেবরা নাকি মোটেই যুৎ করতে পারেননি । তার প্রধান কারণ—অধিনায়ক নিজে ছিলেন ডাক-সাইটে ব্যাটসম্যান । বীরেন্দ্রপ্রতাপের মতে তাঁর বাবার উচিত ছিল কোমর বেঁধে ফাস্ট ব্লাস ক্রিকেটে নেমে যাওয়া—যেমন নেমেছিলেন রণ্জি, দিলীপ সিংজী, পাটৌদির নবাব, পাতিয়ালা মহারাজা । কিন্তু ক্রিকেটের চেয়েও বেশি টান ছিল তাঁর সাহিত্যের প্রতি । আত্মজীবনী লিখতে শুরু করেছিলেন, কিন্তু তিন্মায় বছর বয়সে হঠাৎ হার্টফেল করে চলে গেলেন । বীরেন্দ্রপ্রতাপের বয়স তখন বাইশ । যে কাজ বাপ করে যেতে পারেননি, সে কাজ এখন তিনি করবেন বলে মনস্থ করেছেন ।

দেখতে দেখতে ম্যাচের দিন এল । তার আগে দুদিন মাত্র প্র্যাকটিস করেছি । দুর্বলতা যে পুরোপুরি গেছে তাও বলতে পারব না । তা সত্ত্বেও যে একটা উদ্দীপনা অনুভব করছিলুম এটা বলতেই হবে । মন বলছিল যে এ-খেলা আমাকে খেলতে হবে ।



ইতিমধ্যে প্লান্টার্সের টীম সম্বন্ধেও জেনেছি। তিনজন ভালো ব্যাটসম্যান আছে তাদের মধ্যে—বোল্টন, ম্যানারস আর উইলকিন্স। এছাড়া ভালো বোলার আছে দুজন—মার্টিন আর ফুলারটন। তার মধ্যে প্রথমটির বলে নাকি বেশ তেজ।

খেলার দিন দেখি সকাল থেকে মাঠে দর্শক জমায়েৎ হচ্ছে। বুকের ভেতর ধুকপুক করছে ঠিকই, কিন্তু সেই সঙ্গে খেলার আগ্রহটাও বাড়ছে। ক্যাপ্টেনকে বললাম যে ইন্ফুয়েঞ্জার প্রভাব যেহেতু সম্পূর্ণ কাটেনি, ফীল্ডিং-এ যেন আমাকে এমন জায়গায় রাখা হয় যাতে বেশি দৌড়াতে না হয়। গুপ্তে বললেন, ‘কোনো চিন্তা নেই, তোমাকে স্লিপে দেব।’

দশটায় ম্যাচ শুরু, মাঠের চতুর্দিকে লোক গিজগিজ করছে, নীল আকাশে শরতের তুলো-প্যাঁজা মেঘ, দুই ক্যাপ্টেন আম্পায়ারের সঙ্গে মাঠে নামলেন, আর আমিও চোঁখ বুজে বার চারেক দুর্গা নাম জপে নিলুম। ওদিকের অধিনায়ক জন উইলকিন্স, সেই টস জিতে ব্যাট করার সিদ্ধান্ত নিলে, আর আমি টাটকা নতুন সাদা প্যান্ট, সার্ট, জুতো আর নীল ক্যাপ পরে দলের সঙ্গে মাঠে নেমে সেকেন্ড স্লিপে গিয়ে দাঁড়ালুম। যাবার আগে অবিশ্যি রাজার সঙ্গে দেখা করে গিয়েছিলুম। রাজা আমার হাত ধরে ঝাঁকানি দিয়ে বললেন, ‘কোনো ভাবনা নেই, তোমার ব্যাটে জাদু আছে।’ কথাটার আসল মানে অবশ্য পরে বুঝেছিলুম।

ঔষত্রিশ বছর আগের ঘটনা, তাই খুব ডিটেলে মনে নেই, তবে এটা মনে আছে যে সাহেবরা তিনশো বাইশ রান তুলে দ্বিতীয় দিন টী-এর আগে সবাই আউট হয়ে গেলেন। আমি একটা ক্যাচ লুফে কিছুটা মান রক্ষা করলুম, কিন্তু মন বলতে লাগল যে এবারও সাহেবদের হারানো গেল না, সাড়ে তিনশো রান তোলার মতো ব্যাটসম্যান আমাদের দলে নেই। পরপর দশবার হেরেছে মার্তন্ডপুর ক্লাব, এবার নিয়ে হবে এগারোবার।

এম্ সি সি চায়ের পর ব্যাট করতে নামল; ওপনিং ব্যাট ক্যাপ্টেন গুপ্তে আর সুন্দরম বলে একটি মাদ্রাজি। আমি পাঁচ উইকেট গেলে নামব এটা আগে থেকেই ঠিক হয়ে আছে।

গুপ্তে টুকটুক করে তেইশ রান তুলে কট আউট হয়ে গেল, তার জায়গায় এল সলামৎ হোসেন। বললে বিশ্বাস করবি না, পৌনে পাঁচটার মধ্যে পাঁচটা উইকেট ধড়াধড় কচুকাটা—তখন রান উঠেছে মাত্র বিরানব্বুই! চারটে যখন পড়েছে তখনই আমি প্যাড পরে রেডি। পাঁচ নম্বর যখন শূন্য করে মুখ কালি করে ফিরছে, আমি নেমে পড়লুম মাঠে। কেউ তালি দিলে না। আমাকে কেউ চেনে না, শুনেছে ইনি বাঙালীবাবু, কাজেই আমার উপর কেউই বিশেষ ভরসা করছে না।

তখনও ওভারের তিন বল বাকি, বোলিং করছে ওদের ফাস্ট বোলার ক্লিফ

মার্টিন । আমি গিয়ে জায়গায় দাঁড়ালুম । তখনকার মনের অবস্থা বলে বোঝানো খুব মুশকিল । সকাল অবধি মনে হচ্ছিল যে অসুখের দরুণ যে এনার্জিটা হারিয়ে ছিলাম, তার সবটুকুই এ কদিনে আবার ফিরে পেয়েছি, কিন্তু এখন মনে হচ্ছে সেটা আবার লোপ পেয়েছে । ব্যাটটা হাতে ভারী লাগছে, পায়ের প্যাড যেন একটা দুর্বিষহ বোঝা, তাই নিয়ে ছুটে রান করা যেন একটা অসম্ভব ব্যাপার ।

ওদিকে মার্টিন হেঁটে গিয়ে তার জায়গায় দাঁড়িয়ে বলটা প্যান্টের পাশে ঘষে নিচ্ছে, মন বলছে প্রথম বলেই আমার স্টাম্প হবে চিচিং ফাঁক । তাও কোনোরকমে মনটাকে শক্ত করে মাথা ঘুরিয়ে ফীল্ডটা দেখে নিয়ে ব্যাট পাতলুম ঘাসের ওপর । তারপর ভুরু কঁচকে চাইলুম মার্টিনের দিকে । সব তৈরি বুঝে সে দিলে স্টার্ট । চোদ পা দৌড়ে সমস্ত শক্তি প্রয়োগ করে যে বলটা সে দাগলে আমার দিকে সেটা শর্ট পিচ । কোথেকে মুহূর্তের মধ্যে যে মনে সাহসটা এল জানি না । শুধু সাহস না—সেই সঙ্গে চোখের দৃষ্টি, নার্ভের উপর দখল, কবজির জোর আর হাঁকড়াবার গোঁ । সব মিলে ব্যাটচালানোর সঙ্গে সঙ্গে বলবাবাজী উল্টো মুখে আকাশে উঠে চোখের পলকে ক্লাব ঘরের পেছনে শিরীষ গাছের পাতা ভেদ করে একটা কান ফাটানো খটাং শব্দ করে পড়ল একটা অদৃশ্য টিনের চালের উপর । খেলায় এই প্রথম ছক্কা, আর তাই না দেখে হাজার পায়রা এক সঙ্গে টেক অফ করলে যেমন শব্দ হয়, দর্শকদের মধ্যে থেকে উঠল তেমনি একটা শব্দ । এমন হাততালি ক্রিকেটের মাঠে বড় একটা শোনা যায় না । আর এই হাততালিতেই যেন নদীতে বান ডাকার মতো হুড়মুড় করে আমার সমস্ত উৎসাহ আর কনফিডেন্স ফিরে এল । এটা ঠিক যে সেদিন নিজের খেলায় আমি নিজেই হকচকিয়ে যাচ্ছিলুম । এ যেন আমি নয় ; আমার ভেতর ঢুকে আমার হয়ে অন্য কোন ক্ষণজন্মা ক্রিকেটর যেন খেলাটা খেলে দিচ্ছে, সব কৃতিত্ব তারই, আমি নিমিত্ত মাত্র ।

আমার স্কোর হয়েছিল দুশো তেতাল্লিশ নট আউট, তার মধ্যে এগারোটা ছক্কা আর একত্রিশটা বাউন্ডারি । অন্য ব্যাটসম্যানের উপর ভরসা নেই বলে ওভারে শেষ বলে শর্ট রান নিয়ে ব্যাটিং-এর পুরো দায়িত্বটা নিজের ঘাড়েই নিয়ে নিয়েছিলুম । ড্রাইভ, হুক, গ্লাস, কাট, ওভার দি বোলার—কোনো স্ট্রোকই আমার খেলা থেকে বাদ পড়েনি । আশ্চর্য এই যে, এককালে যখন ক্রিকেট খেলেছি তখন এর অনেক স্ট্রোকই আমার হাত দিয়ে বেরোয়নি । একশো করার সঙ্গে সঙ্গে সাহেবরা এসে আমার পিঠ চাপড়ে দিয়েছিল, কিন্তু দুশোর বেলায় দেখলুম তাদের সকলের মুখ ফ্যাকাশে মেরে গেছে, পিঠ চাপড়ানোর সামর্থ্যও যেন আর নেই ।

আমার এমন খেলার পরে সাহেবরা এমন মুসড়ে পড়েছিল যে দ্বিতীয় ইনিংসে সাতাত্তরের মাথায় তাদের শেষ উইকেট পড়ে গেল । ইনিংস ডিফীট, কারণ

আমাদের টেণ্ডাল হয়েছিল চারশো ছত্রিশ ।

চারদিনের দিন আড়াইটায় খেলা শেষ হয়ে গেল ।

সেদিনই সন্ধ্যায় আমার ঘরে খাটো শুয়ে ভরদ্বাভ বেয়ারাকে দিয়ে একটু দলাই মলাই করিয়ে নিচ্ছি, এমন সময় রাতার খান বেয়ারা এসে জানালে যে আমার শল্য পড়েছে ।

গেলুম বেয়ারার সঙ্গে । তাঁর ঘরে ঢুকতেই রাজা আমার দিকে চেয়ে একগাল হেসে বললেন, 'ওয়েল ব্যানার্ভি, হাউ ডু ইউ ফীল ?'

আমি অকপাট বললুম, 'দেখ রাজা, আমি একেবারে বোকা বনে গেছি । সঠিক বলছি আমি এমন খেলা কখনো খেলিনি, কারণ এমন খেলা আমার পক্ষে সম্ভবই নয় । এর গহস্য ভেদ করার শক্তি আমার নেই ।' রাজার মুখে এখনো মেলায়েম হাসি । সাহসের তেজোর দিকে নির্ভর করে বললেন, 'বোস ।'

আমি বসলুম । রাজা তাঁর সামনে টেবিলের উপর থেকে একটা বই তুলে নিলেন । সেখান থেকে চিনতে পারলুম, এটা বীরেন্দ্রপ্রতাপের ডায়েরির একটা খণ্ড ।

একটা বিশেষ জায়গায় 'এইখনি' বুলুন সেটা আমার দিকে এগিয়ে দিয়ে বীরেন্দ্রপ্রতাপ বললেন, 'এইখনি' পড়ে দেখ ।

পড়ার আগে ওপরে মনে হাবিখ দেখে নিলুম । হেসে নভেম্বর ১৯০৩ । অর্থাৎ বিশেষত যাবার আড়াই বছর পর ।

এবার লেখটার চোখ পেল । যা পড়লুম তার বাংলা করলে এইরকম দাঁড়ায়—'আজ রুশি তার বন্ধুত্বের নিমিত্ত বঙ্গের তার নিজের একটা ব্যাট আমাকে দিল । এই ব্যাট নিয়েই সে মাসেজের হয়ে মিডলসেক্সের বিরুদ্ধে ২০২ রান' করেছিল । আমার মতো ভাস্কর্য্য পৃথিবীতে আর কেউ আছে কি ?'

এতোদিন রুশির শুধু নামই শুনেছিলাম । আজ তাঁর মৃত্যুর ষোল বছর পরে, নিজের খেলা থেকে আঁচ করলুম তিনি কেমন খেলতেন ।



টলিউডে তারিণীখুড়ো

তাকিয়াটাকে কোলের উপর তেনে নিয়ে আরো ভমিয়ে বসে ঝুঁকে পড়ে তারিণীখুড়ো তাঁর গল্প আরম্ভ করলেন।—

আমার তখন তেইশ বছর বয়স, তবে একটা তেকোণা ফ্রেঞ্চকাট গোলুর দাড়ি রেখেছিলাম বলে মনে হত তেত্রিশ। বেয়াল্লিশ সালের কথা বলছি। তখন যুদ্ধ চলেছে পুরোদমে, কলকাতার রাস্তাঘাটে থাকি পরা জি. আই. সেনা ঘোরাফেরা করছে, শহরের চেহারাটাই পালটে গেছে। জোড়া জোড়া মার্কিন মিলিটারি পুলিশ চৌরঙ্গীতে টহল দিয়ে ফেরে, তাদের জামার আস্তিনে কুনুই-এর ওপর লেখা এম. পি.। সিনেমা হাউসগুলো খালি পড়ে থাকে না কখনো; ম্যাটিনি-ইভনিং-নাইট তিনটেই হাউস ফুল, সব ছবিই হিট, তা সে দিশিই হোক আর বিলিতিই হোক। আমাদের টলিউডের স্টুডিওগুলো গমগম করছে, কুইক মানির লোভে রোজই টাকাওয়ালা নতুন নতুন প্রোডিউসার আসছে। তারা জানে ছবি একবার লেগে গেলে কোনো ব্যবসায়ে চটজলদি এত লাভ হয় না। আমার মেজোমামার এক সহপাঠী, নাম পরেশ মুস্তোফি, তিনি ভারত মাতা স্টুডিওর মালিক। আমাকে ডেকে পাঠিয়ে যেচে একটা চাকরি দিলেন প্রোডাকশন ম্যানেজারের। কাজটা নেহাৎ ফেলনা নয়; একটা ছবি হলে পরে সবাইয়ের সঙ্গে যোগাযোগ রাখা, খরচের হিসেব রাখা, আর্টিস্ট আর কর্মীদের পেমেন্ট করা, এমন কি ছুঁচ থেকে হাতি পর্যন্ত যা কিছু একটা ছবিতে লাগবে সব কিছু জোগাড় করার ভার আমার উপর। তখন বয়স কম, তাছাড়া টুপাইস রোজগার হচ্ছে, খাটনি হলেও কাজটা ভালোই লাগছিল।

সেই সঙ্গে এটাও বলা দরকার যে ভেতরে ভেতরে আমার অভিনয়ের একটা শখ ছিল। আমার চেহারাটা যে এককালে ভালো ছিল, সেটা ত তাদের বলেইছি। তাছাড়া আমি ছিলাম হলিউডের ছবির পোকা। বাংলা ছবিতে ত আর অভিনয় হত না, হত রং তামাশা। আমি দেখি পৃথিবীর সব সেরা স্টারের

অভিনয়, যাকে দেখে অভিনয় বলেই মনেই হয় না। অবিশি সেই সঙ্গে ভালো বাংলা পেশাদারী থিয়েটারও বাদ দিই না, কারণ শিশির ভাদুরী, যোগেশ চৌধুরী মনোরঞ্জন ভট্টাচার্য—এরা সব ছিলেন বাঘা বাঘা অভিনেতা। কিন্তু যেচে গিয়ে বলব আমায় একটা পার্ট দিন, তেমন সাহস তখনো হয়নি। তবে স্টুডিও পাড়ায় থাকলে কোনো প্রযোজক বা পরিচালকের চোখে পড়ে গিয়ে সুযোগ যে আসবে না, এমনই বা কে বলতে পারে?

একদিন জানতে পারলাম যে আলমগীর ছবি হচ্ছে আমাদের এই ভারত মাতা স্টুডিওতেই, আর স্টুডিওই টাকা ঢালছে সে ছবিতে। বস্ মুস্তোফি সাহেব আমাকে ডেকে সব ডিটেল বললেন। তখনকার নামকরা পরিচালক জগদীশ নন্দর পরিচালনা করবেন, সেরা অভিনেতারা সব অভিনয় করছেন। তবে নাম ভূমিকায়—অর্থাৎ আলমগীরের চরিত্রে—একটি নতুন লোককে নেওয়া হচ্ছে। এর নাম রমণীমোহন চ্যাটার্জি, সুন্দর চেহারা, উচ্চবংশের ছেলে, অনেক পয়সা। মুস্তোফিমশাই নিজেই নাকি ছেলটিকে এক বিয়ে বাড়িতে দেখে সোজাসুজি অফারটা দেন, এবং ছেলে নাকি একদিনে কুঁচ হয়ে যায়।

রমণীমোহন চ্যাটার্জি নামটা শুনে শুনে লোকে কেমন বুঝতে পারছিলাম না, শেষটায় হঠাৎ মনে পড়ল যে নামকরাটারে একটা ক্রায়ে আমারই স্কুলের সহপাঠী ব্রতীন্দ্র থিয়েটার করে, তার কাছে শুনেছি এই রমণীমোহনের কথা। চেহারা ভালো—‘অনেকটা হোৎ মতো দেখতে’—বলেছিল ব্রতীন্দ্র, আর অ্যাকটিংটাও নাকি ভালোই করে। ওর মনে একটা খটকা ছিল তাই ব্রতীন্দ্রের সঙ্গে সরাসরি যোগাযোগ করলাম, আর করে জানলাম যে এ সেই একই রমণীমোহন। বললাম, ‘পারবে তু এত বড় লজিস্ট কীভাবে নিতে?’ ব্রতীন্দ্র বললে, ‘আদা নুন খেয়ে উঠে পড়ে লেগেছে তু ছোকরা। শখ প্রচণ্ড। আর, ও একটা আংটি পরে সেটা নাকি মুখল আমলের; ওর ঠাকুরদাদার ছিল; খুব পয়সা। আলমগীর সাজলে ওটা আঙুলে পরবে, আর তাহলে নাকি আর দেখতে হবে না। আসলে, রমণী আবার তুকেতাকে বিশ্বাস করে, পূজো আচ্ছা করে। বড়লোক বাপের একমাত্র ছেলে, বুঝতেই ত পারিস, পরসার জন্য যে করছে তা ত নয়, শখ হয়েছে চিত্রতারকা হবার।’

পয়লা বৈশাখ মহরতের দিন স্থির হয়েছে, এখন মার্চের মাঝামাঝি, তাই হাতে কিছুটা সময় আছে। ইতিমধ্যে পরিচালক জগদীশ নন্দর একদিন বলে বসলেন যে নতুন ছেলটিকে একবার বাজিয়ে দেখবেন। শুধু চেহারাতে ত হবে না, তাকে ডায়ালগ বলতে হবে, তাই অভিনয় ছাড়াও কণ্ঠস্বর, উচ্চারণ ইত্যাদি ভালো হওয়া চাই। আর একমাত্র সেই যখন নতুন, তখন তাকে একবার পরীক্ষা করে দেখা উচিত। এই পরীক্ষায় উৎরোলে তারপর একটা ক্যামেরা টেস্ট নিলেই চলবে।

আমারই উপর ভার পড়ল রমণীমোহনকে টেলিফোন করে তারই বাড়িতে একটা আপয়েন্টমেন্ট করা। রবিবার সকাল দশটায় টাইম ঠিক হল। আমি আর পরিচালকমশাই যাবো। টেস্টে পাশ করলে পর মুস্তোফির সঙ্গে বাকি কথা হবে।

রবিবার এসে পড়ল। জগদীশ নস্কর সময়ানুবর্তিতায় বিশ্বাসী, ঘড়ির কাঁটায় কাঁটায় দশটায় গিয়ে রমণীমোহনের বাড়ি সদর দরজার বেল টিপলেন। বেয়ারা আমাদের বৈঠকখানায় নিয়ে গিয়ে বসাবার প্রায় সঙ্গে সঙ্গেই রমণীমোহনের আবির্ভাব হল। চেহারা ভালো তাতে সন্দেহ নেই, আর এতেও সন্দেহ নেই যে আমার সঙ্গে একটা মিল আছে। দুজনেরই হাইট ছ ফুট, দোহারা চেহারা, ফরসা রং, চোখা নাক, পাতলা ঠোঁট। আমার তেকোনা দাড়ির জন্য মিলটা হয়ত অতটা ধরা পড়ে না, কিন্তু আমি জানি, দাড়ি বাদ গেলেই পড়বে।

পরিচালকমশাই সঙ্গে আলমগীরের ডায়ালগ এনেছিলেন। তারই একটা অংশ পড়তে দিলেন রমণীমোহনকে। ছোকরা বেশ ভালোই পড়ল। বলল ও নাকি ভাদুড়ীমশাইকে গুরু বলে মানে, আর হলিউডের তারকাদের মধ্যে রোনাল্ড কলম্যান। নস্কর মশাই বেশ খুশি, আমাকে বললেন অবিলম্বে দরজা এনে রমণীমোহনের পোশাকের মাপ নিতে। এই ফাঁকে রমণীমোহনও তাঁর আংটিটা দেখিয়ে দিলেন। দেখলাম সত্যি খাসা জিনিস; সোনার আংটির মাঝখানে হীরেকে ঘিরে গোল করে পান্না বসানো। নস্করমশাই বললেন আলমগীর গালে হাত দিয়ে বসে থাকলে আংটিটা ক্রোজ-আপের সৌন্দর্য অনেক গুণে বাড়িয়ে দেবে।

তিনদিন বাদে ক্যামেরা টেস্টেও রমণীমোহন দিব্যি উৎরে গেলেন।

এরপর একটা দিন ঠিক করে বস্ মুস্তোফি মশাইকে সঙ্গে নিয়ে রমণীমোহনের বাড়ি গিয়ে তার সঙ্গে চুক্তি সই হয়ে গেল। পঞ্চাশ হাজার টাকা পাবে রমণীমোহন, আর পাঁচ হাজার অ্যাডভান্স। তখনকার দিনে একজন নতুন অভিনেতার পক্ষে এটা অটেল টাকা, আজকের দশলাখের সমান। পয়লা বৈশাখ মহরৎ; তাতে কোনো অভিনয়ের ব্যাপার নেই, কিন্তু রমণীমোহনকে মেক-আপ নিয়ে, কস্টিউম পরে আসতে হবে। এইখানে রমণীমোহন একটি বায়না করলে। সে বললে যে স্টুডিওর মেক-আপ ক্রম তার জানা আছে, সে অতি রুচি, তাতে সে মেক-আপ করবে না। মেক-আপ-ম্যান যেন সকাল সকাল তার বাড়িতে চলে আসে, সে বাড়িতেই মেক-আপ নিয়ে কস্টিউম পরে স্টুডিওতে হাজির হবে। মুস্তোফিমশাই দেখলাম এতে রাজি হয়ে গেলেন, যদিও একজন কন্সল্টার পক্ষে আবদারটা একটু বাড়াবাড়ি রকমের। বুঝলাম নতুন হিরোকে কুই পছন্দ হয়েছে কতামশাইয়ের।

পয়লা বৈশাখ ভারত মাতা স্টুডিওতে আলমগীরের মহরৎ হয়ে গেল।

লোকে লোকাংগা, ফিল্ম লাইনের কেউ বাদ যায়নি, খানাপিনার বন্দোবস্ত ছিল, নতুন তারকাকে মোগল বাদশার মেক-আপে দেখে সকলেই খুব আশ্চর্য করে গেলেন। ইতিমধ্যে রমণীমোহন নাকি আলমগীরের ডায়ালগ পেয়ে গেছেন, এবং সবই তাঁর মুখস্থ হয়ে গেছে। আচকান জোব্বা পরচুলা দাড়ি গোঁফ তুলোয়ার নাগরা সব রোঁড়, প্রথম সূটিং-এর তারিখ স্থির হয়েছে পনেরই বৈশাখ।

এদিকে আমি তখন পুরোদস্তুর প্রোডাকশন ম্যানেজারের কাজ করছি। উদয়াস্ত খাটছি, দম ফেলার ফাঁক নেই। কিন্তু এতেও যে আপত্তি নেই তার কারণ হল যে স্টুডিওর পরিবেশে একটা জাদু আছে। এটা স্বীকার করতেই হবে। বিশেষ করে ঐতিহাসিক ছবিতে যারা কাজ করেন—সে অভিনেতা-অভিনেত্রীই হোক আর সাধারণ কর্মীই হোক—তাদের সকলেরই মেজাজে যেন একটা আমীরী ভাব চলে আসে। স্টুডিওর ভিতরে সেট তৈরী হচ্ছে প্রাসাদের—তার খিলেন, থাম, ঝাড়লগুন, দেয়ালগিরি, গালিচা, মসনদ, ফরাস, তাকিয়া—সমস্ত আবহাওয়াটাই যেন গেছে পালটে। মাঝে মাঝে কথা বলতে যে উর্দু-ফারসিও বেরিয়ে পড়ছে না তা নয়।

দেখতে দেখতে ১৫ই বৈশাখ এসে গেল। আলমগীরকে দিয়েই কাজ শুরু; বাপ শাজাহানের সঙ্গে দৃশ্য। ঠিক সাড়ে দশটার সময় তাঁর নিজের লাল শেত্রোলে গাড়িতে আলমগীরের বেশে এসে হাজির হলে রমণীমোহন।

ক্যামেরাম্যানের আলো করা প্রায় শেষ, দু-একটা খুচরো রিহার্সেলও হয়ে গেল, এবং তাতে শাজাহান-বেশী পেশাদারী অভিনেতা জয়নারায়ণ বাগচির বিপরীতে নিউকামার রমণীমোহন বেশ ভালোই অভিনয় করলেন। কেবল, পাখা সবেও তিনি যে এত ঘামছেন, সেটা বোধহয় প্রথম দিনের উত্তেজনা ও কিঞ্চিৎ নার্ভাসনেসের জন্য। শট-এর সময়ে এটা না হলেই আর কোনো চিন্তার কারণ থাকবে না।

এবার ডিরেকটর সাহেব 'লাইটস !' বলে চেঁচাতেই সেটের প্রয়োজনীয় সব আলোগুলো জ্বলে উঠলো; অভিনেতা দুজন তাঁদের নিজের নিজের নির্দিষ্ট গতির মধ্যে হেঁটে চলে দেখে নিলেন যে আলো ঠিক আছে। ঠিক আছে বলছি অবিশ্যি বাংলা ছবির কথা ভেবে। প্রাসাদের দেয়াল যে চটের তৈরি সেটা বেশ হাত দূর থেকেই বোঝা যাচ্ছে, মেক-আপ আর পোশাক একেবারে যাত্রামার্ক। তবে এ-টুকু জানি যে রমণীমোহন যদি উৎরে যায় তাহলে এ ছবি হিট হবার সমূহ সম্ভাবনা।

'সব রেডি ?' হাঁক দিয়ে প্রশ্ন করলেন পরিচালক জগদীশ নন্দর। নন্দর সাহেব হচ্ছেন সেই জাতের পরিচালক যিনি যার যার কাজ তাকে তাকে দিয়ে নিজে পরম নিশ্চিত্ত বোধ করেন। কেবল পরিচালনার সময়টুকুতেও তাঁর ব্যক্তিত্বে একটা পরিবর্তন আসে। তাও সেটা বেশি না। আর এর আরেকটি

অভ্যাস হচ্ছে যে ইনি কাজের মধ্যে সামান্যতম ফাঁক পেলেই একটু বসে নেন, এবং আরামকেদারা পেলে কক্ষনো মোড়া বা কাঠের চেয়ারে বসেন না।

সব্বাই রেডি ছিল, কাজেই শট নেওয়ায় কোনো বাধা নেই, কিন্তু রমণীমোহন দেখছি ঘেমেই চলেছেন। মেক-আপ অ্যাসিস্ট্যান্ট প্রতি তিন মিনিট অন্তর তোয়ালে দিয়ে তাঁর মুখ ‘প্যাড’ করে দিচ্ছে, কিন্তু তাও ঘামের অন্ত নেই। স্টুডিওতে বৈশাখ মাসে গরম ঠিকই, কিন্তু এখন তো চতুর্দিকে বিরাট বিরাট পাখা চলছে; শট-এর সময়ে সেগুলো বন্ধ হয়ে গেলে কী অবস্থা হবে?

শুটিং-এ একটা রেওয়াজ আছে যে প্রথম দিনের প্রথম শটটা একবার উৎরে গেলে সবাই হাততালি দেয়। বিশেষ করে নতুন অভিনেতা হলে ত কথাই নেই।

কিন্তু অত্যন্ত আক্ষেপ ও বিস্ময়ের ব্যাপার যে পর পর সাতবার চেষ্টার পরেও হাততালির সুযোগ এল না, এবং তার জন্য দায়ী স্বয়ং আলমগীর বাদশা। তাঁর ডায়ালগ ছিল অতি সহজ। বাপকে তিনি বলবেন, ‘আমি ত আগেই বলেছি, আমার পথে কোনো বাধা আমি সহ্য করব না।’ এই কয়েকটি কথা পর পর ঠিকভাবে বলা যে এত কঠিন হতে পারে তা আমি স্বপ্নেও ভাবতে পারিনি। ‘আমার পথে কোনো বাধা আমি সহ্য করব না’—এটা একবার হল ‘আমার বাধা আমি কোনো পথে সহ্য করব না,’ তারপর হল, ‘আমার সহ্যের পথে আমি কোনো বাধা দেব না,’ তারপর হল, ‘আমি কোনো পথেই আমার সহ্যে বাধা দেব না,’ আর চতুর্থবার পরিচালক হুঙ্কার দিয়ে ‘অ্যাকশান’ বলার পরে আওরঙ্গজেবের মুখ দিয়ে কোনো কথাই বেরোল না। আমি দেখি তার পা ঠকঠক করে কাঁপছে। সে তার কাছেই একটা সিংহাসন গোছের গদির চেয়ার ছিল, তাতে বসে মাথার পাগড়িটা খুলে ফেলল। তারপর বলল যে তার ব্লাড প্রেশার নাকি মাঝে মাঝে অত্যন্ত বেশি নেমে যায়, সম্ভবত এখনও তাই হয়েছে, তাই একজন ডাক্তারের ব্যবস্থা করতে পারলে ভালো হয়।

রিহাসাল মোটামুটি ঠিক হয়েছিল বলে সকলে আরো অবাক, কিন্তু আমি ত জানি যে শট নেবার ঠিক আগে যে মুখের সামনে খটাস করে ক্ল্যাপস্টিক মারা হয়, তাতে অনেক পাকা অভিনেতাও টসকে যায়। এখানেও তাই হয়েছে তাতে কোনো সন্দেহ নেই।

ডাক্তার এসে বললেন প্রেশার নামলেও তেমন কিছু নয়, কিন্তু অভিনেতাকে দিয়ে আজকে আর কাজ না করানোই ভালো।

রমণীমোহন বাড়ি চলে গেলেন। পরিচালকও একা শাজাহানকে নিয়ে গোটা পাঁচেক শট নিয়ে তিনটের মধ্যে কাজ শেষ করে দিলেন।

কিন্তু বাকি কাজ কবে হবে?

আর এই রমণীমোহনকে দিয়ে আদৌ কাজ চলবে কি? নাকি, শেষ মুহূর্তে অন্য অভিনেতা দেখতে হবে?



আমার বস্ মিঃ মুস্তোফি আমায় ডেকে বললেন, ‘তুমি একবারটি ওই ছোকরার বাড়িতে গিয়ে সঠিক খবরটা নিয়ে এস ত । সে নিজে কী মনে করে সেটা জানা দরকার । সে ফ্যাঙ্কলি বলুক সে পারবে কি না । যদি কদিন সময় চায় তাও দিতে রাজি আছি, কারণ চেহারার দিক দিয়ে ওকে মানিয়েছিল চমৎকার । হয়ত জড়তাটা টেম্পোরারি । অবিশ্যি দ্বিতীয় দিনেও এই একই ব্যাপার ঘটলে অন্য লোক নিতেই হবে ।’

মুস্তোফি সাহেব যেন একবার ভুরু কঁচকে আমার দিকে চাইলেন, ভাবটা যেন—একে দিয়েও ত কাজটা চলতে পারত । কিন্তু তারপর আর কিছু বললেন না, আর আমিও চেপে গেলুম ।

দুদিন পরে অ্যাপয়েন্টমেন্ট করে রমণীমোহনের ট্যাগোর কাসল্ রোডের বাড়িতে গিয়ে হাজির হলুম । বেয়ারা আমায় বৈঠকখানায় বসানোর এক মিনিটের মধ্যে বাবু এসে ঢুকলেন । দেখলুম এই কদিনে ওর বয়স যেন বেড়ে গেছে দশ বছর । বললুম, ‘কী ব্যাপার বলুন ত ? এরকম হল কেন ?’

ভদ্রলোক গভীর আক্ষেপের ভঙ্গিতে মাথা নেড়ে বললেন, ‘কী আর বলব বলুন, শুটিং-এর তিনদিন আগে আমার এক বন্ধু এক জ্যোতিষী এনে হাজির করে বলল—“নতুন কাজে হাত দিতে যাচ্ছ, ঐকে দিয়ে একবার ভাগ্যটা যাচাই করে নাও ।” আমিও আপত্তি করলুম না, কারণ ওসবে আমার বেশ আস্থা আছে । আর ঐর নাকি জ্যোতিষাৰ্ণব-টার্ণব উপাধি আছে, চেহারাও বেশ ইমপ্রেসিভ । কিন্তু মশাই, হাত দেখার আগেই আমার মাথার দুদিকের রগ বুড়ো আর কড়ে আঙুলে টিপে লোকটা কী বললে জানেন ? বললে, “এ লাইন তোমার নয় । অভিনয়ের দিকে যেও না ; গেলেই হৌচট খেতে হবে ।”—ভেবে দেখুন তো কী কথা ! তিনদিন বাদে শুটিং, পার্ট মুখস্থ হয়ে গেছে, আর লোকটা বলে কিনা আমায় দিয়ে অ্যাকটিং হবে না ? সাথে কি ডায়ালগ্ গোলমাল হয়ে যাচ্ছিল ? যেই মুখ খুলতে যাব অমনি জ্যোতিষীর মুখটা মনে পড়ে যাচ্ছে, আর কে যেন গলার ভেতর পাথর ঝুঞ্জে দিচ্ছে । ওফ্ ! সে যে কী অবস্থা, সে আর আপনাকে কী করে বোঝাব ? রাজ্যি শুদ্ধ লোক জেনে গেছে আমি আলমগীর করছি আর সেই সময় অকেজো বলে বাদ হয়ে যাওয়া—এর চেয়ে বেশি অপমান আর কী হতে পারে বলুন ?’

আমি আর কী করি ? যথাসাধ্য সহানুভূতি দেখালুম । জিগ্যেস করলুম, ‘কী করলে পরে এই বিত্তীষিকা আপনার মন থেকে দূর হতে পারে ? কারণ আপনার মধ্যে যে অ্যাকটিং আছে সে ত আমরা রিহার্সেলেই দেখেছি ।’

রমণীমোহন মাথা নাড়ল । খাড় হেঁট ছিল, এবার মুখ তোলাতে দেখলুম

চোখে জল । আমার হাত দুটো ধরে অত্যন্ত করুণ সুরে বললে, ‘কতদিনের যে স্বপ্ন সিনেমায় অভিনয় করে নাম করব ! আর সেই সুযোগ এসেও গ্রহের ফেরে বানচাল হয়ে গেল ! এখন আপনি যদি কোনো রাস্তা বাতলাতে পারেন । আমার নিজের মাথায় একটা রাস্তা এসেছে কিন্তু সেটা সভয়ে বলব না নির্ভয়ে বলব বুঝতে পারছি না ।’

আমি বললুম, ‘নির্ভয়ে বলুন ।’

রমণীমোহন কয়েক মুহূর্ত আমার দিকে চেয়ে থেকে বলল, ‘আপনার অভিনয় আসে ?’

‘হঠাৎ এ প্রশ্ন কেন ?’

‘কারণ আমার সঙ্গে আপনার চেহারার মিল আছে । সে কথা আমার বেয়ারা প্রসন্নও বলছিল । ভাবছিলুম, আমার বদলে আপনি যদি আমার বাড়ি থেকে মেক-আপটা করে নিয়ে পোশাকটা পরে আমার হয়ে অভিনয়টা করে দিয়ে আসতেন । অবিশ্যি, কিছু লোককে ব্যাপারটা বলতেই হবে । যেমন মেক-আপ-ম্যান যতীন, তার সহকারী হাবুল, আর ড্রেসার তারাপদ । তাদের হাতে কিছু ঠুঁজে দিলে তারা কখনই ব্যাপারটা ফাঁস করবে না ।’

আমি বললাম, ‘তার মানে অভিনয় করবেন তারিণী বাঁড়ুজ্জি আর নাম হবে রমণী চাটুজ্যের ?’

‘এ-ছাড়া আর রাস্তা আছে কি ?’

‘আর প্রোডাকশন ম্যানেজারের কাজটা কে করবে ?’

‘সেটার একটা অন্য ব্যবস্থা করবে ওরা । আপনি বলে দেবেন বোম্বাই থেকে একটা ভালো অফার পেয়েছেন, তাই চলে যাচ্ছেন ।’

‘কথাটা মন্দ বলেননি । কিন্তু যদি অভিনয় আমার ভালো হয়, আর তার জন্য যদি কোনো সংস্থা পুরস্কার ঘোষণা করে, তাহলে সেটাও ত আপনিই নেবেন ?’

‘তা ত নিতেই হবে । তবে আপনাকে পারিশ্রমিক ছাড়াও আমি একটা জিনিস দিতে রাজি আছি ।’

‘কী জিনিস ?’

‘আমার এই মোগলাই আংটি । আজকের বাজারে এর দাম কত জানেন ত ?’

পুরোন ভালো জিনিসের উপর আমার মোহ আছে সেটা ত তোরা জানিস । সেটা তখনও ছিল । বলে দিলুম ‘ঠিক হয় । আমি আপনার প্রস্তাবে রাজি । কিন্তু সবচেয়ে আগে আপনার চিত্রনাট্যটি চাই । ডায়ালগ মুখস্থ করতে হবে ত ।’

রমণীমোহন তৎক্ষণাৎ তাঁর ফাইলটা এনে আমায় দিলেন ।

সেইদিনই বিকেলে মিঃ মুস্তোফির কাছে গিয়ে বললুম যে রমণীমোহন আরেকটা চাল চাইছে । বলছে, এবার না হলে যেন তাকে বাদ দেওয়া হয় ।

শ্রুতি মশাই রাজি হয়ে গেলেন, শুধু প্যারিচালক মশাইকেও খবরটা দিয়ে দেওয়া হল।

রমণীমোহনকে সৃষ্টি হবার সময় দিয়ে পনের দিন পরে শুটিং রাখা হল। অন্যদের কাজের তারিখ আর স্টুডিওর বুকিংও সেভাবে বদলে দেওয়া হল। যাদের দলে টেনে নেবার কথা তাদের সকলকেই তালিম দেওয়া হয়ে গেছে। আমার জায়গায় নতুন প্রোডাকশন ম্যানেজার এসে গেছে। তাঁকেও দলে টেনে নিয়েছি, কারণ প্রোডাকশন ম্যানেজারের কাছে কোনো কিছু লুকোনো বড় কঠিন ব্যাপার। আমি মুস্তাফি মশাইকে অবিশ্যি জানিয়ে দিয়েছি যে একটা ভালো চান্স পেয়ে বোম্বে চলে যাচ্ছি, এ ছবিতে আর আমার কাজ করা সম্ভব হবে না।

যথার্থি শুটিং-এর দিন এসে পড়ল। সকাল দশটায় রমণীমোহনের লাল শেপোলে এসে ঢুকল ভারত মাতা স্টুডিওতে। তার থেকে আলমগীরের বেশে নামলেন তারিণী বীড়জ্জ—কার বাপের সাক্ষ্য ধরে যে অ্যাকটর চেঞ্জ হয়ে গেছে !

সেই একই দৃশ্য তোলা হবে, সব তৈরি, সবাই তৈরি, 'স্টার্ট সাউণ্ড' বলে চুঁচিয়ে উঠলেন প্যারিচালক। সাউণ্ডম্যানের কাছ থেকে উত্তর এল 'রানিং'।

'অ্যাকশন।'

আলমগীর তাঁর বাবার সামনে এসে অত্যন্ত সাবলীলভাবে তাঁর কথা বলে গেলেন ; শট-এর শেষে প্যারিচালক 'কাট' বলতেই হাততালিতে স্টুডিও গমগম করে উঠল।

সারাদিনের তেরোটি শট-এর একটিতেও রমণী-তারিণী ঠেকলেন না।

ছবি শেষ হতে লাগল পাঁচমাস। তোরা তখন জন্মাসনি তাই তাদের খবরটা দিতে হচ্ছে যে আলমগীর হয়েছিল সুপারহিট, আর রমণীমোহন বছরের শ্রেষ্ঠ অভিনেতা হিসেবে তিনটে সংস্থা থেকে পুরস্কার পেয়েছিলেন। অবিশ্যি তাঁর কেরিয়ারের শুরু এবং শেষ এই একটি ছবিতে, কারণ তাঁর শুরু তাঁকে ফিল্মে অভিনয় করতে বারণ করায় সে প্লাস্টিকের ব্যবসায় চলে যায়। আর আমি হয়ত নিজের নামে ছবিতে একটা চান্স নিতে পারতুম, কিন্তু তখনই উদয়পুরে একটা ভালো চাকরি জুটে গেল। আমার কাছে তখন থেকেই নতুন দেশ দেখার চেয়ে বড় আর কিছু নেই, তাই আর দ্বিধা না করে পাড়ি দিলুম রাজস্থানে। অবিশ্যি সেটা আরেকটা গল্প।

'তাহলে সেটাও হোক।' বলল ন্যাপলা।

'তা কী করে হবে,' বললেন তারিণীখুড়ো, 'আগে যেটা বলছি সেটা শেষ হোক।'

আমরা ত অবাক। এ গল্পে আর কী থাকতে পারে ?

'আমি যে দ্বৈত ভূমিকা বা ডবল পার্ট করেছিলুম সেটাই ত তাদের বলা হয়

নি ।' বললেন তারিণীখুড়া, তাঁর চৌকির কোণে মুচকি হাসি ।

‘কিছুকম, কিছুকম ?’ আমরা সকলে একসঙ্গে বলে উঠলাম ।

‘আমার বন্ধু ব্রতীনাথ দিয়ে রমণীমোহনকে আমিই বললাম যে নতুন কাজে নামার আগে একবার ভাগ্য গণনা করিয়ে নাও । তখন ব্রতীনাথ ত জ্যোতিষাৰ্ণবকে নিয়ে যায় রমণীমোহনের কাছে । কে সেই জ্যোতিষাৰ্ণব ?
হঁ হঁ—বয়ঃ তারিণীচরণ বীড়জ্ঞে । নিজের হাতে তৈরি মেক-আপ, নিজের হাতে লেখা সংলাপ । বাড়িমাং না হয়ে যায় কোথায় ?’

তারিণীখুড়ো ও বেতাল

শ্রাবণ মাস, দিনটা ঘোলাটে, সকাল থেকে টিপটিপ করে বৃষ্টি পড়ছে, তারই মধ্যে সন্ধ্যের দিকে তারিণীখুড়ো এসে হাজির। হাতের ভিজে জাপানী ছাতাটা সড়াং করে বন্ধ করে দরজার পাশটায় দাঁড় করিয়ে রেখে তক্তাপোষে তাঁর জায়গাটায় বসে তাকিয়াটা টেনে নিয়ে খুড়ো বললেন, ‘কই, আর সবাইকে ডাক, আর নিকুঞ্জকে বল নতুন করে জল ফুটিয়ে এক কাপ চা করতে।’

লোড শেডিং, তাই বসবার ঘরে দুটো মোমবাতি জ্বলছে, তাতে থমথমে ভাবটা ত কমেইনি, বরং বেড়েছে।

নিকুঞ্জই জল চাপিয়ে পাড়ার এ-বাড়ি ও-বাড়ি থেকে ন্যাপ্লা, ভুলু, চটপটি আর সুনন্দকে ডেকে আনল। ন্যাপ্লা এসেই বলল, ‘এই বাদলা দিনে মোমবাতির আলোয় কিন্তু—’

‘ভূতের গল্প ত?’

‘মানে, যদি আপনার স্টকে আর থাকে। দুটো গল্প ত অলরেডি বলা হয়ে গেছে।’

‘আমার স্টক? আমার যা স্টক তাতে দুটো আরব্যোপন্যাস হয়ে যায়।’

‘তার মানে টু থাউজ্যান্ড অ্যাণ্ড টু নাইটস?’

আমাদের মধ্যে ন্যাপ্লাই খুড়োর সঙ্গে তাল রেখে কথা বলতে পারে।

‘আজ্ঞে হ্যাঁ,’ বললেন খুড়ো। ‘তবে সব যে ভূতের গল্প তা নয় অবশ্যই।’

এখানে বলে রাখি যে তারিণীখুড়োর গল্পগুলো এত জমাটি হয় যে সেগুলো গুল না সত্যি সে কথাটা আর কোনোদিন জিজ্ঞেস করি না। তবে এটা জানি যে পঁয়তাল্লিশ বছর ধরে ভারতবর্ষের নানা জায়গায় ঘোরার ফলে খুড়োর অভিজ্ঞতার স্টক অফুরন্ত।

‘আজকে কিসের গল্প বলবেন?’ জিগ্যোস করল ভুলু।

‘আজকেরটা ভূতেরও বলতে পারিস, কঙ্কালেরও বলতে পারিস।’

‘কখন আর হুত যে এক ভিনিস সেটা ত জানতাম না,’ বলল নাপলা ।

‘হুই আর কে ভিনিস রে ছোকরা ? এক ভিনিস না হলেও একেক সময় এক হয়ে যায় । অমৃত আমি যে ঘটনার কথা বলতে যাচ্ছি তাতে তাই হয়েছিল । শোনার যদি সাহস থাকে তোদের ত বলতে পারি ।’

আমরা পাঁচজন একসঙ্গে পর পর তিনবার ‘আছে !’ বলার পর খুড়ো শুরু করলেন ।

আমি তখন মালাবারে এলান্ডর দাদস করে বেশ দু’ পয়সা কমিয়ে আবার ভবঘুরে । কোচিন থেকে গেলুম কোয়েম্বাটোর, সেখান থেকে ব্যাঙ্গালোর, ব্যাঙ্গালোর টু কুর্নুল, কুর্নুল টু হায়দ্রাবাদ ফাস্ট ক্লাস ছাড়া ট্রেনে চড়ি না, ভালো হোটেল পার্ক, শহরে কোয়ার্টার ইচ্ছা হলে টাকি ভাকি হায়দ্রাবাদে যাবার ইচ্ছে ছিল সামান্য ভাং মিউজিয়ামটা দেখার জন্য । শ্রেষ্ঠ একজন লোকের সংগ্রহ থেকে একটা পুরো মিউজিয়াম হয়ে ফ্যু সেটা না দেখলে বিশ্বাস করা যায় না । মিউজিয়াম দেখে গোলকোণ্ডায় একটা ট্রিপ করে আবার বেরিয়ে পড়ব ভাবছি, এমন সময় লোকাল কাগজে একটা বিজ্ঞাপন দেখে মনটা চমকন করে উঠল । হায়দ্রাবাদেই থাটিস্ট ধনরাজ মার্টও একজন মডেল চাইছেন পৌরাণিক ছবি আঁকার জন্য । তোরা রবীন্দ্রনাথ নাম তুলেছিস কিনা জানি না । রাজা রবীন্দ্রনাথ । ট্যাভাক্কোরের এক রাজবাংলার জেলে ছিলেন । পৌরাণিক ছবি এঁকে খুব নাম করেছিলেন গত শতাব্দীর শেষ দিকটার । তারপরও বহু রাজারাজ্যের বাড়িতে দেখতে পাওয়া যায় তাঁর আঁকা সহ শ্রমের পেন্টিং । কতকটা রবীন্দ্রনাথের স্টাইলের ছবি আঁকে এই ধনরাজ মার্টও, জাং আমি হতভম্বের কথা বলছি, বছর পঁয়ত্রিশ আগে, তখন লোকটার খুব নাম, খুব পসার । তার এই বিজ্ঞাপনটা দেখে বেশ একটা জোরালো প্রতিক্রিয়া হল । পুরুষ মডেল চেয়েছে, চেহারা ভালো হওয়া চাই, রোজ সিটিং দিতে হবে, উপযুক্ত পারিশ্রমিক দেবে । তোদের ত বলেইছি, সে ব্যয়েসে আমার চেহারা ছিল লাইক এ প্রিন্স । তার উপর ডন-বৈঠক দেওয়া শরীর । গায়ে জোকা, মাথায় মুকুট আর কোমরে তলোয়ার দিয়ে যে-কোনো নেটিভ স্টেটের সিংহাসনে বসিয়ে দেওয়া যায় । যাই হোক, অ্যাপ্রাই করে দিলুম, আর ডাকও এসে গেল সাতদিনের মধ্যে ।

নতুন খুরে দাড়ি কমিয়ে ভালো পোশাক পরে দুর্গা বলে হাজির হলুম মার্টওর অ্যাড্রেসে । বাড়িটা দেখেই মনে হল এককালে কোনো নবাবের হাভেলি-টাভেলি ছিল । চারিদিকে মার্বেল মোড়েইক নকসার ছড়াছড়ি । পৌরাণিক ছবিতে যে ভালো রোজগার হয় সেটা বোঝাই যাচ্ছে ।

উদ্দিপরা বেরা এমে আমাকে নিয়ে গিয়ে বসাল একটা সারি সারি চেয়ার পাতা ঘরে । সেখানে জনা পাঁচেক ক্যানডিডেট অপেক্ষা করছে, যেন ডাক্তারের

ওয়েটিং রুম । এদের মধ্যে একজনের চেহারাটা চেনা চেনা লাগলেও সে যে কে তা ঠিক বুঝতে পারলুম না । আমি বসার মিনিট খানেকের মধ্যেই সে লোকের ডাক এল । বেয়ারা ঘরে ঢুকে ‘বিশ্বনাথ সোলাঙ্কি’ বলতেই চিনে ফেললুম লোকটাকে । ফিল্ম পত্রিকায় ঐর ছবি দেখেছি । কিন্তু তাহলে আবার চাকরির জন্য দরখাস্ত করা কেন ?

কৌতূহল হওয়াতে আমার পাশে বসা ভদ্রলোকটিকে জিগ্যেস করলুম, ‘আচ্ছা, যিনি এফুনি উঠে গেলেন, তিনি বোধহয় একজন ফিল্মস্টার, তাই না ?’

ভদ্রলোক একটু হেসে বললেন, ‘স্টার হলে কি আর এখানে দেখতে পেতে ? হতে চেয়েছিল স্টার, কিন্তু তিনটি ছবি পর পর মার খাওয়াতে এখন অন্য রাস্তা দেখছে ।’

ভদ্রলোক আরো বললেন যে সোলাঙ্কি নাকি হায়দ্রাবাদেরই ছেলে । ধনী বাপের পয়সা উড়িয়েছে জুয়া খেলে আর ফুর্তি করে । তারপর বোম্বাই গিয়ে ফিল্মের হিরো হবার চেষ্টায় বিফল হয়ে আবার এখানে ফিরে এসেছে ।

যিনি এসব খবর দিলেন তিনি নিজেও অবিশ্বাস্য একজন ক্যানডিডেট । পাঁচজনের সকলেই মডেল হবার আশায় এসেছেন, তবে তার মধ্যে সোলাঙ্কির চেহারাটাই মোটের উপর ভালো, যদিও যাকে পৌরুষ বলে সে জিনিসটার একটু অভাব ।

আমার ডাক পড়ল সবার শেষে । যে ঘরে ইন্টারভিউ হচ্ছে সেটাই দেখলাম স্টুডিও, কারণ একদিকে রয়েছে বেশ বড় একটা কাঁচের জানালা, ঘরের একপাশে একটা ইজেল আর তার পাশে একটা টেবিলের উপর আঁকার সরঞ্জাম । এইসবের মধ্যেই একটা ডেস্ক পাতা হয়েছে, আর তার দুদিকে দুটো চেয়ার । একটায় বসেছেন মার্তণ্ড সাহেব । সাহেব কথাটা ভুল হল না, কারণ ভদ্রলোকের ইংরিজিটা বেশ চোস্ত । শকুনিমার্ক নাক, ফ্রেঞ্চ-কাট দাড়ি, মাথার লম্বা টেউ-খেলানো চুল নেমে এসেছে কাঁধ অবধি । পোশাক সম্ভবত নিজেরই ডিজাইন করা, কারণ জাপানী, সাহেবী আর মুসলমানী পোশাকের এমন খিচুড়ি আর দেখিনি । পাঁচ মিনিট কথা বলে আর জামা খুলিয়ে আমার বাইসেপ ট্রাইসেপ আর ছাতি দেখে ভদ্রলোক আমাকেই সিলেক্ট করে নিলেন । ডেইলি সিটিং-এ একশো টাকা । অর্থাৎ মাসে ত্রিশ দিন কাজ হলে তিন হাজার—আজকের দিনে প্রায় দশ-পনেরো হাজারের সামিল ।

পরের দিন থেকেই কাজ শুরু হয়ে গেল । যে কোনো পৌরাণিক ঘটনাই হোক না কেন, তাতে প্রধান পুরুষ চরিত্র হব আমি । নারী চরিত্রের জন্য আছেন মিসেস্ মার্তণ্ড, আর ওদেরই উনিশ বছরের মেয়ে শকুন্তলা । খুচরো পুরুষের জন্য মডেলের অভাব নেই । মার্তণ্ডের পৌরাণিক পোশাকের স্টক বিরাট—পাগড়ি মুকুট ধুতি চাদর কোমরবন্ধ তাগা তাবিজ নেকলেস সবই

আছে। অর্জুনের লক্ষ্যভেদ দিয়ে আঁকা শুরু হল, তার জন্য একটি জবরদস্ত ধনুকও তৈরী করিয়ে রেখেছেন আর্টিস্ট মশাই।

হুসেন সাগর লেক থেকে পাঁচ মিনিটের হাঁটা পথে দেড়শ টাকা ভাড়ার দুটি ঘর নিয়ে নিলাম আমি। বাড়িওয়ালা মোতালেফ হোসেন অতি সজ্জন ব্যক্তি, বাঙালীদের সম্বন্ধে খুব উঁচু ধারণা। রোজ সকালে আণ্ডা-টোস্ট খেয়ে বেরিয়ে পড়ি, নটা থেকে একটা পর্যন্ত সিটিং, তার মধ্যে চা-পানের জন্য দশ মিনিটের বিরতি থাকে এগারোটায়। কাজের পর বাকি দিনটা ফ্রী থাকে, হায়দ্রাবাদ শহর ঘুরে দেখি, সন্ধ্যাবেলা লেকের ধারে একটু বেড়িয়ে দশটার মধ্যে ঘুমিয়ে পড়ি। এছাড়া আরেকটা কাজ আছে, সেটা হল পুরাণের গল্প পড়ে মার্তণ্ডর জন্য স্টেবল সাবজেক্ট খুঁজে রাখা। মার্তণ্ড নিজে শুধু রামায়ণ-মহাভারতটা পড়েছে, তাও তেমন খুঁটিয়ে নয়, তাই তার বিষয়গুলো একটু মামুলি হয়ে পড়ে।

আমিই মার্তণ্ডকে বলেছিলাম রাজা বিক্রমাদিত্যের কিছু ঘটনা, যেগুলো ওর মনে ধরেছিল। আমি জানতুম বিক্রমাদিত্যের পক্ষে আমার চেহারা খুব যুৎসই। কিন্তু কাজের বেলা গুণগোলটা কোথায় হল আর কী ভাবে হল সেটাই বলি।

চার মাস একটানা সিটিং দিয়ে আটটা ছবি হয়ে হয়ে গেছে, এমন সময় একদিন সন্ধ্যাবেলা লেকের ধারে বেড়িয়ে বাড়ি ফিরছি, একটা পুরোন মসজিদের পাশ দিয়ে রাস্তা, জায়গাটা নিরিবিলি। মসজিদের উল্টো দিকে একটা তেঁতুল গাছের নিচে পৌঁছেছি, এমন সময় পিছন দিক থেকে মাথায় একটা বাড়ি খেয়ে চোখে ফুলঝুরি দেখলুম।

জ্ঞান হলে পর দেখি হাসপাতালের বিছানায় শুয়ে আছি, মাথায় আর বাঁ হাতে বেদম পেন। রাস্তায় অজ্ঞান হয়ে পড়ে থাকতে দেখে এক সহৃদয় ভদ্রলোক তাঁর গাড়িতে তুলে সোজা হাসপাতালে নিয়ে এসেছেন। হাতের ব্যথাটা আর কিছুই না—যখন পড়েছি তখন রাস্তায় একখণ্ড পাথরে লেগে কনুইটা ফ্র্যাকচার হয়েছে। এখানে বলে রাখি যে অজ্ঞান অবস্থায় আমার বেশ কিছু লোকসান হয়ে গেছে : আমার ওয়ালেটে ছিল দেড়শো টাকা, সেটি গেছে, আর আমার সাতশো টাকা দামের সাধের ওমেগা ঘড়িটা। পুলিশে খবর দিয়ে কোনো ফল হয়নি, কারণ এ ধরনের অঘটন রাস্তাঘাটে নাকি প্রায়ই ঘটে।

হাত প্লাস্টার করে বিছানায় পড়ে থাকতে হল তিন হপ্তা। জখম হবার চার-পাঁচ দিনের মধ্যেই আমি মার্তণ্ডকে একটা পোস্টকার্ড ছেড়ে দিয়েছিলাম আমার অবস্থা জানিয়ে। তিন দিনের মধ্যেই তার উত্তর এসে যায়। দুঃসংবাদ। মার্তণ্ড লিখেছে বিক্রমাদিত্য সিরিজের জন্য অর্ডার পেয়ে গেছে, অমুক তারিখের মধ্যে ছখানা ছবি দিতে হবে, তাই সে অন্য মডেল নিতে বাধ্য হয়েছে। আমার মতো কোয়ালিফিকেশন নাকি তার নেই, কিন্তু নিরুপায়। এ সিরিজ শেষ হলে পরে প্রয়োজন হলে আমায় আবার জানাবে, ইত্যাদি।

এ নিয়ে ত আর করার কিছু নেই, তাই অগত্যা সময় কাটানো এবং যা হোক কিছু রোজগারের জন্য অঙ্ক হেরাল্ড পত্রিকায় একটু আধটু লিখতে শুরু করলুম। ছখানা ছবি আঁকতে মার্তণ্ডের লাগবে অন্তত তিনমাস। অর্থাৎ আমার প্রায় ন হাজার টাকা লোকসান করে দিয়েছে হায়দ্রাবাদের গুণ্ডা।

কিন্তু একমাস যেতে না যেতেই আমার বাড়িওয়ালার কাছে টেলিফোন এল মার্তণ্ড সাহেবের। আমায় নাকি তাঁর বিশেষ প্রয়োজন।

বেশ কৌতূহল নিয়ে হাজির হলুম মার্তণ্ডের স্টুডিওতে। ব্যাপারটা কী? ‘আমার একটা ভালো স্কেলিটন জোগাড় করে দিতে পার?’ বললেন মার্তণ্ড সাহেব। ‘দু-একজনকে বলে ফল হয়নি তাই তোমার কথা মনে হল। যদি পার ত ভালো কমিশন দেব। আমার বিশেষ দরকার।’

জিগ্যেস করলুম স্কেলিটনের প্রয়োজন হচ্ছে কেন। মার্তণ্ড বললেন বেতাল পঞ্চবিংশতির ছবি আঁকবেন। বিক্রমাদিত্যের কাঁধে বেতাল হবে ছবির সাবজেক্ট। বেতালের গল্প আজকালকার ছেলেমেয়েরা পড়ে কিনা জানি না; আমরা এককালে খুব উপভোগ করতুম। এক সন্ন্যাসী বিক্রমাদিত্যকে আদেশ করেছে—দু ক্রোশ দূরে শ্মশানে শিরীষ গাছে একটা মড়া বুলছে, সেইটে তুমি আমার কাছে এনে দাও। বিক্রমাদিত্য শ্মশানে গিয়ে বুলন্ত মড়ার গলার দড়ি তলোয়ারের এক কোপে কেটে ফেলতেই মড়া মাটিতে পড়ে খিলখিল করে হেসে উঠল। ছেলেবেলায় জিন্দা লাশ বলে একটা হিন্দি ফিল্ম দেখেছিলুম; এও হল জিন্দা লাশ। এমন লাশ যার মধ্যে ভূত বাসা বেঁধেছে। এই ভূতে পাওয়া মড়াকেই বলে বেতাল। বিক্রমাদিত্য বেতালকে কাঁধে নিয়ে সন্ন্যাসীর কাছে চলেছেন, আর বেতাল তাঁকে হেঁয়ালি গল্প বলছে। রাজা যদি হেঁয়ালির ঠিক উত্তর দেন তাহলে মড়া আবার তাঁর কাঁধ থেকে শিরীষ গাছে ফিরে যাবে, আর যদি ভুল উত্তর দেন তাহলে রাজা বুক ফেটে মরে যাবেন।

যাই হোক, আমি মার্তণ্ডকে বললুম, ‘কিন্তু সাহেব, বেতাল ত কঙ্কাল নয়, সে ত শবদেহ।’

মার্তণ্ড বললে, ‘স্কেলিটন পেলে আমি ছবিতে তার গায়ে চামড়া বসিয়ে নিতে পারব, কিন্তু স্কেলিটন আমার চাই-ই।’

আমি বললুম, ‘তোমার মডেল কঙ্কালকে কাঁধে নিতে রাজি হবে ত?’ ‘হবে বৈকি,’ বললে মার্তণ্ড। ‘আমি তার সঙ্গে কথা বলেছি। সে বলে তার কোনো ভয়ডর নেই। এখন তুমি বল তুমি জোগাড় করে দিতে পারবে কিনা।’

বললুম, ‘আই শ্যাল ট্রাই মাই বেস্ট। তবে এ কিছু অল্প খরচে হবে না। আর কাজ হয়ে গেলে সে কঙ্কাল ফেরত দিতে হতে পারে।’

মার্তণ্ড আমার হাতে দু হাজার টাকা দিয়ে বললে, ‘এই হল কঙ্কালের সাতদিনের ভাড়া, এটা দাম নয়। আর তোমায় আমি দেব টু হান্ড্রেড।’

স্কেলিটন পাওয়া আজকের দিনে খুবই কঠিন সেটা সকলেই জানে। যা পাওয়া যায় সবই প্রায় বিদেশে এক্সপোর্ট হয়ে যায়। কিন্তু তখনও যে সহজ ছিল তা নয়। বিশেষত হায়দ্রাবাদের মতো জায়গায়। আমি অনর্থক খোঁজাখুঁজি না করে সোজা আমার বাড়িওয়ালাকে ব্যাপারটা খুলে বললাম। মোতালেফ সাহেব হায়দ্রাবাদে রয়েছেন বেয়াল্লিশ বছর। এখানকার নাড়ীনক্ষত্র জানেন। আমার কথা শুনে কিছুক্ষণ ভুরু কুঁচকে থেকে বললেন, ‘একটা স্কেলিটনের কথা মনে পড়ছে বটে, তবে সেটা আসল কঙ্কাল না যন্ত্রপাতি লাগানো আর্টিফিশিয়াল কঙ্কাল সেটা বলতে পারব না। আর সেটা এখনো সে লোকের কাছে আছে কিনা তাও জানি না।’

‘কে লোক সে?’

‘এক ম্যাজিশিয়ান,’ বললেন হোসেন সাহেব। ‘আসল নাম কী জানি না, তবে ভোজরাজ নামে খেলা দেখাত। তার মধ্যে একটা ছিল কঙ্কালের খেলা। কঙ্কাল তার সঙ্গে এক টেবিলে বসে চা খেত, তাস খেলত, দুজনে পাশাপাশি হাঁটাচলা করত। সে এক তাজ্জব ব্যাপার। খুব নাম করেছিল লোকটা। তবে বছর পনের তার কোনো হদিস পাইনি। ম্যাজিক ছেড়ে দিয়েছে এটাই শুনেছিলাম।’

‘সে কি হায়দ্রাবাদেরই লোক?’

‘হ্যাঁ, তবে তার ঠিকানা জানি না। অঙ্ক অ্যাসোসিয়েশনে জিগ্যেস করে দেখতে পার। তারা ফি বছর ভোজরাজের খেলার ব্যবস্থা করত।’

অঙ্ক অ্যাসোসিয়েশনের কাছ থেকে ভোজরাজের এককালের ঠিকানা পাওয়া গেল। আশ্চর্য! গিয়ে দেখি লোকটা এখনো সেইখানেই আছে। চক বাজারের মধ্যে একটা দোতলা বাড়িতে দুটি ঘর নিয়ে তিনি থাকেন। বয়স আশী-টাল্লী হবে, মুখ ভর্তি একরাশ খয়েরি রঙের দাড়ি, মাথায় চক্চকে টাক, গায়ের রং আবলুশ। আমায় দেখে হিন্দিতে প্রথম কথাই বললেন, ‘বাঙালী বাবুর নসীব খারাপ যাচ্ছে বলে মনে হচ্ছে?’

লোকটা তাহলে বোধহয় গুণতে জানে। এবারে আর ভনিতা না করে আসল ব্যাপারটা তাঁর কাছে পেশ করলুম। বললুম, ‘যদি সে-কঙ্কাল এখনো আপনার কাছে থেকে থাকে আর যদি সেটাকে হপ্তা খানেকের জন্য ভাড়া দিতে পারেন তাহলে আমার নসীব কিছুট ইমপ্রুভ করতে পারে। যিনি ভাড়া নেবেন তিনি দু হাজার টাকা দিতে রাজী আছেন। সে কঙ্কাল এখনো আছে কি?’

‘একটা কেন—দুটো আছে—হ্যাঃ হ্যাঃ হ্যাঃ হ্যাঃ।’

আমি একটু থতমত খেয়ে গেলুম।

‘আরে কঙ্কাল ত তোমারও আছে।’ বললেন ভোজরাজ। ‘নেই কি? কঙ্কাল

আছে বলেই ত চলে ফিরে বেড়াচ্ছ ! তোমার কঙ্কাল ত আমি চোখের সামনে দেখতে পাচ্ছি । কনুইয়ের কাছে হাড়ে চিড় ধরল, ডাক্তার আবার সেটাকে জুড়ে দিল । তুমি জোয়ান বলেই জোড়া লাগল ! আমি যদি মাথায় বাড়ি খেয়ে পড়ে হাড় ভাঙতুম, আমাকে কি আর কোনোদিন উঠতে হত ?

এই সুযোগে একটা প্রশ্ন না করে পারলুম না ।

‘আমায় কে জখম করল সেটা বলতে পারেন ?’

‘এ ভেরি অর্ডিনারি গুণ্ডা,’ বললেন ভোজরাজ । ‘তবে তার পিছনে অন্য কেউ আছে কিনা জানি না । থাকতে পারে । সেটা জানতে পারে আমার কঙ্কাল । সেটা আমার চেয়ে অনেক বেশি জ্ঞানী । তুমি চাইছ সে কঙ্কাল, আমি দিতেও প্রস্তুত আছি—অনেককাল রোজগার নেই, দেনা জমে গেছে বিস্তর, দু হাজার পেলে সব শোধ হয়ে যাবে, আমিও নিশ্চিন্তে মরতে পারি—কিন্তু একটা কথা বলি তোমায় । এ কঙ্কাল যে-সে কঙ্কাল নয় । যাঁর কঙ্কাল তিনি ছিলেন সিদ্ধপুরুষ । মাটি থেকে পাঁচ হাত শূন্যে উঠে যোগ সাধনা করতেন । বায়ু থেকে আহাৰ্য আহরণ করতেন, ফলমূলের দরকার হত না । তাঁর তেজ ছিল অসামান্য । একবার তাঁর সাধনার সময় এক চোর তাঁর কুটিরে ঢুকে ঘটিবাটি সরাতে গিয়েছিল । হাত বাড়ানো মাত্র আঙুলগুলো বঁকে যায় । কুষ্ঠ । কেউটে ছোবল মারতে এলে সাপ ভস্ম হয়ে যেত, বাবাজীর কিছু হত না !’


আমি একটা কথা না বলে পারলুম না ।

‘কিন্তু এই বাবাজীর কঙ্কালকেও ত আপনি বশে এনেছিলেন । একে দিয়ে ভেলকি দেখাতেন স্টেজে ।’

‘তাহলে বলি শোন,’ বললেন ভোজরাজ । ‘কঙ্কালকে আমি কোনোদিন বশে আনিনি । এ সবই তাঁর খেলা । অন্য যা ম্যাজিক দেখাতুম সেগুলো কিছুই না—সব যন্ত্রপাতির কারসাজি । লোকে ভাবত কঙ্কালের মধ্যে বুঝি কলকন্ডা আছে । আসলে কঙ্কালের যা কিছু ক্ষমতা সবই গুরুজীর কৃপায় । মনে মনে তাঁর শিষ্য হয়ে আমি একটানা দশ বছর তাঁর পদসেবা করি । তখন আমার তরুণ বয়স—ম্যাজিক সম্বন্ধে একটা কৌতূহল ছিল, এই পর্যন্ত । গুরুজী একবারও আমার কোনো নোটিস নেননি । তারপর একদিন হঠাৎ আমার দিকে চেয়ে বললেন, ‘বেটা, তোর ওপর আমি খুশি হয়েছি । তবে তুই এখন সংসার ত্যাগ করতে যাস নি । তোর অনেক কাজ আছে । তুই হবি ভোজবাজির রাজা । তোর নাম হবে । যে কাজে নাম করবি সেই কাজেই আমি তোকে সাহায্য করব, তোর সেবার প্রতিদান দেব । তবে সেটা এখন নয় । আমি মরবার পর ।’

আমি বললাম, ‘সেটা কি রকম করে হবে যদি বুঝিয়ে দেন ।’

গুরুজী আমাকে সন তারিখ বলে দিয়ে বললেন, ‘এই দিনে যাবি তুই নরমদার তীরে মাক্কাতা শহরে । সেখানে খাশানে গিয়ে দেখবি একটা বেল গাছ । সেই



গাছ থেকে নদীর ধার ধরে পশ্চিমে চলে যাবি নশো নিরানবুই পা । সেখানে দেখবি বনের মধ্যে একটা তেঁতুল গাছ আর বাবুল গাছের মধ্যে আকন্দ ঝোপের পাশে একটা কঙ্কাল । সেটাই আমি । সেটাকে তুই নিয়ে যাস । সেটাই সাহায্য করবে তোর কাজে, তোর আদেশ মানবে, লোকে দেখে তোকে বাহবা দেবে । তারপর কাজ ফুরিয়ে গেলে সেটাকে নদীর জলে ফেলে দিবি । যদি তখনও কাজ বাকি থাকে তাহলে সেটা জলে ডুববে না । তখন আবার তুলে এনে তোর কাছে রেখে দিবি ।’

সব শুনেটুনে ভোজরাজকে জিজ্ঞেস করলাম, ‘ওটা জলে ফেলে দেবার সময় কি এখনো আসেনি ?’

ভোজরাজ বললেন, ‘না, আসেনি । একবার মুসির জলে ফেলে দেখেছিলাম, ডোবেনি । এখন বুঝতে পারছি তোমারই অপেক্ষায় ছিলাম । তোমার কর্কট রাশিতে জন্ম ত ?’

‘হ্যাঁ ।’

‘পঞ্চমী তিথি ?’

‘আজ্ঞে হ্যাঁ ।’

‘তবে তুমিই সেই লোক । অবিশ্যি রাশি আর তিথি না মিললেও, তোমাকে দেখেই মনে হয়েছিল তুমি সিধে লোক । বাবার কঙ্কালের হিল্লোটা তোমার হাত দিয়ে হলে ভালোই হবে । আমার বিশ্বাস বাবারও তোমাকে ভালো লাগত । তিনি সাক্ষা লোক পছন্দ করতেন ।’

‘তাহলে এখন কী করতে হবে ?’

‘আগে ওই বাস্কটটা খোলো ।’

ঘরের এক পাশে একটা বড় কাঠের সিন্দুকের দিকে দেখিয়েছেন ভোজরাজ । আমি গিয়ে ডালাটা তুললুম । ভেতরে কিংখাবের কাজ করা একটা গাঢ় লাল মখমলের ওপর হাঁটু ভাঁজ করে কঙ্কালটা শোয়ানো রয়েছে । ভোজরাজ বললেন, ‘ওটাকে তুলে বাইরে আন ।’

দেখলাম মিহি তামার তার দিয়ে সুন্দর করে কঙ্কালের হাড়গুলো পরস্পরের সঙ্গে প্যাঁচানো রয়েছে । পাঁজরাটা দু’হাত দিয়ে জাপটে ধরে কঙ্কালটা বাইরে আনলুম । ভোজরাজ বললেন, ‘ওটাকে দাঁড় করাও ।’

করালুম ।

‘এবার হাত দুটো ছেড়ে দাও ।’

হাত সরিয়ে আনলুম, আর সঙ্গে সঙ্গে আমার চোখ টেরিয়ে গেল ।

কঙ্কাল নিজে থেকেই দাঁড়িয়ে রয়েছে । কোনো সাপোর্ট নেই ।

‘এবারে ওটাকে গড় কর । এই শেষ কাজের জন্য ওটা তোমারই সম্পত্তি ।’

কাজটা যে কী জানি না, তবু রিস্ক না নিয়ে গড় না করে একেবারে সাষ্টাঙ্গ হয়ে

শুয়ে পড়লুম স্কেলিটনের সামনে ।

‘যা করছ তা বিশ্বাস করে করছ ত ?’ জিগ্যোস করলেন ভোজরাজ । বললুম, ‘আমার মনের সব কপাট খোলা, ভোজরাজজী । আমি হাঁচি টিকটিকি ভূত-প্রেত দত্তি-দানা বেদ-বেদান্ত আইনস্টাইন-ফাইনস্টাইন সব মানি ।’

‘ভেরি গুড । এবার তুমি ওটাকে নিয়ে যাবার ব্যবস্থা কর । দেখো যেন গুরুজীর মনোবাঞ্ছা পূর্ণ হয় । কাজ হয়ে গেলে ওটাকে মুসি নদীর জলে ফেলে দিও ।’

কঙ্কাল পেয়ে অত্যন্ত খুশি হয়ে মার্তণ্ড আমাকে দুশোর জায়গায় পাঁচশো টাকা বকশিস দিয়ে ফেললেন । তারপর বললেন, ‘আজ সন্ধ্যায় কী করছ ?’

‘কেন বলুন ত ?’

‘আজ বিক্রমাদিত্যের ছবিটা আঁকা শুরু করব । তুমি এলে ভালো হয় ।’

‘আমি ত জানতুম আপনি সকালে ছাড়া ছবি আঁকেন না ।’

‘এটার জন্য স্পেশাল ব্যবস্থা,’ বললেন মার্তণ্ড । ‘এ ছবির জন্য যে মুডটা চাই সেটা রাত্রেই ভালো আসবে । আর দৃশ্যটার জন্য আমি নিজে প্ল্যান করে একটা লাইটিং-এর ব্যবস্থা করেছি । আমি সেটা তোমাকে দেখাতে চাই ।’

‘কিন্তু মডেল যদি আপত্তি করে ?’

‘তুমি যে ঘরে আছ সেটা সে জানবেই না । তুমি ঠিক সাতটার সময় এসে স্টুডিওর এই কোণটাতে চুপটি করে দাঁড়িয়ে থাকবে । আলোগুলো সব মডেলের উপর ফেলা থাকবে । তার পিছনে কী আছে সেটা সে দেখতেই পাবে না ।’

এককালে অ্যামেচার থিয়েটার করেছি । জানতুম ফুটলাইটের পিছনে দর্শকদের প্রায় দেখাই যায় না । এও সেই ব্যাপার আর কি ।

আমি রাজি হয়ে গেলাম ।

একটা ধুকপুকুনির ভাব নিয়ে সাতটার ঠিক পাঁচ মিনিট আগে হাজির হলুম মার্তণ্ডের বাড়ি । ওঁর মাদ্রাজী চাকর শিবশরণ আমাকে দরজা ফাঁক করে ঢুকিয়ে দিলে স্টুডিওতে ।

মডেলের জায়গা এখনো খালি । তবে লাইটিং হয়ে গেছে এবং সত্যিই তারিফ করার মতো ব্যাপার সেটা । যে স্থানে ভূত পিশাচের নৃত্য হচ্ছে সেখানে এইরকম আলোরই দরকার ।

মার্তণ্ড বসে আছে ক্যানভাসের সামনে, তার পাশে একটা জোরালো ল্যাম্প । সে আমাকে আড়চোখে দেখে একটা বিশেষ দিকে নির্দেশ করল । সেটা হল স্টুডিওর সঙ্গে লাগা একটা ঘরের দরজা । বুঝলাম সে ঘরে মডেল তৈরি হচ্ছেন ।

এবারে আরেকটা জিনিসের দিকে দৃষ্টি গেল । সেটা হল কঙ্কাল । একটা

হ্যাটস্ট্যাণ্ডের ডাঁটি থেকে সেটা ঝুলছে। তার গায়ে ভৌতিক আলো পড়ে সেটা আরো ভৌতিক দেখাচ্ছে। আর তার সঙ্গে ভৌতিক হাসি। তোরা লক্ষ করেছিস কিনা জানি না—বত্রিশ পাটি দাঁত বেরিয়ে থাকে বলে যে-কোনো খুলির দিকে চাইলেই মনে হয় সেটা হাসছে।

একটা খুঁট শব্দ শুনে অন্য ঘরের দরজাটার দিকে চোখ গেল। তলোয়ার হাতে রাজপোশাক পরিহিত বিক্রমাদিত্য বেরিয়ে এলেন দরজা খুলে। পাকানো গোঁফ, গালপাট্টা, লম্বা ঢেউ খেলানো চুল—কোনো ভুল নেই। মনটা ছুঁ ছুঁ করে উঠল, কারণ এই পার্টিটা আমারই পাবার কথা, দৈব দুর্বিপাকে ফস্কে গেল।

রাজা এসে স্টেজে আলো নিয়ে দাঁড়ালেন। মার্তণ্ড উঠে গিয়ে তার পোজ আর পোজিশনটা ঠিক করে দিয়ে চলে গেলেন হ্যাটস্ট্যাণ্ডের দিকে। কঙ্কালটাকে নামিয়ে নিয়ে সেটাকে মডেলের কাঁধে চাপিয়ে দিয়ে বললেন, 'এটার হাত দুটোকে তোমার কাঁধের উপর দিয়ে সামনের দিকে ঝুলিয়ে দাও, আর পা দুটো কোমরের দুপাশ দিয়ে নিয়ে এক করে তোমার বাঁ হাত দিয়ে চেপে থাক।'।

দেখলুম মডেল দিব্যি মার্তণ্ডের ইনস্ট্রাকশন পালন করলে। লোকটার সাহসের প্রশংসা না করে উপায় নেই।

মার্তণ্ড ছবি আঁকা শুরু করে দিলেন। প্রথমে চারকোণ দিয়ে স্কেচটা করে তারপর রং চাপানো হবে। এর আগে তুমিই মডেল হতুম, তাই আঁকাটা কেমন হচ্ছে সেটা দেখার সুযোগ ছিল না। আর দেখতে পেলুম মার্তণ্ডের নিপুণ হাতের কাজ।

মিনিট পাঁচেকও হয় নি, হঠাৎ মনে হল স্টেজের দিক থেকে একটা গোঙানির শব্দ পাচ্ছি। আর্টিস্ট এত মশগুল যে তার কানে শব্দটা যায়নি। সে খালি বললে, 'স্টেডি, স্টেডি,' কারণ রাজা অল্প অল্প হেলতে দুলতে শুরু করেছেন।

আর্টিস্টের আদেশ সত্ত্বেও দেখলাম মডেল স্টেডি থাকতে পারছে না; সে এপাশ ওপাশ করছে। আর তার মুখ দিয়ে যে শব্দটা বেরোচ্ছে সেটাকে গোঙানি ছাড়া আর কিছুই বলা যায় না।

'হোয়াটস্ দ্য ম্যাটার?' বেশ বিরক্তির সঙ্গে প্রশ্ন করলেন মার্তণ্ড।

এদিকে আমি ম্যাটারটা বুঝে ফেলেছি। কারণ চোখের সামনে দেখতে পাচ্ছি কী ঘটছে।

কঙ্কালের হাত দুটো আর ঝোলানো নেই। সেটা ধীরে ধীরে উপরের দিকে উঠে মডেলের খুঁতনির নিচে এসে ক্রমে একটা ভয়ংকর আলিঙ্গনে পরিণত হচ্ছে। সেই সঙ্গে পা দুটোও যেভাবে জড়িয়ে ফেলেছে কোমরটাকে, সেটা আর কোনোদিন খোলা যাবে বলে মনে হয় না।

মডেলের অবস্থা এখন শোচনীয়। তার গোঙানি ক্রমে পরিত্রাহি আর্তনাদে পরিণত হয়েছে, আর সে তলোয়ার মাটিতে ফেলে দিয়ে সমস্ত দেহটাকে ঝাঁকিয়ে



দু'হাতের সমস্ত শক্তি দিয়ে কঙ্কালের হাত দুটোকে আলাগা করার চেষ্টা করছে।

মার্তণ্ড একটা চিৎকার দিয়ে দৌড়ে গেছে মডেলের দিকে, কিন্তু দু'জনের কসাইন্ড চেষ্টা এবং শক্তিপ্রয়োগেও কোনই ফল হল না। মার্তণ্ড হাল ছেড়ে দিয়ে টলতে টলতে পিছিয়ে এসে ইজেলটাকে উল্টে ফেলে দিয়ে আমারই পাশে দেওয়ালের গায়ে এলিয়ে পড়ল।

আমার কিংকর্তব্যবিমূঢ় ভাবটা যদিও বেশিক্ষণ থাকেনি, কিন্তু তার মধ্যেই মডেল কাঁধে কঙ্কাল সমেত মাটিতে গড়িয়ে পড়েছে। এদিকে ঘড়ঘড়ে গলায় মার্তণ্ড বলছে, 'ডু সামথিং !'

আমি এবার এগিয়ে গেলুম মঞ্চের দিকে। আমার কিন্তু ভয় কেটে গেছে এর মধ্যেই, কারণ মন বলছে কঙ্কাল আমার কোনো ক্ষতি করবে না, আমার চেষ্টায় কোনো বাধা দেবে না।

কাছে যেতেই এক অদ্ভুত দৃশ্য দেখে মাথাটা ভোঁ করে উঠল। রাজার চুল গোঁফ গালপাটা পাগড়ি সবই আলাগা হয়ে খসে পড়েছে, আর তার ফলে যে মুখটা বেরিয়ে পড়েছে সেটা আমার চেনা।

ইনি হলেন মার-খাওয়া ফিল্মের হিরো বিশ্বনাথ সোলাঙ্কি।

মুহূর্তের মধ্যে চোখের সামনে থেকে একটা পর্দা সরে গিয়ে জাজ্জল্যমান সত্যিটা বেরিয়ে পড়ল, আর সেই সঙ্গে মাথায় খেলে গেল এক পৈশাচিক বুদ্ধি।

আমি সোলাঙ্কির উপর ঝুঁকে পড়ে বললাম, 'এবার বল ত দেখি, আমার জায়গাটা দখল করার জন্য আমার মাথায় বাড়ি তুমিই মারিয়েছিলে কিনা। না বললে কিন্তু কঙ্কালের হাত থেকে তোমার মুক্তি নেই।'

সোলাঙ্কির চোখ ঠিকরে বেরিয়ে আসছে ; সে সেই অবস্থাতেই দম বেরিয়ে আসা গলায় বলে উঠল, 'ইয়েস ইয়েস ইয়েস—প্লীজ সেভ মি, প্লীজ !'

আমি মার্তণ্ডের দিকে ফিরে বললুম, 'তুমি সাক্ষী। শুনলে ত ?—কারণ ঐকে আমি পুলিশে দেব।'

মার্তণ্ড মাথা নেড়ে হ্যাঁ জানিয়ে দিলেন।

এবার কঙ্কালের কাঁধ ধরে মৃদু টান দিতেই সেটা রাজার কাঁধ ছেড়ে উঠে এল, সঙ্গে সঙ্গে কোমর ছেড়ে পা দুটোও।

এর পরে অবিশ্যি সোলাঙ্কি মশাইয়ের আর মডেল হওয়া হয়নি, কারণ তাঁকে বেশ কিছুদিন পুলিশের জিম্মায় থাকতে হয়েছিল। তার জায়গায় বিক্রমাদিত্য সিরিজের হিরো হলেন তারিণীচরণ বাঁড়ুজ্যো। ঘটনাটা মার্তণ্ডকেও কাবু করে দিয়েছিল ঠিকই, কিন্তু দিন সাতকের মধ্যেই রিকাভার করে তিনি আবার পুরোদমে কাজে লেগে গেলেন।

বেতালের ছবি শেষ হবার পর দিনই মুসি নদীর জলে কঙ্কালটাকে ফেলে দিলাম। চোখের নিম্নেবে সেটা তলিয়ে গেল জলের তলায়।

মহিম সান্যালের ঘটনা

তারিণীখুড়ো তাকিয়াটা বুকের কাছে টেনে নিয়ে বললেন, 'চমকলালের কথা ত তোদের বলেছি, তাই না ?'

'হ্যাঁ হ্যাঁ,' বলল ন্যাপলা। 'সেই ম্যাজিশিয়ান ত ? যার আপনি ম্যানেজার ছিলেন ?'

'হ্যাঁ। কিন্তু আরেকজন জাদুকর আছেন—অবিশ্যি যখনকার কথা বলছি তখন তিনি রিটায়ার করেছেন—যাঁর আমি সেক্রেটারি ছিলাম।'

'রিটায়ার করলে আবার সেক্রেটারির কী দরকার ?' বলল ন্যাপলা।

'তাঁর ক্ষেত্রে দরকার ছিল। সেটা ব্যাপারটা শুনলেই বুঝতে পারবি।'

'তা হলে বলুন সে গল্প।'

'বলছি—আগে এই জানালাটা বন্ধ করে দে ত। বৃষ্টির ছাঁট আসছে।'

আমি উঠে গিয়ে জানালাটা বন্ধ করে দিলাম।

তারিণীখুড়ো দুধ চিনি ছাড়া গরম চায়ে একটা সশব্দ চুমুক দিয়ে তাঁর গল্প আরম্ভ করলেন।

বছর পনেরো আগের ঘটনা। আমি তখন সবে কানপুরে একটা ব্যাক্সের চাকরি ছেড়ে কলকাতায় এসেছি। হাতে কাজ নেই, কিন্তু পকেটে পয়সা জমেছে বেশ কিছু। নতুন কী করা যায় ভাবছি, এমন সময় আমার এক পুরোন আলাপী জগন্নাথ পাকড়াশির সঙ্গে দেখা। সে বলল, 'তোমাকেই খুঁজছিলাম।' আমি বললাম, 'কেন, কী ব্যাপার ?' 'মহিম সান্যালের নাম শুনেছ ?' 'জাদুকর মহিম সান্যাল ?' 'হ্যাঁ হ্যাঁ। তিনি অবিশ্যি এখন রিটায়ার করেছেন, কিন্তু কেন জানি তাঁর একজন সেক্রেটারির দরকার পড়েছে। ইংরিজি আর টাইপিং জানা চাই। আমার তোমার কথা মনে পড়ল।'

আমি বললাম, 'চাকরি একটা হলে মন্দ হত না। কিন্তু এ ভয়লোকের সঙ্গে যোগাযোগ করব কী করে ?'

'মহিম সান্যাল থাকেন পাম এডিনিউতে। দাঁড়াও দেখি, আমার

কাছে হয়ত তাঁর ঠিকানা রয়েছে ।’

পাকড়াশির নোট বুকে মহিম সান্যালের ঠিকানাটা ছিল, সেটা আমার নোট বুকে টুকে নিলাম ।

দুদিন পরে ছিল রোববার । সকালে সোজা চলে গেলুম সান্যাল মশাইয়ের বাড়ি । বেশ গোছালো, ছিমছাম এক তলা বাড়ি, যদিও বেশি বড় না ।

ভদ্রলোককে দেখেই ভালো লেগে গেল । বয়স ষাট-বাষটি, মাথার চুল পাতলা হয়ে এসেছে, চেহারা একটা শান্ত গাভীর, অথচ ঠোঁটের কোণে একটা হাসি লেগে আছে সব সময় ।

আমি নিজের পরিচয় দিলাম । ভদ্রলোক মিনিট পনেরো ধরে আমাকে নানা রকম প্রশ্ন করে একটু বাজিয়ে দেখে নিলেন । বোধহয় ভালোই ইমপ্রেশন দিলাম, কারণ ভদ্রলোক বললেন, ‘তোমাকে দিয়ে আমার কাজ চলবে বলে মনে হচ্ছে ।’

আমি বললাম, ‘কাজটা কী সেটা জানতে পারি কি ?’

‘আমার ম্যাজিক দেখেছ কখনও ?’ ভদ্রলোক জিজ্ঞেস করলেন ।

‘প্রায় কুড়ি বছর আগে’, আমি বললাম । ‘একটা পুজো প্যাণ্ডেলে দেখেছিলাম বলে মনে পড়ছে ।’

‘হ্যাঁ,’ বললেন মহিম সান্যাল । ‘আমি অনেক পুজো প্যাণ্ডেলে ম্যাজিক দেখিয়েছি । শুধু দিশি ম্যাজিক দেখাতুম, তাই আমার বড় স্টেজের দরকার হত না । আমার যখন বছর পঞ্চাশ বয়স তখন থেকে আমি ম্যাজিক দেখানো ছেড়ে দিয়ে ভারতীয় ম্যাজিক সম্বন্ধে চর্চা আরম্ভ করি । তার জন্য আমাকে সারা ভারতবর্ষ ঘুরে বেড়াতে হয়েছে । এমন জায়গা নেই যেখানে আমি যাইনি । এমনিতে আমি হোমিওপ্যাথি করতাম, তাতে রোজগার ছিল ভালো । হাজারের উপর ম্যাজিক সংগ্রহ করেছি । শুধু হাত সাফাই-ই আছে তিনশো ছাপান্ন রকম । আমার গবেষণার ফল হল একটা সাড়ে চারশো পাতার হাতে লেখা ইংরিজি পাণ্ডুলিপি । নাম দিয়েছি ইন্ডিয়ান ম্যাজিক । সেই পাণ্ডুলিপি এখন টাইপ করতে হবে, কারণ বিদেশের একজন নাম করা প্রকাশক আমার পাণ্ডুলিপি ছাপার ইচ্ছা প্রকাশ করেছে । এ কাজ পারবে ত ?’

‘একবার পাণ্ডুলিপিটা দেখতে পারি ?’

ভদ্রলোক তিনটে মোটা ফাইল আমাকে এনে দিলেন । দেখলাম বেশ পরিষ্কার ঝরঝরে লেখা, টাইপ করতে কোনও অসুবিধা হবে না । তখনই সব কথাবার্তা হয়ে গেল । যা মাইনে অফার করলেন ভদ্রলোক, তাতে আমার দিবা চলে যাবে । বুঝলাম ভদ্রলোক ম্যাজিক দেখিয়ে আর ডাক্তারি করে বেশ ভালো পয়সা করেছেন ।

এবার আমি একটা প্রশ্ন না করে পারলাম না ।

‘আপনার বাড়িতে কোনও সাড়া শব্দ পাচ্ছি না—আপনি কি এখানে একা থাকেন ?’

‘হ্যাঁ,’ বললেন ভদ্রলোক । ‘আমার স্ত্রী গত হয়েছেন দশ বছর হল । আমার মেয়ের বিয়ে হয়ে গেছে । সে ব্যাঙ্গালোরে থাকে । আমার ছেলে অনীশ বাইরে চাকরি করে ।’

ভদ্রলোক একটা দীর্ঘ নিশ্বাস ফেললেন । বুঝলাম একাকীত্বটা যে তিনি খুব উপভোগ করেন তা নয় ।

আমি আমার কাজের টাইম জেনে নিলাম । সকাল দশটায় আসতে হবে, দুপুরে সান্যাল মশাইয়ের সঙ্গেই খাওয়া, আর সন্ধ্যা ছ’টা পর্যন্ত কাজ ।

কাজে লেগে পড়লাম । পাণ্ডুলিপিটা যতই পড়ছি ততই অবাক হয়ে যাচ্ছি । আশ্চর্য সংগ্রহ ভদ্রলোকের । ভারতীয় জাদু যত রকম হতে পারে—মাদারি কা খেল, ভোজবাজি, ভেঙ্কি—সব কিছুই আছে । বই হলে একটা অতি মূল্যবান জিনিস হবে সেটাও বুঝতে পারলাম ।

দুপুরে খাবার সময় ভদ্রলোক তাঁর অভিজ্ঞতার কথা বলেন, শুনতে গল্পের মতো লাগে । যখন জাদুকর ছিলেন তখন বেশির ভাগই নেটিভ স্টেটে রাজা রাজাদের ম্যাজিক দেখাতেন । সব খেলাই হত ফরাসের উপর । স্টেজের কোনও বালাই নেই । এমনি ম্যাজিক ছাড়াও ভদ্রলোক যেটা খুব ভালো পারতেন সেটা হল হিপ্নটিজম বা সন্মোহন । বিদেশি ম্যাজিক ভদ্রলোক ভালো চোখে দেখতেন না, কারণ তাতে হাত সাফাই-এর চেয়ে যন্ত্রপাতির ব্যবহারটাই বেশি । সেখানে জাদুকর হচ্ছে একজন শো-ম্যান । ভারতীয় ম্যাজিক বিদেশির চেয়ে অনেক বেশি খাঁটি । সেটা ফুটপাথে বসেও দেখানো যায় । তাতে যন্ত্রপাতির দরকার লাগে না । যেটার প্রয়োজন হয় সেটা হল জাদুকরের দক্ষতা ।

এই সময়—তখন আমার টাইপিং প্রায় অর্ধেক হয়ে গেছে—একটা ব্যাপার হল ।

কলকাতায় এক ম্যাজিশিয়ান এলেন শো দিতে । আসল নাম সূর্যকান্ত লাহিড়ী, কিন্তু তিনি নিজেকে The great Soorya বলে প্রচার করেন । তাঁর পোস্টার বা বিজ্ঞাপনে ওই নামই থাকে । মহিমবাবু কাগজে এই জাদুকরের বিজ্ঞাপন দেখে বললেন, ‘এঁর নাম ত শুনিনি । ইনি নতুন আমদানি বলে মনে হচ্ছে ।’ আমার একটু একটু ইচ্ছে করছিল এই ছোকরার ম্যাজিক দেখতে, কিন্তু সেটা আর সান্যাল মশাইকে বললাম না ।

দুদিন পরে একটা টেলিফোন এল দুপুর বেলা । আমার টেবিলেই

টেলিফোন থাকে, তুলে হালো বলতে উন্টো দিক থেকে কথা এল—‘আমি সূর্যকান্ত লাহিড়ী কথা বলছি ; জাদুকর দ্য গ্রেট সুরিয়া বলে আমি পরিচিত । একবার মহিম সান্যালের সঙ্গে কথা বলতে পারি কি ?’

আমি বললাম, ‘আপনার প্রয়োজনটা কী জানতে পারি ? আমি ওনার সেক্রেটারি কথা বলছি ।’

উত্তর এল—‘আমি ভদ্রলোকের নাম অনেক শুনেছি । তিনি দিশি ম্যাজিক দেখাতেন সেটা আমি জানি । তাঁকে আমার শোয়ে আমন্ত্রণ জানাতে চাই । আমি ব্যক্তিগতভাবে তাঁর সঙ্গে দেখা করে তাঁকে আসতে বলতে চাই ।’

আমি সান্যালমশাইকে জিজ্ঞেস করলাম । তিনি পরদিন সকালে সময় দিলেন । আমি সে কথা সূর্যকান্তকে জানিয়ে দিলাম ।

পরদিন সূর্যকান্ত সকাল সাড়ে দশটার সময় এল । আমি তাকে বৈঠকখানায় বসালাম । বছর পঁয়ত্রিশেক বয়স, ফ্রেঞ্চকাট দাড়ি, বেশ ব্রাইট চেহারা । আর চোখে মুখে কথা বলে । মহিমবাবু আসতেই তাঁকে নমস্কার করে বলল, ‘আমি জানি আপনি বিদেশি জাদু পছন্দ করেন না, কিন্তু আমার একান্ত অনুরোধ যদি একটিবার আমার শো-য়ে আসেন । আমি ছেলেবেলা থেকে আপনার নাম শুনেছি, আপনার খ্যাতির কথা জানি । আমার গুরু সুলতান খাঁ আপনার ম্যাজিক দেখেছিলেন, তিনিও খুব সুখ্যাতি করেছিলেন । আশা করি আপনি আমাকে নিরাশ করবেন না । আপনাদের জন্য দুখানা টিকিট আমি নিয়ে এসেছি—একেবারে সামনের সারির মাঝখানে । আপনারা এলে আমি কৃতার্থ হব । কালই সন্ধ্যায় শো—মাত্র দুঘণ্টা সময় আপনার যাবে ।’

আমি ভেবেছিলাম মহিমবাবু হয়ত আপত্তি করবেন, কিন্তু দেখলাম তিনি রাজি হয়ে গেলেন । সূর্যকান্ত অত্যন্ত খুশি মনে বিদায় নিল ।

পরদিন সন্ধ্যা ছ’টায় মহাজাতি সদনে শো, আমরা ঠিক পাঁচ মিনিট আগে গিয়ে হাজির হলাম । লোক বেশ ভালোই হয়েছে, প্রায় হাউসফুল ।

দ্য গ্রেট সুরিয়া দেখলাম পাঞ্চ্যালিটিতে বিশ্বাস করে, কারণ ঘড়ির কাঁটায় কাঁটায় ছটার সময় পর্দা সরে গেল ।

বিদেশি ম্যাজিক যেমন হয়, তার তুলনায় সূর্যকান্তের শো নেহাৎ নিম্নের নয় । ম্যাজিক ছাড়াও দর্শকের মনোরঞ্জননের জন্য নানারকম বন্দোবস্ত রয়েছে, তার মধ্যে এক হল রংচঙে সেটসেটিং, দুই হল বাজনা, আর তিন হল ছয়জন মেয়ে সহকারী—তারা সকলেই বেশ সুন্দরী ।

সবচেয়ে অবাক লাগল মহিম সান্যালের প্রতিক্রিয়া দেখে । তিনি অত্যন্ত মনোযোগের সঙ্গে শো দেখছিলেন এবং প্রত্যেক আইটেমের পর

হাততালি দিচ্ছিলেন। আমি একবার ফিস্ ফিস্ করে জিজ্ঞেস করলাম, 'আপনার বেশ ভালো লাগছে বলে মনে হচ্ছে?'

ভদ্রলোক বললেন, 'প্রায় পঁয়তাল্লিশ বছর পরে এ জিনিস দেখছি। শেষ দেখেছি চীনে জাদুকর চ্যাং-এর ম্যাজিক। যৌবনের কথা মনে পড়ে যাচ্ছে, মন্দ লাগছে না। তবে সবই যন্ত্রের কারসাজি আর রংতামাসা দিয়ে লোকের মন ভোলানো। আসল ম্যাজিক যাকে বলে সে জিনিস এটা নয়। আর এ দেখছি হিপনটিজম জানে না।'

শেষ আইটেমের আগে সূর্যকান্ত একটা ব্যাপার করল। মঞ্চের সামনের দিকে এগিয়ে এসে দর্শকদের উদ্দেশ্য করে বলল, 'আজ আমাদের বিশেষ সৌভাগ্য যে সামনের সারিতে উপস্থিত রয়েছেন এমন একজন জাদুকর যার নাম আজ থেকে পঁচিশ বছর আগে লোকের মুখে মুখে ফিরত। ইনি ভারতীয় জাদুর জন্য যা করেছেন তার তুলনা হয় না। আমি মহিম সান্যালকে সনির্বন্ধ অনুরোধ করছি উনি মঞ্চে তাঁর অস্তুত একটা জাদু দর্শকদের দেখান। তিনি সরঞ্জাম কিছুই আনেননি। কিন্তু সরঞ্জাম উনি ব্যবহার করতে চাইলে আমি অত্যন্ত গর্ব বোধ করব, এবং তিনি আমার অনুরোধ রক্ষা করলে আমার আনন্দের সীমা ছাড়িয়ে যাবে। মহিমবাবু!'

মহিমবাবু আমার হাতে একটা মৃদু চাপ দিয়ে মঞ্চের দিকে এগিয়ে গেলেন। তারপর পাশের সিঁড়ি দিয়ে উঠে মঞ্চে হাজির হলেন। দর্শকরা সকলে চুপ। কী ঘটতে চলেছে তা কারুরই ধারণা নেই। আমিও চুপ।

মহিমবাবু দর্শকদের দিকে ফিরে বললেন, 'বহুদিন পরে এ জিনিস করছি, কিন্তু ত্রুটি হলে আশা করি আপনারা ক্ষমা করবেন। আমি আপনাদের দুটো খেলা দেখাব। দুটোই দিশি। তার প্রথমটা হল হাত সাফাই। সূর্যকান্ত, তোমার তিনটি বল যদি আমাকে দাও।'

সূর্যকান্তর এক সহকারী তৎক্ষণাৎ দুটো লাল এবং সাদা বল মহিমবাবুকে এনে দিল।

সেই বল নিয়ে মহিমবাবু যা করলেন তার চমৎকারিত্ব বর্ণনা দেবার ভাষা আমার নেই। হাত সাফাই যে এমন হতে পারে তা আমার ধারণা ছিল না।

এখন হলে হাততালির চোটে কান পাতা দায়, এবং সে হাততালিতে সূর্যকান্তও যোগ দিল।

হাত সাফাই দেখিয়ে মহিমবাবু বলগুলো সূর্যকান্তকে ফেরত দিয়ে বললেন, 'এবার আমি আমার দ্বিতীয় জাদু দেখাতে চাই। আমি সম্মোহন বা হিপনটিজম শিখেছিলাম অমৃতসরে এক ফুটপাথের জাদুকরের কাছ



থেকে । তারই সামান্য নিদর্শন আমি আপনাদের দেখাচ্ছি । আমি সূর্যকান্তবাবুর অনুরোধ রক্ষা করেছি । আশা করি তার প্রতিদানে তিনিও আমার একটি সামান্য অনুরোধ রক্ষা করবেন । আমি তাঁকেই সম্মোহিত করতে চাই ।’

সূর্যকান্ত দেখলাম বেশ স্পোর্টিং ; সে রাজি হয়ে গেল ।

মহিমবাবু সূর্যকান্তকে একটা চেয়ারে বসিয়ে তার সামনে নিজেও একটা চেয়ারে বসলেন । তারপর বললেন, ‘আপনি আমার চোখের দিকে এক দৃষ্টে তাকিয়ে থাকুন ।’

সূর্যকান্ত আদেশ পালন করল । তিন মিনিটের মধ্যে লক্ষ করলাম সূর্যকান্তর চোখের চাউনি বদলে গেছে । তার চোখ দুটো যেন পাথরের চোখ । সে যেন সামনের জিনিস দেখেও দেখতে পারছে না ।

মহিম সান্যাল এবার ধীরে ধীরে উঠে দাঁড়ালেন । সূর্যকান্তর দিক থেকে দৃষ্টি না সরিয়ে তিনি বললেন, ‘আপনাকে আমি কয়েকটা প্রশ্ন করতে চাই ।’

‘করুন,’ ভাবলেশহীন কণ্ঠে উত্তর দিল সূর্যকান্ত ।

‘আপনি কতদিন হল ম্যাজিক দেখাচ্ছেন ?’

‘পাঁচ বছর ।’

‘কর কাকে আপনি ম্যাজিক শিখেছেন ?’

‘সুলতান খা ।’

‘কবে থেকে শিখতে আরম্ভ করেছেন ?’

‘আমার যখন পঁচিশ বছর বয়স !’

‘আপনার এখন বয়স কত ?’

‘পঁয়ত্রিশ ।’

‘ম্যাজিক দেখানর আগে আপনি কী করতেন ?’

‘দিল্লিতে চাকরি করতাম ।’

‘কী চাকরি ?’

‘খবরের কাগজের রিপোর্টার ।’

‘তার আগে ?’

‘আমি কলকাতায় থাকতাম ।’

‘কোথায় ?’

‘চব্বিশ নম্বর ল্যান্সডাউন রোড ।’

‘কার সঙ্গে থাকতেন আপনি ?’

‘আমার বাবা ।’

‘আপনার বাবার নাম কী ?’

‘মহিম সান্যাল ।’

আমি স্তম্ভিত । হলে পিন পড়লে তার আওয়াজ পাওয়া যেত ।

‘আপনার আসল নাম কী ?’ প্রশ্ন করলেন মহিমবাবু ।

‘অনীশ সান্যাল ।’

‘আপনি আপনার বাবার সঙ্গে ঝগড়া করে বাড়ি থেকে বেরিয়ে যান ?’

‘হ্যাঁ ।’

‘এখনো বাবার উপর রাগ আছে ?’

‘না, আর নেই । আমি ভুল করেছিলাম, অন্যায় করেছিলাম ।’

এর পরে সূর্যকান্ত ওরফে অনীশের চোখের সামনে হাত নেড়ে তাকে হিপনোটাইজড অবস্থা থেকে স্বাভাবিক অবস্থায় ফিরিয়ে আনলেন মহিম সান্যাল ।

দর্শক কিছুক্ষণ হতভম্ব থেকে হঠাৎ তুমুল হাততালিতে ফেটে পড়ল । এদিকে অনীশও হতভম্ব । সে ত কিছুই জানে না এতক্ষণ কী হয়েছে । এবার মহিমবাবু তার কাঁধে হাত রেখে বললেন, ‘কেমন বোধ করছ, অনীশ—কোনও কষ্ট হয়নি ত ?’

এতক্ষণে অনীশ বুঝতে পারল । সে তার বাবাকে প্রণাম করে তাঁকে জড়িয়ে ধরল ।

পরে মহিমবাবু আমাকে বলেছিলেন যে সূর্যকান্তের গলার আওয়াজ

আমি কখনও নীচ থেকেই হেলোকে চিনতে পারিনি। পছন্দ
সকালে অসুস্থ আলাম এসেছিল। কখন এম পথে ওম উত্তমভাবে
আছে। তখনই পছন্দে মিন আলাম। সেই সময়ই সে পায়
একটিমুঠে কখন কখন এসেই থাকবে।